



B.N.C.F.

MAGL..5.6.199.




CF005270013

~~5.6.199~~

Biogr. fen. 202


5 L. 6







• • • • •



VITAE ITALORUM

DOCTRINA EXCELLENTIUM

QUI SAECULIS XVII. ET XVIII. FLORUERUNT :

VOLUMEN XIII.

AUCTORE

ANGELO FABRONIO

ACADEMIAE PISANAE CURATORE.



PISIS MDCCLXXXVII.

* ــ *

EXCUDERAT ALOYSIUS RAPHAELLIUS.

• SUPERIORIBUS ANNUENTIBUS.





LEOPOLDO ARCHIDUCI
AUSTRIAE
PETRI LEOPOLDI M. E. D.
FILIO,

ANGELUS FABRONIUS

SI quando Etruria liberalibus studiis floruit, nunc maxime floret. Multa claraque exempla sunt in domo ipsa et familia Principis, et quae in Te eminent atque elucent ingenii magnitudo, ardor mentis

ad gloriam, et in omnes praeclaras disciplinas ac praesertim mathematicas singularis amor, vel ignavissimos excitare ad laborem & laudem possunt. Ea propter litteris consulendum a nobis quoque pro viribus esse putavimus, & dum adlaboramus, ut nota sit vita illorum, qui in iis excolendis utilem operam posuerunt, vota Deo immortali facimus, ut Te Fratresque Tuos Juventutis Principes diu incolumes servet, quorum studiis, exemplis et providentia fiet, ne nostra haec praeteritae unquam invideat aetati.

VITAE ITALORUM

DOCTRINA EXCELLENTIUM

QUI SAECULIS XVII. ET XVIII. FLORUERUNT

ANGELUS FABRONIUS

JOSEPHO AZZONIO AUGUSTINIANO
HOMINI SUMMOQUE AUGUSTINIANAE
DISCIPLINAE DOCTORI.

S. P. D.

Multae sunt quidem artes praeclarae, in quibus excolendis hominum ingenia exerceri solent, et licet difficile sit probatu, quae ceteris praescrenda sit, ea tamen est dignitas et utilitas theologiae, ut summis laudibus effrendos illos esse putemus, qui totos se in exquirendis rerum divinarum causis atque natura collocarunt. Habet et suas partes nobilissima disciplina, in quas, veluti totidem in membra, divi-

Tom. XLII.

A

diur, et qui, ceteris posithabitis, eam exornandam susceperunt, quae ad saecrorum ritus et liturgiam spectat, praedare et ab iis positam fuisse operam arbitrabimur. Sed hic error, et haec indoctorum quorundam animis offusa caligo est, pervulgata haec esse, et tanquam levia quaedam vina nihil valent in aqua, sic liturgicorum ista magis gustata, quam potata delectare, nec multis literis egere eum, qui eadem tractat. Ego quidem sic contendo frustra in ipsis explicandis laborare illum, qui omnem antiquitatem non noverit, qui Graecam et Orientales linguas non didicerit, qui non artem teneat, in qua inest omnis cum subtilitas disserendi, tum veritas judicandi, et qui diu multumque in SS. Patrum et Ecclesiae monumentorum lectione, hoc est in media theologia, non sit versatus, ex quo, quasi quodam sancto augustinusque fonte, omnis manare debet oratio. Profecto nisi haec scientia interioribus quibusdam literis contineretur, non diu magna rerum liturgicarum obscuritas et ignorantia fuisset; cui assignari debent multae disputationes, quae Catholicam Ecclesiam vehementissime et infelicissime turbant. Experti lid sunt Patres Concilii Florentini, et cum de hujusmo-

di rebus inter se controversarentur, non modo per eos lux nulla Graecis ritibus allata est, sed majores obductae fuisse tenebrae videntur: nam quod ad orthodoxum de Eucharistia dogma confirmandum erat opportunissimum, non inutile modo, sed perniciosum judicatum est. Una est Orientalis Ecclesia, una est Occidentalis, unum Deum auctorem omnium suspicit ac veneratur, quamvis suos quaelibet ritus habeat; sed cum hi nihil alicujus momenti contineant, quod antiquitus in sacris faciendis observatum non fuerit, magnum inde colligitur argumentum ab uno fonte, Apostolorum scilicet exemplo et praeceptis, ad omnes Ecclesias illud manasse, rationem et doctrinam fuisse et esse communem, sic ut Ecclesiae, quae precibus quibusdam et ceremoniis differre videntur, re tamen et voluntate mirum in modum consentiant. Quanquam Ecclesia Romana reliquarum prima, ab Apostolorum Principe fundata, summam habeat auctoritatem et dignitatem, et ei singulari quodam jure subjectae maxime fuerint Occidentis Ecclesiae, nunquam tamen primis saeculis ab iis exegit, ut in sacro faciendo eosdem omnino ritus servarent. Itaque, ut a viro summo Joanne Mabillonio observatum, et va-

riis inter se ritualibus libris collatis demonstratum etiam fuit, viguit ritus Ambrosianus in Ecclesia Mediolanensi, Gallicanus in Gallia, Gothicus in Hispania et Gallia Narbonensi, qui precationibus quibusdam inter se differebant. Addi quidem poterunt multa eo praesertim tempore, quo Ecclesia pace fruebatur, et addita fuisse non negamus ad decorem Domus Dei augendum, sed id superstitiose factum fuisse, nemo nisi per summam temeritatem atque impudentiam calumniabitur. Nihil sane jucundius, ut ex meo sensu iudico, nihil utilius harum rerum inquisitione, et comparatione multorum rituum inter se; nulloque non praetconio celebrandum Jo. Bonam Cardinalem putamus, qui edidit duos rerum liturgicarum libros eruditos et laboriosos, in quibus omnia prope, quae in hoc genere optima sunt, accurate collegit, adeo ut illius diligentiam vix quidquam effugerit. Qui antea, ut Iosephus Pamelius, idem argumentum tractarunt, etsi multa collegere, quae non mediocri antiquitatibus liturgicis lumen afferunt, longe tamen absuerunt ab illarum rerum cognitione, in quibus scientia huiusmodi contineri videtur, maxime quia plerique Graecae Ecclesiae disciplinam pro cognita habue-

runt, cum ipsis incognita plane esset, non secus ac Syrorum, Aegyptiorum, aliorumque Orientalium populorum. Nam Pamelius parum Graecam linguam noverat: Genebrardus, etsi linguis Orientalibus et Hebraica in primis doctus esset, officia sacra Orientalium nulla viderat; ceteri, qui ante illos fuerunt, ineruditi et creduli scriptores, ne nominari quidem merentur. In eo etiam peccarunt, a quo vitio ne absuit quidem vir summus Jacobus Goarius e Dominicana familia, qui primus in Graecis ritibus explicandis utilem operam impendit, ut dum liturgiam Apostolicam exponere adlaborarunt, falsis veterum Pontificiarum epistolarum Dionysii, Clementis aliorumque hujusmodi scriptorum testimoniis uterentur, unde multa ad illos reprehendendos atque irridendos arripuerunt Haeretici. Haec omnia artem, doctrinam, ingenium et judicium summum requirunt, et quod his facultatibus abundaverit Bonæ, et quod instrumenta, quae habuit ad obtinendam adipiscendamque sapientiam, ad hominum utilitatem contulerit, et quod in eo quasi lumen aliquod virtutis veterisque sanctitatis perspicere videmur, ejus vitam historiae monumentis mandare decrevimus, quam tibi nuncupamus uti veteri

6
amico, et optimarum artium studiis, et praesertim theologica doctrina erudiissimo. Non minus vero tibi hoc munusculum, vir doctissime, gratum fore confido, quod multi hac ipsa in re laboraverint: quippe cum veterem tum vulgatam esse rem videam, dum novi semper scriptores aut in rebus certius aliquid allaturos se, aut scribendi arte ceteros superaturos credant. Vale, et parce jam laboribus, quos in gravissima studia impendere soles, cum satis gloriae vixeris, neque tibi integerrima mente sit verendum, ne, nisi tanquam lumini oleum instilles, praedara tua sapientia senectute exstinguatur. Huic subvenire debemus; quaerit enim auxilium et requiem, eaque propter Ennius equi fortis et victoris senectui comparabat suam:

Sicut fortis equus spatio, qui saepe supremo
Vicit Olympia, nunc senio confectus quiescit.

Pisis Idib. April. MDCCLXXXVI.

JOANNES BONA CARD.

Sunt qui magnos homines virtute, sunt qui doctrina metiuntur; utrosque summas laudes tribuere oportebit Jo. Bonae, cum facile dijudicari non possit utrum ille doctior an sanctior fuerit. Qui ex nostra mollitie, non ex ipsa virtute de virtutis praestantia et robore judicant, et alienos mores ad suos referunt, leviora fortasse putabunt, quae nos de corporis afflictationibus, de honorum contemptu, de amore solitudinis afferemus. Cum autem exprimere imaginem consuetudinis atque vitae velimus Bonae, nihil videmur debere praetermittere quod pertineat ad eam declarandam; quare dicemus primo de ejus vita privata, deinceps de ea, quam in nobilissimo orbis terrarum theatro, amplissimo decoratus honore degit, postremo de ejus studiis atque editis operibus, quae ad immortalitatem nominis assequendam maxime conducere videntur. Natus is est IV. Id. Octobris an. MDCIX. Montē Regali, urbe subalpinarum nobilissima, patre Jo. Baptista Bo-

na, matre Maria Zugania, quorum ille vinculis propinquitatis conjunctus erat cum Francisco Bona Lesdiguerio Comite Stabuli, ut appellant, Galliae, haec si non nobilitate, forma quidem, prudentia, diligentia atque castimonia commendabatur. Quod rei militaris virtutem pater, merens ipse stipendia, praestare ceteris omnibus putabat, unicum masculini sexus filium militiae destinaverat, quare genus educationis erat ejusmodi, ut ille erudiretur maxime laboribus, currendo, esuriendo, sitiendo, algendo, aestuando, iisque artibus, quae decent bonos et fortes duces. Sed quae ambitiosus homo inierat consilia, fregit pueri constantia, qui nec precibus, nec minis a proposito deduci potuit nomen dandi Cistercensium Monachorum, quae S. Bernardi dicitur, familiae. Contigit id XIV. Kal. Sextiles an. MDCXXV. et maturandae rei occasionem illi dedit impudentissima femina, quae ejus castimoniae (forma enim erat in adolescentulo et species liberalis) periculum molita fuerat. Tum porro sedulo reputare animo coepit, quae essent susceptae a se vitae rationes atque officia, eaque sic

exequabatur, ut tyro esset veteranis ipsis exemplo et admirationi. Studiorum caussa Romam venit, et cum talis evasisset, qui superiorum et doctiorum laudibus responderet, munus ei demandatum est sacras litteras interpretandi. Sed non linguae solum, verum etiam animi et virtutum excellens magister habebatur, et erat. Moribus enim castissimis atque innocentissimis formam veteris sanctitatis expresserat. Ad suos redire jussus, Praeses renuntiatur patrii coenobii: sed ipse sua studia et otium et requiem antetulit dignitati, eaque propter Augustae Taurinorum quinquennium fuit. Non est credibile quantis hic laboribus se exercuerit, qua de causa periculosum in morbum incidit, ex quo aegre, cum intermitteret nunquam studia doctrinae, convaluit. Post id praeficitur Astensis coenobio; nec nisi injecto peccati metu, ni paruisset, ut praefecturam hanc acciperet, adduci potuit. Hic ita vixit, ut universis Astensibus merito esset carissimus. Quo factum est, ut cum principes quaedam familiariae inter se dissiderent, Bonae consiliis et opera ad pristinam concordiam redierint, et

cum dissolute et turpiter nonnulli viverent ; revocare se ad industriam et virtutem coeperint . Paucos post annos remigrare coactus Montem Regalem , quo nobilius coenonium regeret , hunc diem sic universa civitas Astensium prosecuta est , ut lacrimis desiderii futuri dolorem indicaret . Biennium tantummodo fuit in patria . Nam an. MDCLL cum ad comitia , quae Romae haberi solebant , venisset , summa omnium collegarum voluntate et congratulatione universae familiae praefectus est . Id quidem gravissime tulit . Nam cum esset singulari modestia , obscurari atque pene obrui maluisset ; et is nimium inquirens in se , atque ipse se se observans , metuensque ne aliqua in re peccaret , qui ceteris dignitate praestabat , ad inferiores accedere videbatur . Raro pedem domo efferebat , et cum fores cubiculi claudebat , cruciabat se iis afflictationibus , quae Christi sectatoribus esse solent in deliciis , et quas homines voluptatibus dediti nomine calumniantur criminoso . Unus annus additus labori suo calamitas ei videbatur , quapropter effecit , ut omnia removerentur , quae obstare et impedire pote-

rant, quominus ille defunctus jam triennali munere, liber ad suos rediret. Retinere praesertim illum Romae studuit Fabius Chisius Cardinalis, cujus summa erat auctoritas, quique, licet verae amicitiae difficillime repellantur in iis, qui in honoribus et in republica versantur, adeo diligebat Bonam, ut eum esse diceret, quo careret aegrius. Omni igitur cura vacuus Bona totum se ad rerum divinarum contemplationem contulit, degens in Monasterio Beatae Virginis de Vico. Sed quem locum quietis et tranquillitatis plenissimum fore speraverat, in eo maximas molestias invenit. Subagrestes enim homines, incultoque ingenio, nulla dignitatis, nulla doctrinae habita ratione, eum dure et aspere exceperunt, contemnere, despicere, infra se ducere, pro nihilo putare, et nihil non abjectum atque humile ab eodem exigere. Habuit sane Bona ubi ostentaret praeclaram illam suam patientiam omnemque christianam virtutem. Nemo enim illum tantam insolentiam indignitatemque querentem audivit, et quos neque patientia, neque obsequio, neque moribus humanissimis lenire potuit, facile,

memoria illustria Christi et Sanctorum exempla repetens, pertulit ac passus est. Sed instabat tempus ad comitia habenda. Ne Romam de more convenirent Patres, obstabat pesilentia. Itaque plerisque placuit rogare Pontificem, ut ei, cui vellent, summam potestatem deferret, additis postulationi nominibus eorum, quos tanto honore dignos arbitrabantur. Sequebatur tum ad Catholicæ Ecclesiæ gubernacula Alexandri VII. nomine ille idem Chisius, qui tot amoris signa Bonæ dederat, quique, cum eam voluntatem, quam semper habuit erga eum, retinere, intelligeretque quam ejus industria Romæ posset, esse illustris, non haesitans respondit, se ex omnibus Bonam eligere, atque imperare ei, ut sine mora ad munus gerendum se conferret. Qui paullo ante Pontifici ipsi negaverat se ab otio et solitudine discessurum, ne munus a Deo assignatum defugisse culperetur, paruit Pontificis voluntati; neque minus ne obstinata recusatio, laboris declinatio videretur, cessit ejusdem auctoritati, qui eum esse voluit a consiliis Urbanarum Decuriarum, quæ *Indiis*, *Rituum*, *Propagandas Fidei*, et *S. Officii* appellantur.

Magna erat hominum opinio de illo, magna commendatio doctrinae, et cum valeret etiam eloquentia, et facillime optimeque perspiceret, quid res, quid tempora ferrent, eas dicebat sententias, quibus saepissime assentiebantur reliqui ad unum omnes. Haec expressiora et illustriora erant praekonius ipsius Pontificis, sic ut omnes intelligerent facillime Bonam amplissimos honores posse obtinere. Sed vir modestia summa solitus despicere ac pro nihilo putare ea, quae vulgo ducuntur amplissima, aucupabatur tempus redeundi ad suos; et postquam triennium praefuit familiae, et Episcopatum Astensem, quem ei Emanuel II. Sabaudiae Dux detulerat, recusavit, abeundi veniam a Pontifice postulavit. Praeterea id ei negavit Alexander, qui saepe ipsi gravissima mandata dabat, eo studiosius congressus illius doctissimosque sermones requirens, quo magis ille aulae et manium rumorum inimicus coenobii sui latebris se se occultabat. Hic tamen non effugit quorundam invidiam atque calumnias, quas ita tulit, ut nec sibi cavendum, nec quemquam coarguendum putave-

rit. Candide et simpliciter agebat, et in suscepta vitae ratione constanter adeo perseveravit, ut neque fortunae varietas, neque inimicorum injuria potuerit eum unquam de suo statu dimovere. Quae quidem maxime valebant ad conciliandam ei magis magisque Pontificis benevolentiam, qui sive in Urbe esset, sive in Gandulphiano rusticaretur, in sermone et suavitate Bonae omnes curas deponere, et omnino conquiescere videbatur. Accidit eo tempore, ut ad placandum iratum in se Ludovici XIV. Galliarum Regis animum Lutetiae Parisiorum fratris filium legare deliberraverit. Qui quidem cum intelligeret quantum ex Bonae consiliis et opera capere ille posset utilitatis, hunc eidem comitem dare decrevit. Hac re Bona audita, aetatem, incommodam valetudinem, ignorantiam rerum politicarum, aliaque hujusmodi multa excusare, atque demum adjurare id se nisi per vim esse facturum. Se exorari sivit Pontifex, et vocem illam edidit; *se neminem navisse, qui magis, quam Bona, ab honoribus et gloria esset alienus.* Nihilominus de illo in Cardinalium collegium cooptando cogitabat, quod etsi mor-

te impeditus non perfecit, apud omnium tamen animos testatum reliquit, quid de illo sentiret. Ut se periculose aegrotare intellexit, statim Bonam accersiri jussit; ut in eo discrimine praesentem adiutorem haberet. Persolvit Bona carissimo Pontifici omnia pietatis officia, et hac re una solatus est dolorem suum, quem ex illius interitu cepit, quod sperabat fore, ut omni cura laxatus vitam suam solitudini mandare, suisque studiis tranquille vacare posset. Sed Clemens IX., qui in illius locum successit, quique optime noverat, ut erat ingeniorum aestimator acerrimus, Bonae praestantem doctrinam, fueratque et suavis amicus et praeco studiorum illius, nova illi mandata dedit, novoque munere *Consultoris Congregationis Indulgentiarum et Reliquiarum* a se tum primum institutae eundem auxit. Cum bonitatem et beneficentiam tanti Pontificis laudabat, suam vicem dolebat; ac magis magisque doluit, cum ab eo ann. MDCLXIX. III. Kal. Decembres creatus Cardinalis fuisset. „ Beatissimus Pontifex (inquit ipse in sua ad Liturgicos libros Praefatione) me nihil tale aut me-

" rentem aut cogitantem , a tranquillitate et
" pace , quibus in Monasterio perfruebar , re-
" pente abstractum et avulsum ad fastigium
" evexit maximae in Ecclesia dignitatis , cui
" cum impar omnino sim , veror ne vox illa
" Prophetæ ad me pertineat , *elevans allisisti*
" *me* . Vixeram in Religione ab anno xv.
" ætatis meae usque ad LX. et agnoscens
" aliquod signum divinae misericordiae opta-
" bam mori in nidulo meo , *nec diem hominis*
" *desideravi* . Deus scit : nunc autem expul-
" sus a jucunditate monasticae vitae , rerum
" exteriorum tumultus patior , quibus as-
" suetus non eram , et omissis genialibus
" studiis , ad curas sæculi ejectus sum , a qui-
" bus maxime abhorrebam . Invidiosa illa
" tantoque opere a multis expetita purpura ,
" quam comitari solet regalis luxus , magnus
" equorum numerus , copiosa familia , lauta ,
" splendida , sumptuosa supellex , sic ut qui ea
" ornantur , operam dare videntur , non modo
" re magni ut sint atque clari , sed etiam spe-
" cie atque pompa , neque ingenium , neque
" vitae consuetudinem in Bona immutavit . Pro-
" bitas , affabilitas , et eadem , quae in privato
" fuerat

fuerat facilitas atque humanitas elucebat, atque laudabatur ab omnibus, idem cultus, idem victus, eadem instituta ab ipso domi servabantur; et ea, quae pertinebant ad dignitatem, ita moderata erant, ut dijudicari facile posset tribui ista necessitati, et ex hac ipsa non mediocrem molestiam trahere modestissimum hominem. Quantaecumque accessiones factae fuerint Bonae et fortunae et dignitatis, eas sibi vindicasse dixisses pauperes et bonos omnes, quorum utilitati commodisque ita serviebat, ut non alienam, sed suam rem videretur agere. Quod nihil ab eo aberat longius cupiditate divitiarum, et parvo contentus erat, delata plura sacerdotia, atque in his Episcopatum Assisii recusavit, et munera etiam magnae pecuniae repudiavit. Cum aliquando hac de causa homo legatus a Cardinali Barberinio eum hortaretur accipere, simulque admoneret, si his ipse facile careret, suis tamen prospiceret, huic ille: *nolo meis impensis illorum augeri luxuriam*. Haec etiam praeclara vox illius commemoratur: *Ecclesiae bona non sunt diuendis augendisque affinis, sed alendis pauper-*

ribus destinata. Vir tantarum virtutum comitatu septus oculis et verbis omnium designabatur ad Pontificatum Maximum. Nam non multo post quam ille Cardinalis creatus est, mortem Clemens obivit. Bona sane erat in desiderio civitatis, et multis solebat esse in ore epigramma illud, quod Daugieresius Jesuita composuerat.

Grammaticae leges plerumque Ecclesia spernit,

Forte erit ut liceat dicere Papa Bona.

Vana soloecismi ne te conturbet imago,

Esset Papa bonus, si Bona Papa foret.

Sed cum illae comitiorum undae sic interdum quodam quasi aestu effervescent, ut ad alios accedant, ab aliis recedant, nec semper in optimo consistant, omnes quidem summa dignitate Bonam dignum judicarunt, verum hanc alteri detulerunt, quem praesentibus Christianae reipublicae temporibus, difficillimis et turbulentis illis quidem, magis convenire sunt arbitrati. Ex iis, quae de singulari ejus modestia commemoravimus, facile erit conjicere, quam sincere Bona remoratus sit studia multorum in se, eaque ad aliorum ho-

norem traduxerit. Narratur etiam cum satis non fuisset consilio pugnare, artificia ab eo excogitata fuisse, quo Collegarum voluntates a se abalienaret. Tum respirare sibi a metu visus est, cum Pontifex Maximus creatus fuit Clemens hujus nominis X. qui mirifice Bonam diligebat cum propter summum ejus ingenium, summamque doctrinam, tum propter singularem modestiam. Quod eminebat ejus in dando consilio prudentia, fides atque religio, multis gravissimisque in rebus a Pontifice ipso adhibitus est, et magna constantia restitit iis, quibus in administranda Christiana republica periculosa et callida consilia quietis et cogitatis et splendidiora et majora videbantur. Idem motus quosdam temerarios Gallorum theologorum (et in Gallia praesertim erant turbulentissimae tempestates, quas odia, dissidia, contentionesque Jansenistarum et Molinistarum excitaverant) prohibuit, multisque auctor fuit, ut praeclaris operibus, non concertationum plenae disputationibus gloriam quaerent. Nihilo tamen minus suspecta erant Jesuitis ejus consilia; neque dubitabo non modo temeritatis, sed et

iam impudentiae condemnare Decoloniam, qui virum sanctissimum religiosissimumque in Jansenistarum numerum retulit. Verum hoc ei commune fuit cum aliis spectatissimis viris, qui exacuerunt ingenii aciem ad illustranda tuendaque puriora et sanctiora theologiae dogmata. Tanquam id habuerit operis ac muneris Bona, ut praecepta salutis hominibus daret, eosque meliores efficeret, vel a prima adolescentia sedulam operam navavit legendis sacris libris, SS. Patrum operibus, et omni Ecclesiae historiae noscendae, quae adeo sua effecit, ut nil nisi sapientissima oracula fundere videretur. Oderat theologicas disputationes, et pacis semper laudator, semper auctor imposuit sibi istam vim, ut omnino ne liceret cum quoquam dimicare. Quod nihil sanctius, nihil augustius reliquit nobis Christus Missae sacrificio, multa collegit Bona ex SS. Patrum aliorumque scriptis, quae ad illud sancte et pure faciendum pertinebant. Post id scripsit opus *de Divina Psalmodia*, ejusque caussis, mysteriis, disciplina, deque variis Ecclesiarum ritibus; et opus non solum copia eruditionis, sed etiam versibus, imitatus

Boetium, ornavit, idque Romae, Parisiis atque alibi impressum jampridem manibus teritur omnium. Homo, qui SS. Patrum et vetera philosophorum ita percepta habebat praecepta, ut iis ad vitam agendam, non ad ostentationem uteretur, quo ceteros deduceres ad mores praeclaros et disciplinam, quam a majoribus accepimus, tres edidit libros, quorum alteri titulum fecit: *Manuductio ad caelum medullam continens SS. Patrum et veterum Philosophorum*, alteri *Via compendii ad Deum*, tertio demum *Principia et documenta vitae Christianae*. Qui blanditiis voluptatum deliniti atque corrupti non vident in quo vera virtus et felicitas consistit, si se doceri et manu duci sinent a Bona, praeclaram bene beateque vivendi, et apertam, et simplicem, et directam invenient viam. Quoniam vero multum prodest provisio animi et praeparatio ad minuendum mortis terrorem, opusculum quoque condidit, quod inscripsit: *Praeparatio ad mortem*, ex quo uno intelligi potest quam ipse abundaret praeceptis institutisque Christianae philosophiae, et quam ejus mens aleretur vitae consequentis contemplatione, sic ut quo pro-

pius ad mortem accederet, quasi terram videretur videre, in quam tanquam in portum ex periculosa navigatione esset venturus. Sunt etiam alii libri, ut vocari solent, *Ascetici*, quos dum Monachus erat, officio suos instruendi tribuit. Sed cum ille exemplum esset innocentiae, et omnis officii diligentissimus, non minus factis, quam dictis aut dormientes excitabat, aut currentes incitabat ad vitam sanctissime degendam. Moris majorum summus imitator, antiquitatisque amator eximius vel ab adolescentia exquirere et colligere ea coepit, quae ad ritus in sacro faciendo pertinebant; sed opus magnum et arduum, quod de rebus liturgicis edidit, Romae dum esset, urgente maxime Cardinale Sfortia Pallavicinio, instituit atque perfecit. Septem et amplius annos in illo consumpsit, judicatumque est omnes scriptores, nisi qui forte nondum ediderunt, de quibus existimari non poterat, facile illum superasse. Multos doctissimos viros non Italos modo, sed et Gallos commemorare possemus, qui hanc laudem tribuerunt Bonae, explicasse illum accurate et eruditissime omnia, quae propria erant Catholicis Ecclesiis

maximeque Latinis , et ex multorum rituum compositione comparationeque effecisse , ut intelligeretur quae omnibus communis fuerit de Eucharistia doctrina ac fides , quod sane ad tollenda callida et malitiosa Haereticorum sophismata plurimum intererat . Egit itaque primo de Eucharistiae institutione , apparatu , variis missarum generibus , templis , aedibus , locis , altaribus , vasis , luminibus , instrumentis , diversis ministrorum ordinibus , multiplici indumentorum forma , figura et colore , ceterisque hujusmodi rebus , quae sacrificium ipsum antecedunt . Quibus copiosissime expositis , explicat quae sint partes Missae , quae sint caussae et rationes omnium rerum et verborum , quae fiunt , adhibenturque ; quid faciendum fugiendumque sit , quid constantissime servatum , quid additum , quidque immutatum fuerit , et haec omnia sumi debuere ab innumeris ritualibus libris , ceterisque monumentis antiquitatis , quam totam Bonam habuisse cognitam , et in hoc opere exposuisse facile existimabis . Quod qui legat discet quas attulerint quaestiones non Haeretici modo , sed et Catholici ad Eucharisti-

stiam, omnemque fere rem liturgicam pertinentes, quidque de iis judicandum statuendumque sit. Ineptus sane essem si vel summatim praecipua persequi vellem, quae in hoc thesauro sacrae eruditionis continentur, qui ut in manus hominum pervenit, non jucunda solum, sed etiam admirabilis visa est sapientia Bonae. Nescio an ille se laudari laetatus sit a laudatissimis vñtis. Nam non levitas illi, sed certa ratio, non gloriae desiderium, sed hominum utilitas caussam scribendi dedit. Ea propter ut audivit Joannem Mabillonium minus probare ea, quae attulerat in cap. XXIII. lib. I. de azymo et fermentato pane, inclinans ad Jacobi Sirmundi sententiam, docensque ad saeculum usque X. Latinos tum fermentatum, tum azymum adhibuisse, deinceps vero obtinuisse ritum azymi, cum Graeci retinuerint semper ritum fermentati, rogavit ipsum, ut accurate hac de re tota scriberet. Sciebat enim quantum credendum esset doctrinae illius. Paruit ejus voluntati Mabillonius, et quae exaravit virum moderatum, ingenuum et veritatis diligentissimum ostendunt. Librum, quem anno

MDCLXXIV. edidit in vulgus, ipsi Bonae nuncupavit. Eodem tempore exitit Franciscus Macedo Franciscanus homo, qui cum in Bonam male esset animatus, quod nullam sui, ut aliorum multorum, honorificam mentionem suis in operibus fecisset, haud dimittendam occasionem putavit dolorem ulciscendi suum. Declaravit quale ingenium esset in se, cum virum, cujus doctrinam sanctitatemque omnes suspiciebant ac venerabantur, aspere insectatus esset. Sed vanum hominem, qui aura captus frivola insolentem sibi adriperat fiduciam, aut derisum fuisse credo vel ab suis consiliariis, aut admonitum, ut cohiberet iracundiae motus. Quod si fecisset, minime censoriae severitatis nota ejus Dissertationi *

* Amplissimum hunc libellus infelicissimus prae se ferticulum: Reverendissimi P. F. Joannis Bona Abatis Generalis Cisterciensis ex Congregatione Foliensium doctrina de usu fermentati in sacrificio Missae per mille et amplius annos a Latina Ecclesia observato, dum esset Abbas; antequam R. E. Cardinalis (qualis nunc est) crearetur, examinata, expensa, refutata a P. F. Francisco a S. Augustino Macedo Min. Observ. Lectore publico Patavino, producta tertia Authoris, et adhibita responsione in libro inscripto Rerum Li-

inusta fuisset . Ceterum Bonae sententia non solum habuit oppugnatores , sed etiam defensores plurimos , et in utramque partem multa adhuc disseruntur in scholis . Quamquam ille eandem , ut ita dicam , mitigaverit , cum declarasset Latinam Ecclesiam adhibuisse panem modo fermentatum , modo azymum pro temporum , locorum et gentium ratione , nunquam tamen deseruisse videtur . Gratias tamen egit Mabillonio , tum quod laborem impenderit in illustrandam rem , quae erat obscura , et quae difficiles explicatus habebat , tum quod de liturgia Gallicana , in qua exponenda sibi non plane satisfecisse ajebat ,

turgicarum cap. XXIII. Ingilstadii sub signo Aquilae .

Quid dignum tanto feret hic promissor hiatu ?

Vel ab his reprehensus fuit , quibus minus probabatur Bonae sententia ; et quae de eo scripsit Mabillonius summae impudentiae et imperitiae quoque arguunt Macedum . Quod ipsum quavis pena dignum judicabat Norisius , sui et Bonae causa , cujus erat admirator maximus , ea paraverat , quae ad retundendam hominis Franciscani superbiam plurimum valuissent . Sed opus improbavit Bona , qui integritatis sinceræ conscius facile patiebatur se a noxiogum premi insolentis ,

scribendum suscepisset. Sed multa, quae aliorum fugerant negligentiam, unius hominis reperit solertia, quare vere dictum ab Eusebio Renaudotio * putamus, vidisse omnia Bonam, optima collegisse, et primum in rebus liturgicis docte et sapienter illustrandis palmam accepisse. Quanquam in his rebus omnem aetatem consumpsit, noli putare ipsum neglexisse reliqua studia, quae reconditis in artibus, et in quadam varietate litterarum versantur. Vel a prima aetate coluit Latinam poesin, et quos Latinis carminibus reddidit Davidici aliquot Psalmi jure meritoque a multis, sed praesertim a Leopoldo Mediceo, aequo et sapientissimo harum rerum aestimatore, laudati fuere. Non hospes erat in Graecis et Hebraicis litteris, in philosophia, magistro Hieronymo Carrario, cujus magnum erat nomen, haud mediocriter profecerat, et toto illo quinquennio, quo Augustae Taurinorum fuisse diximus, se totum

* In Praef. ad *Liturgiarum Orientalium Collectionem*.

in nobiliores disciplinas, ne mathesi quidem, astronomia ac musica exceptis, quas homine theologo haud indignas esse, ut multi, putabat, abdidisse ex ipso comperimus *. Inexplebilis cupiditas discendi apparebat praesertim in iis, quae ad theologiam et sacram eruditionem pertinebant, et cum talis evasisset, ut summis viris par esse posset, res liturgicas maxime illustrare sibi sumpsit, ut sereret aliquid tanquam in inculto et derelicto solo; et quod sperabat plura bona ex illarum cognitione posse propagari, alios ad eandem tractationem invitabat. Consuetudine beneficentiae cum paratus esset, et tanquam exercitatus ad bene de multis promerendum, libentissime suppeditabat de thesauris suis quae ceterorum utilitati potuissent servire. Testati id sunt Lucas Holstenius, Leo Allatius, et multi eorum, qui divinarum rerum

* Extat ejus epistola ad Hieronymum a S. Roberto de tota ratione studiorum suorum: pag. 3. inter *Selectas ejus epistolas* Augustae Taurinorum editas an. MDCCLXV.

scientia tum in Gallia florebant. Minime pigebit nominare nonnullos, quo testatior sit opinio, quam absentes de illius doctrina habebant. Joannes Cotelierius cum scripta Graecorum Patrum, qui ab ultimis Ecclesiae temporibus vixere, simul conjungere, et commentariis explicare deliberasset, a Bona petiit, ut partem laboris in se susciperet, maximeque exquireret illo suo judicio certo et acri quae vera, falsa ac dubia essent. Cumulae satisfacit amico; nec minus bonitas illius respondit judicio, quod de illo habuerunt S. Bernardi operum editores Lucas Acherius, Claudius Chantelovius et Joannes Mabillonius. Totam Benedictinorum familiam, quae a Sancto Mauro appellatur, in qua maxime florebant non modo tres ii, quos nominavi, sed alii plures doctrina excellentes homines, adeo sibi beneficiis, et quasi quadam societate et communicatione earum rerum, quae ad divina studia pertinebant, obstrinxerat, ut Bonae causa eadem vehementer omnia vellet. Vicissim Bona suum esse putabat et quid sentiret de praeclaris ab ea susceptis operibus ostendere, et quod ipsa faciebat libera oratione contra

nonnullorum invidiam defendere. Multa et maxima sunt quae suppeditavit Acherio ipsi ad ornandum *Spicilegium veterum Scriptorum*, eique aliisque auctor fuit, ut Aythonis, Theodulphi, Ebbonis, Attonis, Marii Mercatoris aliorumque opera quaedam, quae ipse ex codicibus praesertim Vaticaniis deprompserat, emitterent. Favit et Francisco Combefisio ac Stephano Balutio, atque suis copiis mirifice adjuvit Petrum Gousainvillaeum in edendis S. Gregorii Magni operibus. Statuerat enim se non solum officii fructum, sed etiam pietatis laudem debere in eo quaerere, quod particeps, vel socius, vel auctor esset hujusmodi consiliorum. Non mediocria sunt quae concessit Joanni Thiersio, viro Graecis Latinisque litteris eruditissimo, qui quidem tantum tribuebat judicio Bonae, ut ad eum scribens his usus sit verbis: *Is es, cujus studio nihil non tribuo, cujus sententiae, clausis ut ajunt, oculis acquiesco, a quo si nudus labor comprobetur, quin ab eruditis viris sit comprobandum non dubito*. Philippus Labbeus cum suas ad Bellarminium Dissertationes edidit, se ex omnibus maxime dolere Bonae mortera

declaravit, cujus doctrina duce easdem confecerat. Nam inter cetera doctus ab eo fuerat *Sermones XV. de Coena Domini* Ogerio Luce-riensi, non aliis, ut ipse et Theophilus Rainaudus judicaverant, tribuendos esse. Officia plurima praestitit Christiano Lupo, qui iis temporibus in Academia Lovaniensi ob singularem in rebus divinis scientiam principatum tenere videbatur, et beneyolentissime et constantissime ipsum defendit, cum graves in eum turbae excitatae fuissent, quod Joannem Hierosolymitanum inter Haereticos adnumeravisset. Bollandus, Papebrochius atque Heschenius saepe testati sunt quanta subsidia a Bona acceperint in Sanctorum rebus gestis conscribendis, neque desunt alia plura clarorum virorum testimonia, quae magnificis verbis declarant, quid pie, quid grate, quid humaniter ipse aut fecerit, aut tulerit ad amplificandam hominum gloriam et litterarum dignitatem. Reprehensus interdum a Jesuitis fuit quod defensionem hominum, qui contrariorum partium erant, suscepisset; sed ille sui iudicii, potius quid se facere par esset intuebatur, quam quid ii laudaturi forent.

Hoc quoque sit humanissimi Cardinalis bonitatis exemplum, quod si quos invenisset, inter quos laudis esset aemulatio, quantum poterat enitebatur, ut nulla intercederet obtrectatio, omnesque ad Christianam rempublicam, sanctioraque ejus instituta defendenda quasi cognatione quadam conspirarent. Cum jam in uno homine possent cerni omnia, quae commendant ad opinionem et innocentiae et doctrinae, magnum ex ejus morte boni, Pontifex Maximus, et universa civitas percepit dolorem. Obivit illam sancte, postquam triginta quatuor dies aegrotaverat aestu febrique jactatus, v. Kal. Novembres an. MDCLXXIV. Urbanum coenobium, quod dicitur S. Bernardi ad Thermas, magna ex parte rerum suarum reliquit heredem. Eo in loco, quo Monachorum ossa sepeliuntur, conditum et ipsius cadaver, sic illo praescribente, fuit cum hac inscriptione, quam sibi vivens fecerat.

D. O. M.
 JOANNES BONA
 PEDEMONTANVS
 CONGREG. SANCTI BERNARDI MONACHVS
 ET HVIVS. ECCLESIAE.
 TRANSLATO HVC TITVLO
 S. SALVATORIS IN LAVRO
 PRIMVS PRESBYTER CARDINALIS
 VIVENS SIBI POSVIT.

Minime curarunt Monachi monumentum magnifico adornatum opere, nobiliorique in loco faciendum, quod Bonae virtutis memoria nec oblivione eorum qui fuere, nec reticentia posterorum deleri possit.

O P E R A E D I T A

De divina psalmodia, deque varîis ritibus omnium Ecclesiârum in psallendis divinis officiis Tractatus sive psallentis Ecclesiæ armonia ; Romæ apud Jo. Petrum Collinium 1653. in 4. Idem opus auctum prodiit Parisiis apud Ludovicum Bilaine 1663 in 4. et 1672. in 4. et Coloniae 1676. in 8. Mens erat Alberto Fabricio locum ei dare in Tomo VIII. Antiquitatum Ecclesiasticarum (vid. *Giorn. de' Lett. & Italia Tom. IX. p. 353.*) Non est tacendum quod cum Bona in fronte operis iudicium exposuisset suum de auctoribus et libris, quibus usus fuerat, hujus rei primus omnium exemplum dedisse videtur.

Via compendii ad Deum ; Romæ typis Angeli Bernabè a Verme 1656. et 1657. in 12. Parisiis apud Fridericum Leonard 1662. in 12. ; Argentorati et Coloniae 1674. in 8. et Venetiis apud Jo. Mariam Lazzaronum 1742. in 12. Bis etiam edita Bruxelles et Parisiis fuit Gallicum in sermonem conversa.

Manuductio ad cœlum ; Romæ apud Angelum Bernabè 1658. Lugduni sumptibus Claudii Prost 1660. in 12. Viennæ Austriae apud Matthæum Cosmerowium 1660. in 12. Francofurti apud Gulielmum Serlinum 1663. in 24. Friburgi Brig. 1663. in 12. Bruxelles typis Francisci Fopens 1663. in 32. Parisiis apud Antonium Crestien et Petrum de Bess 1664. in 12. Monachii 1664. in 12. Neapoli apud Antonium de Fusco 1664. in 12. Romæ apud Jacobum Dragonellum 1664. in 12. Bruxelles et Reterod. 1670. et 1675. in 16. Coloniae 1674. in 8. et Venetiis 1692. in 16. Hoc opus translaturum fuisse in linguas Italianam, Gallicam, Germanicam, Armenam et Hispanicam.

De sacrificio Missæ Tractatus atecticus. Rhotomagi 1668. in 12. Parisiis 1676. et 1678. in 12. Monachii

1678. in 12. Coloniae 1680. in 12. et Romae 1687.

Rerum Liturgicarum lib. II. Romae typis Nicolai Angeli Tinassii 1671. in fol. *Parisiis* 1672. in 4. *Coloniae* 1674. in 8. *Parisiis* 1676. in 8. *Aucti, et fusiori disquisitione de azymo et fermentato locupletati*. Ex omnibus editionibus, quas operis vere aurei factae sunt, commendatur maxime Taurinensis, quam curavit Robertus Sala, et notis copiosissimis illustravit, et in tres Tomos in fol. magn. divisit. Editus I. est an. 1747. II. 1749. III. vero an. 1753. Biennio post ipse edidit Tomum IV. cum hoc titulo: *D. Joannis Bona S. R. E. Presbyteri Card. Epistolae Selectae una cum aliis eruditorum virorum ad eundem*.

De discretionem spirituum in vita spirituali deducendorum lib. I. Bruxelles 1671. et 1674. in 12. *Romae apud Tinassium* in fol. et 1674. in 4. et *Kenetiis apud Jo. Mariam Latzeronum* 1742. in 12. Editus liber fuit cum *Via compendii ad Deum*. *Parisiis* 1673. in 4. Translatus cum fuisset in Gallicam linguam, *Parisiis* typis impressus fuit an. 1677. in 12.

Principia, et documenta vitae Christiandae: Romae 1674. in 12. *Parisiis* 1674. et 1675. in 12. *Coloniae* 1675. in 12. *Monachii* 1676. in 12. et *Veronae per Jacobum Vallarsæ* 1729. in 12. Bis Italice redditus liber fuit, semel Gallice. Quae vero huc usque nominavimus Bonae opera simul collecta typis impressa fuerunt *Antuerpiae* 1677. in 4. et 1694. in fol. et *Parisiis* 1678. tres in Tomos in 8. divisa.

Testamentum sive praeparatio ad mortem Fr. Jo. à S. Catharina Monachi Congr. Reformatae S. Bernardi Ord. Cistere. demum Card. Bona nuncupati Jo. Cinellius nunc primum in lucem edit Florentiae ex typogr. sub signo Navis. 1675. in 24. *Lugduni apud Anissonios* 1676. in 12. et *Monachii* 1676. in 12. Cinellius, qui librum donb accepe-

rat a Magliabechio, italicam in linguam transtulit, et ipse Bononiae et Mediolani typis impressus fuit.

Horologium asceticum, indicans modum obcundi Christianas exercitationes opus posthumum. Parisiis apud Ludovicum Bilaine 1676. et 1679. in 12. Antuerpiae 1679. in 4. Coloniae 1681. in 12. Hoc opusculum in italicam linguam translatum editum Venetiis fuit 1733. in 12. cum *Tenamento*. Bonae.

De praeparatione ad mortem opusculum Praeneste typis Barberinis per Jo. Dom. Masci 1731. Aureolus sane libellus sub pulvinari Card. Bonae repertus fuit, et dono datus Barberinio. Horum omnium operum collectio edita fuit Antuerpiae primum an. 1723. in fol. mox eadem in urbe 1739. in fol. Sunt qui narrant Bonam reliquisse *Examen mysticae Theologiae, ejusque consensus cum Scholastico*, et aliud opus inscriptum *Phoenix rediviva, renovatio spiritus per anachoresim, et exercitia spiritualia*, et reliquisse etiam quaedam *de vita sua, et Sermones sacros*. Praeter epistolas, quas a Sala editas fuisse narravimus, aliae plures, extant tum editae, tum ineditae, quae omnes singularem viri prudentiam, doctrinam et sanctitatem declarant.

ANGELUS FABRONIUS

A LOYSIO CREMANIO
IN TICINENSI LYCEO JURIS PRUDENTIAE
DOCTORI S. P. D.

Quoniam scito fieri putabimus, amicissime Cremani, ut cum multos impellat ad juris prudentiam addiscendam utilitatis magnitudo, pauci tamen nobilissimam facultatem sic profueantur, ut non modo jurisconsultorum nomine, sed ne foro quidem dignos arbitremur? Castigemus segnitiam hominum atque inertiam; et quoniam hac aetate omnes praeclarae disciplinae plurimum amplificatae fuere, non sinamus in squalore jacere, et male haberi prudentiam juris, quam qui contemnendam putat, is vincula revellit non modo judiciorum, sed etiam utilitatis vitaeque communis. Cogitanti mihi saepe numero et memoria vetera repetenti persapientes fuisse Romani videntur, qui cum rerum gestarum gloria florerent, nulla re magis imperium retineri posse putarunt, quam legibus ad illam antiquissimam, et omnium rerum principem expressis naturam. Optima enim lex est naturae vis, mens et ratio pruden-

tis, juris atque injuriae regula. Difficile est virtutem et aequitatem illum revereri, qui semper secunda fortuna sit usus. Nihilo tamen minus Populus Romanus vel in summa rerum omnium prosperitate tantum civili sapientiae tribuit, ut voluerit eam asservari inter Deorum sacra atque caerimonias, jusque a Pontificibus velut ab ipsa divina justitia postulari; hos leges constituere, hos formulas componere. Quanquam deinde ad populum transierit juris prudentia, ac demum in Principum arbitrio ac potestate fuerit, non minor tamen extitit cura prospiciendi hominum felicitati aequissimis legibus; nec piguit Praetorios viros et Consulares militari virtute et triumphis insignes legum scientiam profiteri, sive in judiciis orarent causas, sive domi sedentes in solis, aut transverso foro obambulantes de jure consulentibus responderent, sive caerimonias religionisque in Deos ordinarent, jusque Pontificum commentariis describerent, sive in forensibus disputationibus juris regulas definirent, et ambiguas leges ratione atque auctoritate declararent confirmarentque, duras aequitate temperarent, inutiles rejicerent, sive adolescentes, in quibus erat indoles virtutis, disciplina instruerent, rati sa-

pienset, quales ipsi cum praeceptis, tum exemplis informarentur; talem fore Reipublicae fortunam. Hujus dignitas, quae quidem non tam rebus gestis, quam recta ratione in jubendo ac vetando sic amplificata est, ut nihil addi potuisse videatur; minui coepit, cum mores lapsi sunt ad luxuriam atque avaritiam: tuebantur se tamen pristinae leges sanctitate sua, et vel ii, qui Rempublicam funditus everterunt, e re sua esse putarunt ea servari insuita atque scita, quae naturae communi hominum consentirent, et civilibus negotiis quadrarent omnium regionum ac temporum. Quare minime est mirandum, si populi, qui a Romanorum imperio desciverunt, ac suos sibi Reges crearunt, Romanas tamen minime deseruerunt leges, ne amitterent humanitatem et regulam, ad quam, quasi e caelo delapsa illa esset, omnium fere judicia rerum dirigerentur. Nec parum profuit ad Romani juris augendam dignitatem jurisconsultorum opera. Hi enim quasi Reipublicae consiliarii atque administri, legum conservatores et judiciorum moderatores dati essent, quidquid in Graecorum scholis et in philosophorum libris invenissent ex usu justitiae et Romanae civitatis, patriis judiciis sic aptabant, ut ubi causa defi-

ceretur verbis legis, tum vel dialectica ratio, vel moralis doctrinae praecepta in auxilium vocarentur, quae asperiora videbantur regulis mitigarentur aequitatis, quae obscuriora propter mutationem linguae et morum nova luce illustrarentur, et quae necessitas magis quam consilium pepererat, et nascenti magis, quam adulto imperio opportuna videbantur, mutarentur, et ad omnia tempora omnesque, si fieri potuisset, mores accommodarentur. Ex interpretationibus, disputationibus responsisque jurisconsultorum nata est juris prudentia, quae adeo propria Romanorum fuit, ut etiamsi ceteras doctrinas omnes atque artes a Graecis acceperint, hujus tamen se solos inventores ac propagatores fuisse merito gloriantur. Sed jurisconsultorum, qui antiquas leges, Senatusconsulta, edicta, orationes Principum illustrarunt, ambiguas enodarunt quaestiones, sua responsa atque decreta ediderunt, tanta fuit copia, ut Justiniani aetate duo usque librorum ab iis conscriptorum millia numerarentur, qui in foro obtinebant auctoritatem. Magnopere propterea intererat aliquem inveniri, qui, quod fustum et dissipatum erat, in certa genera cogeret, et ad artem quodammodo redigeret, quod ita prae-

stitutum ab ipso Justiniano fuit, postquam jam legum codicem vulgaveras, ut ex immenso illo librorum numero unum coagmentatum sit opus, ex quo tanquam ex oraculo peterentur responsa ad omnem fere judicalem controversiam dijudicandam atque dirimendam. Multis enim rejectis, quae contraria, supervacanea, antiquata judicabantur, multis mutatis, interpolatis, omnibus diligentissime excussis, perlustratis, ea tantummodo excerpta fuerunt, quae in foro judiciiisque locum habere poterant, ac si tunc primum inventa et scripta fuissent. Si Justinianaeum aevum docius fuisset et elegantius, majus quiddam confici posuisset. Verum dum dolemus, quod praetermissa fuerunt innumera Senatusconsulta, innumera edicta, innumerae constitutiones cum interpretationibus illorum jurisconsultorum, qui, libertate vigente, claruerunt, in quibus temporum et Reipublicae formam et veterem elegantiam expressam contemplari possemus, ignoscemus Triboniano praecipuo Pandectarum auctori, qui habuit excusationem voluntatis Principis, laboris plusquam Herculei, in quo exantlando triennium satummodo consumpsit, et commodi publici, cui non satis consultum fuisset, si neglectis

recentioribus Papiniano, Paullo, Ulpiano, Juliano, Cajo, Africano, Marcello ceterisque, quorum vel Principum ipsorum constitutionibus confirmata fuerat auctoritas, ex Catonum, Muciorum, Manilii, Cascellii, Servii, Sulpicii, aliorumque veterum jurisconsultorum scriptis magna ex parte Pandectae compositi fuissent. Istud Romanorum jus, quod tam late patuit, quam illorum imperium, quod excultum ab hominibus ingenio et doctrina summis fuit, quod ex ipsius justitiae et naturae fontibus manasse judicabatur, quod Justiniani Imperatoris auspiciis ac jussu collectum, digestum, ordinatum, confirmatumque fuit, per sex ferme rudia, insipientia, insecta, omnisque humanitatis, doctrinae atque elegantiae ignara saecula non neglectum modo, sed omnino oblitteratum jacuit, donec ad scholas ac fora Occidentis, imperante Lothario Saxone, postliminio rediit. Tum inveterata barbaries ex moribus disciplinaque hominum deleri coepit, tum jura societatis et officia vim suam recuperarunt, tum compressa Regulorum ceterorumque potentiorum, qui forum et jurisdictionem cum ferro et armis miscebant, intoleranda licentia, tum nata cupiditas noscendi linguam et mores Roma-

norum atque artes, quibus justitiae penetralia re-
 ferantes non minus aeterna jura, quam aeternam
 Urbem atque aeternum Imperium condidisse vide-
 bantur. Commoda, quae ex legibus constantibus
 et universo generi hominum accommodatis perci-
 piebantur, tantum juris prudentiae amorem ex-
 citarunt, ut institutae plures Academiae fuerint
 ad illam publice docendam, magnisque honoribus
 ac praemiis ii donati, qui in hac facultate ex-
 cellere putabantur. Sed quoniam multi semper
 laboris, multique temporis fuit perpolire disci-
 plinas, quae aut inveniuntur, aut intermortuae re-
 viviscunt, jamdiu plurimi ad scholas loquacitatem
 sine litterarum scientia, et sine eloquendi elegan-
 tia attulerunt, ut litigandi magis, quam justitiae
 tradidisse vias judicentur. Porro cum constet
 universa juris prudentia communi omnibus homi-
 nibus jure, et legibus et moribus populi Romani,
 qui ejus solidam et expressam effigiem non um-
 bram videre cupiunt, necesse habebunt sedulo in-
 quirere quid jura gentium et naturae praecipiant,
 quid rectores civitatum in illa addiderint, aut im-
 mutaverint, suadente publica utilitate, quae fue-
 rint legum, Senatusconsultorum, Edicii perpetui ver-
 ba; quae resitui possint, quae amissa videantur;

quis auctor, quis ordo, quae ratio, quae sententia fuerit; quae veteres annotaverint; quae rescriptis aut constitutionibus laxaverit benignitas Principum; quae in Pandectis aut Codice conjungi, quae separari suadeant locorum inscriptiones aut subscriptiones; quae praeterea ex veterum moribus et studiis, ex linguae usu, ex Graecis scriptoribus, atque ex omni antiquitatis notitia illusterari possint; quae fuerint sectarum discrimina, quas illarum vestigia aut in legibus ipsis, aut in Prudentum responsis appareant; quid jubeat regula juris, quid adversus eam pro communi utilitate receptum sit, quid recte, quid secus fecerit Tribonianus; quae demum scripturae, quae interpunctionum sit fides, constantia, aut varietas. Hanc viam omnium primi inierunt Alciatus et Budaeus, hanc tenuerunt Duarenius, Hotomannus, Donellus, Gifanius, Gothofredi et, ut uno nomine omnes complectar, Cujacius, quorum exempla si nos sequemur, juris prudentiae dignitati et famae nostrae consulamus. Qui declamatorem aliquem de ludo, aut rabulam de foro quaerunt, stultitiae suae dabunt poenas. Non mediocris ingenii est atque doctrinae juris prudentiam profiteri; et jurisconsultus, qui prius in

grammaticorum , rhetorum ac philosophorum scholis diu multumque se non exercuerit , quique ignarus sit , quibus ex fontibus leges manaverint , hoc indignum nomine arbitrabimur . Gratulor huic nostrae , gratulor Academiae Ticinensi , in qua magna celebritate famae vel ab adolescentia docere coepisti , quod cum locum non dent nisi eruditissimis juris prudentiae magistris , turbam et barbariem forensam a scholis atque judiciis depellere conantur ; et quoniam gloriari in primis videris , quod magistrum habueris Leopoldum Guadagnium , cuius sane domus multos ad opinionem innocentiae et juris civilis commendavit , ejus vitam ea mente scribendam suscepi , ut hanc tibi veteri amico veluti munusculum , levius tamen crassoque filo mitterem , quod ita accipi volo , ut te mihi carissimum esse propter egregiam doctrinam tuam ac suavissimos mores , et propter multa , quae mihi semper tribuisti officia , me tibi esse devinctissimum intelligas . Vale .

Pisis IV. Non. Jan. MDCCLXXXVI.

LEOPOLDUS ANDREAS GUADAGNIUS.

MAjores Leopoldi Andreae Guadagnii jurisconsultorum nostrae aetatis eruditissimi sedem Aretii habuerunt, ex qua urbe Marcianum, ac demum Florentiam concessere. Civitate Florentina donati eas exercuerunt artes, quae honestam familiam decent. Petrus Aegidius Leopoldi pater medicinam et chirurgiam faciebat, et magno argumento est ipsum famam ex iis collegisse, quod cum Veneti an. MDCLXXX. bello Illyrico educerent naves in expeditionem adversus Turcas, copiarum et Ducis valetudinem ejus prudentiae in primis commendarunt. Redux in patriam, cum viduitatem aegre ferret, duxit in matrimonium castissimam feminam, quae nobili patre Anglo, at Florentiae genita erat. Haec nomen Anna Maria Palmar, ex qua plures suscepit liberos, quorum natu secundus Leopoldus Andreas in lucem venit XI. Kal. Decembres an. MDCCV. Domi prima humaniorum litterarum elementa didicit: mox ad homines Scholarum, ut vo-

cant, Piarum ductus audivit Ferrantem Monetiam, qui rhetoricam Florentiae ita docebat, ut ejus in universa Etruria percelebre esset nomen. Eruditus et ab iisdem hominibus fuit philosophia, quae ut tum erant tempora, prorsus Lyceum olebat. Ne paternum, ut saepe fit, sequeretur exemplum in danda opera medicinae, fecit hebetudo oculorum, quapropter de juris prudentia addiscenda deliberavit, ex qua gloriam et quaestum sibi pollicebatur. Adolescens illustri ingenio atque industria, et ita moratus, ut prae se probitatem, modestiam ingenuitatemque ferret, cum venisset ad Academiam Pisanam, alliciebat ad se se amandum omnes, quos frequentabat, magistros, atque adeo consuetudine sibi devinxit Jo. Paullum Gualterium et Josephum Averanium, ut nemo iis perpetuo fuerit carior. Sane quem locupletiolem invenisset Averanio, ut ejus opera divitias atque ornamenta ingenii sui augeret? Exercebatur ab eo non tam publice, quam privatim non modo in studiis juris prudentiae, sed etiam in ceteris facultatibus, quae illam juvare possunt. Gratus vero et pius Leo-

poldus in praeceptorem ad ejus exemplum et praecepta omnes actiones suas moderabatur, et sacra ei fuisse dixisses nomina, sententias, scripta, memoriam Averasiorum fratrum. Scholae vacatio non vindicabat eum a labore, cum Florentiae apud Ferronium et Moneliam, qui caussarum patroni nobilissimi habebantur, plurimum exerceretur. Frequens etiam erat Antonii Mariae Salvinii auditor, a quo litteras Graecas ita didicit, ut aequalium suorum haberet, superiorem neminem. Cum vero Salvinius ob valetudinis incommoda domi detineretur, neque continere se posset, quin Graeca praesertim epigrammata componeret, excipiebat haec ex illius voce Guadagnius, et inter scribendum multa ex praeceptore quærebat, quae ejus studium magis magisque proficiendi in Graecis litteris declarabant. Eodem tempore plurimum se exercebat in Etrusca et Latina lingua, ut confideret se jam posse inter elegantes scriptores numerari. Eam certe sibi formavit orationem, quae etiamsi viribus careat, et lenitatem scriptoris exprimat, est tamen, ut ita dicam, integra valetudine. Quidquid inde hau-

haurias , purum liquidumque te haurire senties , et facile subscribes nostrorum hominum sententiæ , qui omnium fere jurisconsultorum Etrusce et Latine loqui elegantissime Guadagnium judicarunt . Hoc etiam nomine coepit absentibus esse notus ; et cum in amicitiam venisset Jacobi Facciolati viri omni fere liberali doctrina politissimi , hoc suasore , Academiam Patavinam cogitavit . Est hoc in more positum , ne ad eam fere admittantur , qui publicum aliquod doctrinae monumentum minime prodiderint , quapropter Guadagnius de legibus Censoriis opus scribendum suscepit , quod a Facciolato ipso , cui inscribitur , Venetiis editum est * . Disputabant jurisconsultorum eruditissimi num Censores potestatem habuissent cogendi comitia , rogandi populum , ferendique leges . Quamquam eorum dignitas ad tantam amplitudinem pervenerit , ut morum disciplinaeque Romanae regimen , Senatus Equitumque centu-

Tom. XIII.

D.

* Extrat in libro , cui titulus : *Novelle letterarie per l'anno 1731. in Venezia presso F. Albrizzi* .

riae decoris dedecorisque discrimen sub ditione ejus magistratus essent, publicorum jus, privatorumque locorum, et vectigalia P. R. ab ejusdem nutu atque arbitrio penderent, probat tamen Guadagnius adversus Heineccium aliosque multos, Censores, concionem etsi aliquando habuerint ad populum, hunc tamen convocare, et cum eodem agere de ferendis legibus minime potuisse; potuisse quidem edicta proponere, quae improprie leges appellata fuere: *Lex* enim, ut ait Capito apud Gellium *, *est generale jussum populi aut plebis, rogante magistratu*. Cum vero Censoribus liceret publicos agros vendere et locare, locare et vectigalia atque opera publica cum quibusdam pactis seu conditionibus, quae leges appellari solent, hinc etiam factum docet Guadagnius quare eorum edicta leges nominarentur. Quae monumenta ad nos pervenerint hujusmodi legum, quae in iis continentur, quae fuerint Censoriae tabulae aliaeque hujusmodi ita copiose, eleganter atque erudite explicat Guadagnius, ut esse jam e-

* Lib. X, cap. 20.

jus artis, quam profiteri coeperat, antistes videretur. Quibus editis, Facciolatus non minus prolixè Guadagnio de voluntate Triumvirum Gymnasii Patavini promisit, quam erat solitus de sua polliceri; quod cum ad aures pervenisset illorum, qui Academiae Pisanae praeerant, retinendum, in Etruria hominem putarunt, de quo non solum bene sperare, sed explorare etiam judicare poterant. Itaque non invitavunt modo, sed pene etiam ipsum coegerunt, ut onus publice Pisis docendi Institutiones Juris Civilis susciperet, quod accidit aestate an. MDCCXXXI. Regnabat tum in Etruria Jo. Gasto Mediceus, qui eruditus ab Averanio fuerat scientia juris civilis. Ut audivit ergo ab Averanio sic efferrì Guadagnium quasi hominem, qui decus atque ornamentum futurus esset Academiae Pisanae, jussit eum bene sperare, et bono animo esse in ingrediendo. nova munere. Quam tum dixit Latina oratio, qua veluti Academiae fores aperiuntur, magnam commendationem habuit, quod esset sapientissimis sententiis, gravibusque verbis ornata et perpolita. Quod cum ad augendam opinio-

nem, quam omnes habebant doctrinae illius, plurimum valuisset, ejus schola juventutis flore frequentabatur. Multa ei obversabantur animo, in quibus optabat vim doctrinae suae consumere. Videbat tamen, ne quid privatis studiis de opera publica detraheret. Saepe etiam consulentibus respondebat, et quod plurimi illum sibi aut arbitrum, aut judicem, aut patronum deligerent, quodque Lucensium, Genuensium, Epidauriorum Republicae aliquae Principes de rebus gravissimis illius consilium exquisierint, id magno argumento est, non aliqua simulatione aut artificio, sed fide et prudentia celebritatem sermonis hominum illum consecutum fuisse. Non me latet eundem a nonnullis culparum fuisse, quod nimium temporis foro tribuerit. Sed si dum publico fungi debebat munere, operam suam nunquam a discipulis removebat, injuste profecto reprehenditur orium illius, qui non modo in eo hebescere et languere noluit, sed etiam plurimis ut prodesset enixus est. Gloriam vero non minui, sed etiam augeri arbitramur eorum, qui ad illustres laudes has etiam minus notas, mi-

nusque pervulgatas adjungunt. Ad excusandum etiam Guadagnium illa valent, quod cum non esset abundans (nam eo tempore, quo inter Doctores Academiae Pisanæ relatus est, ejus stipendium fuit C. centussium, quanquam istud postea ad DCLX. et amplius auctum fuerit) vindemiolas suas eo reservabat, ut libros emeret, fratres sublevaret, et miseris succurreret. Qui exigere videbantur a Guadagnio, ut scriptis suis Academiae gloriæ consuleret, admodum gavisii sunt, cum audierunt ejusmodi illum suscepisse opus, in quo Institutiones juris civilisclare eleganterque expositae copiosis adeo illustrarentur commentariis, ut in iis principia juris naturae et gentium, civilis origines, rationes, progressus, Graeca Latinaque veterum Scriptorum loca, quae his omnibus lucem afferunt, et quae in usu forensi sunt, possemus agnoscere. Etsi quamplures hactenus prodierint in Imperiales Institutiones commentarii, ut ipsos *vel frecto Danico sternendo sufficere posse* affirmaverit Leibnitius, in quibus alii leges cum legibus, minime vero has cum forma Reipublicae atque Imperii, cum

moribus Romanorum, et cum Scriptoribus, quos Classics dicimus, contulerunt, alii artem criticam et elegantiores disciplinas cum juris prudentia conjungentes, mentem a contemplatione rerum ad forensem usum nunquam traduxerunt, alii demum nil nisi forum cogitantes, quod adhuc retinetur in judiciis, atque propterea quod postremum esse debebat, id primum atque unicum, neglectis fontibus, proposuerunt, nihilo tamen minus nulli exstitisse videntur, qui omnes has partes, et quod singulis defuit, expleverint. Id propositum Guadagnio fuit; et cum is haberet in promptu omnem antiquitatem, omnesque notos et tractatos juris prudentiae locos, et explanationes, quas celebriores jurisconsulti adhibuerant in obscuris et ambiguis interpretandis, tale confecit, seu potius instituit opus, ut ei licuerit in hoc quodammodo gloriari, se pulcherrima juris prudentiae ornamenta, et vel ipsas Graecae et Latinae grammaticae divitias ad usum forensem transtulisse. Bina, quae Pisis an. MCCLVIII. prodierunt volumina, ad I. Institutionum librum tantummodo pertinent. Tertium volumen

nil nisi titulum primum secundi libri, qui est de rerum divisione, et acquirendo earum dominio complectitur, nec tam studiosorum utilitati, quam posteritatis otio consulere voluisse videtur Auctor, adeo multa, sane egregia, in eo collegis, quae explicant quid a natura, quid a legibus praescriptum, quidque assensione, aut auctoritate, aut judicio aliquorum comprobatum fuerit de variis privati dominiî acquirendi modis. Omne id, quod pertinet ad jus tum *in re*, ut loquuntur, tum *ad rem*, ita persequi sibi proposuerat Auctor, ut totus II. liber cum tredecim titulis libri III. in priori jure explicando, reliqui cum quinque titulis libri IV. in altero jure exponendo versarentur. Sed quot ei opus fuisset voluminibus, si viam, quam ingressus fuerat, tenere voluisset? Quis ferre potuisset se invitari ad Institutiones juris civilis addiscendas immensa rerum copia, quae vel patientissimos laboris deterruisset? Auctor ipse cum praevidere nequiret quatenus hic suus labor progressurus esset; cum quotidie stimularetur a typographo, ut materiem ad inchoatum opus perficiendum suppeditaret, quam paratam

minime habebat; cumque dolenter sane audiret ita judicari de universo opere, quasi inutile illud futurum esset juris prudentiae elementorum studiosis, quanquam illud omni eruditione atque doctrina abundaret, constitit omnis ejus cura, minimeque, quod pollicitus erat, stimulos licet addentibus Academiae Curatoribus, exitu praestitit. Quapropter cum reprehenderetur a multis, excusatione aut aetatis, aut laboris, aut impensae minime utebatur, sed se non desperare, minus fortasse sincere, aiebat, fore aliquando, ut promissa esset exsoluturus. Sed haec quamvis non effecit, mirum tamen erat ejus ingenium, mira prudentia ac diligentia in erudiendis adolescentibus, qui ei in disciplinam se se tradebant. Pene silere videbantur ceteri Institutionum juris civilis Doctores, ipsa Guadagnio docente, nec minor fiebat ad eum audiendi causa concursus, cum domi tantummodo easdem Institutiones explicaret. Nam an. MDCCXLII. creatus est publicus Pandectarum interpres; et ne amplius haberet scholas privatas Institutionum, factum est XVI. post annos Principis jussu ad sedandos, cre-

do, collegarum questus. Saepe enim evenit, ut discipuli insignia doctrinae ab iis postulent, a quibus Institutionibus juris eruditi fuere. Sed hoc ipsum fuit honorabile: nam actum cum ipso est large liberaliterque, ne quid de laborum fructu dignitateque muneris diminutum videretur. Jam vero Pandectas interpretans quantam consecutus sit gloriam Guadagnius nihil attinet dicere. Videbatur prae se ferre veterum jurisconsultorum majestatem dignitatemque, dum eorum dicta atque sententias e superiori loco exponebat, nec dubito, quin si reviviscerent, Guadagnio suae linguae subtilitatem elegantiamque essent concessuri. Nil tam dolebat, quam si valetudinis incommodis, ne ad Lyceum veniret, impediretur, et vel dum erat summa senectute perditae valetudine, domi excipiebat discipulos suos, ut illos omni doctrina juris instrueret. Opprimi illum malle onere officii, quam discipulis suis deesse dixisses. Nam praeter quam quod a natura comparatus erat ad diligentiam, caritatem et patientiam, ei persuasum erat in officio colendo sitam vitae esse honestatem omnem, ut in negligendo

turpitudinem. Qui tot annos doctrinam suam Academiae Pisanae promptam expositamque prae-
buit, non admodum ejus gloriae consu-
luit scriptis edendis. Levia sunt, si ejus sa-
pientiae vim spectes, quae de Pandectis in
vulgus emisit. Horum celeberrimum codicem,
qui Pisis olim, nunc Florentiae asservatur,
diligenter suo more aestate an. MDCCXXXII.
examinavit, et multa ad eum pertinentia in
adversaria retulit. Id ut rescivit Ferrantes
Capponius, cui sane plurimum tribuebat Gua-
dagnius, ipsum ad aliquid de eo scribendum
invitavit. *Quin tu, modeste respondit Leo-
poldus, me post Homerum Iliadem scribere, aut
post Roscium comoediam agere hortaris? An i-
gnoras quam erudita hac ipsa de re Henricus
Brenemannus in lucem hominum protulit?* Cum
tamen opus instituisset, statim intellexit e
segete ad spicilegium relictam fuisse stipu-
lam. Libellum itaque exaravit, qui ab An-
tonio Gorio in volumen IV. Decadis II. *Sym-
bolarum litterarum* relatus fuit, in quo mul-
ta eruditio et critice compareret. Propositum
autem Scriptori praesertim fuit duo haec con-
ficere, primo Florentinum exemplar, contra

ac putaverant Politianus, Hotomannus, Broeus, Perezus aliique, Imperatoris Justiniani, seu Triboniani prototypum non esse, sed ex alio apographo, aut forte ex pluribus, ex quibus menda quaedam in illud irrepserunt, VI. vel VII. saeculo descriptum, neque adeo semper et ubique fidem eidem praestandam, ut nulla ratio, auctoritas nulla a Florentina lectione dimovere nos possit: secundo quoniam ex insigni hoc MS. ceteri omnes, quos huc usque superesse novimus, Digestorum libri profluxerunt, Florentinam lectionem, nisi summa et evidens vetet ratio, esse ceteris praeferendam. Ex hac quidem dissertatione conjicere licet fuisse Guadagnium jurisconsultorum suae aetatis elegantissimum atque eruditissimum; nec dubito quin si collegisset omnia ea, quae ad interpretandas obscuriores Pandectarum leges scripto mandaverat, clarius etiam illius doctrina apparuisset. Verum nec prece, nec praemio, nec gratia, ut aliquid ejusmodi ederet, adduci potuit, solitus excusare scholae et fori occupationes. Aegre ab illo impetravi librum, quem nunc in vulgus emitto, quemque extrema aetate

composuit *. Poterat enim hoc, quod Salvius Julianus jurisconsultorum sui temporis facile princeps, gloriari: *Nam ego discendi cupiditate, quam solam vivendi rationem in octavum et septuagesimum aetatis annum duxi, memor sum ejus sententiae, qui dixisse fertur: καὶ τὸν ἑτέρον ποῦδα ἐν τῇ ὁρῶ εἶχων προσμαθὴν τὴ βουλομένην* **. Qui hunc librum legerit, et eruditionem et voluntatem Auctoris laudaverit, qui de adolescentium institutione optime meritus sit, cui ut magis magisque serviret, vel minima interdum, quae puerorum elementa videri possunt, sequi non dubitavit. Sed id illi erat persuasum, non esse jurisconsulti credere aliquid esse minimum, objiciebatque iis, qui haec vel arroganter, vel inepte nimis fastidire solent, Cujacii dictum ***: *nil est inutile in jure, et si mihi creditis, omnia vobis perscrutanda, pertentanda*

* Admonendos lectores putamus hoc commentarium de vita Guadagnii editum primo fuisse cum libro, quem de *Gracis Pandectarum* ipse confecit.

** Apud Pomponium l. 29. de fideic. libertat.

*** De rat. doc. juris.

sunt, si non velitis esse jurisconsulti de populo. Quoniam hoc propositum Guadagnio fuit, ut Graeca Pandectarum explicaret, facile judicabis illum in suo regno versatum fuisse, et vehementer concupivisse, ut juris prudentiae studiosi omnes imitarentur Modestinum, Papinianum, Scaevolam, ceterosque, e quorum libris Digesta composita fuerunt, qui adeo amabant callebantque Graecas litteras, ut veriti minime fuerint ne irriderentur, quod saepe verba Graeca inculcaverint. Exposuit Auctor in principio operis quid esset dicturus: ait enim. I. *Animadvertendum esse duco, Graeca quaedam in Pandectis vulgo esse omissa aut mutata, aut mendose et imperfecte scripta, aut inutiliter addita*; II. *Romanos, etsi quondam sollicitam habuerint curam servandi sartam tectamque Latinam linguam, ejusque usum longe lateque proferendi, sub Imperatoribus tamen a veteri illo instituto descivisse*; III. *Disserendum videtur de Romanorum studio ac peritia Graeci sermonis, qua illi quondam jurisconsultis nostris praeiverunt*; IV. *Ostendendum erit jurisconsultos, e quorum libris fragmenta in Pandectis exstant, non sine causa verba Graeca Graecasque senten-*

tias immisauisse Latinis ; V. *Agam de iis*, quae Graece scripta Pandectis praemitti in editionibus quibusdam solent, et vero etiam in ceteris omnibus praemitti debebant ; VI. *Graeca*, quae in Pandectis ipsis habentur, ad quasdam veluti classes referre iuvabit ; VII. *Peruile erit de Graecorum*, quae in Pandectis occurrunt, verborum, sententiarumque in Latinum translationibus dicere ; et denique VIII. *De aliquibus jurisconsultorum hellenismis*. Haec omnia suppeditarunt ei satis copiosam materiem ad amplificandum exornandumque opus, quod quia totum versatur in Graecis rebus, proprium ex iis habuit titulum : inscribitur enim *Ad Graeca Pandectarum*. Maximas vero gratias et agere et habere debemus Guadagnio, quod quinquaginta et amplius annos, quibus Doctoris munus in Academia Pisana sustinuit, qua voce, qua scriptis cultiorem juris prudentiam provehere maxime studuit, in qua quod princeps et signifer fuerat Cujacius, tantum huic tribuebat, ut tanquam numinis alicujus oracula omnia illius dicta habere videretur. Proinde si qui sunt artifices ad corrumpendam juventutem, qui, quod multitudo litium, va-

rietas caussarum, turba et barbaria forensis dat locum et quaestum vel impolitissimis jurisconsultis, clamare solent supervacaneam esse, et usum non habere in juris prudentia Graecam et Latinam eruditionem, notitiam antiquitatis, doctrinam philosophiae et naturalis juris, rogemus ut sileant, postquam aetas nostra jam ad ea patienda, quae veteribus scholis perplacuerunt, exolevit, nosque sinant amplecti atque exornare, quae nobis summi viri omnibus bonis artibus politi et ad juris prudentiae gloriam nati tradiderunt. Sed ad Guadagnium revertamur, qui cum instituisset multa, quae politius limare et perficere optabat, oblectamenta senectutis sibi parasse dicebat. Sed hae fuerunt inanes cogitationes, quamvis in Academia, ad quam flos juventutis concurret, plures studiorum suorum adjutores invenire potuisset. Semper tamen ejus mens alebatur discendo, volutandisque Graecis et Latinis scriptoribus. Alexandram tenebrosissimi Lycophronis magna ex parte in Italicum vertit, et alia hujusmodi inchoata reliquit. Quod vero magna esset opinio de illius in Latine scribendo e-

legantia, saepe rogabatur, ut inscriptiones, titulos, elogia mortuorum, epigrammata, ceteraque hujus generis conderet, quae libentissime concedebat. Quidquid profecto scriberet, antiquitatem redolebat; sed nunquam clarius apparuit quam concinnus et elegans esset Latinus scriptor, quam in iis, quas Academiae jussu dixit, orationibus, quaeque sunt in manibus hominum. Altera est *de laudibus Josephi II.* cum Romanorum Rex creatus fuit; altera *de periculis ex copia subsidiorum in litterarum studio cavendis*. Quae tam ingratae fuissent litterae, quae conticescerent felici adeo faustoque tempore, quo multum jactata Austriacae domus fortuna praesidia stabilitatis suae adepta fuisse videbatur? Academia Pisana singularibus a Francisco Caesare aucta beneficiis, officium gratulationis lubens meritoque persolvit, ac vehementer gavisa est, cum intellexit se prudentem iam judicio et gratam in munere habitam fuisse, quod mandasset Guadagnio, ut orationem diceret, editamque in vulgus ipsi Caesari nuncuparet. Usus est quidem in ea sententiarum gravitate, verborumque ponderibus, sed cum ei de-

esset

esset flumen ingenii, illa vis, ille sensus, quibus legentes audientesque rapimur, inflammamur, commovemur, laudamus magis, quam admiramur Guadagnii eloquentiam, ad quam enervandam valebat etiam frequens alienorum dictorum factorumque commemoratio. Qui jurisconsultorum mos magis etiam apparet in ea, quam secundo loco, sed praepostere, supra nominavimus, oratione. Verendum sane erat, ne subsidiorum copia, quae ad comparandas bonas artes hac aetate plurima suppetunt, retardarent magis, quam inflammarent adolescentium industriam. Nihil enim est tam sapienter inventum, nihil tam utile, quod vel ignavia perdere, vel stultitia in perniciem convertere non audeat. Dolens itaque Guadagnius esse multos, qui abutentes librorum copia, et iis praesertim, qui facilem, et quasi compendiarium ad sapientiam se viam monstraturos promittunt, ne malum latius manaret atque inveterasceret, eos convincendos suscepit, minime qui multa, sed qui utilia legerit sapientis nomine esse censendum; tardi ingenii esse rivulos consecrari, fontes rerum non videre, ac-

mulandam majorum nostrorum diligentiam atque industriam, qui in litteris Graecis atque Latinis addiscendis, qui in noscendis, perscrutandis, pervolutandis gravissimis auctoribus et magistris intelligendi atque dicendi, quique in jaciendis stabiliendisque disciplinarum fundamentis omnem aetatem contrivere. Illi, qui epitomas, qui versiones, qui dictionaria, ut loquuntur, amant, questi sunt cum Guadagnio, quod extorquere e manibus hominum conatus esset utilissima instrumenta, quae, licet per ea minime assequamur quae sunt recondita et abstrusa in litteris, efficiunt tamen ne harum plane rudes simus et ignari, et ne facile decipiamur ab iis, qui fallacissime venditant ingenium atque doctrinam. Horum voces haud omnino contemnendas esse putavit Guadagnius; quare ut cum iisdem in gratiam rediret, alteram dixit orationem, qua non Carneadeo more quod in priori probaverat oppugnavit, sed hujus severitatem mitigavit, ut vel eorum assensionem captaverit, qui diuturnum laborem reformidantes nil curare videntur, nisi ut leviter tincti sint litteris. Sed haec ora-

tio minime in vulgus est edita, cum veretur fortasse Auctor, ut quod dixit non perinde intelligeretur a doctioribus, atque ipse senserat. Nec sane verisimile erat, hominem, qui, quoad vita suppetitavit, egit acerrime, ut non solum juris prudentiae, sed et interiorum litterarum penetralia sibi paterent, blandiri voluisse discipulorum timiditati atque ignaviae. Quod in se ipso esset expertus quantum ad percipiendam colendamque virtutem adjuvare possunt litterae, saepe et libenter carpebat nonnullorum malitiam, qui iis ita abutuntur, ut teneros animos avocent a religione, eorumque dolos, machinas, fallacias, praestigias dum patefaciebat, se nihil tam studuisse ostendebat, quam ut secum semper adesset pietas in Deum, in homines caritas, reliquaeque virtutes, in quibus perfecti Christiani laus continetur. Minime miraberis hominem gravitati deditum frequentasse theatra. Mirifice enim delectabatur musica, neque indignum sapiente existimabat paullisper relaxare animum, et dare se jucunditati. Adde quod cum lumen lucernae diu ferre non possent ejus oculi, nec aliud

haberet, quo senectutem suam oblectaret, aurium sensui aliquid se posse dare arbi-
trabatur. Verum, ut ut haec judicentur, ca-
vit semper Guadagnius ne quid ageret aut
diceret, quod dedecere prudentioribus vide-
retur. Omnino si quicquam est decorum,
nihil est profecto magis quam aequabilitas
universae vitae, tum singularum actionum,
quodque ita vixerit Guadagnius ad LXXXI.
usque annum, ut ejus vel primum aetatis
tempus palam fuerit ad castimoniae, integri-
tatis atque innocentiae exemplum divulgatum,
semperque in rebus optimis constans virtu-
tum laude creverit, non tam praeconio, quam
admiratione dignum existimamus. Aliorum
gloriae ac laudi tam aberat, ut invideret,
ut illi vitio verteretur, quod effusius fave-
re videretur vel iis, qui mediocriter docti e-
rant. Cum animum gereret apertum et sim-
plicem, simulationem dissimulationemque ex
omni vita tolli optasset. Verum, quoniam non
vivitur cum perfectis hominibus, is, qui cete-
ris cavere didicerat, non satis sibi, ne de-
ciperetur, cavit. Parsimonia et diligentia de-
lectabatur, quarum fructus aut pauperes, aut

propinquitatibus affinitatibusque conjuncti percipiebant. Ad omnem humanitatem facilitatemque proclivis facile sibi parabat amicos, retinebatque fide et caritate singulari. Vel desertus ab nonnullorum officiis, quorum famae parco, dum illos non nomino, in sua erga ipsos voluntate permansit. Sic se gerendo bonam famam honorum, quæ sola vere gloria nominatur, consecutus est, tantumque ei tribuebatur, ut in ejus consilio antiquæ residere virtutis memoria videretur. Robur ejus animi nec senectute, nec valetudinis incommodis fractum aut imminutum est. Sancte ac placide, uti vixerat, mortem obivit. Hanc fortasse maturavit gravis cibus, quo ventris fluxiones, quibus sæpe laborabat, sanari posse speravit. Adfuit morienti ejus frater, heres et collega Carolus Guadagnius, homo doctrina in physicis rebus clarus, qui ut memoria posteris proderetur meritorum illius in se, in litteras atque in Academiam Pisanam, cenotaphium eidem posuit in sepulcreto, quod *Campum Sanctum* dicimus, in quo hæc vere magis, quam eleganter scripta leguntur.

LEOPOLDO . ANDR. GVADAGNIO
 CIVI . FLOR.
 JOSEPHI . AVERANII . JVRIS . CAESAREI
 ET . ANTONII . MARIAE . SALVINII
 GRAECAR. LITTER. ANTECESSORVM
 AVDITORI . SOLERTISSIMO
 JVRIS . PRVDENTIAM
 ET. PANDECTARVM. INTERPRETATIONEM
 IN . PISANO . ARCHIGYMNASIO
 LIII. ANNOS . PVBLICE . PROFESSO
 LITTERARVM . OMNIVM . MAGIS
 RECONDITARVM . PERITISSIMO
 DOCILI . PROBO . MITI . PIO
 LXXXI. AN. NATO
 CAROLVS . ALFONSVS . GVADAGNIVS
 IN . EADEM . ACADEMIA
 EXPERIM. PHYSICES . PROFESSOR
 FRATRI . AMANTISSIMO
 PRID. NON. MART. AN. AERAE CHRIST.
 MDCCLXXXV. DEMORTVO
 M. P.

ANGELUS FABRONIUS

GUIDONI SAVINIO

ACADEMIAE SENENSIS CURATORI

S. P. D.

Quam ex historia percipiatur jucunditatis et fructus, nemo est qui ignoret, a qua siquis abhorre se dicat, parum aberit, quin ipse se ne hominem quidem esse fateatur. Vel ipsi pueri, in quibus naturae vis maxime elucet, narratiunculis delectantur; homines vero vel a-grestiores scire aliquid semper cupiunt earum rerum, quae gestae sunt, quas qui narrare solent opportune et in loco, quamvis non utantur sermone historico, sed quotidiano, eorum omnes colloquia congressusque requirunt. Sed de jucunditate suo quisque sensu judicare facile poterit, de utilitate non item. Mitto jam quod ille apud Platonem Aegyptius Sacerdos Soloni dixisse fertur, semper pueros esse, qui vetustatis cognitione careant: illius quidem omnium humanarum rerum moderatricis prudentiae, unde major vis

quam ex historia colligi potest? Quanquam non certa quadam et immutabili lege omnes res humanae reguntur, magnaque earum varietas et inconstantia est, plerumque tamen e similibus similia existunt, neque ulla certior regula est iudicandi quo quaeque res evasura sit, quam considerare quid praeteritis temporibus acciderit, quidque ex iisdem fluxerit caussis: inde quod divinare, quod imitari, quod vitare debeas capies. Porro is, qui diu diligenterque pervolvaverit historiae monumenta, se non unius circumdatum moenibus loci, sed civem totius mundi agnoverit, videbiturque sibi omnibus aetatibus vixisse, omnes regiones perlustrasse, omnibus publicis consiliis interfuisse, atque omnia, quae unquam contigerunt, spectasse, et dum contemplantur omnis exempli documenta, vere dictum fatebitur historiam esse testem temporum, lucem veritatis, vitam memoriae, magistram vitae, nuntiam vetustatis. Quondam historia nihil erat aliud nisi annalium confectio, quibus sine ullis orationis ornamentis monumenta temporum, hominum, locorum gestarumque rerum mandabantur. Graeci omnium fere doctrinarum atque artium inventores addidere historiae eloquentiam, et post Herodotum, qui prin-

ceps genus hoc ornavit, omnes, qui otium suum in scribenda historia consumpserunt, non tam instruere, quam delectare sibi proposuerunt lectores compositione verborum et copia varietateque sententiarum. Sero Romani Graecorum exemplum secuti sunt: nam, teste Cicerone, nec Cato, nec Pictor, nec Piso tenuerunt, quibus rebus ornetur oratio, et quamvis Antipater majorem sonum vocis addiderit historiae, nullo tamen modo aut cum Thucydide, aut cum Theopompo et Ephoro, qui duo ex Isocratis schola prodierunt, aut cum Xenophonte Socratico, aut cum Callisthene Aristotelio fuit comparandus. Admonere tantummodo reliquos potuit, ut accuratius scriberent; verum qui illi successere, Gellius, Clodius, Asellio, alique antiquorum languorem atque inscientiam consecrati sunt, et narratores rerum, minime vero exornatores facere. Cum omnium oculi in ipsum Ciceronem conjecti essent (quis enim magis quam orator formare orationem potest, eamque variare quasi quibusdam verborum sententiarumque insignibus?) et ab eo, quippe homine eloquentissimo, non modo postulare, sed et exigere viderentur, ut quod deerat Latinis literis ipse suppeditaret, respondebat se hoc munus

pairiae libentissime persoluturum, si sibi ullum tribueretur vacuum tempus et liberum, quod res tanta suscipi non posset occupata opera, impeditoque animo, nec absolvi nisi diuturno tempore maximoque labore. Quod a Romanis fuit relictum, perfecit tandem homo Patavinus, qui cum ab ultimis temporibus scribendi coepisset exordium, feliciter adeo tractavit Romanam historiam, ut in hoc etiam genere populus omni praeclara arte florentissimus nihil Graeciae concederet. Jungens ille eloquentiam cum prudentia, res non modo granditer narrat, ornat ubique, ac praesertim in iis concionibus, in quibus illae undae populares velut mare profundum atque immensum quodam quasi aestu effervescere videntur, sed etiam sapienter animadvertit quae vita, qui mores fuerint, per quos viros quibusque artibus domi militiaeque et partium ei aucium imperium fuerit; quomodo, labente paullatim disciplina, immutati sunt mores, deinde ut magis magisque lapsi sunt, tum ire coeperint praecipites, donec ad ea tempora, quibus homines nec vitia, nec remedia pati potuere, pervenium est. Est in magnis imperiis admirabilis quaedam continuatio seriesque rerum, sunt varii evenus, qui ab aliis pendent,

sunt varii mores, ac propterea varia fortuna, dominantur in iis modo studia bonorum, modo pravorum cupiditates, sunt jura et leges, quas aut aequitas, aut ambitio peperit; et qui caussarum omnium animo perspexerit colligationem, qui quae inter se distantia videntur, quomodo copulentur noverit, qui ad sensus voluntatesque hominum penetrare, deque eorum consiliis et actionibus recte judicare didicerit, qui liber sit a metu atque spe ne quid veri dicere non audeat, quiue adeo in scribendi arte profecerit, ut facta dictis exaequare, lectoremque delectare, atque apte instruere queat, is ad perfecti historici laudem poterit aspirare. Livius et Sallustius hoc maxime digni nomine existimantur. Magnus quoque est pictor Tacitus; et quia in picturis alios laeta et collustrata, alios horrida et opaca delectant, genus quoddam scribendi adhibuit acre atque vehemens, ac si ad eas ruinas, quibus Tiberii temporibus oppressum erat Romanum Imperium, aliquod acerbitatis addere voluisset. Creber est rerum frequentia, ut verborum prope numerum sententiarum numero consequatur, ita pressus, ut nescias, utrum res oratione, an verba sententiis illustrentur. Nihilo tamen minus

magis excellere videtur in detegendis latebris hominum voluntatum vitiorumque, quam in patefaciendis caussis motuum, fortunae, mutationumque imperii. Illa de Arminio, quem florentissimum imperium sub Tiberio lacessivisse dicit, illa de Nerva, quem res olim dissociabiles, principatum ac libertatem, miscuisse affirmat, illa de Trajano, quo imperante, ait securitatem publicam non spem modo ac vorum, sed ipsius voti fiduciam ac robur assumpsisse, in magna historico videntur, qui ignorare haud debet, cur ea, quae praeceperunt, facta sint, et ea, quae instant, fiant, et ea, quae consequentur, futura sint. Nam vita et salus imperiorum uni virtuti debetur, et ubi tyrannis, foeda vitia, malaeque artes dominantur, omnia sine ulla spe ad interitum ruere necesse est. Inter Latinos historicos Caesar etiam suspiciendus est ob elegantiam, perspicuitatem, brevitatemque, qua res a se gestas narrat. Ex ejus commentariis facile est divinare qui esset status Romanae Reipublicae, hanc magnitudine sua jam laborantem ad breve exiguumque tempus duraturam, et quae ad eandem evertendam admirabilis ille temporum et personarum moderator meditabatur. Illum legens,

*nusquam adhaerescas , disces semper aliquid ,
 semper delectaberis , et vere de illo iudicatum es-
 se affirmabis , quod dum voluit alios habere pa-
 rata unde sumerens qui vellent scribere historiam ,
 sanos quidem homines a scribendo deterruerit .
 Postquam Mediceorum praesertim opera Latinae
 litterae ad novam , ut ita dicam , vitam revoca-
 tae fuerunt , multi sane exitere , qui Latinos
 historicos non solum imitari , sed etiam aemula-
 ri siuduerunt . At quamvis cultiores Europae po-
 puli suos in hoc genere efferre possint scriptores ,
 magnos illos quidem , uti Thuanos , Sleidanos ,
 Oforios , Camerarios , Grotios , Buchananos , Ma-
 rianas , Iiali tamen , ut ego iudico , ceteris et co-
 pia et praestantia superiores fuerunt . Pauci imi-
 tati sunt Sallustium , plurimi Livium , quidam
 Caesarem , nulli , quod fortasse mireris , Tacitum ,
 quod aut noluerunt , aut , quod verosimilius est ,
 non potuerunt . Perplacent mihi praesertim ii ,
 qui nudum illud , et rectum et venustum scriben-
 di genus , quod tantopere in Caesare admiramur ,
 secuti sunt . Nihil est enim in historia , ut ait
 Cicero , pura et illufiri brevitate dulcius . Ex his ,
 siquid ego iudico , praestant Petrus Bembus et*

Casiruccius Bonamicus, quorum alter majorum memoria, alter nostra floruit: quanquam Bonamicus interdum ornatius dicit, quam simplex expositio gestarum rerum ferre videatur. Sunt enim quaedam in historia, quae ornamenta aut verborum, aut sententiarum requirunt, ut, tanquam pictae tabulae, bono in lumine collocentur. Miror equidem Jo. Lamium virum judicio eruditissimum secus de Bonamico judicasse. Fortasse illum ferociorem fecerunt praeclara de eodem testimonio, et dum minima inquirere et capere *, nullam probabilem rationem reddit, cur ille in optimis historiae scriptoribus pure et prorsus Latine loquentibus non sit numerandus. Sed Lamianorum rumor raucus jam factus est, et Bonamicii nomen vivet, dum honos habebitur Latinis litteris, quae utinam apud nos diu vigeant, nec abripi nos ab iis unquam sinamus vocibus illorum, qui magis audacter, quam perite affirmant, non peregrinos modo, sed et barbaros fore in a-

* Vid. *Novelle Letterarie* pubblicate in Firenze an. 1746. Tom. VII. p. 667. et an. 1751. Tom. XII. p. 381.

liena civitate , si alia quam nosira lingua in scribenda historia uitemur . Jucundum quidem mihi est vitam declarare Bonamicii ea lingua , quam ipse prae omnibus excoluit , atque hoc commentariolum si tibi probabitur , qui iudicio et doctrina polles , satis contra Latinae linguae hostes et munitus et septrus mihi esse videbor . Vale ; et mihi ignoscas volo , si de viris doctrina excellentibus scribens cogitem

. . . . Si qua me quoque possim
Tollere humo .

Id enim voto meo sufficit : illud supra votum

. . . Victorque virum volitare per ora
Quanquam ô !

Sed hoc satis est , quod prope sola historia (vides me C. Plinii Caecilii Secundi uti verbis) polliceri videtur .

Pisis Kal. Jan. MDCCLXXXVI.

CASTRUCCIUS ET PHILIPPUS
BONAMICII FRATRES.

LUcensium Civitas, quae semper floruit viris doctrina praestantibus, duos hac aetate tulit historicos Vincentium Lucchesium et Castruccium Bonamicium, quorum alter feliciter adeo Livianam majestatem, alter Caesarianam elegantiam expressit, ut omnes fere, qui id post ranatas litteras tentarunt, superasse videantur. Natus ille nobilissima familia, cautus, prudens, religiosus et castus, famam, quam illi litterae pepererunt, muneribus fortunae et virtutis auxit, hic celebritatem nominis a litteris tantummodo obtinuit, quae splendescabant fortasse hac ipsa de causa magis in eo, quod alieno omni ornamento, si tamen virtus a litteris sejungi potest, spoliatae essent. Ad has ab ineunte aetate durior visus est, quod non fastidiret modo, sed pene horreret grammaticorum tricas atque ineptias. Ut vero coepit intelligere ab optimis scriptoribus posse et debere repeti grammaticae praecepta,

et

omnem scribendi elegantiam, iis totum se se dedit. Ipse, ut erat avidissimus legendi, et memoriam singularem habebat rerum et verborum, scriptores cursim percurrebat quoscumque, habitabat autem et pernoctabat cum Cicerone, Caesare, Horatio atque Virgilio. Nam non eloquentiae modo studebat, sed etiam poesi, et cum verba et vim eorum, quos sibi proponebat ad imitandum, exprimere satageret, clarius explendescebat, quam generosi condiscipuli et vel praeceptores ipsi ferre possent. Attigit quoque Italicam poesin, et contempsit eos poetas, quibus tenues sunt copiae rerum, quamvis elegantia sermonis commendentur. Varietatem enim, magnificentiam et robur tam esse propria poesis arbitrabatur, ac si sine iis nulla esset; sciscitantibusque quem scriptorem potissimum imitaretur, respondebat se Dantem et Petrarcham ceterosque non Italos modo, sed et Latinos probatissimos sic respicere, ut ex multorum virtutibus suam quamdam propriam formam efficeret, quae novitate ipsa commendaretur. Tali modo confecto studiorum curriculo in patrio gymnasio, Pisas a

patre missus est, ut in ejus civitatis Academia philosophiae et juris prudentiae operam daret. Praeceptorem habuit juris civilis Salvatorem Olmetam Corsum hominem, qui licet non multa doctrina esset ornatus, maxime tamen putabatur idoneus ad inflammandos adolescentes acri et vehementi quadam incitatione. Frequentavit Guidonem Grandium, qui tum Italogum mathematicorum princeps habebatur, et erat. Sed praesertim audivit illos, qui humanioribus litteris excellere putabantur, quod has ad omnem vitam omnemque aetatem plurimum habere et adjumenti et ornamenti Bonamicius existimabat: nam cum legimus delectant, cum scribimus sunt necessariae. Cum minus ei probarentur, qui tum celebrabantur, philosophiae magistri, quod Gassendum tanquam ducem et signiferum sequebantur, quasi diuturnam sitim explere cupiens adiit libros Baconis a Verulamio, Lockii, ceterorumque philosophorum, quibus maxime Britannia gloriatur. Suspexit vero in iis non tam doctrinam, quam libertatem (quin de nonnullis licentiam dicam?) scribendi, solitusque erat appellare Britannos

prope jam solos vindices humanorum jurium et fugientis libertatis custodes. Post haec eum jussit pater versari in judiciis, et forensibus concertationibus, idque se facturum, asseveravit Bonamicus, ad sustentandam familiae egestatem. Sed cum coepisset iracundius respuere ineptias Pragmaticorum sive morose, ut putabatur, sive ingenuo, liberoque fastidio, neque a se obtinere posset, ut ullum cum iisdem commercium haberet, aliud iter atque aliam fortunam sibi tentandam esse putavit. Romam itaque cogitavit tanquam communem quamdam nationum, ac totius terrarum orbis patriam, ad quam omni tempore undique confluerunt viri ingenio, atque doctrina praestantes praemia virtutis a communi parente postulaturi. Eo cum venisset, nullo conciliatore, gratiam aucupatus est Cardinalis Nerei Corsinii, cujus summa erat potestas, Pontificatum Maximum illius Patruo, Clemente XII. gerente. Amabat litteras Corsinius, atque ut in Bonamico ingenium elucere vidit, ipsum ad laborem atque laudem excitavit. Factum vero ejusdem commendatione, ut Aeneas Sylvius Piccolomineus, quâ

Pontifici erat a Latinis epistolis, illo tantum studiorum et muneris adjutore uteretur. Quaerebat Piccolomineus ex elegantia Latine scribendi plausum et gloriam, et cum in vulgus edidisset Latinam orationem habitam in funere Friderici Augusti Saxonici Poloniae Regis, nobilem illam quidem et splendidam, sibi famam elegantissimi scriptoris confecisse gloriabatur. Sed Bonamicus ad omnem sermonem liber tenere se non potuit, quin aperte palamque affirmaret, se illius orationis opificem habendum; quam ob rem indignatus Piccolomineus eum domo sua abiire jussit. Quae priusquam acciderent, sui oratorii ingenii jam periculum fecerat Bonamicus. Latinas enim ediderat orationes duas, de laudibus Pontificis alteram, et pro Latii Academia, Melchiorre Polignachio auctore, instituta alteram. Quibus in orationibus impetus licet esset ingenii, et inchoata quaedam a natura eloquentiae imago, non vero perfecta, atque ex multarum rerum cognitione efflorescens, laudarunt tamen eas docti homines, atque indolem adolescentis ad magna nati excitandam esse arbitrabantur Pon-

tificis liberalitate. Bono eum esse animo iubebat Corsinius Cardinalis: spes aliqua ei ostendebatur a Cardinali Alberonio, si illius vitam ita describere voluisset, ut ejusdem magis ambitioni, quam historiae legibus serviret; nec deerant, qui, proposita mercede praemiorum, ejus operam in scribendis epistolis requirerent. Verum seu quod Urbanae fortunae cautiore et moderatiores homines desiderarent (nam Bonamicus morae impatiens et natura inconstans eos laedebat interdum, quos antea laudaverat) seu quod miserriam omnino esse putaret ambitionem honorumque contentionem, Urbem deserere deliberavit. Peropportune tum cecidit, ut femina Angla nobilitate, forma, ingenio atque opibus clara eum habere concupiverit Latinae linguae magistrum et iterum socium. Cum huic obsecutus fuisset, et multas Italicas urbes peragrasset, et Patavii etiam aliquamdiu consedisset captus praesertim Dominici Lazzarini doctrina, quem mortuum postea elegantissimis Latinis versibus laudavit, ne servituti (sic enim observantiam appellabat) assuescerot, se se in libertatem

vindicavit. Dum commorabatur cum ipsa femina in Etruria, timere debuit Fidei Quaesitorum severitatem ob licentiam sermonum. Nec sane vincula ulla ejus linguae injici posse videbantur, sive jocaretur (sales enim et aculeatas facetias amabat) sive de seriis rebus loqueretur, solitusque erat dicere Dei concessu atque munere datam hominibus libertatem, hujusque proprium esse sic vivere, sic loqui, ut volumus. Quam licentiam cum nunquam sibi praecidere vellet, quid erat, quod de inclementiore fortuna saepe quereretur? Vere enim dictum videtur: *sui cuique mores fingunt fortunam*. Non necesse arbitror recensere quam multa, quam varia, quam acerba perpeti debuerit Bonamicus, donec meliora per militiam sperare coepit. Quasi istud novae vitae initium esset, Petri Josephi nomen, quod datum ei fuit, cum an. MDCCX. in lucem venit, in illud Castrucci, ad renovandam, credo, Castrucci Castracani civis sui nobilissimi memoriam, commutavit, atque hoc praesertim litteratorum reipublicae notus esse videtur. Nam quae antea in vulgus sparserat seu car-

mina seu orationes , quanquam non minimi fuerint ad hominum famam , nullo tamen modo sunt comparanda cum iis , quae bellorum caussa scripsit , quibusque effectum est , ut non Latinus historicus unus e multis , potius inter multos prope singularis fuisse judicaretur . Bellum Italicum a morte Caroli VI. Caesaris Borbonios inter atque Austriacos conflatum ancipiti jampridem Marte ducebatur . Spoliare Carolum Borbonium Siciliae ac Neapolis regno , quod infeliciter decennio ante amiserant , Austriaci meditabantur , eaque propter armorum impetus ac furor ad Velitras diutius consedit , quae urbs a fortuna jam delecta esse videbatur , ubi exercituum vires atque artes palam ostenderentur , et extrema fortuna tentaretur . Is belli Veliterni exitus fuit , ut Carolus Rex , qui illi praefuit , Austriacos , magna accepta clade , aufugere coegerit , ac ipse victor maxima populi acclamatione Neapolim redierit . Haec Bonamicus , qui ejusdem Regis castra secutus fuerat merens stipendia sub Sancta-crucio Morillii Comite , et in exercitu Neapolitano Terraconensis alae Praefecto , digna

putavit, quae historiae monumentis per se mandarentur. Neque haesit qua praesertim lingua uteretur. Confidebat enim, si res ad Velitras gestae Latinis illustrarentur litteris, fore, ut latius dimanaret Ducis fama: praeter quam quod ei erat persuasum bellorum praeliorumque narrationes Latino sermone conscriptas alius quodammodo assurgere, et majorem inde assumere gravitatem et decus. Nihil sane nobilius, nihil elegantius libro, quem his de rebus anno MDCCXLVI. in vulgus edidit, et Trajano Aquavivae Cardinali amplissimo praefatione tanti viri majestate digna dedicavit. Nescio equidem an quicquam in hoc genere extet, quod cum eo comparari possit; et hic unus commentarius satis esset ad convincendam stultitiam recentiorum Gallorum, qui, cum in Latinis litteris hospites sint et peregrini, frustra eos laborare affirmant, qui illarum subsidio magna exprimere, et lectores in admirationem traducere confidunt. Non plausus modo, sed et praemia ex suo labore obtinuit Bonamicius. Nam relatus inter milites custodes Regis fuit, et ab eo grandi pecunia donatus,

Is quidem videbatur etiam ad eam laudem aspirare, ut non solum facta aliorum scribere, sed et fortia ipse facere posset. Sed nos in Bonamicio scriptorem, non auctorem rerum suspiciendum putamus, quanquam suspicari quis possit bellicam virtutem et scientiam illi non defuisse ex iis orationibus, quas Etrusco sermone habuit Neapoli coram lectissimos Duces: altera enim novam quamdam bellandi rationem suadebat; altera militarem Academiam recens institutam collaudabat. Porro qui utrumque praestiterit, hunc ex maxime raro hominum genere judicare debemus; sed Graecorum Romanorumque exempla hodierni Duces, quamvis bellandi virtute veteribus non sint inferiores, commendant magis, quam aemulantur. Concitatus Bonamicius amicorum cohortatione, ut in posterum famae diligentius serviret, iterum edere commentarium de rebus ad Velitras gestis, novam historiae materiem quaerere, et cum omnibus Musis rationem se habere cogitavit. Sed morum facienda erat mutatio, si parem ejus ingenio fortunam invenire voluisset. Cum e re sua et Philippi majoris

natu Fratris esse existimasset conciliare sibi benevolentiam Benedicti XIV., quo sane nemo sapientior, nemo doctior, celebrior nemo Pontificatum Maximum gessit, hujus laudes persecutus est splendida praefatione (nam sententiarum ornamentis et conformationibus omnibus praestat) qua secundam editionem historiae belli Veliterni illi nuncupavit. Gratum fuit Pontifici munus, quod laudum cupidus esset, et quod nemo tam sit aversus a litteris, qui non mandari iis aeternum laborum suorum praeconium facile patiatur. Quam ego lauream cum laudatione, aut quod telum cum vituperatione Bonamicii conferam? Saepe is in hujusmodi scriptionibus exercebatur, et mirabantur omnes illum posse non solum verba, sed vim exprimere Latinorum, quos sibi ad imitandum proponebat. Et sane quis illo magis Caesarianam elegantiam in historia, Ciceronianam majestatem in praefationibus, Horatianum robur in sermonibus, Catulli videres in elegiis effinxit? Italicam quoque excoluit linguam, cujus utilitatem, elegantiam atque dignitatem efferens quadam oratione, in La-

tinam, quod mireris, multa dixit. Sed hanc orationem scripsit non quo aperiret sententiam suam, sed ut concertationis studio oppugnaret alienam, solitus Carneadeo more modo hoc, modo illud defendere; in quo sane ejus ingenii magnitudo elucebat. Jam id gaudebat, quod nomen suum longe lateque vagaretur, quodque gloriae amplificandae occasionem sibi dedisset Carolus Neapolitanorum Rex jubens eundem illam Italici belli historiam Latine conscribere, quae consequeretur res apud Velitras gestas, quaeque Aquisgranensi pace, et Nicaeensi in Italia conventu terminabatur. Ea propter iter in Cisalpinam usque Galliam suscepit, ut et locorum, ubi majori ex parte bellum illud gestum est, perspecta natura, et hominum, qui eidem interfuerunt, explorato testimonio, non minus diligentiae, quam veritati consuleret. Opus sane memorandum ob fortunae varietatem, ob acerrimas pugnas, ob magnitudinem exercituum, ob claritatem Imperatorum, ob defensam strenuissime libertatem vel ab iis, qui imbelles putabantur, et ob pacem repente conclusam otiosis ma-

gis optandam , et defatigatis necessariam , quam cuiquam opportunam aut gloriosam bellantium . Totum autem opus tres in libros Auctor divisit , quorum primum in Caroli Regis , secundum in illius fratris Philippi Borbonii , tertium in Senatus Genuensis nomine apparere voluit . Quae duae res maxime historiam commendant , veritatem atque libertatem in illa scribenda se semper retinuisse profitetur Bonamicius . Sed homini , qui sub Borboniorum signis militabat , et qui iis beneficiorum vinculis erat obstrictus , nullius partis esse minime licebat , et quae adversus Austriacos dicit , inimico animo illum dicere facile judicabis . Quapropter multorum offensionem timere debuit ; sed in primis Antoniotus Botta optare videbatur , ut ille temeritatis suae poenas daret . Etsi quae fuit temeritas laudare fortitudinem , et si vis etiam ferociam civium , qui pro defensione avitae libertatis pugnarunt , vellicare imprudentiam Ducis , qui ignorans , quid in animis servitutis jugo minime assuetis possit libertatis amor , se eos nullo negotio domituros , atque nil ipsis nisi oculos ad lacrimandum relicturos

superbe jactabat? Ut facilius ac certius res
 Genuensium cognosceret, Castrucius ad eo-
 rum urbem venit, nec satis dici potest quam
 liberaliter ab iis fuerit tractatus, qui sibi ho-
 norificentissimum fore judicabant mandari e-
 leganter atque libere scriptis multa praeclara,
 quae pro patriae salute et dignitate gesserunt,
 ut non iracundiam injustam, sed meritam ac
 debitam fuisse constaret, utque memoria de-
 fensae, et exemplum defendendae libertatis
 posteritati proderetur. Profecto divinae cujus-
 dam virtutis fuisse videtur ferocientem ar-
 morum insolentia plebis faecem continuasse,
 eandem hostium reditu dejectam excitasse;
 sociis praesidium, civibus salutem attulisse,
 atque hostibus ipsis egregiam in foedere fi-
 dem, singularemque in bello constantiam o-
 stendisse. Dum autem Castrucius consilia,
 acta, eventus omnis Italici belli describit,
 dum eos laudat, qui prudentia, virtute, so-
 lertia, fide atque constantia inclaruere, ta-
 lem se scriptorem ostendit, ut non potuerit
 nisi a se ipso (sunt enim qui praeferunt com-
 mentarium de rebus ad Velitras gestis hisce
 de bello Italico commentariis) superari,

Hanc artem magnam habere difficultatem ex eo intelligi potest, quod Bonamicus multam commentationem atque meditationem adhibebat, antequam stilum verteret, et multas saepe horas laborabat, ut elegantiores dicendi modos inveniret, quanquam, sicut initio docuimus, ea esset memoria, ut nihil legeret, quod non in illa penitus insidere videretur. Praeter munus pecuniae, quod ei satis large dederunt Genuenses ob confectam historiam Italici belli, annulum magni pretii a Philippo Borbonio accepit, et Comitibus titulo honoratus est. A Neapolitanorum vero Rege Praefectus Fabrūm extra ordinem, et in oppido Barolo Quaesor perpetuus creatus est. Sed Principum donis non utebatur ut frugi ac temperans homo: profundebat quod habebat, sicque totam fere vitam in egestate degit. Audivi saepe illius fratrem Philippum querentem quod coactus fuisset sustinere intemperantias, sumptus, ac miseras non modo fratris, qui tamen illi erat carissimus propter ingenii bona, sed etiam feminae humili et obscuro loco natae, quam Romae dum erat (erat autem frequentissime vel post il-

lud tempus, quo ad Neapolitanorum Regem militatum abiit) in matrimonium duxerat . Ita fere sunt magna ingenia , ut negligent quae sunt prudentis hominis officia , in quibus exequendis vera gloria , felicitas vera continentur . At licet Bonamicium bona , quae in virtutibus sita sunt , modice tangerent , ii tamen , quibus utebatur familiaribus et quotidianis convictoribus , suspiciebant in ipso fidem , animum ab avaritia , ab invidia , ab assentatione , a gratia , a mendacio alienum , in notandis ceterorum vitiis acrem , in suis confitendis ingenuum , et ita apertum , ut nihil in ipso lateret . Famam certe ex eo quaesivit Castruccius , quod amicitiae officia diligenter sancteque coluit , et multorum benevolentiam ad vitae usque exitum retinuit . Amatoriis vero levitatibus deditus , in his inconstantiam probare videbatur , nec sane poetice lusit , cum ad Guidonem Savinium scribens dixit fuisse testes suorum amorum Padum , Tyberim , Tarum , Sebethum , Arnū , et praesertim Arbiā , quod est Senensium flumen . Absens amicos saepe compellabat tum Etruscis , tum Latinis carminibus , quorum

nonnulla typis impressa fuerunt ad declarandum poeticum ejusdem ingenium. Quod ex iis quidam fuerunt, qui se peti arbitrabantur a L. Sectani Q. F. ad Gajum Salmorium Sermonibus, Castruccijs suae fidelitatis suorumque nervorum esse existimavit eorum defensionem arripere cum accusatione Jesuitarum, qui illorum Sermonum, magnarumque turbarum atque rixarum auctores esse putabantur, et erant. Carmen itaque confecit multa elegantia, multoque sale atque lepore conspersum, quod inscribitur: *L. Sectani Q. F. de caussis superiorum quatuor Sermonum Sermo I.* Simulavit enim se esse eundem illum L. Sectanum suorum Sermonum caussas referentem: re autem vera in Sectanum illum ejusque socios acriter invehitur. Amicitiae etiam et aequitati binas consecravit orationes, quarum altera commilitonem suum Jo. Baptistam Guimbardium capitis reum egregie defendit, altera probavit non satis fuisse caussae, quare de fratribus Aviglianis uti homicidii reis praejudicaretur. Illud adhibuit dicendi genus, quod ad patrocinia mediocriter aptum illis videri potest, qui sententias

ex aliorum dictis atque auctoritatibus concludunt, et incondite efferunt. Sed qui elegantiam, nervos forenses, atque oratoria ornamenta amant, magnas sane tribuent laudes hisce Bonamicii orationibus, sed praesertim Guimbardianae, quae his virtutibus longe alteri praestat. Laetus Castruccius hujus successu, facile sivit eandem in vulgus spargi, beatas appellans illas civitates, in quibus eloquentia primas tenet, secundas juris civilis scientia. Profecto ut hominis decus est ingenium, sic ingenii lumen est eloquentia, qua cum se valere intelligeret Bonamicius, libenter omnes captabat occasiones illius exercendae non solum ad salutem et conservationem hominum, sed etiam ad propriam gloriam. Interdum ingenii exercendi gratia crimina fugebat; et narratur mihi finxisse etiam aliquando factam fuisse Lucae conjurationem, et hanc ita descripsisse, ut Sallustiano modo conjuratorum mores effinxerit; conciones interposuerit, et laudes eorum extulerit, qui contra civium perditorum popularem, turbulentamque dementiam a Senatu et bonorum causa steterunt. Mirum autem

minime videri debet, si ex hoc facto offensionem exceperit, quod eo indignius videbatur, quod a suis civibus nullo non tempore eximias erga se voluntatis significationes habuerat. Materies digna facultate et copia ejusdem esse videbatur narratio belli illius, quod inter Gallos Britannosque extiterat, quo in bello admirabilis sane fuit Gallorum virtus ob obsessam et captam minorem Bailearem insulam. Fertur Rex ipse Galliae ab Rege Neapolis petiisse uti ad se Bonamicius mitteret, de quo audierat sic praedicari, illum vel veteribus se aequasse in claris et fortibus viris, et factis commemorandis atque describendis. Sed cum Neapolitanorum Regis interesset animum a studio partium alienum ostendere, facile illi fuit causam recusandi invenire. Non est credibile quantum id doluerit Bonamicius, quod esset gloriae percupidus, et opum egentissimus; nec dubito quin id valuerit ad augenda valetudinis incommoda, quibus jamdiu coeperat affici. Ad haec levanda in patriam rediit, quod a Sebastiano Paullio Lucensi, quo medico et amico jamdiu utebatur, aliquid ad

spem ostendebatur. Sed malum inveteratum, factum erat robustius, vel ipsa medicina, quam inconsiderate adhibuerat Neapoli. Marina enim aqua intus inclusit, quod foras natura expellere coeperat. Qua ex re aqua intercus orta est, cujus morbo decessit VI. Kal. Martias an. MDCCLXI. Sepultus est in templo SS. Vincentii, et Anastasii, cum hac inscriptione:

Comiti . Castruccio . Bonamico

Lucensi . Francisci . F.

In . exercitu . Neapolitano

Praefecto . Fabrûm . Extr. Ord.

Et . in . oppido . Barolo . Quaest. perp.

Magni . ingenj . et . nominis . viro

A . Carolo . Borbonio

Primum . Neapolis . et . Siciliae

Mox . Hispaniarum . Rege

Et . a . Philippo . Fratре

Parmensium . et . Placentinorum

Duce

Necnon . a . Genuensium . Republica

Quorum . res . Italico . Bello . gestas

Latinis . commentariis . illustravit

100 CASTRUCCIUS ET PHILIPPUS

Singularibus . beneficiis . ornato

Qui . amissam

Diuturno . morbo . valetudinem

In . patrio . solo . curaturus

Summa . constantia . et . religionem

Decessit

An. ab . rep. sal. MDCCLXI.

Sext. Kal. Mart.

Vixit . ann. L.

Mens . IV. dies VI. hor. II. P. M.

Philippus . hujus . templi . Rector

Et . RP. Lucensis . negotiorum

Apud . Pont. Max. Procurator

Vincentius . J. C. et . Lugiensibus . Praefectus

Angelius . inter . custodes . corp.

Reg. Neapol. Ord. ducens

Comites

Fratri . desideratissimo

Et . sibi . suisque

Posterisque . eorum

MM. PP.

Qui . jacet . hoc tumulo . magnus

Castruccijs . ille . est

Orator . Vates . Miles . et . Historicus

Ipsè vero Castrucciùs fertur parasse sibi alteram inscriptionem, quae sic est .

Hic . jacet

Bonamicius . Comes

Qui . dum . personam . ludit

Militis . ducis . et . historici

Inanes . Regum . amicitias

Et . castra . sequutus

Castrucciùs . vocabatur

Deinde . gravissimo . oppressus . morbo

Valetudinem . quaerens

In . patrio . caelo

Mortem . et veritatem . invenit

Petrus . Josephus . Maria

Dici . et inscribi . voluit

Ut . quem . vulgus

Ludum . fortunae . appellabat


Scirent . omnes . esse

Divinae . misericordiae . trophaeum

Obiit XXV. Febr. MDCCLXI.

Optimus fuit portus poenitenti mutatio ingenii, ac vehementissimus dolor, quod sero intellexerit, pietatem, religionem, sanctita-

tem, quae omnia pure et caste Dei numini tribuenda sunt, adeo ad vitae felicitatem conducere, ut prae iis cetera omnia flocci facienda sint.

 Uoniam de Castruccio satis dictum putamus, non incommodum videtur non praeterire Philippum Bonamicium, quo facilius collatis utriusque studiis, qui praefendus sit possit judicari. Hujus quidem vitam elegantissime exposuit Jo. Baptista Montecatinius, vir non tam nobilitate, quam ingenio clarus, quem ita sequemur, ut coarctemus, nostrum tamen interdum interponentes judicium, quae ipse dilatavit. Natus est Philippus Lucae x. Kal. Mart. an. MDCCV. Maria Felice Rigola et Francisco Bonamico, qui honeste rem quae- rebat tenui mercatura facienda. Fuere veteribus temporibus plures Bonamicii doctrina maxime illustres, quos cum gentiles suos fuisse affirmaret Bonamicus, laudi magis suae, quam veritati serviebat. Gloriosum ei profecto fuit hos atque alios aemulari, ut ejus quoque nomen immortalitati commendaretur. Apparebat in puero docile ingenium, et quem ad

litteras natura pepererat, voluntas et fortuna exercuit. Nam degens in Seminario Lucensi usus est praeceptore Sancte Pierotto, quo sane nemo aptior extitit ad inflammandos adolescentium animos ad gloriam. At theologiae praeceptorem habuit Joannem Fidelem Rigolam matris suae fratrem, cui quidem sic deditus fuit, ut adolescens tristem et severum senem omnibus aequalibus suis in familiaritate anteposuerit. Complures annos in Seminario commoratus est, quod in eo praefecti, ut loquuntur, et magistri humaniorum litterarum munere, postquam Pierottus e vita excessit, functus fuerit. Ea propter cum esset acceptissimus Fabio Colloredo Lucensium Antistiti, ab eo inter minores Sacerdotes maximi Templi cooptatus fuit, et adhibitus ad acta Synodi, quam habuit an. MDCCXXXV. Latine conscribenda. Sed illud majus fortunae munus fuit, quod in eam civitatem se contulerit, quae nobilitate, humanitate, doctrina praestaret omnes, et ei unus ante alios fuerit carissimus, cujus magnum erat in ipsa nomen, magna auctoritas. Nam Jo. Vincentius Lucchesinius cum esset summa senectute, cu-

peretque aliquem habere, quo adiutore in scribendis Pontificis nomine epistolis, et familiari uteretur, Bonamicium ad se se Romam vocavit. Domus autem Lucchesinii, in qua quinquennium fuit, tanquam ludus quidam omnis doctrinae et virtutis esse potuit Bonamico. Nec tam vivo, quam mortuo praestitit singularem pietatem, cum eum funebri oratione laudasset, vitam, quam nos primo edidimus *, litteris mandasset, et in omni fere sermone multa et ornate et honorifice et grate de eodem praedicaret. Quasi sua res aut decus ageretur, vehementer laboravit Lucchesinius, ut Bonamico gradus aliquis fieret ad munus, quod ipse sustinebat. Quo ut se dignum ostenderet Bonamicus ipse, opus scribendum suscepit *de claris Pontificiarum epistolarum Scriptoribus*, quod edidit an. MDCCLIII., et Benedicto XIV. nuncupavit. In disputatione et dialogo (induxit enim enim cum Lucchesinio disputan-

* Extat in Vol. XI. hujus operis

tes Alexandrum Furietium et Cajetanum Fortium, homines auctoritate et doctrina summa, de quorum laudibus majora dici non possent, quam populus Romanus memoria retineat) ea persecutus est, quae necessaria putavit illis, qui magnum et difficillimum munus tuentur explicandi sensa Principis, quem omnes caerimoniarum et sacrorum et publicae religionis magistrum habere debent. Quod vero ex humanae divinaeque potestatis conjunctione existat Pontificia majestas, ex duplici quoque civilium sacrarumque rerum cognitione genus illud scribendi efflorescere debere ait Pontifici Maximo accommodatum, eoque dignum scriptore, quem Formandum susceperat. Profecto non satis laudari ii possunt, qui eloquentiam graviorum artium instrumento locupletare student; sed cum ego nunquam in Bonamico tam lautam supellectilem viderim, nec a philosophia, nec a jure Pontificio, nec a politica, nec ab historia satis ille esset instructus, vim eloquentiae rei natura, et dignitate muneris, cui ipsa servire debet, non facultate sua metitus fuisse videtur. Ex hoc tamen dialogo

facile intelliges elegantiam Latinorum verborum in sua potestate habuisse Bonamicius, nec Latinitate modo, sed et explanatione, quae reddit apertam et dilucidam orationem, ipsum valuisse. Cum vero scribenti de iis, qui Romanis Pontificibus ab epistolis fuerunt, magnus esset apertus campus, in quo ejus excurrere oratio, et diligentia atque eruditio cognosci potuissent, in exiguum sane gyrum se ipsum compulit Bonamicius, cum pauca vel de illustrioribus Scriptoribus exposuisset, et innumeros fere praetermisisset. Nemo ignorat quanta industria et patientia opus sit illi, qui vetera monumenta conquirat; nec profecto Bonamicius natura aptus erat ad id, solitus interdum rerum minutarum inquisitores, quae ad litterariam historiam pertinent, sicuti operarios barbarosque perstringere. Hujus libri confectio gratissima illi fuit, quod per eum famam elegantissimi scriptoris (etsi idipsum nonnullis aut severioribus, aut invidis visum sit secus) se collegisse arbitrabatur. Gratum quoque fuit Benedicto XIV. operis munus, sed qualis illius esset in Bonamicius animus ex eo cognosci po-

test, quod successor fuerit Lucchesinio Ca-
 jetanus Amatus, huic vero Thomas Emaldius
 (bini enim esse solent Pontifici ab episto-
 lis) neque quidquam aliud ab eodem Bona-
 micus ipse obtinuerit, nisi ut *Secretarii Bre-
 vium* (sic enim appellatur) *Substitutus* create-
 tur. Hanc exiguam Pontificis erga se volunta-
 tis significationem Bonamicus modo laudabat,
 modo carpebat. Non enim poterat esse obscu-
 rum quantum ipse iis, quos nominavi, La-
 tine scribendi elegantia et ingenii gloria an-
 tecelleret. Quae ut magis magisque univer-
 sae Urbis iudicio ac testimonio comproba-
 rentur, saepe aliquid dignum suo nomine, et
 praesertim Latina carmina mittebat. Propter
 elegantiam et sententiarum exornationem,
 quae non in imaginibus agentibus, acribus,
 insignitis consistit, sed quae in verbis et in
 rebus ipsis quamdam dignitatem habet, lau-
 dantur praesertim, quae condidit de maximo
 Templo Bononiensi a Benedicto instaurato;
 de Cardinalibus Henrico Enriquetio, Vincen-
 tio Malvitio et Antonio Maria Herba Odes-
 chalchio, de nuptiis Marci Antonii Burghe-
 sii et Annae Mariae Salviatae, atque Sigis-

mundi Chisii et Flaminiae Odeschalchiae .
 Nunquam aut libuit , aut licuit Bonamicio
 longius contexere carmen , quod minime in-
 flammaretur illo instinctu divino afflatuque ,
 ex quo magni atque uberes existunt poetae .
 Exornator tamen erat gravis rerum et lauda-
 tor magnificus , et cum saepe mitteret ami-
 cis et Maecenatibus suis munera epigramma-
 tum , perinde accipiebantur , ac si ab ipsis
 Latinis Musis missa fuissent . Per haec sibi
 sperabat fortunam Bonamicius , et multo et-
 iam magis , quod in ea urbe vivebat , quae
 omnibus communis semper patria fuit , quae-
 que crevisse , et ad summam amplitudinem
 pervenisse videtur , quod exteris hominibus ,
 quos virtus et doctrina commendabat , aditus
 ad honores semper patere voluerit . Memoria
 repetens Philippus illa Ciceronis in oratione
 " pro Plancio . " Illud sine ulla dubitatione
 " maxime nostrum fundavit imperium , et
 " populi Romani nomen auxit , quod prin-
 " ceps ille creator hujus Urbis Romulus foe-
 " dere Sabino docuit , etiam hostibus reci-
 " piendis augeri civitatem oportere " , haec
 explicare latius atque exornare Italica oratione

sibi proposuit, quam dixit in Academia Quirinorum, jubente Card. Nereo Corsinio, ipsius Academiae Dictatore perpetuo. Non verebatur ne non conveniret omnium auribus isthaec oratio: extitit tamen Cardinalis Sciarra Columna, qui per eam detractum aliquid Romanorum dignitati, nobilitatique fuisse questus graviter est; sed quam aut leviter, aut superbe, ex ipsa cognosci poterit oratione, quam in vulgus hac ipsa de causa edi voluit Bonamicus, cui id tantummodo doluit, quod inclementior fortuna beneficia aulae Romanae, quae sibi evigilanti in studio debita esse dicebat, et quae dormientibus saepe deferuntur, moraretur. Sed si quaerimus cur non tam cito ejus votis faverit fortuna, hanc fortasse causam reperiemus, quod se insolenter efferret, multos invidiose carperet, paucis parceret amicis, et saepe aut libere, aut accusatorie de potentium factis loqueretur. Quae non ita accipi volo, perinde ac si inimico animo a me dicerentur. Plurimi enim semper feci Bonamicum, amavi etiam ex eo tempore, quo simul saepe eramus apud Livium et Victoriam Odes-

chalcios, quos ita observabamus (ego quidem observabo dum vivam) ac si neque vir melior, nec femina lector in terris unquam extitissent. Sunt qui dicunt praecipuum munus sapientiae in arte vivendi consistere, et foedus quoddam esse debere sapientum, ut ne minus amicos, quam se ipsos diligant. Ergo is, quisquis est, qui tabescit invidia, qui ceterorum contemptu aut risu aut plausu captat, qui sitienter gloriam atque honores appetit, et aut alacritate futilli gestiens deliquescit, aut quemcumque casum fortuna invexerit, hunc apte et quieto non perfert, violare videtur officium et estimationem suam. Factum est tandem Vitaliani Borromei Cardinalis commendatione, ut a Clemente XIV., priusquam is egrederetur e comitiis, in quibus Pontifex Max. fuit renuntiatus, Bonamicius epistolarum, ut dicunt, Latinarum Secretarius crearetur, et tum se felicem putavit, si tamen potest ulla in humana vita felicitas esse. Perinde quasi Pontifex benevolentiam insignem in ipsam Rempublicam Lucensem declarasset, Senatus illi gratias agendas censuit, et Bonamicium

multo donatum auro honorificentissimo decreto inter Patricios retulit. Quod beneficium alia quoque liberalitate auxit. Vel ab eo tempore, quo Pontificatum Maximum gerebat Benedictus XIV. eum suis procurandis Romae negotiis (Agentem vocant) destinaverat. Quo in munere magni quidem ejus opera fuit. Egit enim prudenter et dextere, ut potestas esset Senatui Lucensi tres nominandi, e quibus unus a Romanis Pontificibus sacrorum Antistes eligeretur; ut jus, quod jamdiu ipsi exercuerant, discerpendi Archiepiscopatus fructus, et quibus vellent assignandi, circumscriberetur; et ut Lucensi civi in Romano Advocatorum, quos Concistoriales nominant, collegio semper locus pateret: quae quidem omnia et utilissima et honorificentissima habita fuerunt. Quoniam autem Bonamicus factus ab epistolis Pontificis, altero se exolvere munere, quod pro patria gerebat, coge batur, censuit Senatus habendam rationem illius in omni re, quae sibi cum Romanis Pontificibus esset tractanda, nec dubitavit unquam, quin optimi civis officia idem esset expleturus. Bonamicus cum

jam in ipsa Pontificis aula habitaret , non videbatur posse esse mediocribus rebus contentus , praesertim cum natura ad honorum cupiditatem trahi videretur . Itaque studuit vehementer , ut Pontificis animum sibi magis magisque conciliaret , eaque propter illi nuncupavit iterum editum a se opus *de claris Pontificiarum Epistolarum Scriptoribus* , quod etsi multis in locis emendavit , ac multum auxit , tale tamen non est , ut plane expleverit expectationem doctorum hominum . Quae Philippus addidit in illud , cum desidiosa delectatione vestigasse videtur , et ea jam erat aetate , ut consumere multum operae et laboris in aliqua re nec posset , nec vellet . Cum autem Clemens XIV. recuperasset Avinionensem et Beneventanam Provincias , ac pene oblitterasset memoriam praeteritarum offensionum , ob quas Galliae et Neapolis Reges illas regiones Sedi Apostolicae ademerant , Bonamicius versibus Latinis sane elegantibus celebravit lenitatem ac prudentiam singularem Pontificis , quibus mirum in modum utebatur ad conciliandam sibi potentiorum caritatem , et quod aptissimum erat iis temporibus

ribus, ad quiete vivendum. Hæc atque alia hujusmodi dicendo amplificare atque ornare potuisset Bonamicus jussus funebrem orationem habere de laudibus ejusdem Pontificis; sed quamvis hujus mores fuerint iusti, integri, religiosi, perferentes injuriarum, et ab omni cupiditate alieni, verendum tamen erat Oratori, ne in multos inofficiosus, et in se ipsum pene periculosus esset, si omnia, quæ constanter magnoque animo ille gessit, laudare voluisset. Quid? In eam potius partem peccavit, quæ est cautior, omniumque suorum dictorum, quod mireris, habuit moderatricem prudentiam. Sed tum bene audire ab omnibus, omnibus satisfacere adlaborabat, et cum nihil tam cuperet magis, quam leniter, eleganter et cum dignitate extremam senectam degere, videbatur coarguere superioris ætatis perniciosam culpam de omnibus libere ac licenter judicandi. Neque minus ex vero intellexit, praesertim cum coepit esse incommoda valetudine, omnia illa, quæ habent speciem gloriæ collecta inanissimis splendoris insignibus, brevitas, fugacia, caduca existimanda, verum-

que decus in una virtute positum esse. Quare omnia, quae ad Dei cultum pertinent, diligentissime pertractabat, et cum a Clemente XIV. lectus fuisset in Collegium Canoniorum Lateranensium, non tam illi jucundum erat fungi officio suo, quam molestum abstrahi ab eo aut muneris occupationibus, aut valetudinis incommodis. Religioni, ut et amicitiae in Odeschalchios in eo se servire putavit, quod vitam Laetine scribendam suscepisset Innocentii XI. qui ex illa gente fuit, quemque omnes sciunt fuisse exemplum innocentiae et sanctitatis. Commentarium in vulgus edidit an. MDCCLXXVI. et Pio VI. dedicavit. Ego autem dicam quod sentio. Omnem illam salubritatem Latinae dictionis quasi sanitatem retinuit semper Bonamicius. Non tamen ejus scripta, ut illa Castrucci, plane implent animum meum. Inops est sentiis, non semper videt quid deceat, quid non, raro aut nunquam ex magnarum reconditarumque rerum cognitione ejus oratio efflorescit, quae sit ars atque scientia magni scriptoris, ut agricolarum, quae circumcidat, amputet, erigat, extollat, adminiculetur pe-

ne ignorasse mihi videtur. Cum autem nonnulli dicunt Philippum Latinā elocutione (nam elocutio non solum habere debet elegantiam verborum, compositionem et dignitatem, sed etiam sententiarum accommodationem) vel ipsum superasse Castrucium, nimis admirabiliter, nimisque magnifice dicere videntur. Inter eos, quos Bonamicus laudatores habuit elegantiae et integritatis suae, magni, et merito quidem, facere videbatur Benedictum Stajum: ea enim est jucunda et gloriosa laus, quae ab iis proficiscitur, qui ipsi in laude vixerunt. Dicitur etiam Stajus auctor inscriptionis, quae legitur in marmoreo monumento, quod in Romano Lucensium Templo fratris filii eidem faciendum locarunt. En inscriptionis ipsius exemplum.

PHILIPPO BONAMICIO CIVI LVCENSI
OB SVA DE PATRIA APVD SANCTAM
SEDEM MERITA INTER PATRICIOS

ADLECTO

AB EPISTOLIS LATINIS SVMMORVM
PONTIFICVM CLEMENTIS XIV. ET PII VI,

CANONICO LATERANENSI

ET PRAELATO DOMESTICO

SCRIBENDI ELEGANTIA

EDITIS INGENII OPERIBVS CLARO

IN DEVM PIETATE IN AMICOS FIDE

CARITATE IN SVOS EXIMIO

MICHAEL CASTRYCCIUS

ANTONIVS FRATRVM FILII ET HERED.

G. A. M. PP.

ANNOS NATVS LXXV. M. IX. D. VIII.

OBIIT DIE XIII. NOVEMB.

MDCCLXXX.

OPERA EDITA

Bonamiciorum Fratrum opera quatuor voluminibus comprehensa edita fuerunt Lucae typis Josephi Rocchii an. 1784. in 8. En eorum indicem .

Vol. I. *Philippi Bonamicii de alarum Pontificiarum epistolarum Scriptoribus .*

----- *De vita Jo. Vinc. Lucchesinii .*

----- *De vita Castrucci Fratris .*

Vol. II. *De Innoc. XI P. M. vita .*

----- *Oratio in funere Jo. Vinc. Lucchesinii .*

----- *Oratio in funere Clementis XIV. P. M.*

----- *Epistolae .*

----- *Discorso recitato nell' Accademia Quirina .*

----- *Carmina .*

----- *Inscriptiones .*

Vol. III. *Castrucci Bonamicii de rebus ad Velitras gestis Commentarius .*

----- *Commentariorum de bello Italico Libri III.*

Vol. IV. *Opuscula Latina, quae soluta oratione scripta exsistunt .*

----- *Carmina .*

----- *Prose Toscane .*

----- *Versi Toscani .*

ANGELUS FABRONIUS

FRANCISCO DE ALBITIIS

IN ACADEMIA PISANA JURIS

PONTIFICII DOCTORI S. P. D.

Bene ac sapienter tu quidem iudicas, eruditissime Francisce, ex multis studiis, quae ingenio exercentur, in primis magno usui esse memoriam rerum gestarum, cujus de praestantia quia alias dixi, nunc silendum puto, simul ne per insolentiam quis existimet memet, studium meum saepius laudando, extollere. Quod si hominibus bonarum artium tanta cura esset, quantae nihil profuturas petunt, multi facta clarorum virorum investigarent, et historiae monumentis mandarent, quin pertimescere de fama et de honore debeant, cum historia quoquo modo scripta delectet, et in pretio habeatur. Sed in magna rerum copia amplissimoque campo aliud alii iter ingredi possunt. Qui de praeclara virtute atque gloria bonorum ita scribendum suscipiunt,

ut facta dictis exaequent, instructi esse debent ab eloquentia, quae res una est omnium difficillima. Sunt qui ab historia haud segregandam putant notitiam illarum rerum, quibus felicitas humani generis, et justum injustumque continetur, atque illarum artium, quibus domi militiaeque et partum et auctum imperium est; sunt alii, qui elaborant, ut penitus introspiciant mentes illorum, qui magna gesserunt, et ut noscant causas omnes vel casus, vel sapientiae, vel temeritatis; sunt qui bellorum jura, Imperatorum consilia et acta, et praeliorum eventus perpendere et narrare sibi proponunt, et hi nisi eloquentiam magnarum artium instrumento locupletaverint, risum magis quam admirationem movebunt; sunt demum, qui annosas quasdam chartas tangerant undique, et tanquam aliquod historicum opus obrudant; sunt etiam multi, qui nolint nisi annales conficere, et sine ullis ornamentis monumenta temporum, hominum, locorum, gestarumque rerum litteris consignare, et hos non oportebit esse doctrina imbutos: satis erit non esse mendaces. Magnum profecto munus illi sustinere mihi videntur, quibus propositum est aliqujus regni atque provinciae historiam ita nar-

rare, ut non modo omnes fortunae vicissitudines, sed omnia instituta et leges, quae varia fuerunt pro varia imperantium voluntate, morum mutationes, quid tempora uulerint, quid hominum libidines pepererint, persequantur. Fuit hoc omnium regnorum fatum, in quibus Romanorum jus diu viguit, ut non solum ejus vis paulatim infirmaretur, sed omnis pene ejus memoria sensim obscurata sit et evanuerit. Conjugendam propterea homines doctrina praestantes putarunt historiam Romanae juris prudentiae et legum, quae in illius locum successerunt, cum historia quorundam regnorum, et ii bene posuisse operam judicantur, qui causas tot mutationum acute investigarunt, vereque ac libere, detractis simulationum involucris, aperuerunt. Magna merito laus in hoc descriptionis genere tribui tolet *Arthurø Dukio* homini *Britanno*, qui de usu et auctoritate Juris Civilis Romanorum in *Dominiis Principum Christianorum* copiose disseruit; sed quod opus hujusmodi propter amplitudinem regionum magnas habebat difficultates, quas unus homo haud poterat exsorbere, ille quidem satisfecit *Britannis*, *Scotis*, *Hybernisque suis*, *Gallis*, *Germanis*, *Italīs*, atque

aliis exteris nationibus non item. Suds et Gallia ostentat Cironium, Costam et Doujatium, Germania Coringium, Batavia Voetium, Hispania Molinum et Cortesium, nec desunt historici hujusmodi multi Svecis, Danis et Norvegis. Quanquam Italia abundaverit semper omni praedara arte atque disciplina, pene tamen abesse videbatur literis nostris hujusmodi historia; et miror equidem, quippe cum sit opus, ut tibi quidem videri solet, unum hoc legale maxime, et apud nos magno semper in honore fuerit juris prudentia et diligentissime exculta, et dissimilitudo imperiorum varietatem juris habuerit maximam, multos allicere debebat rei utilitas, praestantia et copia, ut in hanc laborem impenderent, et ad illam caussarum operam narrationem adjungerent vicissitudinum, quas in Italia leges habuerunt. Quae quidem historia dat Principibus regnandi, dat populis praecepta parendi, propositisque optimarum institutionum exemplis, et praesentes et posteros longe omnes excitat ad justitiam colendam, sine qua nihil potest esse laudabile, et in qua virtutis splendor, et omnis humana felicitas continetur. Atqui si quaerimus quidnam sit illud, quo aetates quaedam ceteris

fortunatiores esse videantur, in eo positum repēriemus, quod nonnullae nactae sint scriptiores illustres, qui recte factorum memoriam scriptis commendarunt suis, ducueruntque homines unde quaeque lex orta sit, quid varietates, mutationesque temporum, morum atque imperiorum pepererint, quid superstitio, barbaries, et infinita dominandi habendique cupiditas suaserint, quid sancta jusserit Religio, quid non patiatur natura, quidque manens et non mutata ratio ex illo omnium bonorum fonte petita postulet atque exigat. Haec perpendens Petrus Jannonius Jurisconsultus Neapolitanus vehementer posse id probari populo suo arbitratus est, si eo tempore, quo sibi a causis vacatio dabatur, operam consumpsisset in inquirendis explicandisque legibus, quibus olim Neapolitanum regnum gubernabatur. Fuit profecto quaedam huic regno fortuna fatalis, ut a multis, moribus et lingua dissimilibus, subjiceretur. Paruit Romanis et Graecis, paruit Gothis et Longobardis, Northmannis et Svevis, dimicarunt de illo Romani Pontifices et Constantinopolitani Patriarchae, qui cum praetermitterent nihil quod ad augendam potentiam conducirer, novis institutionibus tem pu-

blicam miscuerunt, viguit diu in eo feudale jus, habuit dominos seu potius praedatores Gallos, Hispanos, Germanos, adeo varia et diversa genera bellorum et imperiorum passum est, ut perpetuis fortunae fluctibus objectum esse videretur. Quanta vero illa sunt, quae Clerici infirmarunt, commutarunt atque condiderunt, cum omni studio ad Principum jura occupanda incumberent! Haec in primis exponere sibi proposuit Jannonius, ducens inñium ab antiquissimis Ecclesiae legibus, et ab ultimis Christianae reipublicae temporibus, quod dum praestitit non tam libere, quam accusatorie, ut in fabulis Amphiarus, sic ille prudens et sciens ad pestem ante oculos positam profectus est. Sed ex eodem fonte intelligebat se haustum laudes suas, e quo fuisset aspersus; et nemo est tam inimicus illi caussae, quam suscepit Jannonius, qui illum veterum legum institutionumque non fuisse prudentissimum audeat dicere. Atque illum minus instituti sui poenituisse oportet, quod grate libenterque intellexerit trans mare transque alpes, quibus in locis praeclarissimae artes ac disciplinae vehementius jam quam in earum quasi parente atque altrice quondam Italia coluntur,

non reprehendi rationem scribendi suam, exemploque suo excitata fuisse multorum studia, ut civilem quarundam Provinciarum historiam illucis consignarent. Est boni civis, et eorum praesertim, qui in rebus publicis versantur, nosse exempla majorum, quibus regerentur magistratibus, quid habuerint militum, quid valerent aerario, quas artes excolerent, quos socios, quos amicos sibi adsciverint, quae habuerint in publicis institutis ac legibus, quae relictae sint et tradita de jure populi terrarum domini, quae corrumpere vel corrigere potuerint mores civitatis, quidque judicatum atque statutum fuerit de sacris et religiosis. Audivi equidem saepe te querentem pro summo tuo in patriam studio (nam illa non minus tibi cara est, quae genuit, quam illa, ex qua genus nobilissimum ducis) deesse hujusmodi scriptorem Pisanae civitati, quae quondam florentissima respublica fuit, neque in Graeca urbe viguisse Graecorum morem, apud quos Νομοφυλακίαι creabantur, qui non solum litteras, sed etiam facta hominum observabant, ad legesque revocabant. Nos quidem hoc sentimus: si tibi placuisset colligere monimenta Pisarum, quae ex maximo miserrimoque

*naufragio ad nos usque pervenerunt, effici potuisse, te patriam historiam tractante, ut nihil in hoc genere ceteris nationibus cederemus; nam ut ipse intelligo, et ex te persaepe audi-
 vi, sunt multae fabulae apud Troncium, ejus loquacitas sine nitore atque elegantiâ est, de institutis rerum publicarum, et de optimis legibus minime disputat; admonere tantummodo reliquos potuit, ut accuratius ac prudentius scriberent. Sed ut ad Jannonium revertamur, cujus causa hunc suscepimus sermonem, et de qua saepe colloqui solemus, est quaedam inter nos parva dissensio. Quae tandem inquires? Num satis ornate, ut docte scripserit. Habere ille quidem mihi videtur vires agrestes atque horridas, sed ab illo abest politior elegantia, quam adeo propriam historicorum esse reor, ut nisi, quemadmodum apud Graecos Thucydides et Xenophon, apud Romanos Sallustius, Caesar et Livius, apud nos, ne externa tantum offeramus, Machiavellius et Guicciardinus, delectu verborum ac sententiarum, quae scribunt ornent, magnorum Scriptorum nomen minime mereantur. Sed plura persequi tum magnitu-*

do epistolae prohibet, tum festinatio, ut ea explicem quae exorsum sum. Quare ad propositum veniamus, et in hoc commentariolo de Jannonii vita sequemur praesertim Leonardum Panziniū, qui magna cura atque diligentia collegit omnia, quae ad illam declarandam conducere posse videntur. Vale.

Pisis Id. Martii MDCCLXXXVI.

PETRUS JANNONIUS

Difficile est vitam hominis scribere, in quo aut laudando, aut reprehendendo nulli fere modum retinuisse videntur. Utcumque erit, juvabit tamen aliquid tentasse, et si in tanta aut reprehensorum, aut laudatorum turba perpauca veritatis cupidos invenero, qui aequo animo accipiant, quae ego liber a partibus dicturus sum, eorum testimonio ac judicio me consolabor. Sine dubio magnus homo et summe disciplinarum gravissimarum studiosus fuit Petrus Jannonius, qui si doctrinae parem habuisset aut fortunam aut prudentiam, non ille quidem major et celebrior (nam et ex culpa fama interdum invenitur) sed honoratior et felicior extitisset. Nam cum aetas illius in ea tempora incidisset, quibus periculosum erat, in Italia praesertim, quae sancta putabantur, quanquam cum religione nihil commune haberent, Romanorum Pontificum ceterorumque Ecclesiae Praesidium jura vel minimum laedere, ac veteres regum regnorumque casus adumbrare,

quidquid ipse reprehendit, malevolentia atque odio in Catholicam religionem dictum putabatur, eaque propter a potentioribus ita vexatus est, ut nunquam ex multis miseriis atque periculis requieverit. Patriam ipse habuit Ischitellam, quod est Apuliae ceterioris oppidulum illa in parte situm, quae Garganus mons dicitur, quo in loco ipse natus est non. Maii an. MDCLXXVI. matre Lucretia Migaglia, patre Scipione pharmacopola. Sunt qui tradunt hunc originem duxisse a Jannoniis-Alittis divitiis generisque nobilitate insignibus; sed tam aberat Scriptor noster, ut obrepere vellet ad existimationem hominum commendatione fumosarum imaginum, ut nobilitatem tanquam inane nomen et alienum honorem, nisi cum virtute conjungatur, irrideret. Institutus liberaliter fuit educatione doctrinaque puerili in domo paterna; cum vero ageret XVIII. aetatis annum, missus est a patre Neapolim, ut ibi nobilioribus disciplinis, ac praesertim juris prudentiae, vacaret. Nihil illi fortunatius fuit, quam tradi in disciplinam Dominico Aulizio, qui non solum iis facultatibus, iisque

que artibus, quibus instruuntur adolescentes ad usum forensem, abundabat, sed & Graecis Latinisque litteris, historia, philosophia, omnique fere liberali doctrina erat eruditissimus. Quod in adolescentulo fulgebat singularis indoles virtutis, magnaue gloriae cupiditas, erga eum semper se gessit Aulifius amice et benevole, vix ut id pati posse viderentur ceteri ejus generosi condiscipuli. Cum vero adeo profecisset in studiis tum philosophiae, tum juris prudentiae Jaunonius, ut famae se jam servire posse putaret, petiit a Cajetano Argentio, quo tum nemo illustrior erat in Neapolitano foro caussarum patronus, ut se quoque in eorum coetu locaret, quos solitus erat domi suae habere ad excolendas privatis exercitationibus nobiliores disciplinas. Tum se acerrimum propugnatorem ostendit cultioris juris prudentiae, cujus praeclarum specimen dedit, cum illustrandam suscepisset pluribus in dissertationibus l. 2. §. *de origine juris*. Indagatio rerum maximarum turbae jurisconsultorum occultissimarum habebat oblectationem; quapropter cum intermitteret nunquam studia eruditionis, et illa praesertim,

quae ad originem mutationemque legum, vicissitudinesque regnorum pertinebant, orta est in eo cupiditas, ipso Argento approbatore, Neapolitani regni civilem historiam scribendi, exponendique causas, quae impulerunt eos, qui molitionem novam quaerentes id machinati sunt, ut vetera instituta atque scita tollerentur. Nihil illi erat optatius, quam in suscepto jam opere dies noctesque consumere, sed coegerunt illum rei familiaris angustiae, ut doctrinam suam ex umbraculis eruditorum otioque domestico in solem, in pulverem, aciemque forensam educeret. Dominatur in foro Neapolitano non tam juris civilis prudentia, quam dicendi copia, ad quam cum a natura minime esset factus Janonius, neque ei multum operae dedisset, propterea quod melius esse putabat cogitare acute et prudenter, quam eloqui copiose, sero in claris causarum patronis numeratus est. Ut numeraretur factum est an. MDCCXVI: tum cum patrocinium suscepit oppidanorum S. Petri in Lama, a quibus eorum Dominus Lyciensis Episcopus olivarum decimam exigebat. Nam quae hac de causa edidit scri-

pta, quamvis non sint splendida verbis, sunt tamen acuta prudentiaeque plenissima; et ipsa adversarii celebritas plurimum valuit ad famam illi conciliandam. Quae priusquam acciderent, tenuis illi adeo erat fortuna, ut cum pecuniam non haberet ad emenda Cujacii opera, quae utiliora videbantur ipse sibi exscriberet. Post illam plures nobiles causas egit, et quae attulit in forum scripta, diligenter adeo elaborata erant, et tanquam elucubrata, ut nulla esset causa, quae non digna illius patrocinio esse videretur. Maxime vero perspiciebatur illius doctrina, si quidquam historicum, aut ad jus publicum et *feudale* pertinens illi esset tractandum: tum enim facile primas tenebat. Sed Jannonius quotidie et legens et scribens et commentans forensibus exercitationibus contentus non erat, & cum vacabat a foro, se in villam suburbanam quamdam Ischitellae Principis abdebat, ut ibi opus de civili historia Neapolitani regni urgeret. Verum parum abfuit quin illud e manibus deponeret, non solum quia res habebat multum difficultatis et laboris, sed etiam quia audierat Partenium Jannetta-

sum hominem Jesuitam, doctum illum quidem, et ab omni cura solutum, in historia Neapolitani regni scribenda plurimum laborare. At ubi haec in lucem hominum venit an. MDCCXIII. vidit statim Jannonius nihil esse caussae, quare de proposito deduceretur, cum aliud nihil egisset Jannettasius, nisi ut Latinae linguae ornamentis vestiret, quae Summonta Italica atque ineleganter exposuerat. Aderant etiam amici saepe ipsum rogando, ut ad umbilicum promissum opus adduceret, neque magnitudine rei deterreretur. Inter haec moritur Aulifius, neque mediocris suspicio fuit veneno necatum ipsum fuisse ab fratris filio Nicolao Ferrara-Aulifio. Ea propter hic in carcerem conjectus est, et cum pejora timeret, rogavit Jannonium, ut sui patrocinium susciperet. Hujus opera e vinculis emittitur, et ut gratus et pius erga eum cognosceretur, cui se vitam debere dicebat, donavit eidem magnam partem librorum, et omnia fere scripta patru sui. Suaviter & jucunde cum reminisceretur Jannonius quantum ipse in juris prudentia profecisset per Aulisium, ut illius doctrinae utilitas ad omnes dimanaret, typis imprimen-

da curavit quae ipse adnotaverat ad quosdam Pandectarum titulos, et quae de institutionibus juris Pontificii exposuerat. Sed quoniam tanto viro malevoli deesse non poterant, hi in vulgus spargere coeperunt, manu scripta Aulicii divitias opportunas fore Jannonio, ut laudaretur, utque Historiam Neapolitanam absolveret, quasi homo ingenio, doctrina atque studio abundans alienis subsidiis indiguisset. Nihil ille respondit, ut tam absurdam tamque inverecundam accusationem refelleret, et acrius in incepto permansit. Sed quod ab hoc illum saepe abstrahabant fori occupationes, videbatur accusare fortunam suam, quod vitam sustentare litibus et jurgiis cogeretur. Tantum ex his cepit utilitatis, ut festivam, quod jamdiu optaverat, sibi paraverit librorum copiam, et suburbanam villulam, ubi se oblectare sine interpellatoribus posset. Levabatur ejus animus se exercendo; et ne in una juris prudentia vitae tabernaculum collocasse videretur, interdum in antiquitatis et naturae investigatione versabatur. Est in manibus hominum epistola ad Nicolaum Cyrillum virum medicina et omni physica

doctrina clarissimum, qua ei quaerenti respondit, cur nix diutius maneat in ea Vesuvii montis parte, quae est inferior, quaeque flammam eructat, quam in superiori, ex qua ignis minime erumpit. Cujus rei causam invenit Petrus in arena, qua tegitur cacumen inferioris montis, per quam liquescens nix facile percolatur, cui aquae percolationi cum minime sit aptum saxum aut terreum solum superioris montis, inde fit, ut ubi nix in eo liquescere incipit, quae inde dilabitur aqua facile quod reliquum est nivis solvat. Egerat jam Petrus cum typographo de imprimenda sua civili Historia Neapolitana, cujus rei, approbante Nicolao Capasso viro sibi amicissimo et doctissimo, facultatem obtinuit ab Althano Card., qui Caesaris nomine ad Regni gubernacula sedebat. Emanavit itaque opus, in quo conficiendo viginti annos laboraverat, mense Martio an. MDCCXXIII. quod non minus segetem et materiem Auctoris gloriae, quam molestiarum acerbissimarum fuisse dixeris; de quo quidem nescio quemadmodum scribam, adeo multa, adeo magna sunt ea, quibus commendatur. Propositum

id quidem Auctori fuit, ut quoniam omnibus rerum Neapolitanarum Scriptoribus aut studium et cura, aut animus viresque defuerunt exponendi perpendendique leges, mores omnemque politiam nobilissimi regni, ipse hanc relictam partem expleret. Ea propter exordium capiens ab ultimis temporibus, quibus Graeca urbs suis regebatur institutis, donec in Romanorum potestatem ditionemque venit, diligenter inquirat quae propria Graecorum, quae Romanorum fuere, per quos Magistratus, per quas leges, quibusque artibus hi in uniuersa dominabantur Italia. Tali modo vestibulum et aditum illustrem fecit ad suam historiam, quae ab Constantini Magni imperio incipere videtur. Mens enim praesertim fuit Jannonio considerare mutationes, quas habuerunt Romanae leges, antiqui mores, omnisque civilis Reipublicae administratio a Christiana religione, et ab iis, qui sacrorum moderatores fuerunt, et quomodo, nato Pontificio jure, potestas Regulorum cecidit, convaluitque pene intermortuum jus Romanum. Nulla fere est res illustris, quae ab illo non sit notata, et quod difficillimum fuit,

sic Ecclesiasticae potestatis originem et progressus subtexit, ut ex eo possimus cognoscere quando conservata sit illa a sacerdotio et imperio conglutinata concordia, quando nonnullorum avaritia atque ambitione disjuncta, et quae inde manaverint quæstiones, discordiae atque mala. Dum rerum ordinem et vicissitudines declarat, conservat ubique rationem institutionemque suam perpendendi quid quamque rem secutum sit, quid veteribus institutis ac scitis sit contrarium, quid a majorum moribus discrepans, et quid aequitati consonum. Infinitum esset si vel summas rerum atque sententiarum attingere vellem, quae continentur in opere, quod narrat quid per xv. et amplius saecula domi militiaeque gestum sit per eos, qui in Neapolitano regno dominati sunt, quos magistratus, quaeque publica munera instituerint, quae fuerint jura Romanorum, Gothorum, Longobardorum, Northmannorum, Svevorum, ceterorumque, qui illis usque ad Austriacos successerunt, quae extiterint controversiae inter Occidentis et Orientis Patriarchas, et quomodo ii, qui in Ecclesiae castris militabant, se gesserint,

ut potestatem, jurisdictionem, bona atque divitias amplificarent. Homo ad scribendi licentiam liber testabatur Deum se aequitatis et veritatis causam defendere, et neminem laedere, nisi qui se ita offerret, ut in eum non invasisset, sed incurrisset illius oratio videretur. Verum si aequi esse voluerimus, fatebimur infenso atque inimico animo fuisse Jannonium in presbyteros et monachos, nihil illis indulsisse, et ubique virus acerbitalis suae sparsisse. Hic noster acerrimus objurgator melius quidem causae et famae suae consulisset, si a contumeliis atque conviciis abstinisset, et tristitiam severitatemque semper gravitate, atque rationum pondere firmasset. Praeter quam quod is, qui objurgare ceteros sibi proponit, etiam atque etiam cavere debet, ne ulla in re ipse labatur. Saepissime is errat in chronologia, quaedam magni momenti leviter tangit, raro vetustiora certioraque monumenta consulit, cum multa expiscatus esset, et surripuisset etiam, verba haud immutans, a Constantio, a Summonta, a Parrinio ac praesertim a Buffierio, qui omnes de Siculis Neapolitanisque rebus scripse-

runt, quid his debeat ingenue haud aperit, fastidiose interdum dicta jam repetit, aut minima sequitur, ut invidiam faciat sacris hominibus, utitur vero oratione, quae etiam si vim quamdam habeat, non est tamen puris et electis verbis composita, soluta et aequaliter fluens. Magnum et difficile est munus historiam scribere, majus etiam πολιτικόν opus efficere, atque ea persequi omnia, quae ex varietate temporum, imperiorum, legum, consuetudinum atque opinionum dimanarunt. Verum etsi non plane satisfecit Jannonius superioribus judicibus, multam tamen gloriam ex historia civili Neapolitani Regni, quam in IV. divisit volumina, collegit, et ii, qui refrenandam et coercendam putant nimiam Ecclesiasticorum potentiam, et jura Principum sarta et tecta esse volunt, maximum se accepisse a Jannonio beneficium praedicant, quod docuerit, quid in jure, aut in aequo verum & bonum aut esset, aut non esset. Magnam quoque attulisse utilitatem putatur iis, qui causas agunt et judicant in Neapolitano foro, quod complectens totam rationem universi juris ac legum, quibus civitas regeba-

tur, quid evanuerit vetustate & oblivione, quid imperantium voluntate immutatum, quidque retineatur adhuc, et retineri expediat declaravit. Haec respiciens ipsa civitas, et laudibus et dono, et dignitate patroni sui scriptorem remunerandum putavit (1). Quo testimonio cum ipse superbire videretur, ei dixisse fertur sapiens homo Argentus: *Nescio equidem gratuler ne tibi, an doleam: admodum enim vereor, ne, quam nunc in capite habes, laurea corona, spinea futura sit.* Praedictionem confirmavit eventus; nam paullo postquam opus in vulgus editum fuit, ex clamoribus illorum, qui sacris erant addicti, ferme tota urbe per-

A' dì 17. Marzo 1723. Si è appuntato d' eleggersi per Avvocato ordinario di questa fedelissima città il Mag. D. Pietro Giannone, ed il Mag. Segretario ne stenda la conclusione --- Si è appuntato, che il Mag. Razionale spedisca il mandato di ducati cento trentacinque a beneficio del Mag. Matteo Tassone per dovergli impiegare in compra di una galanteria d' argento per regalarsi in nome di questa fedelissima città al D. Pietro Giannone in segno di gratitudine per il libro composto dell' Istoria civile di Napoli, che può ridondare in tanto beneficio di questo Pubblico. Marchese Costanzo, Pignone, Serra, Pignatelli, De Maria. *Ex libro IV. Appuntamentorum* fol. 39. J. Velli Secret.

crebuit ab illo everti sacra et caerimonias; irrideri indulgentias, religiosas peregrinationes, sanctorum miracula, et illud praesertim ebullientis sanguinis, quod S. Januario tribui solet, et inexpiabiles strui infidias ad convellendam Christianam rempublicam, atque ea, quae majores nostri religionibus tuta nobis atque sancta esse voluerunt. Usque eo a Jesuitis praesertim commotus est populus, ut Jannonius quoties in publicum prodibat, clamore convicioque jactaretur, et cum timeret vel ipse Althanius Cardinalis, quo eruptura esset isthaec popularis audacia atque licentia, quaesivit a consiliariis suis quid sibi faciendum esse putarent. Fuerunt nonnullorum sententiae dandum in custodiam Jannonium; censuerunt alii vetandam operis venditionem, & quotquot invenirentur illius exemplaria in librariis officinis penes *Collaterale*, ut loquebantur, *Consilium* deponenda. Opportune hac de re admonitus Jannonius ab ejus amico Francisco Ventura, cujus magna erat in cognoscendis criminibus potestas, quotquot potuit clam recuperavit exemplaria, tacite approbantibus ipsis judicibus, quibus nil aliud erat propositum

nisi aut restinguere aut sedare tantam invidiæ flammam . Ea propter quidam religiosi homines, qui in publicis concionibus acerbe et contumeliose in Jannonium invecti fuerant , aut in exilium acti, aut minaciter, nisi linguae frenum injecissent , perterriti . Sed non propterea sedati animi fuere : exasperati etiam magis postquam episcopale fulmen emissum fuit in Nicolaum Nasum , quod Jannonii opus typis impressisset, non impetrata prius ab Archiepiscopo potestate. Cum interea hujus administri acerbiora Jannonio machinarentur , neque dubitarent ad illum perdendum opportunam fore occasionem proximum S. Januarii festum, eorum crudelibus consiliis occurrendum putavit . Adit itaque Althanium Cardinalem , exponit ei quanto in periculo versetur non aliam ob causam nisi quia patriae et principatus jura animose defendit , astutias , audaciam adversariorum aperit , populi levitatem ac superstitionem accusat , ab eoque petit ne se implorantem ejus auxilium deserat . Homo nullius animi , nulliusque consilii non tam de Jannonii vita , quam de sua timendum sibi arbitrabatur , si malevolentiae hominum in illum vi obsistere voluisset , qua-

re eundem ab se dimisit sine ulla rerum expectatione meliorum. Quod tamen periculo illius movebatur, suavit ipsi, ut se latebris alicujus domus occultaret, aut Vindobonam concederet, Caroli VI. Caesaris praesidium aequitatemque imploraturus. Id ut exequeretur accessit etiam auctoritas amicorum, quapropter III. Kal. Majas an. MDCCXXIII. clam Neapoli discessit. Hac ipsa die lata fuit sententia ab iis, qui pro Archiepiscopo judicabant, qua spretarum legum reus Jannonius declarabatur, quod facultatem minime obtinisset ab Archiepiscopo edendae Neapolitanae historiae, eaque propter cum ipso sic agendum, tanquam si illi aqua et igni interdictum esset (1). Citatus antea fuerat, sed non re-

(1) *Auctoritate nostra ordinaria, qua in his fungimur, excommunicamus, & excommunicatum declaramus, et ipso facto incursum in excommunicationem majorem latam & contentam in Concilio Lateranensi scss 10. necnon in Constitutione Eminentissimorum et Reverendissimorum Dominorum Cardinalium Archiepiscoporum Neapolitanorum praedecessorum, praesertim Synodo Dioecesi, Eminentissimi & Reverendissimi Card. Cantelmi tit. de Editione & usu librorum cap. 5. num. 2. & tandem latam & confirmatam ab hodierno Eminentissimo & Reverendissimo Card. Pigna-*

spondit, quod se esse absentem simulaverat. His auditis, exultare gaudio plebs, ultorem impietatis adesse dicere Deum, & rogare Magistratus, ut ex urbe exhaurirétur comitum Jannonii, si qui fuissent, Christianae reipublicae perniciosa sentina. Itineribus devliis ipse Manfredoniam venit, cujus civitatis Archiepiscopus, vir sapiens, et ab adolescentia Jannonio officiis, usu et consuetudine con-

tello Archiepiscopo, in Edicto ad hunc effectum lato & publicato die 3. mensis Augusti 1707. U. J. D. Petrum Giannone relatum et non comparentem & contumacem effectum, notorium transgressorem ordinationum contentarum in praedictis sacris Conciliis, constitutionibus & edictis, ex eo quia temere ausus fuit absque ullo examine, approbatione & licentia dicti Eminentissimi Domini Cardinalis Pignatelli Archiepiscopi, sive nostra, hic Neapoli propriis sumptibus imprimi facere, seu typis edere, & publicare opus quoddam ab ipso compositum in quatuor Tomos divisum, cui titulus est: *Historia Civile* &c. Qua quidem excommunicatione tandiu maneat irretitus, donec ab eodem Eminentissimo & Reverendissimo Domino Card. Archiepiscopo, cui illam reservamus, absolutionis beneficium meruerit obtinere. Careat interim consortio & communione Christianorum & sepultura Ecclesiastica, quatenus excommunicatus decesserit. Ita instante & petente Domino Fisco Curiae Archiepiscopalis Neapolis Antonius Buttone pro Curia Actorum Magister. Ciavarelli Notarius.

junctissimus, non mediocriter laboravit, ut posset ille sine periculo e regni finibus egredi. E Barolo, ubi aliquot dies periculose commorari coactus fuit, Tergeste navi advectus est, et tum paullulum respirare a metu coepit. Habitus ibi honorifice fuit ab optimatibus, ad quos fama illius doctrinae et calamitatum, quas perpeſsus fuerat, pervaserat; neque multo post Vindobonam pervenit. Qui ei machinabantur perniciem, nihil non egerunt, ut tota urbe spargeretur rumor illum, ficuti impietatis reum, sacris interdictum fuisse, atque gravissima culpa teneri, quod opus suum vulgasset, neque Archiepiscopo, neque Pro-Rege permittentibus. Non defuerunt verba & monumenta Jannonio, ut quid in hujusmodi accusatione falsum esset ostenderet, et aequis hominibus palam faceret ab adversariis suis calumniam religionis non religione, sed malevolentia comprobari. Sed quia nihil est tam volucre quam maledictum, nihil facilius emittitur, nihil citius excipitur, nihil latius dissipatur, minime est mirandum si quosdam potentiores, & illos praesertim, qui Jesuitis favebant, conciliari sibi posse despe-

raverit. Neque minus illius frater Carolus adlaborabat, ut elueret maculam illa Archiepiscopali sententia susceptam. Cujus in patronis si fuit etiam Argentus, magis fuit, ut ipse moleste ferre videretur insignem injuriam Petro illatam fuisse, quam ut propulsaret. Poenituit illum postea, quod languidiore studio fuisset in causa, in qua de honore amici, & de Regis jure agebatur; & quae dixit et gessit, postquam Althanius Cardinalis ejusdem caussae cognitionem mandavit iudicibus, qui e sanctoribus Magistratibus electi fuerant, ut suaderet nullam fuisse Archiepiscopo rationem sacris interdicensi Jannonio; & esse eorum, qui praesunt administrationi Reipublicae, videre ne quid haec a malis libris detrimenti capiat, neque posse Ecclesiarum Rectores hanc potestatem sibi arrogare, ejus pristinum in amicum animum comprobarunt. Verum haec antequam acciderent, actum cum Archiepiscopo fuit, ut Jannonium absolveret, quod illius postulationi concessit (1).

T. XIII. K

(1) Eminentissimo Signore. Mi viene scritto da Napoli d' essersi dalla Curia di V. E. proceduto contro di me.

non quia hanc aequam & honestam putabat, sed quia verebatur, ne lata a se sen-

a censure per avere io fatto stampare la mia opera della Storia Civile del Regno di Napoli senza licenza della medesima Arcivescovile Curia, la qual opera sottopongo alla censura della S. Madre Chiesa, se mai in quella vi fosse errore involontariamente trascorso. Mi dichiaro essere ciò succeduto per ignoranza, supponendo che detta licenza avesse dovuto andare a carico dell'impresore o del padrone della stampa; onde pentito ne chiedo perdono, supplicandola umilmente a voler dare gli ordini per la mia assoluzione, come io spero dalla somma sua benignità e clemenza; e riverentemente mi sottoscrivo &c. Vienna 2, Ottobre 1723.

Attenta supradicta copia epistolae U. J. Doctoris Petri Giannone transcriptae a suo originali, cum quo concordat, ejusdemque tenore involontarii erroris, benigne procedendo secundum regulam et viscera S. Matris Ecclesiae erga poenitentes, delegamus & committimus facultatem absolvendi praedictum oratorem cuicumque Confessario ab eo eligendo, approbato tamen ab Ordinario loci; conditione subiecta, ut in futurum abtineat similia perpetrare, & poenitentiam imponendam a Confessario adimpleat & satisfaciat &c., alias &c.

Datum Neapoli in nostro Archiepiscopali Palatio die 22. Octobris 1723.

Franciscus Cardinalis Pignatellus Archiepiscopus. De mandato Eminentiissimi & Reverendissimi Domini mei Archiepiscopi Jacobus Collex Secretarius.

tentia a Regiis iudicibus injusta, vitiosa atque irrita declararetur. Sed haec ipsa absolutio offendit animos majoris partis iudicum, & eorum, qui Vindobonae ad Caesarem de rebus Neapolitanis referebant; quare non mediocriter adlaborandum fuit Jannonio, ut his omnibus persuaderet non laedi per illam jura Regis, quod non publice, sed privatim ad levandam curam & angorem animi sui postulata & concessa fuerat. Non mediocriter etiam conducebant ad levamentum summorum hominum aut officia, aut testimonia, inter quos honoris causa nomino Blasium Garosolum et de Miro Monachum Cassinensem, qui praestare ceteris doctrina putabantur. Eo jam res deducta erat, ut confidere posset Janninius fore sibi gloriae adversariorum malitiam atque improbitatem, & declaratum iri a iudicibus, apud quos causa sua Neapoli agebatur, Regni leges ac jura Principis sua condemnatione violata fuisse. Sed ne iudicium pronuntiaretur, cum jam praejudicium adversus Archiepiscopum factum fuisset, obstitit Caesaris voluntas, qui de tota controversia tum Neapoli, tum Vindobonae fileri jussit,

instante maxime Perlasio Rialpi Marchione ; viro , in quo summa erat auctoritas atque amplitudo . Nam cum cupiditas honorum ejus filium Romam duxisset , ejus causa gratificari Romano Pontifici vehementer cupiebat . Et permagni quidem hujus intererat ita fieri , quod multorum malefactorum convictum Jannonium putabat , cum judicassent Quaesitores Fidei opus illius de Civili Historia Neapolitani Regni continere *doctrinas et propositiones quamp plurimas falsas , temerarias , scandalosas , seditiosas , per summam calumniam injurias omnibus Ecclesiae ordinibus , & toti Ecclesiasticae , praesertim S. Sedi Apostolicae , erroneas , schismaticas , atque impias et haereses ut minimum sapientes* , atque propterea illud e Christiana Republica , si fieri potuisset , omnino tollendum (1) . Non propterea Jannonium erubuisse atque expalluisse judicabis , at incredibili robore animi septus illud curabat unum , ut potentiorum benevolentiam & Caesaris patrocinium sibi conciliaret . Quod saepe Regum

(1) Hoc decretum interpositum fuit Kal. Quint. an. MDCCXIII.

animi occupantur vocibus eorum, quos audiunt, ut difficilis aditus veritati relinquatur, adhibuit Pium Nicolaum Garellium, quo medico Caesar utebatur, ut in hoc excitaret desiderium ipsum opus legendi, quod cum praestitisset, haud deserendum hominem putavit, qui animose & fortiter Regum jura defenderat. Quam voluntatem confirmarunt in eo testimonia et officia Zizendorffii, & praesertim Eugenii Sabaudi, quorum auctoritas magna quidem apud omnes, & in primis gravis erat. Post id cum saepius in conspectum ipsius Caesaris venisset, narravit ei, quid quisque adversariorum suorum voluerit, cogitarit, admiserit, & se retractaturum professus est, si quid forte ex calamo suo excidisset, quod non posset honeste vereque defendere. Sed plane illum intelligere volebat se tanta in invidiae flamma non futurum, si Clericorum et Monachorum moribus & consuetudinibus pepercisset; qua in re se Casfinii Cardinalis secutum esse exemplum dicebat, quo sane nihil acrius ad nimias Ecclesiasticorum libidines vituperandas. Proferebat etiam in medium auctoritatem Bossuetii, de

Marca, Thomasmii, aliorumque, ut plerasque suas sententias cum illorum iudicio mirifice congruere ostenderet. Sed quod hi rationibus, Jannonius impetu et ira saepe persequitur; qua de caussa iusta prudentum reprehensione non caruit. Placuit tandem Caesari praemio hominem afficere, quod esset et laborum fructus, & adversus pericula propugnaculum atque praesidium. Factum itaque decretum exeunte Octobre an. MDCCXXIV. quo Caesar ex aerario Siciliae quotannis pendi iussit Jannonio mille florenos, & quod honorificentissimis verbis conceptum fuit, ejus exemplar infra exscribere juvabit (1). Cum tanto Cae-

[1] *Avendo S. M. C. e C. presenti gl' importanti servigi fatti dall' Avvocato D. Pietro Giannone alla sua Real Corona per aver sostenuto con tanto vigore ne' suoi libri le sue regalie ed alte preminenze, avea risoluto S. M. che fosse impiegato in posto conveniente alla sua dottrina e merito. E perchè presentemente non vi è occasione di vacanza, ha stimato ordinare, che intanto la servisse in questa Corte presso la sua Imperial persona, somministrandogli per suo sostentamento fiorini 1000. l'anno da pagarsegli mese per mese. E perchè la precisa volontà è che con effetto gl' fossero pagati, comanda a' suoi Uffiziali, che dalla Cassa segreta de' Spagnuoli mese per mese se gli pagasse il contingente di fiorini 80, ovvero a sua propria elezione questo pa-*

saris beneficio se a morte ad vitam , a despe-
 ratione ad spem revocatum esse diceret , gau-
 deretque , quod in Germaniae luce cogno-
 sceretur , atque versaretur in summorum ho-
 minum vel flore , vel robore , omni mente &
 cogitatione exquirebat qua ratione suum gra-
 tum ac pium in Caesarem animum ostende-
 re , & ante collectam famam non modo con-
 servare , sed etiam augere posset . Tum opus
 de *Triregno* instituit , quod satis bellam esse
 materiem ajebat ad Regiae potestatis jura
 vindicanda . Ea propter Caesaream bibliothe-
 cam frequentabat , consulebat etiam , qui in
 his rebus peritissimi habebantur , et nulli par-
 cebat industriae , quo doctior in omnis juris
 scientia evaderet . Delectabatur etiam inda-
 gatione rerum politicarum , et de his sapien-
 ter judicasse , et multa acute ipsum prae-

X 4

*gamento si assegnasse sopra i diritti della Segreteria di Si-
 alia incorporati a S. M. colla precisa destinazione , non po-
 tè che ciò dovesse eseguirsi infino a tanto , che non farà il
 medesimo provveduto di posto onorevole e conveniente a' suoi
 meriti ed eminente dottrina . Vienna li 31. Ottobre 1724.
 Il Marchese di Rialp , Al Presidente del Supremo Consiglio
 di Spagna .*

vidisse ex ejus ad Carolum fratrem litteris intelligi potest. Ejus quoque operae & vigiliae deservebant amicis, civibus, iisque omnibus, qui illum sibi caussarum, quae Vin-
dobonae in Hispaniensi, ut vocabant, Con-
filio agebantur, patronum adsciscebant. Ma-
xime illustres fuerunt illae, quibus cogno-
scendum erat de publicis quibusdam juribus
(et cum de jurisdictione disputabat, prorsus
videbatur in suo regno versari) Calabrorum,
atque urbium Capuae, Cajetae & Ostanii,
nec non eae, quibus patrocinator est juribus
Montis Mileti, Madalonae et Ariciae Princi-
pum; et cum defensionem arripuisset testamen-
ti Urbani VIII. pro Maffeo Barberinio adver-
sus Corneliam Barberiniam, quae exhaeredare
ipsum volebat, propterea quia justo matrimo-
nio genitus haud erat, se ad respondendum
et ad agendum et ad cavendum peritissimum
ostendit. Neque est tacendum magni fuisse
Constantino Grimaldio operam Jannonii, sine
qua nimis adversariorum viribus (conspira-
verant enim adversus eum Althanius Cardi-
nalis, Romanus Pontifex, et Jesuitae, quos
praesertim insectatus fuerat iis in scriptis,

quibus oppugnandam susceperat philosophiam & theologiam Scholasticam) oppressus fuisset. Ab illo quoque, ut de ceteris fileam, qui ejus doctrinae plurimum tribuerunt, opem petiit Vanespenius contra potentissimorum hominum conspirationem, sperans Jannonium iisdem armis cum iis posse configere, quibus se ipsum texerat. Quanto autem ferocius ille Ecclesiasticorum potentiam atque artes oppugnabat, eo acrius illi exardescebant ad ultionem, & ii ipsi, qui antea cuniculis, nunc aperte & palam eundem petebant. Hos vero dum maledictis insectabatur, imitatus mihi fuisse videtur Sophocleum Philoctetem, qui accepta injuria ea spectacula quaesivit, quae ei acerba fuere. Primus omnium in certamen venit Philippus Anastasius Surrentinus Archiepiscopus, in quo tanta erat cupiditas dominandi specie religionis tuendae, ut semel iterumque Dioecesi sua et Regno abire coactus fuerit. Romae dum esset an. MDCCXXIV. *Apolo-*
giam quamdam in vulgus edidit, qua inter cetera contendebat Christum, minime vero Principes, dedisse Clericis potestatem exercendi iudicia, & coercendam esse petulantiam Jan-

nonii, ne contagio mali manaret latius, quod ausus fuisset tribuere Principibus quae Dei sunt. Facilis quidem & prompta fuit defensio dictorum Jannonii; ut vero injuriis, quae propositae fuerunt ab Anastasio, responderet, non admodum elaboravit, cum ex his intelligi posset ipsum impetu potius quodam animi atque odio, quam cogitatione et veri studio illam Apologiam exarasse. Gravius accipit Petrus ob violatam amicitiam, quae ab Octavio Ignatio Vitaliano, cujus opera usus fuerat in sua Civili Historia Neapolitani Regni edenda, adversus hanc scripta fuere. Spectabant haec maxime ad potestatem, quam, Northmannis & Svevis imperantibus, Magni Siciliae Cancellarii exercuerant in Clericos, qui in domo Principis habitabant, ad hujus potestatis originem, et ad causas, quibus ipsa tranfit in Regii Sacelli Praefectum. Merito quidem affirmavit Vitalianus male interpretatum fuisse Jannonium caput quoddam *Investiturae*, quam an. MCLXXXVIII. Innocentius III. Constantiae Imperatrici atque ejus filio Friderico II. concesserat, quam ob rem audacior factus alia male et injuste reprehend-

dit. Hujus inscitiam notavit Petrus, nec unquam pro sui defensione arma sumpsit, quin gladiatoriam iracundiam prae se tulerit: homo enim erat asper, & durus oratione & moribus, usque eo ut malediceret iis, qui contra se dicerent. Sed caussa etiam fuit major Jannonio de Sicula historia disserendi, cum jussus fuisset a Caesare jus suum persequi adversus Romanos Pontifices Clementem XI. et Benedictum XIII. qui Constitutiones promulgaverant ad abrogandam Monarchiam Siciliae, omne scilicet jus illud proprium Legatorum Pontificiorum, quod ab Urbano II. Siciliae Reges obtinuisse dicebantur. Diu haec controversia duravit, et quae scripto mandavit Petrus, ut probaret jus illud ratum esse debere, plausu maximo a Caesareis excepta fuere. Ex quo factum est, ut ipse cogitationem suscepit dilatandi quae antea coarctaverat, vulgandique opus Lipsiensibus typis. Sed istud latet adhuc in occulto, nec scimus ad quos ipsum pervenerit. Emanarunt interea Romae bina volumina, quae ita inscripta erant: *Riflessioni morali e teologiche sopra l' Istoria civile del Regno di Napoli esposte al pub-*

blico in più lettere familiari di due amici de Eusebio Filopatro. Auctor horum erat homo Neapolitanus atque Jesuita nomine Josephus Sanfelicius, qui et sua sponte, et multorum vocibus in illum furorem impulsus fuerat, ut Jannonium omni contumelia tanquam impietatis & seditionis reum perfringeret. Quod illa, quae ipse scripsit, sunt tota commentitia & vix digna lucubratione anicularum, risu a prudentioribus excepta sunt. Quid? Huic calix multum impingendus erat, ut plorare desineret? Sed nihil dulcis habebat in pectore Jannonius, qui cum solitus esset, sive haberet adversarium, sive non haberet, pugnacissime defendere sententiam suam, vehementer gavisus est se sibi obtulisse hominem insulsum, audacia et impudentia superbientem, quem atro dente peteret. Nec minus hujus impudicam impudentiam repressit Comes Harrachius, cui tradita fuerat, mortuo Althanio Card., rerum Neapolitanarum administratio. Nam ut ipse audivit ab iis, quos consulendos putavit, illo opere famam multorum, & sacra Principis jura violari, poenam constituit in eos, qui idem aut legissent,

aut retinuissent, aut vulgassent, et auctorem exilio mulctavit. De hoc nonnulli gravius decernendum putarunt: sed Pro-Rex se rogari fivit a Card. Cinfuegosio Caesaris ad Pontificem Legato, ut supplicis misereretur. Renovatae etiam veteres, quae obsoleverant, leges fuerunt, quibus vetabatur imprimi libros in Neapolitano regno, aut alibi impressos in illud comportari sine eorum, quibus ea res a Rege mandata esset, examine atque concessione (1). Atque ego Sanfelicii impudentiam non miror, at illos homines sapientissimos, quorum magna erat Romae auctoritas, miror, qui cum Jannonio luctari siverint Jesuitam imbellem atque anilis animi, qui sane effecit, ut adversarius suus exultaret audacius. Eo ipso tempore, quo se ad respondendum Petrus comparabat, epistolas a Garofalo accepit, quibus erudite atque acute coarguebantur Sanfelicii errores plurimi; sed non alieno egebat auxilio pugnacissimus homo, qui ex lateribus, atque

(1) Harum rerum narrationem a Capassio contextam vide sis in vol. Act. Lipsiensium, quod est de rebus an. 1729. p. 423.

lacertis suis nobilitatus erat. Texuit itaque opus, quod inscripsit; *Professione di Fede scritta da Pietro Giannone al P. Giuseppe Sanfelice Gesuita &c. co' dubbj propostigli intorno alla sua morale*. Minime dubitabis perpetua ironia usum fuisse Jannonium affirmantem se tandem ad sanam mentem et ad Catholicam Ecclesiam rediisse monitis Sanfelicii, et magistrum sibi fuisse illius opus, ut tribueret Romano Pontifici tanquam Deo omnium tum divinarum, tum humanarum rerum potestatem, ut Cardinales dignitate aut pares aut superiores Regibus esse censeret, ut sanctissima et omnino divina reputaret omnia religiosarum familiarum inventa, quae non ad colendam religionem, sed ad augendam potentiam atque divitias excogitata fuisse antea affirmaverat. Post id propius adoritur adversarium suum, et multa quae dixerat in historia civili iterat, ut probet nullam huic fuisse causam se calumniandi atque reprehendendi. Illud verò erimen de Epicurea philosophia non repellit a se, sed illudit tanquam frigidam et jejunam calumniam, et ubique genus ejusmodi descriptionis adhibet, ut trahat in odium non

modo adversarium suum, sed omnes eos, qui de rebus sacris et religiosis, omnique Pontificali jure opinionum commenta pepere-
runt. Fuit profecto Petrus in hos intemperantior quam debuit; sed se imitatore fuisse dicebat viri illustris Sancii, qui ad irridendas confutandasque calumnias Cardinalis Perronii Episcopi Eberovicensis similem *Fidei Professionem* ediderat (1). Scriptum suum cum misisset ad Capassium prudenter et amice ab illo admonitus fuit, ne illud in vulgus prodire sineret; quod si fecisset, novis profecto illum conflictatum iri molestiis per illos maxime religiosos homines, quos in odium atque in contemtionem adducere studebat: erigeret potius et confirmaret se ipsum, si qua subeunda dimicatio esset, ut Principum jura, quae cum Catholicae Ecclesiae juribus com-

(1) Haec ita inscribitur: *Confession Catholique du Sieur de Sancy, et declaration des causes tant d'Etat, que de Religion, qui l'ont mené à se remettre au giron de l'Eglise Romaine*. Multa etiam surripuisse videtur Jannoni-
us ex libro edito Parisiis an. MDCLXXVI. cum hoc titulo. *Les nouvelles lumieres politiques pour le gouvernement de l'Eglise, ou l'Evangile nouveau du Cardinal Pallavicini, revelé par lui dans son histoire du Concile de Trente*.

mixta sunt, defenderet. Tum, quod raro accidebat, passus est se moneri a viro sapientissimo; non ita tamen compressit opus, ut nunquam emanare posset, eidemque locus datus est eo in volumine, quod Jannonii *Opera posthuma* inscribitur. Potuisset quidem facile Jannonius nonnullorum reprehensiones contemnere, cum audiret tanta et tam praeclara de suo opere in Germania, in Gallia atque in Britannia fieri judicia, ut illud immortalitatem consecutum jam esse videretur. Plures etiam adlaborabant, ut illud ipsum in Latinam, in Britannicam, in Germanicam, atque in Gallicam linguas converterent, & Jacobus Ogilvius cum suam interpretationem Britannicam an. MDCCXXIX. vulgasset, laudem et utilitatem haud mediocrem ab ipsa accepit. Qua de re cum scriberet ad Jannonium, cum illo se partiri velle emolumenta sua dixit, mittens homini satis largum pecuniae munus cum quibusdam operis exemplaribus. Post haec in aciem dimicationemque venit Sebastianus Paulius Lucensis vir eruditus, neque infacundus ex ea familia, quae *Clericorum Regularium Congregationis Matris Dei*
ap.

appellatur. Edidit enim librum, cui, nulla scriptoris, loci atque temporis apposita nota, titulum fecit: *Annotazioni critiche sopra il nono libro del Tomo II. della Storia civile di Napoli del Sig. Pietro Giannone &c.* Par pari retulit Petrus, vulgato opusculo, quod inscripsit: *Risposta alle Annotazioni critiche sopra il nono libro della Storia civile del Regno di Napoli an. 1731.* Quod iracundi proprium est animi cupere, a quo laesus esse videatur, ei quam maximum dolorem inurere, Petrus persecutus est oratione sane feroci objurgatorem suum, sed quod ejus licentia nimium habere visa est acrimoniae viro prudentissimo Capassio, cujus judicium exquiserat, antequam librum emitteret, multis mitigationibus ipsam lenivit. Dolebat praesertim Jannonius, quod homo, quocum familiarissime Vindobonae vixerat, eo tempore, quo ille sacras ad Caesarem conciones habebat, repente, commutato animo, ad contrarias partes transierit; augebatque dolorem suspicio, quod Matthaeus Aegyptius aliique doctrina et gravitate clari homines ejus aut probaverint consilium, aut in re gerenda se adjutores prae buerint. Pauli

animadversiones spectabant maxime ad historiam Northmannorum, quam ita tractari a Janonio aiebat, ut plena errorum essent omnia. Defendit hic dicta a se, & eruditionis et argumentorum copia prudentioribus satisfecit (1). Tum etiam accuratius quoddam et exquisitius attulit dicendi genus, et leporem et

[1] Unus instar omnium erit Ludovicus Muratorius, qui hæc Grimaldio scripsit.

La risposta del P. Paoli, di cui mi ha favorito V. S. Illustrissima, mi è felicemente giunta. Mi son posto immediatamente a leggerla, e non me la ho potuto staccar dagli occhi, se non dopo aver letto l'ultime parole. L'Autore ha adoperato non il pettine, ma la striglia; e probabilmente il povero Religioso non tornerà al secondo assalto. Vero è, che egli con termini civili aveva fatta la sua critica, e pareva, che meriasse miglior trattamento; ma quel benedetto Vesuvio mette un gran fuoco in voi altri Signori. Mi scrive ella, che il Sig. Giannone ne è l'autore. Non l'avrei creduto, che lo stile mi pare assai diverso. Forse la collera l'avrà mutato. Certo è che chiunque ne sia il Campione, uomo è di polso, e che sa maneggiar l'erudizione. Però quantunque si tratti d'un amico mio, il quale m'incresce, che sia stato sì rudemente accolto, tuttavia la prego di ringraziar il Sig. D. Carlo, e l'Autore, perchè m'abbiano voluto spettatore di questa zuffa &c. Modena 7. Settembre 1732.

salem interdum consecutus est , quod delectatione aliqua alliciendos lectores putavit. Haec victoria superbum ingenium immodicamque linguam magis magisque acuit , et cum impune nemo se cum illo dimicaturum putaret , comprimebatur odium , quod Pontificallium jurium defensores conceperant. Sed fervidi animi vir non poterat conquiescere , omnesque captabat occasiones a se magis magisque abalienandi adversariorum animos . De iterum edendis epistolis Petri de Vineis Friderici II. Caesaris. Cancellarii cogitationem suscepit , et non mediocriter ea in re , quam tamen exitu non praestitit , elaboravit. Rogatu Castellii , Confilii Colateralis , ut vocabant , Regentis , cui postulanti nihil solitus erat recusare propter summam hominis auctoritatem et benevolentiam , libellum composuit , quem ita inscripsit : *Breve Relazione de' Configlj e Dicasterj della ciud di Vienna* . Extitit qui illum in Latinum verteret , & Auctor ipse typis imprimendum curavit. Venetiis cum hoc titulo : *Jani Peronini Jurisconsulti de Confiliis & Dicasteriis , quae in Urbe Vindobona habentur , liber singularis : Halae Magdeburgicae MDCCXXXII.*

Caussa illi fuit anagrammatis involucro tegendi suum nomen, quod verebatur odium multorum, ac praesertim Hispanorum, quos Caesar adhibebat in administratione rei publicae, quosque illo libro momorderat. Questi & alii sunt de Jani Perontini injuriis, & Vindobonensis Archiepiscopus & Pontificius Legatus de laesis ab eo suis juribus vehementer atque iracunde cum Caesare expostularunt. Neque defuerunt qui affirmarent eundem quaedam magni momenti, quae ad Aulicum, ut nominant, Consilium, aliaque majora Tribunalia pertinebant, praetermisisse, atque idcirco opus hujusmodi parvi esse pretii. Habuit alios aequiores judices Jannonius, neque facile dixeris, utrum ille magis praeconiis an objur- gationibus, amicitiiis an inimicitiiis claruerit. Efferebant praesertim quidquid ex illius officina prodibat Scriptores Actorum Lipsiensium, quorum in numero cum essent nonnulli, qui non tam inimico quam maledico dente carpenda susceperant gesta Romanorum Pontificum, iis libenter Petrus se culpaе socium adscribebat. Quapropter ut a Menckenio, quocum sibi erat epistolarum commercium, intellexit Joan-

nem Capium laborare in Lateranensis Concilii, quod a Benedicto XIII. anno MDCCXXV. habitum fuit, historia conscribenda, non pauca illi suppeditavit, quibus hanc pleniorē faceret. Quid? Nonne & illa tristia fuerunt quae exaravit, ut probaret ad Julium II. Pontificem pertinere illa Isaiae verba: *Perdam Babylonis nomen*, quae scripta leguntur in quodam Ludovici XII. Francorum Regis numismate? Quod haec ipsa fuerat Jacobi Augusti Thuani sententia, hujus operum editor Samuel Bucklejus Britannus magnum accessurum suae editioni ornamentum putavit, si Jannonii dissertationem cum iisdem operibus edidisset. Interim magna orta est controversia inter Clementem XII. & eos, qui res Neapolitani regni pro Caesare administrabant, caussa Beneventani Archiepiscopatus. Cum hoc privatus fuisset Card. Coscia, ejus in locum sublegit Pontifex Sinibaldum ab Auria Genuensem, qui nulla mora ad exequendum suum munus venit. Id ut auditum Neapoli fuit, extitere qui ad Pro-Regem, ejusque *Collaterale Consilium* referrent, prohibendum Archiepiscopum Beneventanum, cu-

jus ferme tota Dioecesis constat ex locis Neapolitano regno subjectis, quidquam in his conari adversus Caesaris leges. Hic enim edixerat Regni sacerdotia alienigenis haud danda esse, & sine sua confirmatione nullas fore Pontificias Constitutiones, ceteraque Romanae Curiae jussa, si quidquam contra rem suam, & de rebus & de personis, quae in ditione & potestate sua essent, decrevissent. Adversus haec Pontifex suum imperium, quod in Beneventano Principatu habet, jactabat; & ut suum jus teneret, & ut Neapolitanorum injuriam persequeretur, litteras ad Caesarem dedit. Neapolitanis advocatus venit Janninius, sed frustra, quamvis libellum exaraverit ut probaret, Archiepiscopum Beneventanum omnem vim sui juris in subjectos Regi populos amittere, nisi hujus voluntate comprobetur. Omnino is triumphare sibi videbatur, quoties se se illi occasio offerebat Pontificiam majestatem asperioribus verbis perfringendi. Sed quae sperabat praemia a Principibus, minime obtinuit; & postquam Neapolitanum regnum, quod accidit an. MDCCXXXIV., in Hispanorum potestatem

pervenit, tot difficultatibus affectus atque afflictus fuit, ut suae illum imprudentiae fortasse poenituerit. Quae ei jussu Caesaris quotannis pendebatur pecunia ab aerario Siciliae regni, hoc ammisso, solvi desiit, eaeque erant angustiae Caesarici aerarii, ut ille jam de sua fortuna desperaret. Itaque Neapolim cogitare coepit, hortantibus amicis, & stimulos addente fama, quae de bonitate & beneficentia et de studio in litteras Caroli Regis Borbonii percrebuerat. Dies, quo Vindobona discessit, fuit III. Kal. Sept. an. MDCCXXXIV. Paucis post diebus Tergeste pervenit, ubi cum biduum propter tempestatem fuisset, tandem Venetias post. Id. Septembr. appulit. Acceptus ibi hospitio fuit ab Angelo Pisano Senatore amplissimo, neque mediocribus honoribus affectus ab Galliarum & Hispaniarum Regum ad Venetorum Rempublicam Legatis. Sparsus interea rumor est ab illius inimicis eundem ab Caesarea bibliotheca abstulisse, & secum asportasse exemplar epistolarum FridERICI II. Imperatoris. Cum res ad aures ipsius Caesaris pervenisset, facile fuit Garellio, qui illi erat a bibliotheca, genus hujusmodi calli-

ditatis & calumniae in odium accusatorum retrahere. Non pari felicitate data est opera ab illius Neapolitanis amicis, Vincentio de Hippolytis, Nicolao Cyrillio, Francisco Bonocorio, Carolo Mauro & Caelestino Galliano, ut ei potestas permitteretur redeundi in patriam. Fieri id non poterat, quin gravis offensio concitaretur Romani Pontificis, & cum e re sua esse tum putaret Carolus Rex illius sibi conciliare voluntatem, de hoc placando, deque restituendo Jannonio se ne rogari quidem est passus. Tum hic, cum sine periculo Venetiis se posse commorari sibi persuaderet, hoc in loco tabernaculum vitae suae collocare deliberavit. Nec solum illum impulit ratio, ut ita faceret, sed etiam auctoritas summorum virorum, quos inter honoris caussa nomino Angelum Pisanium, Antonium Cornelium, Antonium Contium, & Dominicum Pasqualighium, qui etiam dederunt operam, ut ipse ad docendam juris prudentiam in Academia Patavina invitaretur. Sed malo consilio obstitit illorum studiis, & qui locus quietis & tranquillitatis plenissimus fore videbatur, in eo maximae moles mole-

stiarum, & turbulentissimae tempestates extiterunt. Cum conquiescerent nunquam ejus inimici, inter quos eminebant Jesuitae, memores quam multa non modo acute, sed etiam facete et ridicule in se ipsos collegerat, cum Sanfelicii accusationibus respondit, insurrabant quotidie potentiorum auribus haud ferendum hominem turbulentum, infidum, proptereaue Vindobonae desertum ab officiis amicorum, atque hac una re notum, quod petulantissime in sacros homines, in Romanos Pontifices, atque vel in ipsam Catholicam religionem esset invectus. Addebant etiam illum laesisse Venetae Reipublicae jura, cum in sua historia negasset huic ullum esse dominatum in Adriaticum mare, affirmavissetque quae acta Venetiis dicuntur Alexandrum inter Pontificem hujus nominis III. et Fredericum I. Caesarem, poeticis magis decora esse fabulis, quam incorruptis rerum gestarum monumentis tradi. Hanc accusationem, quam periculosam fore praevidebat, minime negligendam censuit. Libellum itaque in vulgus sparsit, qui postea inter ejus opera post-

huma relatus fuit (1), quo probavit nullam se injuriam fecisse Venetis, quod eorum jura aliis ex fontibus, hisque remotioribus, manarent, ad quos minime respexit, nec respicere debebat in sua Neapolitana historia conscribenda. De iis vero, quae convenisse inter Alexandrum Pontificem & Fridericum Caesarem nonnulli affirmabant, idem se judicasse ajebat, quod illustriores rerum Venetarum scriptores, & ipse Paullus Sarpus judicaverant. Haec prudentioribus idonea visa sunt ad liberandum culpa Jannonium, quare ejus inimici alios commoliti sunt dolos atque machinas ad eundem perdendum. Lex vetat optimates Venetos, et eos, quos hospites et contubernales habent, versari cum exterorum Principum Legatis. Quod hac in re

(1) Huic titulus est: *Risposta di Pietro Giannone Giureconsulto ed Avvocato Napoletano ad una lettera scrittagli da un suo Amico, nella quale gli avvisa la poca soddisfazione di alcuni in leggendo nel libro 13. della di lui Storia civile del Regno di Napoli al cap. I. la pretensione de' Napoletani intorno al dominio del mare Adriatico; e l'istoria de' trattati seguiti in Venezia con Federico I. Imperadore, e l'atto di Papa Alessandro III.*

parum cautus esse videretur Jannonius, essentque multi, qui omnia ejus facta atque dicta explorarent ac maligne interpretarentur, capta hinc caussa fuit eundem apud Inquisitores criminandi. Horum jussu dum noctu ex domo Josephi Terzii caussarum patroni nobilissimi domum rediret (accidit hoc id. Sept. an. MDCCXXXV.) a licitoribus comprehenditur, rapitur ad tribunal, et tota Veneta ditione statim exulare jubetur. Parata erat navis ad ipsum transportandum, et cum appuisset ad Ferrariensem Provinciam, ibi solus relictus est. Graves rumores tota urbe sparsi fuerunt; sed brevi apparuit non satis justam fuisse causam tantae severitatis exercendae in hominem magis fortuna, ut plerique affirmabant, quam culpa calamitosum, cui Pontificii crimini dabant quod viveret, aut aliquo in loco conquiesceret. Mutato nomine, Mutinam venit, quo in loco quadraginta & amplius dies fuit, Venetorum praesertim amicorum liberalitate sustentatus. A Pisanio etiam, qui erepta ejus scripta recuperavit, haec, libros, modicamque suppellectilem accepit. Venit quoque ad ipsam Joannes filius, quem

ex Elisabetha Castellia genuerat. Ut illum levavit hujus adventus, sic afflixit miserrima ejusdem conditio, quasi ea lege natus esset, ut omnibus telis fortunae ejus vita, non secus ac paterna, proposita esset. Quod ei spes aliqua ostendebatur, res suas meliore loco fore Mediolani, eo, exeunte Octobre, venit. Commendatione Trivultii Principis, quocum intime Venetiis vixerat, ab hujus uxore, qua nulla erat femina lectior, aliisque genere, & doctrina insignibus Mediolanensibus honorificentissime tractatus fuit. Fortuna & jure belli regnabat tum in Mediolanensi Provincia Sardiniae Rex, cujus voluntatem ut sibi conciliaret Petrus, Augustam usque Taurinorum accedere deliberavit. Vix eo pervenit cum audivit jussisse jam Regem ipsum, ut ille Mediolano, omnique sua ditione exularet, quod non odio in Jannonium adductus fecit, sed cupiditate gratificandi Romano Pontifici, quocum de gravissimis rebus tractabat. Tum intellexit Petrus nullum esse in Italia locum, ubi ipse consistere posset, quare Genevam concessit invitatus non tam loci amoenitate, & aquis Helvetiorum legi-

bus, quam praemiis, quae illi proponebantur a Busquetio bibliopola, si de emendandis, augendis, atque iterum edendis scriptis suis laborem suscepisset. Non est credibile quantum ei licentiae, seu potius audaciae dederit Helvetiorum propria libertas, & domesticus cum haereticis usus. Nihil potius habuit quam ut absolveret duodecim ante annos inchoatum opus, quod inscripsit *il Triegno*, propterea quia de tribus regnis in eo agebat, terreno scilicet, caelesti et Pontificio, quibus totidem libros assignavit. Leonardus Panzinius, qui Jannonii vitam Italico sermone diligentissime atque copiosissime exposuit, formam non modo hujus operis adumbravit, sed declaravit omnia pene, quae in eo continentur, qua re quidem parum auctoris famae consuluit. Tum enim cognitum est Jannonium a se ipso, a christianis institutis, atque a sua dignitate defecisse. Turpiter ubique errat, dogmata omnium gentium catholicarum confirmata consensu convellere voluisse videtur: omnino nihil fieri poterat miserius, nihil perditius, nihil foedius. Ut nonnulla exempli caussa ponamus, cum Calvini-

flis et Sacramentariis Jannonius consentire videtur in eo quod pertinet ad Eucharistiam, Poenitentiam, Purgatorium (libet uti usitatis ab Ecclesia verbis) ad sacrarum imaginum et reliquiarum Sanctorum cultum, et ad auctoritatem et judicia Ecclesiae ipsius. De mortuorum resurrectione eadem ferme tradit quae Burnetius philosophus Anglicus, nec nisi post resurrectionem sui poenas ab impiis, neque has aeternas fore arbitratur. Sunt alia hujusmodi quae arbitrio suo quemque tenere aut rejicere posse ait, et nulla re magis hominem philosophum quam libertate sententiae commendari. Postquam disputavit de opinionibus et legibus Hebraeorum, ad quas revocat terrenum regnum, et de Christi institutionibus, ad quas caeleste regnum refert, persequitur copiosissime Papale regnum, quod praecipuum operis *ακρον* fuisse facile dixeris. Tantum obtinuisse et habere Pontifices Romanos affirmat, quantum rapere potuerunt, et dum eorum politicam historiam, quam a capite repetit, exponit, et reddit rationem plurimorum factorum, ubique spargit virus acerbitalis suae. Hortatur demum Principes, ut

adversus ereptores jurium suorum arma sumant, ut vindicent errata superiorum temporum, utque nulli parcant industriae, quo Christiana respublica tandem aliquando exurgat, et in aliquo statu tolerabili consistat (1). Dum ea parabat Petrus, quae ad operis hu-

[1] *Qua mente opus hoc scribendum suscepit Janninus, ex his ad Trivulium Principem litteris cognosci poterit.*
 Forse per divina provvidenza sarà disposto, che que' miei scritti, sopra i quali ho travagliato in comporli per lo spazio di dodici anni, che sono dimorato ozioso in Vienna (poichè la Corte di Roma, non potendo ottenere altro, impedì sempre ch' io fossi impiegato nelle pubbliche cariche de' Magistrati) ne' quali sono dimostrate verità di gran momento, ed importanti non meno ai Principi Cattolici, perchè si accorgano delle tante usurpazioni e sorprese fattegli sopra i loro Principati, togliendosi loro più della metà dell' imperio, che Iddio sopra i medesimi ha loro conceduto, che a' loro sudditi, prosciogliendoli da tante e sì dure catene, nelle quali la vana superstizione, l' altrui ambizione, avarizia e fasto gli tiene miseramente avvinti e legati, le quali mie fatiche aveva io già destinate a' tarli ed alle tignole, poichè sotto cielo ed in terreno Italico non avrebbero potuto certamente allignare. Forse, dico, avverrà che in altro clima potranno vedere la chiara luce del sole, nascere, farsi grandi, e volare da per tutto. Iddio difenda me e questi miei travagli, che non furono impiegati se non che per la ricerca del vero, cioè per la

jusce editionem erant necessaria, sperans ex impudentia sua se quaestum haud mediocre facturum, adlaborabatque, ut typis imprimeretur historia civilis Neapolitani regni, quam in Gallicum verterat Bochatius, accidit res, quae eum de statu omni dejecit. Habebat Genevae apud Carolum Chenevejum, ad quem saepe veniebat Pedamontanus quidam nomine Josephus Guastaldius, qui cum Sardiniae Regis esset a cubiculo, ab eo se militiae vacationem habuisse fingeat. Hic se insinuaré in gratiam Jannonii, ejus concelebrare merita, fortunam dolere, ipsum omnibus prosequi officiis, et invitare quoque domum suam, quae erat ad ripam Lemani lacus in ditione Regis, aberatque ab urbe circiter milia passuum tria. Recusavit primo Jannonius, mox victus ficti amici precibus se cum filio pascha apud ipsum, ut pote Catholico in lo-

co

conoscenza di lui stesso. Curerò poco le altrui infidie, profrizioni, e maledizioni, purchè egli gli protegga e benedica; sicchè possa con verità e sicurezza replicare ciò che il Santo Re Davide soleva dire [Salmo 108. 1] *maledicens illi, & tu benedices*.

co commorantem celebraturum spondit : Ante illud tempus venit ad eum Guastaldius, seque paratam habere dixit naviculam, ut domum suam carissimos hospites deferret, qui simul ac Venam (quod oppido nomen est) pervenerunt, bene & jucundè coenarunt. Cum post coenam Petrus cubitum se ire vellet dixisset, neque propterea sermones inopportunos serere desisteret Guastaldius, hujus loquacitas illi suspicionem attulit insidiarum. Tandem cum in cubiculum introductus esset & hujus fores clausisset, somnum haud capere poterat, quod observabantur ejus animores, quae timorem faciebant. Neque injuria. Nam magnus subito fit strepitus, fores franguntur, completur cubiculum armatis, & Guastaldius ipse, exuta omni humanitate, denuntiat retineri ipsum in sui Regis potestate. Proditionis crimen, Pedemontanorum ingenium, & quae omnium scelestissimus homo loquebatur & minitabatur, Petrus horruit, & iracunde execratus est; mox sedato animo, in arcem Miolanensem traducitur, & quamvis incertus esset de sorte sua, cum tamen vultum & eam constantiam prae se

tulit, quae decet virum fortem, et excipien-
dis fortunae telis diu assuetum. Post id
Regis misericordiam imploravit, fidem obte-
status est Ormeae Marchionis, quo Rex ipse
in primis utebatur in administratione reipubli-
cae; et quae responsa tulit hujusmodi fuerunt,
ut illum multa consolatione lenierent. Petiit
a Senatu Genevensi, ut sua sibi scripta et
libri redderentur, quos, ut de ipsius infelici
casu audisum est, apud Isacum Vernetium
spectatae probitatis hominem, et Jannonio ex
animo amicum servari jusserat. Ut vero scri-
ptione levaret carceris aegritudinem, Titum
Livium e Latino in Italicum convertendum su-
scepit. Dum progrediebatur in opere, intel-
lexit utilius et gloriosius fore, si de Liviana
historia ea conscriberet, quae optimo in lu-
mine collocarent, quae fuerint Romanorum
religio ac ritus, quae civilis prudentia, quae
causae eorum potentiae et majestatis, et ar-
tes, quibus effecerunt, ut dignissimi potesta-
te et dominatu omnium fere nationum puta-
rentur. Hoc peracto, ex Gallico in Italicum
vertit Partem IV. historiae Sanctae Marthae,
quae est de rebus Italiae, et de familiis qui

busdam Neapolitanis et Siculis, et librum de Lutheri cum Daemone congressione. Commentarium etiam de rebus suis censcripsit, quod nihil sit aptius ad delectationem lectoris, quam fortunae vicissitudines. Casus enim alienos intuentibus etiam ipsa misericordia est jucunda. Inter haec forte ad ejus manus pervenit Sabaudiae historia, ex qua cum colligere se posse putaret firma argumenta, ut probaret jus esse Sabaudis Ducibus, minime vero Romanis Pontificibus, de quo tum vehementer disceptabatur, nominandi eos, qui praeposendi erant majoribus illius Provinciae sacerdotiis, scriptum hac de re confecit, quod ad Regem misit. Regi gratissimum munus fuit, sed gratius illi erat, quod in sua potestate scriptorem ipsum haberet, quod ad reconciliandum sibi Pontificis animum, ac veteres, quae sibi cum eo erant, controversias dirimendas opportunum fore sperabat. Mirabuntur fortasse multi sapientissimum Regem suae magis utilitati quam gloriae hac in re consuluisse, nec se indignum putasse adhiberi dolos et astutias ad fallendum Jannonium. Hic postquam sex circiter menses fuisset in

Miolanensi arce, jussu Regis Augustam Taurinorum traductus est, et in arcem illius urbis conjectus. Non venit cum eo filius, qui usque ad illud tempus fuerat calamitatum ipsius socius. Nam data illi liberitas fuit ut quo vellet abiret, dum ne in Sardiniae Regis ditione commoraretur; suppeditata etiam pecunia ad iter faciendum. Secum auferre optabat patris scripta, quod ei negatum est. Postquam Neapoli aliquandiu fuit, in Pannoniam, atque in militiae disciplinam profectus est. Cum ei semper ante oculos obversaretur patris miserrimi calamitas, petiit a multis, ut illius patrocinium susciperent. Sed frustra. Obduruerat enim Rex ad supplicum voces, cum suis rebus convenire arbitraretur minime ab se dimittere hominem, qui facile solvebat linguam ad jurgia atque maledicta. Praeter quam quod gloriosum sibi fore putabat, si animum sanasset, quem pravae et perversae opiniones conturbaverant. Si fidem habere volumus orationi Jo. Baptistae Preverii Oratoriani, ut loquimur, Presbyteri, non modo sermone ac disputatione, sed peno conspectu ipso congressuque obtinuit a Jan-

nonio, ut is praeteritae vitae facta et errata ex animo detestaretur. Hinc illa retractatio apud Quaesitores Fidei (1), quae

M 3

[1] *Hanc totidem verbis exscribere haud pigebit.*

I. Intorno all'istoria civile del regno di Napoli, dico, che non ebbi altra mira se non che di chiarire la politica e le leggi di quel regno; e poichè non poteva nettamente concepirsi se non con dare un' idea dell'ordine Ecclesiastico, che occupa la maggior parte di quello, mi convenne trattare degli Ordini regolari, e con tale occasione degli abusi. Se ho ecceduto in narrargli, come ora me n'accorgo, intendo ritrattarmene, e se potessi, vorrei che fossero annullate tali stampe, affinchè non si apportì per quelle scandolo ad altri e danno alla Chiesa; con che li condanno e ritratto.

II. Per ciò che riguarda la risposta fatta al P. Santefice, il quale con due tomi in quarto stampati in Roma scrisse non tanto contro l'istoria suddetta, quanto contro il suo Autore, caricandolo di molte contumelie, s'chè dal Consiglio Collaterale di Napoli fu dichiarato per libello famoso, non ebbi animo di offendere la Chiesa di Roma; ma fu dettata unicamente per deridere il detto Padre Santefice, il quale m'imputava di eretico, perchè aveva spute massime esorbitanti della potestà Pontificia, facendogli vedere, che quelle si leggono in più autori Romani, e ben sapendo, che autori serj e gravi abborrivano tali massime; e così parimente de' miracoli, che si narrano da altri scrittori non approvati da' più gravi e serj. Né intesi mai,

adeo fama celebrata est, & de qua disputatur adhuc, num simulata, an sincera religio, num mutatio mentis, an timor spesque clementio-

che quella scrittura si pubblicasse, nè mai consentii, che quella fusse data alle stampe; anzi procurai, che non mai si stampasse, come fatta per puro scherzo e per derisione del P. Sanfelice presso li miei amici; e con dolore seppi poi, che manoscritta girasse intorno; onde siccome non fu mia volontà di pubblicarla, così ora protesto e desidero, che se ne spenga affatto ogni memoria, e la casso, irrito e ritratto, avendola come non fosse scritta, nè mai da me dettata.

III. Intorno al libro *de Consiliis & Dicasteriis urbis Vindobonae*, questo libro non lo riconosco per mio, ma fu rifatto da una mia relazione manoscritta, che io mandai in Napoli ad un Reggente del Consiglio *Collaterale*, il quale mi ricercò che gl' iaviassi una distinta relazione di tutti i Consigli e Dicasterj di Vienna, la quale la dettai in lingua Italiana, e gliela mandai per sua istruzione ed uso, non già che dovesse pubblicarsi in istampa. Poi seppi, che capitata in mano d'alcuni Tedeschi, la fecero tradurre in lingua Latina, e che la dettero alle stampe, molto alterata però dal suo originale manoscritto in lingua Italiana; onde non devo riconoscerlo per mio, e perciò tutte le proposizioni, che per causa mia si fossero ritrovate in quello, scandalose, temerarie, false, contumeliose, erronee, e prossime all'eresia, anche lo ritratto e condanno, abjuro e detesto.

ris fortunae ipsam pepererit. Nihil in ea praetermissum est a Jannonio, quod aliquam factorum suorum excusationem habere pote-

M 4

IV. Per ciò che riguarda gli altri manoscritti mandati in Roma dalla Regia Maestà del Re di Sardegna, il primo de' *Remedj contro le scomuniche invalide* fu dettato contro la censura del Vicario di Napoli, il quale credette poterla fulminare, perchè io non aveva cercato a lui la licenza di poter stampare l'istoria civile del regno di Napoli; onde fu composto per mia difesa, affinchè fosse rimossa come nulla ed invalida; e le altre parti, che lo compongono, de' modi, de' quali i Principi possono valea se per farla rievocare, furono dettate nel caso, che il Vicario non volesse da se stesso rievocarla; ma tutte queste scritture non furono fatte per darsi alle stampe; nè poi più servirono, poichè il Cardinal Pignatelli allora Arcivescovo di Napoli, conosciuto il motivo, ove li appoggiava la censura ed il mio ricorso fatto a Sua Eminenza, perchè la togliesse, mentre io era in Vienna, mi mandò l'assoluzione, e fu rimossa e cassata da quell'Arcivescovo; onde non fu d'uopo nemmeno pubblicare quelle scritture, ma rimasero in profondo obbligo, come quelle, che più non servivano; nè ebbi mai l'animo di stamparle, e dovunque manoscritte si trovino, anche ora le casso, irrito e ritratto, abiuro e detesto.

Così l'altro manoscritto intorno alla proibizione de' libri non fu composto per darlo alle stampe, ma unicamente per sagerare l'animo debole d'alcuni; e per dimo-

rat, quod vel ad summae improbitatis odium deprecandum, vel ad illudendos magistros suos factum ne ab ipso fuerit ignoramus. Cum

strare quanto potei a mia difesa in quelle proposizioni, sopra le quali si appoggiò la proibizione; ma questo non bisognò, e si tenne sempre nascosto per non pubblicarsi, onde se in quello ci fosse eccesso, come conosco esservi, nè si confermasse alla credenza della Chiesa Romana, lo rivoce, ritratto, abiuro, e detesto.

V. Per ciò che riguarda gli altri manoscritti e note, che teneva meco, e ritrovati, non sono che cartole e piccole memorie, che secondo andava leggendo alcuni Autori io notava, ed ancorchè avessero relazione fra di loro e portassero seco un gruppo di diversi errori, non furono da me abbracciati, ma unicamente per notare gli altrui sentimenti. Ed in ciò confesso di avere errato, perchè non doveva nè leggere tali libri, nè trascrivere da essi tali errori; onde tutte le suddette memorie desidero che si cassino, aboliscano, e non si serbi di esse memoria nè vestigio alcuno, mentre le detesto, irrito e ritratto ed abolisco.

VI. Intorno al trattato del *Concubinato* non si ebbe animo di darlo alle stampe, ma fu scritto istoricamente per difesa di due capi dell' istoria civile, dove io parlava del concubinato antico de' Romani, nè mai ho creduto, che quello oggi fosse permesso. Contuttociò mi rincresce di aver messo in iscritto tale materia, dalla quale avrebbe forse potuto recarsi scandalo. E perciò siccome non ebbi animo di stan parlo, così desidero, che se ne perda ogni me-

Quaesitorum Fidei judicio fuisset absolutus,
actum cum illo est leniter atque humaniter,
sic ut pro voluntate in ipsa arce deambulare,

moria, e si abbia come non scritto, che però lo detesto,
irrito ed abiuro.

VII. In quanto agli scritti filosofici ben si conosce,
che non sono miei sentimenti, ma bensì d'altri filosofi, a'
quali non mi uniformai; anzi in altre cartucce furono da
me notati i loro abbagli, e da me conosciute le bestemmie
e proposizioni ereticali, e li ferissi per notarli, non già
per abbracciarli; le quali proposizioni abiuro e detesto.

Per ultimo. Quanto mai si trovasse in tali cartucce
e manoscritti, ed ogni mia memoria, che non fosse con-
forme alla Santa dottrina della Chiesa e che potesse altrui
essere di scandalo e di errore, tutte ritratto, rifiuto ed
abiuro, e prego la Divina misericordia; che siccome mi
ha dato lume di conoscere i miei errori, sicchè ne avessi
potuto avere pieno dolore e pentimento, così mi conceda
il suo perdono, siccome lo chieggo alla Santa Madre Chie-
sa Cattolica, ed a tutti i suoi fedeli dello scandalo dato e
danni recati pregando in fine tutti a condonare i miei
errori ed umane debolezze, ed avermi nell'avvenire nel lo-
ro concetto per uomo diverso di quello, che forse ave-
va io dato occasione per i miei scritti di farmi credere e
riputare, protestandomi di vivere e morire vero figlio ub-
bidiente alla S. Madre Chiesa.

E per mia maggiore ritrattazione [e ciò sia a tutti
noto] quando la Santa Chiesa giudichi bene di fare stam-

et adeuntes ad se excipere posset. Ex eo tempore visus est delectari mirifice lectione sacrorum librorum, et opus etiam ejusmodi

pare questa mia ritrattazione per metterla in pubblico ad esempio degli altri, mi farà somma gloria e consolazione; però per maggiormente assicurare la S. Chiesa ed il suo tribunale di quanto qui in questi fog'j ho detestato e detestato, mi sottoscrivo PIETRO GIANNONE.

Aggiungo a questa mia spontanea comparizione, che supplico Vostra Paternità molto Reverenda fare scrivere qualmente nell' anno 1735. nel fine di Novembre, non avendo nè sussistenza; nè terreno da potere abitare in Italia, forse a motivo de' miei manoscritti, così pensai di ritirarmi in Ginevra non già (per Dio grazia) a motivo di cangiar Religione, ma per necessità di vivere; e come pure la mia Istoria Civile di Napoli soprannominata la volevano tradurre, e farla stampare in Francese, così avevano a caro in Ginevra la mia assistenza. Con che mi portai colà per questo fine, non avendo altra strada da mantenermi. Ma non fu poi stampata: ben può essere tradotta come so in fatti essere in parte tradotta in Francese, ma non mai stampata, che io sappia, essendo ormai tre anni che io fui arrestato; e che manco da detta città di Ginevra.

Debbo ben dire per maggiore isgravio di mia coscienza, che quando fosse proseguita la mia dimora in Ginevra, e non avessi avuta sussistenza, probabilmente mi sarei indotto a travagliare e comporre il quinto Tomo di dottr

suscepisse dicitur, in quo nihil sonare atque olere debebat nisi quod sanctum ac religiosum esset. Belli caussa an. MDCCXLI. ab arce Taurinensi in Castellum Cevanum traductus fuit; quatuorque post annos, unde discesserat, rediit. Totos tredecim annos; quibus carceri addictus fuit, ita transegit, ut insignia constantiae atque fortitudinis indicia dederit, quasi omnia, quae cadere in hominem possunt, despiciere atque pro nihilo putare videretur. Curiose tamen investigabat quid de se homines opinarentur; nam glo-

istoria. Quando mai fossi perciò incorso in qualche errore, parimente detesto il tutto, e ne chiamo la misericordia di Dio ed assoluzione; con dire che in que' tre mesi e mezzo che ho dimorato in Ginevra, ho sempre vissuto cattolicamente sì nell' udire la S. Messa, che in ogni altro dogma spettante alla Cattolica Chiesa Apostolica Romana, ed infatti fui arrestato nella Domenica delle Palme per essermi portato in un villaggio fuori di Ginevra, Stato di S. M. Re di Sardegna per adempire il precetto Pasquale. E questo è quanto devo dire, e rappresentare a vostra Paternità in isgravio di mia coscienza. Pregando ognuno, che possa avere de' suddetti libri e manoscritti, consegnarli alla S. Chiesa, come iniqui, scellerati e scandalosi, detestando il tutto.

riae sensum nunquam amisit, cujus cupido novissima exuitur. Optare etiam videbatur, cum multos fore praevideret, qui calamum sumerent adversus civilem historiam Neapolitani regni, ut aliquis existeret, qui famam suam a calumniatoribus armis prudentiae defenderet: nam posterorum iudicium, quod de sua religione futurum esset, pertimescebat. Et quidem celebriores, qui Romae erant, theologi moliebantur aliquid exquisitius Sanfelicianae responsione conscribere ad refellendas allatas ab ipso tristi arrogantia criminationes. Exarserunt praesertim Jo. Antonius Blanchius & Jo. Andrea Tria. Sed quid ego sentiam de Blanchii opere (nam de Tria levis armaturae milite silendum puto) ex iis, quae in superiori volumine exposuimus intelligi potest. Porro cum non pauca sint in Jannonii opere contumeliosius quam verius dicta, quaedam absurda et a sanctioribus Romanae Ecclesiae institutionibus aliena, dignum illud erat censoria animadversione. Sed oportebat adhibere certam rationem moderationemque dicendi, non blandiri alienae ambitioni, et ex aequo et bono, et ex certissimis historiae monumen-

tis omnia dijudicare ; qua re factum esset , ut intelligeretur in tota illa caussa quid tenere debeamus , quid tempora tulerint , quid error affinixerit , quid invidia conflarit . Cum vero clarissimi viri sint testes Jannonium poenituisse , quod acerbe et aspere eos accusaverit , quos Christus Ecclesiae consiliarios et administratos esse voluit , id magno argumento est , longius , quam mortalis vitae et caducae famae termini postulant , illum spectasse . Antequam moreretur , ea omnia praestitit , quae praestare solent ii , quos sancta religio commendat . Octo tantummodo dies aegrotavit , cum inflammatio stomachum occupasset . Huic autem causam dedisse putatur deambulatio matutina , cum caelum frigidum esset . Dies , quo vitae extremum spiritum edidit , fuit XVI. ante Kal. Apriles anni MDCCXLVIII. cum ageret ipse secundum supra septuagesimum aetatis annum . Nullum testamentum scripsit , cum antea per litteras significasset Francisco Melae homini sibi benevolentia conjunctissimo , quid de bonis suis Neapolitanis fieri vellet . Haec enim dividi jusserat inter Joannem et Fortunatam filios suos , et Elisabetham Ange-

lam Castelliam, ex qua illos genuerat (1); Media fuit statura, subnigro colore, facie oblonga, oculis venustis et acribus, et in uni-

(1) *Carolus Jannonius Petri frater, ut solus haberet fraterna bona, illos minime ex uxore, sed ex concubina matros fuisse contendit. Lata a Regio Consilio sententia fuit, quae declaravit fuisse Petro cum Castellia matrimonium. Joannes licet patri longe ingenio dissimilis, maximis tamen a Rege beneficiis affectus fuit, in quibus dandis hanc rationem Rex ipse subjecit.*

Informato il Re delle strettezze, in cui trovasi D. Gio. Giannone figlio ed erede del fu Dottor Pietro Autore della Storia Civile di questo Regno, e considerando non consentire alla felicità del suo governo ed al decoro della Sovranità, il permettere, che resti nella miseria il figlio del più grande, più utile allo stato e più ingiustamente perseguitato uomo, che il regno abbia prodotto in questo secolo, è la M. S. venuta in dare a D. Gio. Giannone ducati 300. annui di pensione su' proprj suoi Allogiali. Lo partecipo nel Real nome a VS. Illustrissima per l'adempimento.

Portici 8. Maggio 1769.

Bernardo Tanucci = al Sig. Consigliere Caruso.

Rogavit postea Joannes Regem, ut ejus beneficia post mortem suam transferrentur ad utilitatem filii & uxoris, & in haec verba rescripsit Princeps. Dopo di avere il Re apertamente dimostrato quanto sia a cuore della M. S. la felicità de' suoi popoli col promuovere le arti e le scienze

verso corpore, ut et in motu, omnique actione dignitatem quamdam prae se tulit. Cum

più utili coll'agevolare il commercio terrestre e marittimo, e col rendere più corte e spedite le vie della retta amministrazione della giustizia, costituendo providamente tanti premj ad uomini di merito, non ha lasciato la M. S., volendo vieppiù incoraggiare i suoi sudditi, di accogliere benignamente le suppliche date da D. Gio. Giannone figlio del su Pietro autore dell' immortal opera intitolata la *Storia Civile* del Regno di Napoli, il quale ha chiesto, che la pensione vitalizia di annui dueari 300. assegnatagli su' R. Allodiali, si continuasse a corrispondere dopo la sua morte al di lui figlio, e alla di lui moglie e sorella. E quindi considerando S. M., che poco si converrebbe alla felicità del suo governo, e al decoro della Sovranità il lasciare senza un contrassegno di perenne guiderdone la successione di un uomo di chiara fama, il cui patri non ha prodotto questo secolo, e cotanto utile allo Stato per avere con vigore, ingenuità e dottrina sostenute le supreme Regalie del Regno, e perciò da altri a torto perseguitato, è venuta la M. S. usando di sua singolar munificenza, e che non ha esempio, in accordare al Supplicante la grazia, che ha chiesta. Ne prevengo di R. ordine le SS. VV. Illustrissime per loro intelligenza e del Giannone, e per l' adempimento.

Palazzo S. Giugno 1750.

Il Marchese della Sambuca = Alli Sigg. Ministri della
Piaata Allodiade.

tanta prosperitate usus esset valetudinis, ut raro medicina indiguerit, eludebat medicorum artes, atque eos, qui post adultam aetatem ad internoscenda corpori suo utilia vel noxia alienum consilium requirerent. Tenui victu ac deambulationibus, quibus semper delectatus est, vel ipsam diu sustentare se posse senectutem, quam anhelitus tentare coeperat, sperabat. Nihil tam oderat quam desidiosam vitam, et quamvis minime refugeret a congressu colloquioque amicorum, breve tamen post tempus se in solitudinem conferebat, ut in studiis doctrinae omne otium consumeret. Inter scriptores, quos diurna nocturnaue manu versabat, ei erant in deliciis Plutarchus, Baco a Verulamio, Thuanus atque Montagnius. Memoria valebat sic, ut quidquid legeret, facile retineret; et quod ingenium acutum et perspicax habebat, verissime de scriptis aliorum judicabat. Si qui vero fuissent, qui sententiae atque opinionis suae voluissent esse participes, nihil occultabat, cum quod clausum erat in pectore, se in ore habere gloriaretur. Libertatem loquendi quae sentiret praesertim ostentabat, cum de clericorum usur-

pa-

pationibus et moribus, de Monachorum institutionibus et artibus, de Regum juribus, de Pontificia majestate, de barbarorum saeculorum, ut ajunt, historia sermonem haberet; sed libertatem, quam sibi dari postulabat, aliis praecidere videbatur, cum indignaretur, siquis sibi aut voce aut scripto contradiceret. Haec sive ambitio, sive morositas incurrebat in reprehensiones hominum, qui facile ab illo abalienabantur, cum nihil tam valeat ad conjungendas retinendasque amicitias, quam facilitas, modestia et aequalitas. Nec effugit invidiae crimen, qua lacerabatur praesertim, cum minus meritis praemia virtutis et doctrinae dabantur. Tum maxime conquirebatur suum fatum et fortunam, haud intelligens hanc plerumque moribus fingi. Pietate fuit singulari in parentes atque in patriam, a qua quod exulare coactus fuerit valde dolebat, ac saepe amicos ad vicem suam dolendam invitabat. Sed quamvis viri excellentis anticipes variique casus habere soleant admirationem, molestiam, spem, timorem, ipse tamen per paucos invenit miseriarum suarum deprecatores, quod omnes fere verebantur ne eum miserum

esse nefas esset dicere, qui erat natura asperimus, et ad vitia non modo carpenda, sed etiam ad maledicta ferociter et libere jacienda propensus, et qui de industria in odium offensionemque civium suorum et potentiorum incurrisse videbatur. Verum iisdem artibus, quibus fatum suum, famam etiam provocavit; et cum multos doctrina aut pares, aut superiores Jannonio oblivio obruet, is posteritati narratus et traditus superstes erit.

O P E R A E D I T A.

Historia civile del regno di Napoli di Pietro Giannone Giureconsulto ed Avvocato Napoletano con accrescimento di note, riflessioni, medaglie, e con moltissime correzioni date e fatte dall' Autore, e che non si trovano nè nella prima, nè nella seconda edizione. Palmyra 1762. T. IV. in 4.^o *Quod hanc Palmyrensem seu Neapolitanam editionem ceteris praefarendam putamus, ideo ei locum dedimus in hoc catalogo operum Jannonii. Iisdem typis impressum est volumen V., quod inscribitur;*

Opere postume di Pietro Giannone in difesa della sua Storia civile del regno di Napoli con la di lui professione di fede al P. Giuseppe Sanfelice Gesuita. Tandem Venetiis apud Joan. Baptistam Pasqualium an. MDCCCLXVIII. editus est liber cum hoc titulo:

Delle opere postume di Pietro Giannone Giureconsulto ed Avvocato Napoletano T. II. contenente alcune sue opere finora inedite precedute dalla vita del medesimo Autore. Hanc vitam, ut supra commemoravimus, exposuit

Leonardus Panzinius Presbyter Neapolitanus. Opera vero posthuma, quae in hoc volumen relata fuere, haec sunt.

Indice generale dell' opera de' tre regni, terteno, celeste e papale.

Abjura fatta avanti il Vicario Generale del S. Offizio di Torino Delegato del Tribunale dell' Inquisizione di Roma, estratta dagli atti del medesimo Tribunale.

Ragioni, per le quali si dimostra l' uffizio di Corriere maggiore del regno di Napoli non dover essere compreso nella reciproca restituzione de' beni da stabilirsi negli articoli della futura pace.

Osservazioni sopra la scrittura intitolata: Difesa della Reale Giurisdizione intorno a' regj diritti di S. Maria della Cattolica della città di Reggio.

Osservazioni dell' Ab. Biagio Garoffalo sopra le riflessioni morali e teologiche esposte in più lettere da Eusebio Filopatro.

Breve relazione de' Configlj e Dicasterj della città di Vienna.

Ragioni del Marchese D. Maffeo Barberini sopra la successione della casa Barberini derivanti dalle disposizioni del Pontefice Urbano VIII.

Ragioni, per le quali si dimostra, che l' Arcivescovado Beneventano, non ostante che il dominio temporale della città di Benevento fosse passato a' Romani Pontefici, sia compreso nella grazia concessa da S. M. C. a' nazionali, e sottoposto al Regio Exequatur, come tutti gli altri Arcivescovadi del Regno.

Explicatio numi sub Ludovico XII. Franchorum Rege cussu inscriptique: PERDAM BABYLONIS. NOMEN.

Mis Jannonii operibus addi debent alia scripta, praesertim forensia, de quibus singillatim Panzinius in vita ejusdem mentionem fecit.

ANGELUS FABRONIUS

CAJETANO MIGLIORIO

HUMANIORUM LITTERARUM IN FERRARIENSI
GYMNASIO DOCTORI EJUSDEMQUE
GYMNASII PRAEFECTO

S. P. D.

Cum multorum inter se studia comparo, etiam si non uni magis faveam quam alteri, dummo utilitati hominum consulant, persapientes tamen mihi ii esse videntur, qui ingenii acumine doctrinaeque praediti toti sunt in conquirendis illustrantisque antiquitatis monumentis. Nam praeter quam quod haec studia mirum in modum historiam adjuvant, tantum in se habent nobilitatis atque jucunditatis, ut quas edax tempus nobis conservavit reliquias, veluti ornamenta nationum atque monumenta majorum sapientiae ac potentiae maxime revereri soleamus. Illa trophaea, quae bellicae laudis insignia & victoriarum monumenta sunt, illae descriptiones pugnarum conversionisque imperiorum quamvis curiose conquirantur, quia

tamen in illis apparent vestigia aut feritatis, aut ambitionis hominum, magis commovent quam delectant contemplantium animos. Ipsa cognitio rerum, quae erant in institutis & moribus antiquorum, raro adjutrix esse potest bonorum confiliorum sive in administratione rei publicae, sive in regenda vita; at quae effecta sunt manu et artificio adeo conducunt ad vitae ipsius commoda, ad excitanda ingenia, ad provehendas nobilissimas et utilissimas artes, ad ornandas urbes, ad alendam hanc suavitatem humanitatis, qua prope sola delectari homines videntur, et ad obliteranda, quae nos comitantur, mala, ut irasci soleamus iis, qui illa aut negligere aut non plurimi facere videntur. Sed gratulandum saeculo est, quod non in Italia modo, sed etiam ultra montes et maria haec studia maxime colantur, maximoque in pretio habeantur, ipsis nationibus exemplo praecuntibus, quae olim nefarium bellum antiquitatis reliquiis intulerunt. Illa quoque nostrorum temporum laus est, quod in hujusmodi studiis exercendis non, ut olim, sola eruditione contenti sumus, sed cum illa conjunctam volumus philosophiam, et sensum quemdam, ut de omnibus si non veram, saltem probabilem rationem reddere, et quae ad artem

ſpectant guſtare, deque iis iudicium ferre et praecepta dare poſſimus. Omnia quibusdam vinculis apud veteres erant colligata, et quaſi cognatione quadam inter ſe continebantur; et pictura, architectura, et praefertim ſculptura ex multis animi perceptionibus conſtabant, cum arcte copularentur cum religione, cum moribus, & cum legibus. Quapropter pleniffimum temeritatis eſſe dicam vel de huc et illuc ſparsiſ monumentis diſſemere niſi ars teneatur quae diſjuncta ſunt conjungendi, revocandique eo unde manarunt, quod quia multum habet difficultatis et laboris, multorum ſcriptorum diſertam negligentiam reddidit. Praetereo illa quae de Aegyptiis, Graecis Latinisque monumentis a multis expoſita ſunt, ut de Etruſcis loquar, arrepta occasione a Juſti Fontaninii vita, quam ad te mitto, amicorum ſuaviſſime, hominis quidem multarum litterarum, qui plura Etruſcorum de Hortano civitate Etruſca ſcribens, patefacere ei illuſtrare ſe poſſe putavit. Quanto ſucceſſu, viderint eruditi. Porro ſi tu facile inveneris, qui tot in tenebris, in quibus jacent omnia pene veterum Etruſcorum, lumen litterarum accenderit, accuſabis haefitationem meam. Verum, ſi me amas, nonne ſibi videtur nihil huc us-

que constitutum fuisse quod non incurrat in magnam aliquam difficultatem? Ea propter auctor fui viro amicissimo Aloysio Lantio, ut pro eo quo pollet ingenii acumine, industria atque eruditione, opus hujusmodi susciperet, in quo totam Etruscorum antiquitatem, quantum ex monumentis conjicere licet, intueri possemus. Susceptum ab eo negotium feliciter transactum fuisse vehementer gaudeo, et in hac animi mei laetitia non gravabor tibi, qui cum sis litteratissimus, maxime faves litteris, eorumque cultoribus, universi operis brevi in lucem prodituri formam adumbrare. Prima pars illius ad ea, quae deinde Auctor persequitur, munit viam: cum enim vetustissimas Italogum linguas Graecae Latinaeque veteris subsidio illustrari posse affirmet, ejus sententiae ex historia primum pete probationes, tum ex monumentis ultimae antiquitatis parat adjumenta; neque modo lapides, et ceteras ejusmodi praeclarorum temporum reliquias profert atque explicat, sed praecepta quaedam et quasi artem adjungit, quae eadem illae earumque similes legi debeant; neque enim, ut probe nosci, aut Latium aut Graecia ita initio scripsit, ut in vulgariis aut historicis, aut oratoribus, aut poetis scriptum libris eorum editis videremus; sed alia quaedam

fuit & characterum figura et orthographiae ratio: sequens vero aetas litteris multis vel additis, vel ademptis, vel permutatis hanc scribendi formam, quae nunc est omnino, aliam a vetustissima, et minimum cum illa consentientem induxit. Altera pars est, quae rem propius attingit: in ea Etruscae linguae ac reliquarum quaedam quasi grammatica ars comprehensa, et prope edita est: alphabetum, quo usi ante hos dies fuimus, tum excussum, tum litteris aliquot emendatum atque auctum; formae litterarum singulae cum Graecorum monumentis collatae, vis assignata quae cuique congruat, deinde orthographia explicata; quas litteras in Etruscorum monumentis legendis aut demere aut adijcere aut permutare debeamus: denique etymologiae atque analogiae praesertim ratio habita; atque in ea tractatione universa vix pauca conjecturae data, pleraque ex parte prima atque ex veterum aut Graecorum aut Latinorum consuetudine accersita. Tertia denique pars est, quae ipsa monumenta veterum Italicorum, Tuscorum imprimis atque Umbrorum, per quos Tabulae illae Eugubinae conscriptae sunt, proponit atque explicat, in qua grammaticis jam expensis, historica praesertim consecratur, neque pauca sunt, quae vel ad civilem

cultum antiquorum, vel ad religionem, vel ad Italiae historiam pertinentia, nova quadam luce illustrentur: quibus de rebus quam acriter superiori aetate ac nostra vel ab Italis vel ab exteris disceptatum sit, profecto nosti: ibi enim disceptatur vehementius, ubi obscurior caussa est, et suspensae magis judicum mentes. Satis de his. Reliquum est, ut te orem, ut quoniam artes nostrae nescio quo modo nunc uberiores fructus ferre videntur quam olim ferebant, sive quia nunc nulla in re alia magis acquiescimus, sive quia munus, quod sustinemus in Academia Pisana, id exigere arbitramur, me meaque pro veteri amicitia nostra adversus invidos et obrectatores tuearis atque defendas. Vale.

Florentiae id. Septilis an. MDCCLXXXVI.

JUSTUS FONTANINIUS

Postquam Jannonii vitam explicavimus, de Justo Fontaninio scribendum suscepimus, quorum alter ut odio, sic alter studio in Romanos Pontifices inclaruit: adeo paucis posteritatis cura inter infensos vel obnoxios. Is natus est honesta familia III. Kal. Novemb. anni MDCLXVI. in perillustri Provinciae Forojulienfis oppido, cui S. Danielis nomen. Parentes habuit Franciscum Fontaninium et Ludovicam Manzoniā, qui cum puero vivendi praecepta darent, non minus studuerunt, ut ille doctrina liberaliter institueretur. Vix hic excesserat ex ephebis, cum venit in Goritianum Collegium, quod tum Jesuitae regabant. Quia illum omnis ars & doctrina liberalis, & maxime philosophia delectabat, iis, quibus utebatur, magistris contentus haud esse poterat. Tanquam ad adspiciendam lucem se revocatum fuisse affirmabat, cum

Redii scripta forte in manus suas pervenissent, quae quod commendentur copiose & eleganter loquente sapientia, hanc sibi comparandi cupiditate incredibili exarsit. Invitabant etiam eum ad se se dignitate & utilitate sua sacrarum literarum studia, praesertim cum deliberasset sacrae militiae nomen dare. Quod cum praestitisset an. MDCLXXX. ad excolendum magis magisque doctrina animum, Venetias primum, mox Patavium venit, quae urbes abundarunt semper optimis disciplinis atque hominibus omni doctrina & virtute ornatissimis. Tum specimen ingenii atque eruditionis dedit, cum Dissertationem emisisset *de masnadis aliisque servis juxta Longobardorum usum*, qua quasi gradum quemdam atque aditum ad famam, cui servire deliberaverat, se jecisse putavit. Quod minime ambitiose ab illo judicatum fuisse existimabis, cum Apostolus Zenus, de illa dissertatione edenda auctor eidem fuerit. Inter eos, quibuscum familiarissime atque amicissime vixit Fontaninius, fuit Philippus a Turre, cujus opera factum est, ut ipse Josephi Renati Imperialis Cardinalis bibliothecae

praeficeretur. Ea propter Romam venit aestate an. MDCLXXXVII. et quidem cum spe maxima majora obtinendi ab Innocentio XII., qui quamvis illitteratus esset, mirum tamen in modum doctorum hominum honori et dignitati favebat. Cum videret Justus haud mediocrem de se homines habere opinionem, hanc ut constantem efficeret plurimum laboravit. Multum vigilabat in studiis, frequentabat litteratorum hominum domus, horum coetus, qui erant apud Severolium & Ciampinium Praesules amplissimos, posse interdum dicendo tenere sibi gloriosum arbitrabatur, veniebat saepe ad Norisium et Casanatam, qui lumina atque ornamenta Romani Senatus esse putabantur, & erant; omnino nihil praetermittebat, quod ad laudem omnium undique, et benevolentiam et gratiam potentiorum colligendam conducere posse videbatur. Hortante etiam Laurentio Zaccagnio viro Graecis Latinisque litteris eruditissimo, quocum saepissime erat, Graecam linguam didicit, et Raphaele Fabretto magistro in inquirendis interpretandisque antiquis inscriptionibus plurimum versatus est. Sed in tanta studiorum

verietate illa semper potiora duxit, quae ad
 Ecclesiasticam historiam spectabant, in qua
 quantum profecisset saepe declaravit in illa
 Academia, cui a loco, in quo habebatur, Pro-
 pagandae Fidei nomen erat. Veniebat ad eam
 flos virorum et nobilitatis, ejusque fama non
 solum manaverat per Italiam, sed etiam alpes
 transcenderat. Personuerat enim vocibus Chri-
 stiani Lupi, Henrici Norisii, Jo. Mabilonii,
 Eusebii Reneaudotii, Philippi a Turre, Josephi
 Mariae Thomasii, ut de ceteris sileam, qui
 ad eam accuratas et meditatas commentatio-
 nes de gravioribus rebus ad theologiam, jus
 Pontificium, et Ecclesiae historiam pertinenti-
 bus attulerant. Quae in ea disseruit Fonta-
 ninus, uno volumine complexus est, quod
Collationes inscripsit. Cum jam in universa
 Urbe celebratum ejus nomen esset, manda-
 vit ei Summus Pontifex Clemens XI. ut ad
 se referret de dialogo quodam contra Frati-
 cellos, qui Jacobo de Marchia Ordinis Mino-
 rum tribuebatur. Certissimis monumentis at-
 que argumentis probavit Fontaninus neque
 fuisse, neque esse potuisse ejus opusculi au-
 ctorem Beatum Jacobum, atque propierea

nullam esse causam constandi invidiam homini sanctissimo, remorandique debitos illi Sanctorum honores. Eodem tempore de Andrea Agnello, qui saeculo aerae Christianae IX. historiam scripserat Pontificum Ravennatum, quaedam exaravit, ut responderet iis, qui vetandam operis hujusce impressionem censuerant, propterea quia scriptor ille affirmaverat consuevisse Caesares Archiepiscopis pallium concedere. Hujus enim testimonium nihil momenti habere probavit, cum graviorum & antiquiorum scriptorum auctoritas atque consensus jus illud tribuat Romanis Pontificibus. Dabat & famae, quod saepe de componendis Latinis inscriptionibus rogaretur vel ad memoriam mortuorum, vel ad prodenda posteris illustria Romanorum Pontificum facta. Homo navus et industrius multa uno eodemque tempore versabat animo, in quibus otium suum consumeret, & cum Italica carmina & epistolas collegisset Cyri Persi equitis Hierosolymitani, ejus vitam exposuit; de scriptoribus Foro-Juliensibus opus magnum suscepit; alia, quae memoriam rerum Foro-Julensium illustrarent, seposuit, de

edendis Hieronymi Aleandri junioris Cardinalis doctissimi operibus, quae ex bibliotheca Barberinia excipserat, cogitavit; breviter vitam Alexandri Tassonii declaravit (1) studiumque poesis nunquam intermissum, a primaeque adolescentia cultum, et semper auctum renovavit. Sed magis quam propriorum carminum confector (nam natura, quae in poesi in primis dominatur, non admodum valebat) alienorum iudex esse voluit, & cum ceteris poetis omnibus antecellere Torquatum Tassum existimaret, Amintae defensionem adversus Bartholomaeum Cevam Grimaldium arripuit. Itaque an. MDCC. librum vulgavit; quem Cardinali Imperiali suo nuncupavit, ut persuaderet omnibus, siue elocutio, siue fabulae artificium spectetur, nullam in re saltem graviori peccasse Torquatum,

(1) Quae de Tassonio exaravit Fontaninius edidit Apostolus Zenus cum libro, cui titulum fecit: *Annotazioni sopra il Vocabolario degli Accademici della Crusca; opera posthuma di Alessandro Tassoni &c. Venezia 1698. in fol.* Satis superque nunc constat hoc opus Tassonio falso attributum fuisse. Vide quae hac de re narravimus in vita Apostoli Zeni Vol. IX. pag. 214.

quinimmo tale confecisse poema, de quo nihil satis admirabiliter, satisque magnifice dici possit, quoque uno effecit, ut ceteras nationes omnes in hoc poesis genere, ne Graecis quidem et Latinis exceptis, vinceremus. Haec defensio docta, erudita, elegans est, magnoque plausu Romae excepta fuit. Non caruit tamen rephensoribus (1), nec uti potuit Fontaninius excusatione justa et idonea, quando coarguit eum typographus Josephus Cominius, quod probatiores Amintae editiones minime consulisset. Sponderat Tassi studio sis se secundo editurum defensionem suam multis in locis auctam et emendatam, quod tamen exitu non praestitit. Tanto amore ferebatur in Tassum, ut exarserit quoque ejus ingenium contra eos, qui magno in pretio haud habendam jure meritoque affirmabant illius tragoediam, quam inscripsit *il Re Torrismondo*, et tum de tragoedia et comoedia, et de celebrioribus Tragicis et Comicis praesertim Gal-

(1) Vide *le Osservazioni d'un Accademico Fiorentino* (Uberto Benavoglianti) quas Sebastianus Coletus edidit Venetiis an. MDCCXXX cum defensione Fontaniniana.

Gallis libellum scribendum suscepit. Quamquam non defuerint, qui ab eo petierint, ne gravaretur exaedificare opus, quod instituerat, ego tamen censeo eundem non satis aptum et locupletem fuisse ad illud exornandum amplificandumque artis praeceptis, quae interioribus et reconditis litteris continentur. Erant tamen in eo plurimae, nec eae vulgares, qua re factum est, ut illi a Clemente XI., cui maxime curae erat, ut ad veterem splendorem dignitatemque revocaretur Archigymnasium Romanum, munus docendae in eo eloquentiae deferretur. Oratio, quam in ingressu muneris dixit de usu et praestantia litterarum, vel Petri Baylii laudes obtinuit (1); laudarunt

T. XIII.

O

(1) Exemplar orationis [*sic ille*] quod muneris loco mihi misisti, vir praestantissime, tantum grati animi sensum mihi instillat, ut ei significando vix par esse posset insignis tua facundia. Idem dixerim de voluntate, nec non admiratione, quibus perfundebar, dum legerem illam orationem vere redolentem aureum aevum eloquentiae Romanae. Inclarescet in primis vel eo nomine Pontificatus Clementis XI., cujus sane virtutes optimarumque artium intelligentia & cura laudem merentur egregiam, obtinentque ab iis quoque, qui alia sacra colunt, quod Gymna-

et alii doctrina insignes viri quae Fontaninius tradere solebat auditoribus suis, cum interpretandos Ciceronis libros de Oratore, et alia ad Romanorum eloquentiam & Latii linguam spectantia explicanda suscepisset. Beatus jam sibi esse videbatur Fontaninius, quod in florentissima urbe, & in doctissimorum hominum flore versabatur, & quod studia sua adeo probabantur Clementi XI. magno ingeniorum aestimatori, ut ab eo auctus sacerdotio, aliisque beneficiis affectus fuerit. Hunc ut sibi magis magisque conciliaret, in ipsius nomine apparere voluit quae pro Jo. Mabillonio adversus Bartholomaeum Gernonium exaravit. Nemo ignorat quam de litteris bene meritus fuerit Mabillonius, & quantam illi praesertim gloriam pepererint, quae ad rem diplomaticam illustrandam vulgavit.

sum Urbis in pristinum splendorem restituere allaborans, ac inter alios admoverit muneri eloquentiae, interiorumque litterarum excolendarum. Faxit Deus, ut diu hanc spartam exornes in emolumentum Reipublicae litterariae ac nominis tui famam dudum florentem latius, latiusque propagandam. Vale.

Uni Jesuitae, quia proclives erant ad omnia Benedictinorum Monachorum facta obrectanda, invidiose illius scripta carpebant, extititque ex iis unus Germonius, qui cum *de veteribus Regum Francorum diplomatis & arte discernendi antiqua diplomata vera a falsis* opus Parisiis anno MDCCIII. edidisset, tot incorrupta rerum gestarum monumenta, quibus usus fuerat Mabillonius, quibusque Benedictinum S. Dionysii, ceteraque insigniora tabularia gloriabantur, dubia & incerta esse affirmavit. Tantam arrogantiam haud ferendam, putavit Fontaninius, et multis argumentis atque exemplis confirmavit summae dementiae esse quae ad nos pervenerunt ab antiquitate monumenta, quibus veritatis notae insunt, in dubium revocare. Nonne erat injuriam facere summis viris, qui ex ipsa Jesuitarum familia fuerunt, Sirmundo, Chiffletio, Browerio, Gretsero, Serario, & Bollandianis, aliisque bene multis, qui historiae in tantis tenebris clarissimum lumen praetulerunt, documenta ab iis allata contemnere, quorum quae sit vis, quae auctoritas, quod pondus tot rationibus comprobarunt, ut ad omnem verita-

tem caeci esse videantur, qui iis fidem habere recusent? Itaque Germonius, cum amen-
tia quadam raperetur, non vidit quid ab il-
lustrioribus Ecclesiis et Monasteriis omni tem-
pore gestum fuerit, ut sua haberent diplo-
mata ac conservarent, quorum nonnulla a
Fontanino non nominantur modo, sed etiam
eruditissime explicantur, atque eorum aucto-
ritas vindicatur; non vidit quae publica tes-
timonia iis accederent; non novit quae es-
set barbarorum saeculorum lingua, qui scri-
bendi modi, quae consuetudines, ritus, mo-
res, instituta et leges, & dum abutitur ad
omnia immoderate & ingrate judicandi li-
bertate atque licentia, imitari voluisse vide-
tur exemplum collegae sui Joannis Harduinii,
quem non puduit affirmare celebriores scri-
ptores Graecos & Latinos non exscriptos,
sed confictos fuisse a Monachis Benedictinis
XI. saeculi, quo sane nihil auribus animis-
que hominum absurdius. Propter ubertatem
eruditionis, & abundantiam rerum omnium,
quae ad diplomaticam, ut loquimur, artem,
et historiam et chronologiam medii aevi per-
tinent, magno in pretio Fontaninii opus ha-

bendum est, quod a doctissimis Gallorum, ac praesertim a Mabillonio ita exceptum fuit, ut maxima ei statim facta fuerit gratulatio (1), & summis laudibus ejusdem nomen

(1) *En Mabillonii ipsius gratulatoriam epistolam.*
 Pervenit tandem in manus meas e Regia bibliotheca aureus liber tuus, vir clarissime, quo veterum diplomatum veritatem, simulque meam fidem ab iniqua Germonii censura vindicare aggressus es. Ubi primam illum mutuo adepti a Regio Bibliothecario, continuo eum aperui, moxque ad legendum me rapuit primo quidem typorum nitor, quo nihil elegantius, tum argumenti genus, quod mea maxime intererat: argumento probe respondet titulus, quo concinnius nihil, Juste nomen praeferens ad jus suum cuique reddendum. Verum eo felicius nihil, quod Sanctissimus Pontifex Clemens XI. communis omnium parens & judex, causae suae pariter ac nostrae patrocinium suum impendi haud dedignatus est, passus auspiciatissimum suum nomen libro tuo praefigi; qua de re maximam tecum gratiam Sanctitati suae habemus. Lecta magnifica tua ad eum epistola, mox librum tuum avide lego, ac perlego, in quo scribendi modus Professoris eloquentiae nomine dignus elucet. Jam vero quam exquisita rerum in toto operis decursu varietas, quanta rationum vis, quanta argumentorum moles! Ea sane, ut iis adversarius non tam superari, quam obui videatur. Quamquam vereor ut se victum fateatur Germonius, vixque mihi persuadeam, qui se in re diplomatica magistrum putabat, vix discipulum se reputari sibi

celebratum. Sed haec ipsa valuerunt ad excitandum si non odium, attamen aut invidiae, aut odii non dissimilem offensionem Jesuitarum omnium in Fontaninium, cui rei argumento esse possunt quae Scriptores ephemeridum Trevoltiensium et Jacobus Bernardus litteris mandarunt. Nec siluit Germonius ipse,

le sustineat. Verum hac de re judicabunt aequi rerum aestimatores, quos mihi applausuros esse non dubito. Hoc saltem Germonio nos debere censebimus, quod tam praeclari operi occasionem dederit. Ad me quod attinet, etsi non dubitem, vir clarissime, te in componendo edendoque eximio isto libro non tam mei, quam publicae rei, ut par est, rationem habuisse, tamen quia mea causa cum publica conjuncta est, teque meis studiis alias favere compertum habeo, verbis exprimere, nedum re ipsa, non valeo, quantum tibi obstrictus sim, quod istam elucubrationem elaboraveris ac publici juris feceris; ex qua certe intelligent literati omnia quae & quanta ex tua eruditione sperare & expectare possint, qui tam praeclarum ejus specimen praeter alia dederis. Quam expectationem, ut satis compleas, integram & diuturnam valetudinem a summo rerum Auctore tibi concedi ex animo exopto. Plura tibi nomine meo dicturus est noster in urbe Generalis. Vale; & me tibi addictissimum, ut coepisti, amare perge.

qui, vulgato libello, asperioribus verbis Fontaninium, & qui fuerant ejus operis defensores, Antonium Gattium, & Dominicum Lazzarinum perstrinxit. Verum cum in Fontaninio inesset animi excelsi atque invicti magnitudo ac robor, contempsit Jesuitarum voculas, quanquam eosdem semel laesos suarum laudum obrectatores et adversarios perpetuo fore intelligebat. *Stet per me veritas*, dicere solitus erat, *quo quo modo de me mereantur homines*. Haec fidentia obtinuit ab eo defensionem Tillemontii, cujus immortale opus de historia Ecclesiastica Romae a nonnullis adeo vituperabatur, ut de illo ab hominum manibus, si fieri potuisset, eripiendo, agitaretur, auctore praesertim Jacobo Laderchio. Quam id indecorum, turpe, injustum futurum esset, argumentis et rationibus plurimis Fontaninius ostendit, ut ille, de cujus caussa agebatur, non potuisset accuratius eandem defendere. Ista haec libertas perplacuit Summo Pontifici, qui nihil contra Tillemontium decernendum censuit, quod eo mirabilius debet videri, quia ille nihil tam oderat, quam Jansenistarum, quorum in

numero esse putabatur Tillemontius, nomen. Laudis avidus Fontaninius eam gloriam ingentem esse putabat patrociniū suscipere clarorum virorum, de magna virtute atque doctrina eorum saepe commemorare, certiores illos facere, siquid esset quod scire aut sua, aut ipsorum interesset, quas ab iis accipiebat ponderosas epistolas cum amicis communicare, & quod nihil est utilius quam conjunctio inter doctos doctorum & communicatio opinionum, invitare omnes ad ineundam studiorum societatem. Coluit praesertim Gallos, iis indulgit, eorum voluntati & gratiae deditus fuit, et cum his temporibus Parisiis esset, ejus amicus Dominicus Passioneus, nihil tam illi se invidere aiebat, quam quod praesens videret tot homines doctrina praestantes, eorumque congressu colloquioque frueretur. Sed ea res haud scio an plus illi profuerit, vel nocuerit. Nam laudum illius invidi, ac praesertim Jesuitae, sermonibus divulgaverunt, mire illum esse studiosum et fautorem Jansenistarum, quos tristissimo verbo nominabant haereticos, et Romanae Ecclesiae Romanorumque Pontificum hostes. Fa-

cile fuit Fontaninio homines contemnere ; qui religionis calumniam non religione , sed malevolentia comprobabant , et cum haberet multa virtutum praesidia , quae illorum criminationibus opponeret , tranquillo animo in iis studiis exercitationibusque , quas gloriosissime susceperat , perseveravit . Edidit an. MDCCVI. librum Italice scriptum *de Italica Eloquentia* , quem ad Josephum Ursium instituit . Huic quod multa deesse postea intellexit , de eodem augendo atque iterum edendo cogitavit , quod praestitit an. MDCCXXXVI. Nihilo tamen minus non fugit reprehensionem eorum , qui omnibus eruditionis ornamentis abundabant ; et quae emendavit notavitque Apostolus Zenus , quanquam nimium obsecutus fuisse videatur desiderio de Fontaninii gloria detrahendi , hujusmodi sunt , ut hunc errasse arbitremur , cum de iis , qui de eloquentia Italica optime meriti sunt , satis copiose atque erudite se dixisse judicavit . Mirabitur vero quispiam Zenum , cui erat mitissimum ingenium , acerbum fuisse in reprehendendo Fontaninio , qui vel a prima adolescentia in illius amicitiam se contulerat . Sed acuit illum ad severitatem genus

reprehendendi morosum, quod saepe adhibuit Fontaninius, cujus ingenium Aegyptio aceto assimilare solebat, & negligentia, qua multa vel ante pedes posita transiliit, atque a se inventa attigit. Rationes etiam quasdam attulit Zenus, quare se disjunxerit ab familiaritate hominis, cujus estimationis buccinator antea fuerat. Nam Fontaninius facilis ad exardescendum, & ad dissuendas non solum, sed etiam ad repente praecidendas amicitias, cum a se abalienasset Muratorium & Maffejum, irasci videbatur Zeno, quod cum iis litterarum commercia haberet. At Zenus solitus metiri amicos non aliorum dissidio ac dissensione, sed voluntate ac judicio suo, risit Fontaninii querelas, permanfitque in sua pristina erga illos benevolentia. Tum quaesivit, servaverit ne in illo fidem, quod cum a se multa accepisset ad augendum corrigendumque librum de Italica Eloquentia, non modo nullam accepti beneficii mentionem fecit, sed ne caritati quidem suae pepercit, ne quid temere in se proferret. Haec adeo commoverunt Zenum, ut asperius, quam ejus paterentur mores, erga Fontaninium se se ger-

serit; quanquam ei in mentem saepe venerit praeceptum illud, quod vetat cineri & ossibus mortui dolorem inurere. Nam Fontaninus e vita excesserat, quando ille opus suum confecit, quod inscripsit: *Annotazioni alla Biblioteca dell' Eloquenza Italiana*. Porro si tam sapiens fuisset Fontaninus, quam fuit vehemens, melius quidem famae ac fortunae suae consulisset. Nam magna Romae opinio erat de illius doctrina, & qui otiosis & nihil agentibus honores saepissime deferuntur, debiti videbantur homini, qui totam aetatem in studiis litterarum contriverat. Horum laborum fructus uberes atque immortales cepit Hortanum civitas, de cujus antiquitatibus ita disseruit Fontaninus, ut scriptorum veterum se litterate peritum ostenderit. Quaerit primo de urbis ortu, quem a Pelasgis repetit, et quia haec illo tempore, quo Trojani in Italiam migrarunt, opibus florens fuit, et quia nomen Vadimonis, quod est lacui in agro Hortano, aliquid Etruscum sonare videtur, probabili conjectura colligere se posse ait fuisse Hortam unam ex duodecim urbibus Etruriae, seu Dynastiis, quae

totidem Lucumones, seu Reges habuere ; Sed ad hanc concludendam sententiam necesse erat Vejentes quodammodo ab Etruria expellere, idque praestitit Fontaninius, cum eos, Livio teste, proprium regnum habuisse, atque non inter, sed proxime Etruscos fuisse ostendisset. Hoc ipse ordine enumerat Etruscorum Dynastias. I. Perugia. II. Cortona. III. Aretium. IV. Clusium. V. Volaterrae. VI. Vetulonia. VII. Volsinium. VIII. Rusellae. IX. Tarquinium. X. Caere. XI. Hortae. XII. Faleria. Qui fuerit status Hortae, postquam Augustus Caesar eo militarem coloniam deduxit, quae tribus, quos magistratus habuerit diligenter inquiri, facem illi praeferentibus antiquis inscriptionibus, quas erudite explicat, et interdum acute supplet. Inter has eminet illa, quam foederatus Faliscorum populus Hortae posuit, cujus rei causam dum explicat, de Tusciae & Piceni Pentapoli & de Faliscis copiose disputat. Hoc loco Goltium non modo et Harduinum, quod Faliscos Argivorum in Etruria colonos cum Faleriis Magnae Graeciae populo commiscuerunt, sed etiam Stephanum, Plinium & So-

lium reprehendit, quod Falerios et Faliscum duo diversa fuissa oppida affirmarunt, cum, Livio teste, expioratissimum sit Romanos oppidum ipsum, quod situm erat juxta viam Flaminiam Otriculos inter et Romam, Falerios, agrum vero et populum Faliscos nunquam non vocitasse. Explodit etiam Salmasii sententiam affirmantis Aequos Faliscos ab Etruscorum Faliscis differre, et nomen Aequorum non ab aequa planitie, sed ab Haesio aequi servantissimo manasse contendit. Quod in inscriptione, de qua loquimur, quatuor priores lineae oblitteratae sint, ex eo conjicit ad Domitianum Caesarem illam spectasse, de cujus morte adeo Senatum Romanum laetatum fuisse scimus, ut ex omni aere vel saxo eradi nomen et titulos, ad abolendam, si fieri potuisset, crudelissimi Tyranni memoriam decreverit. Hinc Fontaninius occasionem captat disserendi de aliis monumentis, ac praesertim de inscriptione, quae est in arcu Septimii Severi, in quibus elogiorum et nominum litterae deletae conspiciuntur; et si cui haec digressio a proposito argumento nimis longa videbitur, aliquid

ignoscat volo consuetudini antiquariorum, qui dum intendunt oculos in omnes partes, vereri videntur, ne omnia dilabantur, si unum aliquid effugerit. Reliquarum Hortanarum inscriptionum non modo sententias, sed et verba diligentissime explicat et enucleat, & dum multa obscura patefacit atque illustrat, quae ad Etruscorum numina, mores et linguam (hanc ex Graeca magna ex parte fluxisse judicat) et ad Romanorum facta illustria pertinent, se doctrina atque optimarum artium studiis eruditissimum ostendit. Haec quidem in priori operis parte. Altera vero pars tota ferme constat dissertatione de Faltonia Proba cive Hortana, sane digna, quae ob Centonem Virgilianis versibus de Christo compositum inter Poetrias Latinas numeretur. Hanc cum Faltonia Proba ex clara Aniciorum gente, consulis filia, consulis uxore, ac trium consulum matre, quaeque SS. Hieronymi atque Augustini necessitudine et laudibus inclaruit, contra ac putaverant viri in primis docti Vossius, Barthius, Reinesius, Baronius, ac Dupinius, nihil commune habere probat. Turpius etiam illos errasse ait, qui

hoc carmen Sedulio tribuerunt, quod Probae adjudicandum esse arguit etiam Gelasii 1. Decretum, quod an. CCCCLXXXVI. in Concilio Romano fecit, quodque ex antiquissimo codice Bibliothecae Vaticanae exscriptum noster hic veterum monumentorum corrector sapientissimus non mendose, ut alii non pauci, in lucem protulit. Divinare se jam posse putabat quemadmodum Scriptores ephemeridum Trevoltiensium jactaturi essent opus, quod non Itali modo, sed et Germani magnifice laudaverant (1). Sed quae illi inscite atque inimice obiectarunt ita diluit Fontaninius, ut adversariorum accusationes laudes illius magis magisque illustraverint. Bis Romae editum fuisse opus creditur (2) semel au-

(1) Vid. *Giornale de' Letterati d' Italia* Tom. XXI, Venezia 1715. & *Acta Erudit.* an. 1709. Lipsiae &c.

(2) Apostolus Zenus diligens investigator earum rerum, quas gessit Fontaninius, falso affirmari ait bis Romae editum fuisse illius opus. Mutata enim libri fronte & addita III. parte operis ipse, seu Auctor, sive Typographus fucum, ut dicitur, fecerunt. Vid. ejusdem *Annotazioni alla Biblioteca dell' eloquenza Italiana* Tom. I. pag. 329.

tem Lugduni Batavorum. Tanti enim illud fecit Burmannus, ut ad *Thesaurum* illum suum *Historiarum Italiae* exornandum maxime opportunum judicaverit. Si se occupationibus relaxasset Fontaninius (nam ut plane exsolveretur non postulabat) quibus distinebatur, propterea quod omnibus curis Sedis Apostolicae jura sibi tuenda putabat, alia hujusmodi ad antiquitatem pertinentia profecto vulgasset: haec enim studia otiosum hominem desiderant; sed illa potiora et utiliora judicavit, quibus adversus potentiorum machinas se arripuisse patrocinium aequitatis dicebat. Prima illi contentio fuit cum Caesarianis, qui Duce Bonevallio perduto homine, & instigante Rainaldo Atefino an. MDCCVIII. Comaclum occuparunt, quod ad Caesarem *feudi* jure pertinere ajebant. Non est credibile quantum id doluerit Clemens XI. qui ad molliendum Josephi I. Caesaris animum multis de caussis sibi infensum litteras ad eum dedit plenas justissimi doloris. & querelarum. Sed necesse erat scripto probare nullum esse jus neque Caesari, neque Atefinis in Comaclum, hujusque lacunosam vallem, idque

que Pontifex Fontaninio mandavit. Vulgavit hic eodem anno libellum, quem inscripsit: *Il Dominio temporale della S. Sede Apostolica sopra la città di Comacchio per lo spazio continuato di dieci secoli esposto ad un Principe*, quo in libello collegit gravissima monumenta, ex quibus confici vult diuturna adeo possessione Pontificem deturbare iniquum esse, & Catholico Principe indignum. Tanti haec non esse putavit Ludovicus Muratorius, quin rationibus aliisque monumentis infirmari & dilui possent; et quae jussu Mutinensium Ducis, cui omnia studia sua consecraverat, typis mandavit, ob celebritatem Auctoris & eruditionis copiam magnos profecto motus excitarunt. Ex iis, quae hic scripsit, moderatum hominem & prudentem cognosces; ex illis, quae respondit Fontaninius, satis apparet fuisse illum natura vehementem & ferocem, neque suae, neque adversarii dignitati, dum pro sententia sua pugnat, pepercisse. Ista haec intemperantia (nihil enim juri tam est inimicum, quam vis) vel iis displicuit, qui favebant Pontifici, & dolere ipse postea

T. XIII.

P

debut, quod poenas culpaе gravissimas suscepit. Vere enim dictum:

Paucis temeritas est bono, multis malo.

Controversia inter Muratorii et Fontaninii sententias in illo erat, utrum Romani Pontifices ante Pipini & Caroli Magni donationes Exarchatum Ravennae possederint, & utrum eae donationes validae, confirmataeque fuerint a Ludovico Pio, aliisque Imperatoribus tum Gallis tum Germanis; num hi dominatum et principatum liberum dederint Romanis Pontificibus, aut iis conditionibus, quae sunt omnibus *Feudis* communes; a quibus Atestini Principes Comacini, ut loquimur, investituram acceperint, et cui potestas esset hanc concedendi. Hinc de tota illa controversia de Ferrariensi Ducatu disputatur, & num justa fuerit causa Clementi VIII. illum recuperandi. Multa, quae ad historiam, chronologiam, & criticam pertinent, hinc illinc afferuntur, & nonnulla, quae obscura caligine tecta videbantur, clarescunt. Nostrum non est quidquam de tantis rebus decerne-

re; illud addemus unum Carolum VI. Caesarem reddidisse Benedicto XIII. Comacini possessionem; nec sane verisimile videtur fuisse causam restituendi, si iusta fuisset occupandi. Pro his laboribus praemia haud mediocria Summus Pontifex persolvit Fontaninio. Sibi enim a cubiculo illum esse voluit, auxit etiam ditibus sacerdotiis, et fortasse aluit in ipso speculam fore, ut aliquando amplissimis honoribus decoraretur. Id erat non modo stimulos admoveere, sed pene ignes adhibere, quo pergeret tenere gloriae et industriae viam, quam instituerat. Majores res scribere ingressum, e cursu ipso revocavit voluntas Cardinalis Imperialis, qui ab eo confici et vulgari optavit plures annos ante inchoatum suae bibliothecae catalogum. Praestitit id Fontaninius an. MDCCXI., qui glorians affirmavit magnas se exorbuisse difficultates, et labores prope incredibiles sustinuisse, ut exscriberet librorum titulos, et antiquas et novas editiones adnotaret, ut inveniret, et suis auctoribus restitueret ea, quae inter aliena scripta et collectiones latebant, ut quae es-

sent singularum artium et disciplinarum veluti instrumenta ordine recenseret, ut tale denique opus conficeret, quod et doctrinarum et librorum editorum studiosis utilissimum foret. Constat universum *catalogo Auctorum in alphabeti ordinem adducto, hujusque appendice, catalogo scientiarum, & demum indice classium et capitum*. Ingrate ille se gereret, qui scrutari vellet qui errores in tanta re objecti fuerint Fontaninio: ex his enim libris ii maxime laudantur, qui minimis contaminantur vitiis. Non adeo delectabatur typis impressis libris Fontaninius, quin saepe etiam annosos codices conquireret; et quantum his de rebus ejus tribueretur judicio, satis declaravit vir summus Bernardus Montfauconius, cum in suum *Diarium Italicum* retulisset ejusdem *Dissertationem de translatione codicis Evangelii Sancti Marci ex Foro Julio Venetias*. Codex hic Latinis non Graecis, ut Cornelius a Lapide censuit, exaratus litteris antiquitate superare omnes videtur. Mutilus est, propterea quia Carolus IV. Caesar a. MCCCLV. quo tempore Aquilejam venit visendi causa Nicolaum Patriarcham fratrem suum, quasdam

illius paginas secum Pragam, ubi adhuc servantur, adsportavit. Ab Aquileja Forum Julium, inde Venetias translatus est, quod Fontaninius minime factum fuisse putat ante annum MCCCCXX., quo Venetorum Respublica universam Forojuliensem Provinciam occupavit. Sciebat, cui scriberet, ac propterea dicta sua certissimis monumentis confirmavit. Ipse vero mirum in modum laetabatur, quod a Maurinis Monachis, quorum plurimi iis temporibus erant doctrina illustres, nulla non laude celebraretur, ac saepe consuleretur de rebus ad antiquitatem pertinentibus, ad quas opus erat ingenio acuto et eruditione praestanti. Jam id videbatur profiteri, ut de omni hujusmodi re, de qua disputabatur, copiose dicere posset, quare libenter arripuit facultatem de corona ferrea Regum Longobardorum disserendi, quae Moedoniae in principe Ecclesia servabatur, eique divini honores tribuebantur ea de causa, quod Christi Domini clavum circum eam esse incolae illius regionis a maioribus acceperant. Antiquitatem et sanctitatem hujusce coronae adversus Mediolanen-

ses quosdam, qui utrumque negabant, scripto probandam suscepit, et satisfacisse illum officio suo judicatum fuit non modo a viris doctis, sed etiam ab iis, quorum munus est Romae videre, ut in caeremoniis omnia rite fiant. Quanquam haeretici superstitiose atque aniliter id a nobis fieri affirmant, quod veneremur xxv. usque Christi Domini clavos, plausisse tamen videntur Fontaninii dissertationi, quae secundo edita Lipsiae fuit cum Commentario Ludovici Muratorii *de Corona ferrea*, quem retulerat in secundum *Ancedotorum* volumen. Duritas, severitas (quin dicam iniquitas?) Fontaninii, cum de Muratorii scriptis iudicium ferebat ex iis apparet, quae ipse notavit. Sic enim ait: *Bene est quod (Muratorius) adolescens in coronam ferream se scripsisse dicat. Sed melius dixisset cum Hieronymo: peccavimus pueri, emendemur & senes. Censor non fecit hoc, quare adolescentiae excusatio in accusationem et vertitur (1).*

(1) Quid Muratorius iudicaverit de Fontaninii sententia indicant quae ipse praefatus est ad Tom. xiv. *Rerum Italicarum Scriptor*.

Quod incredibili ille amore flagrabat illustrandi religiosa, quae ad nos ab antiquitate pervenerunt, monumenta, undique conquirenda sibi illa esse putavit, quapropter a Pontifice facile veniam obtinuit lustrandi Italiam, & adeundi homines, qui eruditione atque doctrina excellere putabantur. Collegit laudem omnium undique, & permulta in rem suam seposuit. Sed vix Romam rediit cum iussus est opus aggredi, quo probaret Romanos Pontifices dominationem habuisse in Parmae et Placentiae Ducatum. Causa fuit de hac re differendi, quod in eo foedere, quod ineunte Sextili an. MDCCXVIII. inierunt Caesar, Galliarum et Britanniae Reges, et Batavorum Respublica, cetera inter statuerant, quoties Farnesiorum familia esse desineret, Ducatum illum tanquam Caesareum, ut loquebantur, feudum sub Caesaris ipsius imperium ditionemque casurum (1). Disputatio uberrimos

P 4

(1) Fontaninius ut causae suae serviret, multa sane aliena a vero affirmasse videtur. Si vetera monumenta quaerimus, ut quaerenda sane sunt in huiusmodi controversiis, ex iis patebit nullum fuisse jus Romanis Pontificibus id

fontes juris & historiae continebat, in quibus aperiendis Fontaninius se studiosissimum Pontificiae majestatis ostendit. Totum opus

Parmae Ducatum. Extat in Regio illius civitatis tabulario Diploma Caroli Magni dat. VII. anno ejus regni Italici, hoc est an. 780. vel 781. Aerae Christianae ad Apollinarem Episcopum Regii, quo illi concedit *quamdam sylvam juris nostri sitam in Comitatu Parmensi in finibus Bismani, in loco, qui dicitur Lamafrularia*. Nemo sane ambigere potest totam illam regionem supremis suis tabulis ipsum reliquisse Pipino filio, et Cajetanus ipse Cennius, qui erat studiosissimus defensor jurium Pontificiorum, in opere quod inscripsit *monumentis Dominationis Pontificiae* Tom. II. p. 188. cum de Aemilia loqueretur in notis ad Privilegium Henrici Imperatoris, ait: *Sed provincia erat valde angusta, cujus fines territorium Bononiense ex parte una, ex altera vero Pentapolis*. Quare Ludovicus, Otto, & Henricus Exarchatus & Pentapolis civitates enumerant, Placentia & Parma aliisque ultra Bononiam silentio praetermissis. Non desunt alia monumenta, ex quibus conficitur Reges Italiae & Caesares post Carolum Magnum imperium exercuisse in Parmam & Placentiam. Petrus Maria Campus Canonicus *Istor. di Piacenza P. I. Append. n. V.* pag. 456. vulgavit Placitum an. 83., ex quo apparet Lotarium sedem habuisse infra claustra Sancte Parmense Ecclesiae ad singulorum hominum causas audiendas. Apud Muratorium *Antiquit. Ital. med. Aevi* Tom. 1. *Dissert. XI. col. 369.* extat Privilegium Lud. II. dat. an. 863. quo

tres in libros divisit, neque dubitare se aje-
bat, quin, si armis legum controversia fuisset
dirimenda, ille, cujus patrocinium susceperat,
superior esset discessurus. Homo paratus ad

donat Supponi quasdam *Cortes* juris Regni nostri situs in
Comitatu Parmense in *Gastaldatu Bismantino*, quarum una
vocatur *Felina* & alteram, que nominatur *Malliacu*.
Harum *Cortium* Dominium confirmavit Berreogarius an.
890. Hunnoco filio ipsius Supponis, ut colligitur ex alte-
ro Diplomate apud eundem Muratorium *Tom. 1. Dissert.*
VI. p. 279. Verum quis ignorat Carlomanum illo ipso
saeculo concessisse in feudum Wibodo Episcopo Parmensi
civitatem Parmae cum omnibus ejus regaliis? Male Ughel-
lius id factum fuisse putat an. 872., cum quinquennio
serius id evenisse probetur ex monumento ad ipsum Wi-
bodum pertinente, datoque 29. Decembris an. 877. Extat
illud in tabulario Parmensis Capituli, & inter cetera ait
Episcopus ille: *Deus immixtu in cor Serenissimi Regis, quod*
in manu sua est, teste scriptura, ut nobis in servitio Dei Pa-
tris et Filii ejusque Matris pulsantibus et maxime pro statu
Ecclesie Parmensis intervenientibus suo roboraret edicto & con-
firicaret precepto omne jus publicum & quid quid ad regalem
pertinet exactionem omnino in integrum tantum infra Civita-
Parmensem & Pratum, quod vocabatur Regium in jure & po-
testate istius Ecclesiae Parmensis. Quas postea alii Parmen-
ses Episcopi obtinuerant infeudationes legi possunt apud
Ughellium, ex quibus omnibus conficitur Regium, non
Pontificium jus esse in Parmensem Ducatum.

pericula ; libenter , audacter , libereque dixit quae ad causam pertinere putavit , et acerbè aspereque accusavit illos , qui allata à se infirmare atque convellere posse sperarunt : Sunt quasi ministrae comitesque sapientiae moderatio dictorum atque prudentia . Sed facilius aquam a pumice , quam a Fontaninio , cui vehemens et ferox erat ingenium , hasce virtutes postulasses ; qua re factum est , ut cum in locum Clementis XI. successisset Michael Angelus de Comitibus , ipse ab aedibus Pontificis , in quibus habitabat , abire , et omnem spem , quam in illius humanitate et benevolentia positam habebat , abjicere coactus fuerit . Illam osculatus est , qua fuit oppressus , manum , tacite gemens tristem fortunae vicem . Tum studia sua vehementius coluit , ut per quae res ejus secundae fuerant ornatae , sublevarentur adversae . Levamentum etiam afferebant aegritudinum congressus amicorum , & officia eorum , quorum opera Innocentius XIII. in illam celsissimam sedem dignitatis atque honoris ascenderat ; quos quidem minime poenituit ita esse molitos , ut quoniam pro ratione temporum

multa agitabantur adversa Romanis Pontificibus, Fontaninius consuleretur quid faciendum esse judicaret. Noli putare quidquam illum maluisse, quam ut Pontificis mandatis satisfaceret, et illud praesertim curavit, ut intelligeretur quas adhibuerint machinas Jesuitae ad perdendos tot homines, qui scriptis suis Gallicanam Ecclesiam ornaverant. Quaedam etiam ille exarasse dicitur, quae opportunissima fuerunt ad vindicanda Sedis Apostolicae jura, in quae scriptor audacissimus invaserat, et cum nullam praetermitteret occasionem bene de Pontifice merendi, hic non solum magna signa dedit animi erga illum mitigati, sed etiam benevolentissimi. Talis erat Pontifex Innocentius XIII., ut bonis omnibus ad bene sperandum de Christiana Republica quasi signum aliquod sustulisse videretur; sed impedivit eum mors ne multa et magna, quae animo conceperat, ad exitum perduceret. Huic successit Benedictus XIII., cui cum Fontaninius tribuisset semper diligentem cultum, non solum sperare, sed etiam confidere poterat suam illi fortunam et dignitatem curae fore. Ut testatum Pontifex apud animum

illius relinqueret quid sentiret de illius scriptis; haec dixisse, cum primum illum excepit, narratur: *bene equidem tibi dico, qui tot laboribus pro defendendis Romanae Ecclesiae juribus perfuncto digna ut eveniant precor, et quantum potero enitar.* Neque multo post Ancyranum Archiepiscopum et Canonicum Liberianae Basilicae ipsum creavit. Praeposuit etiam officio, quod *Visa de Curia* appellatur, pendique eidem jussit haud mediocrem pecuniae summam ex redditibus Episcopatus Cenedensis. Assignavit ei aedes in pulcherrimo Urbis loco, ut ibi tranquille et placide suis studiis vacaret. Quod totum se Pontifex converterat ad sanctionem disciplinam revocandam, qua praesertim de caussa in Lateranensi Basilica haberi Concilium voluit, multa ex Fontaninio quaesivit, quasi superiorum temporum consuetudinum et legum interpres, et antiquitatis internuntius ille constitutus fuisset. Et sane nulla res major per illa tempora in controversiam disceptationemque vocata fuit, de qua prius decretum sit, quam ipsius sententia cognita. Accuratissime disputavit de liturgicis libris Romanae Ecclesiae, cum defensionem suscepisset Card. Jo-

sephi Mariae Thomasii, qui eosdem vulgaverat atque illustraverat. Hujus viri sanctitas et doctrina eo magis eminuit, quo studiosius ab hominibus petulantissimis, quibus praeerat Laderchius, opprimebatur, et ut omnia sua officia constarent erga illum, quem suavissime ac diligentissime Fontaninius coluerat, ubi primum Romam venit, ejusdem vitam exposuit, ex qua posterius pudoris, pudicitiae atque innocentiae exemplum capere possent. Eodem ferme tempore de *corona clericali*, de *sacris peregrinationibus*, de *indulgentiis*, de *caeremoniis quibusdam*, de *Cingulana Ecclesia*, quae est in *Piceno*, antiquis honoribus *Cathedrae Episcopalis restituenda*, de *Episcopatu Eugubino* disseruit, dumque se exercebat in hujusmodi consultationibus, huic laudi videbatur studere uni, ut sacrarum Constitutionum, et Pontificalis juris peritissimus judicaretur. Id Benedictus XIII. respiciens mandavit illi, ut poneret operam in vulgandis quinque Gratiani Decreti libris eo ordine, quo illos disposuerat Card. Turrecremata. Hic ordo idem erat, qui librorum, et titulorum Epistolarum Decretalium, quae Gregorii IX. dicuntur. Exem-

plar Turrecrematae operis chartaceum assertatur in bibliotheca Barberinia, sed illud typis imprimere quanti laboris fuerit, ex praefatione Fontaninii perspicui potest. Ait enim: *in ea (editione) procuranda, singulorum Canonum citationes probae a spuris distinctae, ac ad pristinos fontes, ubi licuit, secundum praestantiores editiones recensitae. Ad editionem Romanam exactae pariter fere omnes. Quasdam enim paucas variare, aut tangere, nobis, earum lectionem pro codice habentibus, religio fuit. Characterum diversitate omnia distinximus. Ad Sacrorum Bibliorum loca in contextu recitata, librorum, capitum, & versiculorum numeros e regione exaravimus: quaeque de nostro alicubi post singulos canones persaepe accesserunt, ea literis minuioribus inter geminos uncus clausimus, ut nostra ab alienis sejungeremus. Suspectis brevi monito consulimus; perperam in dubium vocatis praesto fuimus, non raro adductis auctoribus, qui ea tuerentur. Pro maiori canonicae eruditionis utilitate partitionem et numeros vulgatae editionis Gratiani ad oram singulorum canonum adnotavimus, ut facile conferri, & quacunque occasione mox reperiri possent. Prae-*

per ea quinque indices contexti, I. Librorum, titulorum, rubricarum, et canonum. II. Canonum tantum, principiis eorum, ordine alphabetico ita contextis, ut huic nostrae, & etiam reliquis editionibus accommodetur. III. rerum. IV. Historicus. V. Geographicus et Chronologicus. Piihoeorum curae multa nobis subministrarunt. Ex iis non sine crisi selegimus quae ad rem nostram facere videbantur, scriptorum, unde testimonia proferuntur, expressis aetatibus atque epochis certioribus; locorum etiam nominibus, ubi opera, quae laudantur, conscripta, & qua interdum missa. In tanto labore exantlando, addit ipse, se solidos menses XVI. consumpasse, et mirificos sibi adjutores fuisse Vincentium Thomam Moneliam et Dominicum Georgium, viros divinarum rerum scientia claros. Quantum satis esse videbatur disseruit de collectione Isidoriana, hanc vel ipsis Romanorum Pontificum iurium defensoribus acerrimis Antonio Augustinio, Caesari Baronio, et Roberto Bellarmino suspectam fuisse probans, docuitque unde repeti debeat auctoritas, quam obtinuit Gratiani Decretum, quidque judicandum sit de hoc ab iis, qui ratione, non odio judicant. Quod

bene meritum de Pontificio jure, et de Romanis Pontificibus Turrecrematam laudibus extulerit, veniam ab se haud peti debere ait, non desperans illam viam, quam ipse tenuit, sibi ad honores fore expeditissimam. Hujusmodi opus non potuit Benedicto XIII. non summe esse gratum, qui ita gubernabat Christianam rempublicam, ut veterum leges, instituta, mores, quorum in Gratiani Decreto non modo adumbrata, sed etiam expressa sunt vestigia, prorsus instaurari optasset. Quod vero sapientissimus Pontifex illud praecipue in cognitione rerum salubre ac frugiferum censebat esse, intueri sanctitatis documenta in illustri posita monumento, stimulavit Fontaninium ad vulganda, quae de S. Columba collegerat illo tempore, quo iter per Italiam habens ad patrios lares redierat. Ex his confecit commentarium, ex quo apparet Virginem illam Aquilejensem evasisse ex strage, qua complevit florentissimam provinciam Hunnorum Rex Attila, eandem ex hac vita ad superos migrasse III. Non. Aug. an. CCCCLIII., in summo fastigio veterrimae arcis & montis Osopi conditam, eoque in loco

loco Deo aediculam dedicatam fuisse , et ejus sepulcrum sanctum , augustum et religiosum semper habuisse Forojulienses , & magna frequentia celebrasse . Egit Fontaninius cum Bollandianis , ut suam quoque Columbam adscriberent ordinibus Sanctorum , quorum vitas scite et litterate exponebant ; et digna quidem erat hoc honore , quod ea , quae scriptis mandavit Fontaninius , ex epitaphio antiquissimo a se primum detecto , aliisque incorruptis monumentis hauserat . Sed ita in illum animati erant omnes Jesuitae , ut nihil ad eorum mentes oratione flectendas proficere potuerit (1) . Alia hujusmodi , quae ad Sanctorum res gestas et reliquias pertinent , postea exaravit Fontaninius , pugnavitque acerrime pro Ticinensibus , qui magno id sibi ornamento esse existimabant , quod possiderent Augustini cineres , cujus ignoratum sepulcrum detectum fuisse putabatur an. MDCXCV. cum altare quoddam instauraretur in *Confessione Ecclesiae S. Petri in Caelo aureo* . Si Fontaninio fidem habemus ,

T. XIII.

Q

(1) Vide quae ipsi attulerunt in vol. II. Act. Sanct. mensis Augusti p. 124.

saeculo V. exeunte corpus sanctissimi viri ex Africa in Sardiniam ab Episcopis, quos Trasamundus Rex Vandalorum in exilium eiecerat, translatum fuit. Nullo certo monumento id probat, tantummodo conjectura quadam ducitur ad id credendum, quod Beda et Paullus Diaconus, qui illum excripfit, testentur saeculo VIII. Luitprandum Longobardorum Regem magna pecunia a Saracenis redempta Augustini ossa e Sardinia Ticinum asportanda curasse. Nihil his testimoniis potius habuit; cetera, quae affert, antiquitate auctoritateque illis concedunt, nec illa tanti esse puramus, ut rem maxime dubiam certam faciant. Fortasse Fontaninius ipse diffidebat se posse firmissime in hac caussa consistere, in quam Summi Pontificis jussu ingressus fuerat. Laudi tamen ei damus, quod multa eruditione *Disquisitionem* suam ornavit; nam & de Trasamundi crudelitate in Africanos Episcopos, de antiquorum ritibus in sepeliendis Sanctorum cadaveribus, de phialis oleo plenis, quae in eorum sepulcris reperiuntur, de velis, aliisque hujusmodi rebus copiose disseruit. Ait etiam se mirari quod

ignoraverit vir summus Cluverius, idcirco urbem Ticinum dictam fuisse Papiam, quia ex tribu Papia, cujus mentio fit in aliquot perverustis inscriptionibus, eo colonia deducta fuit. Diu disceptatum est a multis, num Ticini esset, inventumque fuerit S. Augustini corpus, & qui Augustinianorum familiae praeerat vir doctus Fulgentius Bellellius, duobus voluminibus comprehendit, vulgavitque Venetiis, quae hinc illinc scripta fuere. De Fontaninio quidem & Saxio, quorum sententiae plurimum tribuere videbatur Bellellius, vere judicatum putamus: *ea dicitis quae non sentitis, utque vestitum, sic sententiam habetis aliam domesticam, aliam forensem* (1). Certiora habuit Fontaninius quae in apertum proferret de Sancto Petro Urseolo, quod summi sui studii in Venetam Rempublicam, cui vir sanctissimus, antequam an. DCCCCLXXXVIII. Benedictinorum familiae nomen daret, prae-fuit, signum esse debere ajebat. Noli putare Fontaninium ea tantummodo persecutum fuisse, quae commendant vitam, mores ac sum-

(1) Ex Cic. lib. II. de finib. cap. 24. Vid. Acta Lipsiensia an. 1731.

nam Urseoli sanctimoniam, ob quae ei Sanctorum honores merito decretos fuisse, & confirmandos esse contendit: nam explicat & excutit multa, ex quibus clarissimarum familiarum Ursiolae, Justinianae, & Buduariae propagines, successiones Ducum Venetorum ab an. DCCCCLIX. ad annum usque MIX. & alia ad Veneiarum & locorum, ac praesertim Aquitaniae, in quibus Urseolus commoratus est, historiam pertinentia possumus cognoscere. Haec gratissima fuerunt Veneto Senatui, qui binis aureis numismatibus et honorificentissimis litteris remunerandum Fontaninii laborem censuit. Est etiam unus liber de vita Camillae Urfiniae Burghesiae, quem ab Alexandro Maffejo amicissimo suo inchoatum Fontaninius ita perficiendum putavit, ut in eo multa ad sancte et caste agendam vitam praecepta continerentur. In quibus dum elaborabat, potius quid se facere par esset intuebatur, quam quid alii, qui majora ab ipso exigebant, laudaturi forent. Quod non solum pudoris pudicitiaeque exempla plurima, et praecepta salutis, sed etiam elegantia & munditia Etruscae orationis peti possunt ex

libris moralibus S. Gregorii, quos in Italiam converterat Zanobius a Strata, omnem a se adhibendam diligentiam putavit Fontaninius, ut illi emendatiores iterum Romae in lucem prodirent. Praeclara voluntas, atque omni laude digna. Num vero ipse plane satisfecerit eruditorum expectationi, ex Apostolo Zeno cognosces (1), in cujus de Fontaninio judiciis probo quidem severitatem, acerbitem non item: quanquam plerisque videatur haud debuisse esse mitis in iudicando de homine, qui nullis unquam condimentis humanitatis severitatem acerbam mitigavit. Mihi quidem ignosces si appellem talem virum saepius. Verissimus enim & sapientissimus iudex Zenus fuit de iis rebus omnibus, quae ad litteras Italicas editosque libros pertinent, & id dolemus, quod Fontaninius tot ad reprehendendum ansas propter praeproperam praesertim in scribendo & de alienis scriptis iudicando festinationem, ac fer-

(1) *Vid.* Annotazioni alla Biblioteca dell'Eloquenza Italiana T. II. a pag. 469. ad pag. 475.

vidum ingenium illi dederit. At si interdum illi deligentia, non labor certe defuit, cum in auctoribus cognoscendis, in evolvenda antiquitate, in notitia vel rerum, vel hominum, vel temporum omnem fere vitam consumpsisset. Illum pene se amisisse annum arbitrabatur, quo non aliquid ex thesauris suis in lucem protulisset. Fecisset hoc egregie, si quod animo conceperat, praestitisset, ut insigniora quaedam Christiana monumenta, quorum maxima Romae est copia, illustrasset. Nam hercle idoneus erat, ut ex illa dissertatione conjici potest, quam de *Disco argenteo votivo* non ita pridem Perusiae reperto, & ad Museum Albanum delato, an. MDCXXVII. in vulgus edidit. Videtur illum ex aede principe S. Petri barbarus miles abstulisse. Erat enim una ex gabatis votivis & gabatis seu lancibus utebantur majores nostri in sacrae mensae ministerio. Hoc ipso in disco victoriam de Maxentio a Constantino ad pontem Milvium reportatam exprimi putat Fontaninius. Inscriptio vero, quae ipsum circum ambit, tota veterum Christianorum pietatem ac religionem olet. Sic enim se habet.

DE . DONIS . DEI . ET DOMNI . PETRI .
VTERE . FELIX . CVM . GAUDIO .

Haec praesertim occasionem Fontaninio sup-
peditat multa de donariis, aliisque ritibus Chri-
stianorum disserendi, quod dum praestat,
se Christianarum antiquitatum litterate peri-
tum ostendit. In praefatione libri eos recen-
set et laudat, qui in huiusmodi studiis uti-
lem operam posuerunt, et admirari in pri-
mis videtur hominem Florentinum sibi ami-
citia conjunctum Philippum Bonartotium,
quo sane nemo doctior, nemo prudentior
exitit. Post haec rediit ad se, atque ad
morem suum; nam in extremo libro vehe-
mentissime objurgavit nonnullos, quos Ro-
manis Pontificibus inimicos esse arbitratus est,
cum quibus se inexpiabile bellum suscepisse
gloriabatur. Questus & graviter est, quod ex-
titisset, qui non solum sumeret multa e sua
Dissertatione, sed etiam surriperet, nulla sui
mentionem habita (1). Qua in re multo am-

P 4

(1) Vid. *Eloquenza Italiana* pag. 491.

bitiosius fecisse mihi videtur, quam honos illius & fama postulabat. Sed erat laudis percupidus, & de suis rebus gestis libenter et saepe loquebatur. At hoc non concedo, ut qua re gloriabatur in se, libertate scilicet dicendi quae sentiebat, eandem reprehenderit in aliis. Haud enim ferebat eos, qui a se discrepabant; disrumpebatur dolore, et iracundia exardescibat, cum vel de levissimo errore coarguebatur. At si quidquam in vita est praedicabile, est profecto defensio veritatis et praestantium virorum, qui pro ea pugnarunt, et hac certe laude non caruit Fontaninius. Matthaeo Petitdidierio Benedictino homini, qui Jansenismi reus accusabatur, ea tribuit, ut plura a parente proficisci non potuerint. Egit cum Pontifice ut Abbatia Senonensis Benedictinis restitueretur, quam ob rem ab Augustino Calmetio, qui illam rexit, maximae gratiae illi actae sunt. Scripta Petri Brunii Oratorii Gallicani Presbyteri praeclare auctoritas ejus commendavit, postquam ille docilem se praebeuit ad quaedam in illis corrigenda. Confirmavit sententiam

eorum, qui antiquissimas caeremonias *salivae*,
salis et *insufflationis* in Baptismate Indianorum
 haud posse negligi affirmabant, retulitque ad
 Benedictum esse summorum Pontificum, quo-
 rum auctoritati et fidei et prudentiae Deus
 ipse sacra religionemque commendavit, nihil
 his de rebus remittere. Scripto etiam pro-
 bandum suscepit ab illorum sapientia remotissi-
 mum fore, si Cordis Jesu cultum invehi in Ec-
 clesiam sivist, quia Christus *non concisus, non*
confractus, non divisus, sed integer accipitur &
colitur; et qui ejus partes et membra quo-
 dammodo caedunt, ut separatim colant, vi-
 deri ipsi Servatori injuriam facere. Omitto
 alia plurima, de quibus consultus disseruit,
 ob quae graves inimicitias suscepit. Excepit
 etiam offensionem ex eo scripto, quo pallium
 negandum Aretinis Episcopis probavit, &
 Cardinalis Laurentius Corfinius, cui haec
 aequa et honesta postulatio videbatur, ut
 Pontifex Maximus creatus est, abire suis
 Quirinalibus aedibus Fontaninium jussit, ei-
 que alia irati animi signa dedit. Tulit haec
 graviter, sed aliquanto levius, quia, ingra-

vescente aetate, cupiditates deferbuerant. Spe reliquae tranquillitatis praesentem calamitatem leniebat, et prope lugubri voce gesta a se pro defensione Sedis Apostolicae recordabatur. Veluti veteranus miles, quem nunquam deserit animi excelsi atque invicti magnitudo ac robur, jus illud *Regaliae*, quod sibi Reges vindicabant, infirmare studuit, cum opus Henrici Norisii Cardinalis *de Investituris* edendum, et eam partem, quam ipse inchoatam reliquerat, absolvendam suscepisset (1). Non minus id contendere atque laborare videbatur, ne quid suorum jurium Romani Pontifices amitterent, quam uti ea, quae dormientibus Principibus obtinuerant, recuperarent. Eodem quoque tempore in eo evigilaverant curae et cogitationes Fontaninii, ut jamdiu institutum a se opus de doctis viris Forojulienibus perficeret, quapropter irasci iis visus est, qui ab hoc studio illum revocare conati sunt, ut aliquid exararet de iis controversiis, quas

(1) Vide ipsius Norisii vitam Tom. VI. p. 77.

Pontifex habebat cum Sardiniae Rege. Quod aegre sibi imponi sivit, brevi abiecit, retulitque animum ad pristinas occupationes. Universi operis minima pars est volumen, quod anno MDCCXLII. vulgatum est Romae cum hoc titulo: *Historiae Literariae Aquilejensis libri V.*, et Benedicto XIV. magno harum rerum aestimatori nuncupatum. Ipse catalogus viro-
rum illustrium Provinciae Forojulienfis, qui est in extremo libro, indicio esse potest quam amplius esset campus, in quo excurrere sibi proposuerat Fontaninius. Quae vulgata sunt pertinent ad Cornelium Gallum poetam, ad S. Hermetem Pastorem, ad summum Pontificem Pium I., ad Fortunatianum, & S. Chromatium Aquilejenses Antistites, ad Tyrannium Rufinum naturae Concordiensem, civitate Aquilejensem, presbyteratu Hierosolymitanum, ejusque edita scripta. Clauduit volumen dissertatio de anno emortuali S. Athanasii Patriarchae Alexandrini, quem Fontaninius multis argumentis (res enim erat controversa) fuisse contendit CCCLXXII. aerae Christianae, Modesto et Arintheo consulibus. Quanquam doctissimorum hominum sententiae non sem-

per consentiant cum dictis Fontaninii (1); unus tamen est consensus omnium, ex hoc opere conjici posse fuisse illum omni sacra & profana doctrina eruditissimum; neque arte, ut ejus inimici dictitabant, sed ingenio, studio atque doctrina dimanasse ad existimationem hominum. Utque intelligatur quanta in opinione praesertim esset apud Gallos, in extrema pagina hujus commentarioli exscribemus, quae de eo dicta sunt in celeberrimo Sorbonae Doctorum Collegio, quando ad illos nuncius de morte ejusdem pervenit. Neque dubitare possumus aliquid assentatorie fuisse dictum, quippe de mortuo et externo homine. Mors ejus consentanea vitae fuit: vehemens enim, non placida, cum illam apoplexis attulisset. Sepultus fuit in Liberiana Basilica cum hac inscriptione.

(1) Vide vol. XI. p. 110. ubi referuntur quae de Rufino & de emortuali Achanasii anno, quo constituto, certo constat annus et suscepti a Rufino baptismatis & arreptae ab eo Orientalis peregrinationis, scripsit Bernardus de Rubéis adversus Fontaninii sententias.

JVSTVS FONTANINVS EX FORO IVLIO
VENETORVM

HVIVS AEDIS CANONICVS

ARCHIEPISCOPVS ANCYRANVS

ET ABBREVIATOR SACRI PALATII

H. S. E.

QVIEVIT IN PACE FIDEI CATHOLICAE
ANNO SALVTIS MDCCXXXVI. DIE XV:1.

MENS . APRILIS

NATVS ANNO MDCLXVI. DIE XXX.

OCTOBRIS.

Astitit morienti fratris filius Dominicus Fontaninius, cujus summa non minus in mortuum, quam in vivum merita constitere. Collegit enim ordinavitque omnia ejus scripta, libros ad S. Danielem, uti testamento patruus civium suorum utilitati consulens praescripserat, deferri curavit, typis edidit opus *de literaria Aquilejensi historia*, quod supra commemoravimus, & commentarium de ejusdem vita exaravit, si non elegantia, ordine ac judicio, pietate certe et multis monumentis, quae illam illustrent, commendatissimum. Nihil est in eo infigae, quod

non minus mea celebratione commemoratum fit; quanquam non ita sim demens, ut aeternitatem immortalitatemque me donasse putem Fontaninio, qui manet mansurusque est in animis hominum, fama ipsa rerum gestarum.

O P E R A E D I T A

Delle Masnade ed altri servi secondo l' uso de' Longobardi. Ragionamento di Giulio Fontanini. In Venezia per Girolamo Albrizzi 1698. in 4.*

Lettera al Sig. Apostolo Zeno intorno alle opere del Tassoni. *Exist* nelle Annotazioni sopra il vocabolario degli Accademici della Crusca, opera postuma di Alessandro Tassoni &c. Venezia 1698. in fogl.

L' Aminta di Torquato Tasso difeso e illustrato. In Roma nella stamperia del Zenobi e Placho 1700. in 8. e in Venezia presso Sebastiano Coleti 1730. in 8. con annotazioni del Sig. Uberto Benvoglianti sotto nome d' un Accademico Fiorentino.

*De usu & praestantia bonarum literarum Oratio habita in Archigymnasio Romano. Romae per Franciscum Gonzagam 1704. in 4.**

Vindiciae antiquorum diplomatum adversus Bartholomaei Germanii dissertationem lib. duo. Romae 1705. per Franciscum Gonzagam.

Dell'Eloquenza Italiana Ragionamento sseso in una lettera all'Illustriss. Sig. Marchese Gian Giuseppe Orsi. In Roma 1706. in 4.^o In Cesena 1714. per Giuseppe Gheratdi in 4. In Roma per il Mainardi 1716. in 4. Edizione disapprovata dall'Autore con pubblico Manifesto. In Venezia presso Giovanni Malachini 1717. in 8 e finalmente in Roma 1736. in 4., ma talmente aceresciuta, che puossi dire opera nuova avendo ancora il titolo diverso, che è il seguente. *Della Eloquenza Italiana di Monsignor Gioffo Fontanini Arcivescovo d'Ancira libri tre*. Nel ptimo si spiega l'origine e il processo dell'Italiana favella. Nel secondo si tratta del suo ingrandimento per l'opere scritte. Nel terzo si dispone una Biblioteca ordinata d'Autori singolari nelle materie più classiche, illustrata di molte osservazioni. Impressione nuova, e dalle precedenti affatto diversa. In Roma nella stamperia di Rocco Bernabò in 4. *His verbis Dominicus Fontaninus retulit patrum opus*.

Il Dominio temporale della Sede Apostolica sopra la città di Comacchio colla difesa del medesimo Dominio. In Roma per Francesco Gonzaga 1709. in fol.

Difesa seconda del Dominio temporale della Sede Apostolica sopra la città di Comacchio. In Roma 1711. in fol.

Confutazione d'uno scritto Italiano e Francese sparsò in Germania intorno a Comacchio. In Roma 1711. in fol.

Risposta a varie Scritture contro la S. Sede in proposito di Comacchio. in Roma 1720. in 4.

Bibliothecae Card. Imperialis Catalogus secundum authorum cognomina, ordine alphabetico dispositus. Romae 1711. apud Franciscum Gonzagam in fol.

De translatione codicis S. Marci ex Foro Julio Venetias. Exiat in libro Montfauconii, cui titulus: Diarium Italicum Parisiis 1711.

De antiquitatibus Hortae Coloniae Etruscorum lib. III. Romae apud Rochum Bernabè 1713. in 4. et in Tom. VIII. Thesauri Antiquitatum Italiae: Lugd. Batavor.

I Morali del Pontefice S. Gregorio Magno sopra il libro di Giobbe, volgarizzati da Zenobi da Strata Protomartiro Apostolico, Poeta laureato, e contemporaneo del Petrarca, purgati da varj errori e di Prefazioni illustrati da Monsignor Fontanini. In Roma Tomi 4. in 4. Il primo per gli Eredi del Corbelletti 1714. Il secondo nella Stamperia Tinassi 1721. Il terzo per Girolamo Mainardi 1725. Il quarto nella Stamperia di Rocco Bernabè 1730.

Dissertatio de corona ferrea Longobardorum. Romae apud Gonzagam 1717. in 4. Lipsiae apud Weidmanum, & in vol. IV. Thesauri Antiquitatum Italiae.

Isoria del Dominio temporale della Sede Apostolica nel Ducato di Parma e Piacenza. In Roma per Francesco Gonzaga 1720. in fol.

Tavola cronologica degli Autori, i quali giustificano la Costituzione di Lodovico Pio sopra gli Stati della Chiesa Romana.

Vita Philippi a Turri Adriensis Episcopi. Exiat in libro ipsius a Turri, qui inscribitur: Monumenta veteris Antii. Romae 1724.

De amplitudine pecularis Provinciae Summi Pontificis, ut Romani Metropolitae, deque Episcopatu Eugubino in eadem posito, commentatiuncula. Romae typis Rev. Cam. Apost. 1725. in 4.

De Cingulana Ecclesia in Picens, antiquis honoribus Cathedrae Episcopalis restituenda, consultatio. Romae Typis Rev. Cam. Apost. 1725. in 4.

Di S. Colomba Vergine sacra della città d'Aquileja Commentario. In Roma nella Stamperia di Rocco Bernabò. 1726. in 4.

Gratiani Decretorum lib. V. secundum Gregorianas Decretalium libros titulosque distincti, praefatione, scholiis & indicibus illustrati a Justo Fontanino. Romae apud Hieronymum Mainardum 1726. in fol. tom. II.

Discus votivus argenteus commentario illustratus. Romae typis Rochi Bernabò 1728 in 4.

De corpore S. Augustini Hipponensis Episcopi Disquisitio. Romae typis Rochi Bernabò 1728. in 4. & Venetiis a Coletto in libro, cui titulus: Collectio Actorum, atque allegatorum, quibus ossa sacra Ticini in Confessione S. Petri in Coelo aereo an. 1695. esse Saeras S. Augustini &c. exuvias probatum est, & novissime judicatum.

Ragioni per l'identità del corpo di S. Agostino estratte dalla disquisizione Latina. In Roma nella Stamperia di Rocco Bernabò 1728. in 4.

Achates Iliacus Annularis commentariolo illustratus. Romae typis Rochi Bernabò 1728. in 4.

Codex Constitutionum, quas Summi Pontifices ediderunt in solenni canonizatione Sanctorum a Joanne XV ad Benedictum XIII. accurante Justo Fontanino, qui lemmata et notulas addidit. Romae Typ. Rev. Cam. Apost. 1729. in fol. Vide quae ad locum quorundam huiusce operis adnotarunt Bollandiani in Tom. II. mensis Augusti p. 248.

De S. Petro Urseolo Duce Venetiarum Dissertatio. Romae typis Rochi Bernabò 1730. in 4.

Tom. XIII.

R

Vita del venerabile Card. Giuseppe Maria Tomasi. *Hæc exstat in ephemeridibus de' Letterati d'Italia, quo in opere exstat etiam Fontaninii epistola ad Ruinartium de morte Mebilloni edita prius in 4.*

Vita della ven. Principessa Cammilla Orsini Borghese, principiata dal Sig. Cav. Alessandro Maffei, e continuata dal Fontanini.

Iusti Fontanini Archiepiscopi Ancyranı Hıstoriæ literariæ Aquilejensis libri V. Accedit Dissertatio de anno emortualli S. Athanasii Patriarchæ Alexandrini, nec non virorum illustrium Provinciæ Fori Julii Catalogus ad Benedictum XIV. P. M. Romæ 1742. apud Palcarinos in 4.

R ferri possent inter Fontaninii opera plurimæ Latinae ejus inscriptiones, plurimæque epistolæ ad Familiares. Extitit et qui fingeret eundem scripsisse libellum multarum paginarum, qui hunc præ se fert titulum. Lettera di Monfig. Giusto Fontanini scritta dagli Elhi all' Autore dell' Osservazioni letterarie. In Napoli 1743.

Nihil elegantius, nihil venustius hoc libro fieri potuit, quo auctor defensionem arripuit Eloquentiæ Italicæ adversus Scipionem Maffijum ceterosque hujus operis reprehensores nimium severos. Cum defensione jungitur confessio errorum quorundam, et causæ eorum offeruntur. Vid. Nouvelle Letterarie pubblicate in Firenze l' anno 1744. Tom. V. col. 8. Prefecti ad Fontaninii gloriam magnus cumulus accessisset, si vivo, ut mortuo, par data fuisset ad scribendam facultas.

Reliquum est ut exscribamus ex vita, quam Dominicus Fontaninius patrui sui edidis, Orationem, quæ dicta fuit in Collegio Sorbonæ. Sic ipse illam ex Gallica in Italicam linguam convertit.

Abbiamo avuta la notizia, Signori, di una perdita, che interessa tutta l'Europa letteraria. Il celebre Monsig. Fontanini, sì cognito per la sua erudizione, sì stimato per la sua modestia, è morto in Roma il mese passato di Aprile. Egli era nato suddito della Repubblica di Venezia, le inclinazioni della sua gioventù diedero un vero saggio de' di lui talenti, e buon gusto verso gli studj, e benchè Venezia sia la principale delle più savie Repubbliche, che giammai l'Europa abbia ammirato, e fosse stata sufficiente ad istruirlo, e ad aprirgli delle strade per farsi merito, nondimeno volle andar a Roma in tempi, che assai fiorivano le belle lettere. Egli si diede a conoscere per uomo di spirito, ma la sua ritiratezza fu di ostacolo, che non divenisse subito palese in una Città, dove comunemente si fanno grandi fortune, e che conviene praticare, ma soprattutto aver un certo carattere di accortezza, che il giovane Fontanini non si curò mai di possedere. Ci voleva un ottimo conoscitore di lui, come fu il Cardinal Imperiali, per levargli il velo di questa modestia, e scuoprire li di lui talenti, dandogli tutta la confidenza, e facendolo custode della sua Libreria, della quale non aveva cosa più cara, il che servì di onore e all'uno, e all'altra per il Catalogo, che di essa compose, che in questo genere si può dire che sia un modello, e un capo d'Opera. Nel palazzo di sua Eminenza ebbe l'opportunità di fare amicizia con tutti li principali personaggi, che allora ritrovavansi, I Grandi divennero maggiori, quando uniscono alla loro grandezza la protezione delle lettere, e de' Letterati. Il Cardinal Imperiali avea conversazione stabilita e fissa ogni settimana, alla quale in riguardo del Bibliotecario intervenivano molte

persone . Benedetto XIII. di casa Orfini fu eletto Papa; che conosceva il merito di Monsignor Fontanini, e la egual inclinazione di essi alla pietà e allo studio fu cagione di una stretta familiarità, che poteva chiamarsi amicizia . Era questo Pontefice un riguardevole personaggio, amante de' Letterati, perchè tale era egli, sebbene più volentieri alcuni dicano, che sia stato piuttosto fornito di grande bontà, che di molta dottrina, essendo però cosa certa, che la pietà non andava disgiunta dalla scienza, e qui in Francia sono stati tradotti li di lui *Discorsi* sopra tutti li Sabbati dell'anno, che vengono letti con grande ammirazione . Per testimonianza del Fontanini il Papa era dotto, e devesi prestar fede, perchè in genere di lodare non era egli molto prodigo, e ciò per solo titolo di giustizia . Lo fece Arcivescovo d' Ancira in *partibus*, Prelatura assai più stimata in Italia, che in Francia, essendo per lo più la ricompensa di un gran merito, o di una illustre nascita . Fu fatto parimente Canonico della Basilica di S. Maria Maggiore, la qual dignità è solita a conferirsi a persone qualificate, e le rendite sono assai buone .

L' Arcivescovo d' Ancira divideva il tempo, impiegandolo parte negli studj, e parte negli uffizj di pietà, nè in caso di grande necessità poteva staccarsi dalla sua domestica Libreria, dove riceveva tutti quelli, che venivano in Roma per solo motivo di approfittarsi nelle scienze . Aveva egli corrispondenza letteraria con tutti li uomini illustri dell' Europa, e per l'inclinazione, e per giustizia dava una gloriosa preferenza a que' Francesi, che in occasioni di Conclavi capitavano in Roma . Ebbe una bontà particolare per il merito dell' Arcivescovo di Burges,

per il Sig. Abate *de Rothelin*, e per li Monaci Benedettini della Congregazione di S. Mauro Bernardo de Montfaucon, Renato Massuet, Pietro Goultanzio, Carlo Conrado, Michele Felibien, Niccolò Nurrio, Vincenzo Theillier, ed altri, e fra' Domeicani per il P. Michele Lequien, oltre all' Abate Renaudot, col quale tenne lunga corrispondenza. L'uguaglianza di spirito, la candidezza de' costumi di questo Prelato sì ne' discorsi, come nelle operazioni, il desiderio insaziabile di fare conoscenza con tutti, furono li giusti motivi delle sue amicizie. Il suddetto Abate de Rothelin essendo comparso a Roma in concetto di uomo di gran merito e riputazione, di niente più si pregiava, che dell'onore particolare di conoscere Monsignor Fontanini, sì giusto stimatore delle persone. Un certo contrasto letterario, che ha avuto con alcuni Gesuiti Francesi, non gli fece niente sminuire la stima, che professava a questa Compagnia, e però riguardava il P. Harduino, come uno de' primarj dotti soggetti della Francia, e il Padre Turnemine era da esso fuor di ogni credere onorato, e lo stesso si può dire che praticasse verso li Padri Solterio, e Janningo, due celebri continuatori del Bollandò.

Oltre le Opere a tutti note, l'ultima edizione della *Eloquenza Italiana*, che sta per publicarsi, è la più infigne; l'Autore in questa più che nelle altre comparirà per quel celebre letterato che è stato: la scelta delle materie l'ordine, la disposizione, la bellezza dello stile, la vivacità dell'espressione, la giustizia che farà a tutti, di concerto la renderanno un capo d'Opera. Monsignor Fontanini si era formato delle regole, e delle massime sopra ogni sorte di studj, nè mai ha voluto impacciarsi in affari di

Religione , e in materie di scienze e di erudizione non si stancava mai di ragionare , perchè il ragionamento è la chiave delle scoperte , e delle nuove cognizioni ; in materia di medicina il rimedio e prenderla rare volte , perchè la migliore è quella , che fa minor male ; in materia di studio lo studiare lungo tempo , e la perseveranza sono quelle cose , che fanno gli uomini grandi . La di lui conversazione versava sopra di ogni sorte di libri , e cercava spogliarsi di una certa superiorità , la quale a tutti piaceva , al contrario di quelli , che affermano di assumerla in una maniera , che tutto il mondo abborrisce . Una vita studiosa , ritirata , piena di buone operazioni lo ha disposto ad una morte cristiana ; è passato all' altra vita da una malattia , di cui noi non sappiamo le circostanze , ma in breve ne aspettiamo il distinto ragguaglio ; a lui gli si conviene tutto quello , che è dovuto ai grandi uomini . Tutti i Letterati piangono la morte di Monsignor Fontanini , e fanno a gara per gettar fiori sopra la di lui sepoltura ; ma i sentimenti , che gli uomini insigni conservano ne' loro cuori , e la loro memoria è un ritratto ben più perfetto , e più naturale di quello , che l' eloquenza la più sublime possa abbozzare . L' illustre Marchese Maffei , il dotto Cardinal Davia , il celebre Monsignor Monti hanno dati de' pubblici segni del loro dolore , e questo solo basta per formare di lui un elogio de' più perfetti . L' *Abate de Cherré* era in Francia uno di quelli , che aveva letteraria corrispondenza col Fontanini , a cui professava amicizia sì grande , che gli poteva esser motivo di vanagloria , se non l' avesse considerata come un effetto della di lui bontà , e per la quale gli ha sempre professata una viva , e giusta riconoscenza .

ANGELUS FABRONIUS

JOSEPHO FARSETIO VENETO PATRICIO

S. P. D.

Sunt duri quidam et agreſtes homines, qui ſaepe invehi ſolent in dulcia mythologiae mendacia, in fictiones illas, quibus Homerus et Heſiodus, et poſt illos poetae omnes carmina ſua ornarunt. Sed quamvis hae fictiones minime veritates utiles, et interdum etiam neceſſaria praecepta tum ad vitam, tum ad populos regendos occultarent, non propterea juſta cauſa eſſet illas vituperandi abigendique: animare enim, et nobilitare videntur naturam ipſam, non ſecus ac ſi Templum Dei eſſet omne id quod conſpicimus. Florum omnium varietates, ſuavitatesque odorum, qui afflantur ab iis, munera ſunt Aurorae, quae lacrimis ſuis illos gignit, mulcet et educat. Dulcis Zephyri flatus folia movet, Najadum ſuſpiria

R 4

salientis et decurrentis aquae murmur efficiunt, et siquid audies strepitus sonitusque, dum agros et nemora peragras, Dianam adesse putabis, canibus, cornu et cursu cervos insequentem, aut Dryades, Napeas, Limoniadesque terram alieno pede quatientes. Deus huc et illuc ventos efficit, Deus caelo demittit aquas, easque aut intra ripas cohibet, aut diffuentes late vagari finit. Bacchus colit arva, & uvae repertor et sator est, Cereis spicis redimita messibus praeest, et a Pomona fructuum ubertatem et copiam accipimus. Quis est ille, qui in summo montis complet aures meas tam dulcis sonus? Fudit illum Pan Deus Arcadiae, qui fistula suspirat amores absentes, eique carmina melle dulciora aptat. Sol Deus est forma pulcherrima, qui undis aureum caput effert, et flammeo curru vehitur, ut cuncta sua luce lustret et compleat. Luna est ipsa Dea formosissima, quae Solis annuos cursus spatiis menstruis consequitur, et accessu et recessu suo ab eo lumen accipit, et mittit in terram, ut homines de fratris absentia consoletur. Neque haec solum clarissima mundi lumina, quae caelo labentem annum ducunt, sed et astra omnia tum ea, quae infixae sunt certis locis, tum illa errantia divinis

animata sunt mentibus, ob eamque causam aut suis sedibus perpetua inhaerent, aut immutabilibus spatiis ab ortu ad occasum commeant cursus suos orbisque confectura celeritate atque constantia admirabili. Dominatur mari Neptunus, quem innumerae comitantur Nereides concharum sono, quas praecedunt Tritones inflant, saltantes. Ille Divum atque hominum Pater Jupiter maximus aut fulmina, quae Cyclopes fabricarunt, etherea domo dimittit ad perterrendos puniendosque homines, aut parvo capitis motu Olymperi quatit, aut risu naturam laetificat. Circum eum sunt Numina purpureo in stratu assidentia, et bibunt ambrosiam, quam juvenis pulcherrima Hebe ministrat. In hoc Deorum concilio fulget Venus solo ornata cinctu, et circum eam ludunt charites, risus et joci; ludit et Amor, qui licet inter agros, interque armenta natus sit, caelum tamen ipsum et naturam universam suo imperio subjecisse videtur. Hi, hisque similes poetarum nos delectant errores; et quod in iis oblectamenta et solatia servitutis, ceterorumque malorum, quae humanam vitam comitantur, inveniunt homines, et quod ab iis artificiosa, et divina opera Graccorum, quae tantopere admira-

mur, dimanarunt, nimis aspere et rustice (quin etiam dicam illitterate?) ii nobis agere videntur, qui illos, tanquam delirantium somnia, omnino deridendos atque contemnendos pronuntiant. Sed, ut supra innuimus, latent in ipsis fabulis multa vera, quae idcirco velis quibusdam obtendebantur, ne palam proposita a vulgo contemnerentur atque irriderentur, omninoque illud affirmari posse videtur, mutuis officiis philosophos a poetis fabulam, poetas a philosophis sapientiam accepisse, quod respiciens Aristoteles in exordio Primae Philosophiae scripsit, amatorem fabularum quodammodo philosophum esse. Profecto ad rerum quarundam naturalium memoriam retinendam, et opiniones, quae de iis veteres habuerunt, comprehendendas mirifice conducunt fabulae, ut illa de Phaethon-te, qui terram, quae circa Padum est, ut nunc etiam multa indicia apparent, praesertim in Patavinis montibus, combussisse videtur, illa de Neptuno, qui idcirco a Graecis Εννοσίγαιος appellabatur, quod ab aquis in terrae visceribus clausis illa moveri putabatur. Prothei fabula tota physica est, sub quo tegumento materia communis rerum omnium delitescit, et huiusmodi similia multa in Homero occurrunt, quae Plutarchus in

primis atque Heraclides Ponticus persecuti sunt, ex quorum explanationibus facile intelligi potest retrusa atque abdita esse in Deorum fabulis prae-cipua veterum physicorum mysteria. Nonne quod maxime in cognitione rerum salubre et frugiferum est, scilicet, ut quod tibi tuaeque reipublicae utile sit capias, quod foedum inceptu, foedum exitu vites, ex poetarum fictionibus praesertim discas? Est officium hominis, ut unam atque alteram rem exempli caussa ponamus, non esse nimis curiosum in exquirendis iis, quae ad Deum pertinent, cujus praecepti vim, et quae sequantur ex violatione mala, unde melius cognosces, quam ex poena, qua affectus fuit ille curiosus Bacchicorum mysteriorum investigator Pentheus, qui vidit

Et geminum solem, et duplices se ostendere Thebas?

Quod voluptas rationi inimica impediat consilium, ac mentis perstringat oculos, nec habeat ullum cum virtute commercium, hujus veneficam naturam veluti in tabula pictam inspicies in HomERICA Circe, et, si cupis, tanquam alter Ulixes, a Mercurio herbam $\mu\omega\lambda\upsilon$ dono accipies, qua ejus pestiferos morbos sanare possis. Quae ratio poe-

tas, maximeque Homerum impulit, ut unicuique rei, hominumque facultati, studio, indoli Numen suum peculiare tribuerent, nisi ut varias et multiplices universi notas et proprietates, quæ simul sumptæ omnes mundi partium naturas, et ætates exhiberent, itemque morum et affectionum χαρακτῆρας? Immo: ut acutiora ingenia id quod res esset suspicari et ad medullam fabulæ penetrare possent, Deos induxit Homerus peccantes aliquando, et Diis hominibusque indigna perpetrantes: ita enim cordatis lectoribus manifestum fiebat illos re vera Deos non habendos esse; nihil enim prævum, scelestum, flagitiosum cadit in divinam naturam. Hinc quotiescumque non fabulose aut poetico more, verum serio et ex animi sui sententiâ locutus est ille non tam poetarum, quam philosophorum princeps, unum Deum posuit, cumque omnia tempora et loca pervadentem, nullis finibus circumscriptum, rerum omnium et naturarum auctorem, cujus personam interdum Jovi gerendam tradit, præcipue cum Diis reliquis ipsum validiorem facit, ut loco illo, quem locum Plato accurate perpendit, ubi cætena quædam aurea in terras a Jove demissa commemoratur. Non sane materia deesset ei, qui vellet fabulas omnes poet-

tarum, et quae tum physica, tum historica, tum moralia, tum theologica, tum politica ab iis involvuntur explicare; quare minime est mirandum, quod veteres Homeri poemata, quamvis tota ferme ex fabulis contexta sint, speculum vitae humanae et universitatis rerum imaginem appellaverint. Est igitur poesis, ut optime animadverit Aristoteles, nescio quid majus quam vulgo judicatur, et multis disciplinis, ut Graeco vocabulo utar, φιλοσοφῶντων. De cujus artis jucunditate, utilitate atque praestantia libuit mihi tecum praeicere, si copiam argumenti, multis, si epistolae modum spectes, disserere, occasione sumpta a commentariolo de Jo. Antonii Vulpii vita, qui Latina praesertim poesi unus inter omnes excelluisse videtur. Hoc te humaniter accepturum veluti amoris et observantiae meae pignus sperare jubet amicitia et conjunctio studiorum, quam cum eodem habuisti, ut te laudare mihi videar, dum eos laudo, qui Latinas Musas feliciter excoluere. Vale.

Pisis Kal. Quint. MDCCLXXXVI.

JO. ANTONIUS VULPIUS

Joannes Antonius Vulpus Patavii ortus est III. Id. Novembris ante lucem anno a reparata salute MDCLXXXVI. Jo. Dominico Vulpio, et Christina Zena. Pater ejus e Valseriana, quae generis antiquitatem testabatur, Patavium circiter an. MDCL. habitatum venit, qua in urbe honoratus erat et propter animi virtutes, et propter honestatem familiae, cujus decus non mediocriter augebat affinitas, quam habebat cum Joannelliis. Hi enim summa virtute perfecerunt, ut amplissimis honoribus a Veneta Republica, neque solum iis civilibus, sed etiam summo Sacerdotio (Patriarcham appellant) digni putarentur. Jo. Antonius institutus liberaliter educatione doctrinaque puerili magnam spem in patre excitavit fore, ut qui jam inter aequales eminebat, inter summos etiam viros aliquando ingenio et doctrina excelleret. Illi nihil jam noceri potuit a Guglientio et

Gabellotto Jesuitis, qui publice Patavii, sed perverse, ut aetas illa ferebat, humaniores litteras docebant, cum ex aurei saeculi Scriptoribus, quos diurna nocturnaue versabat manu, poetices et eloquentiae praecepta hauriret. Ad Latinam poesin praesertim ferri videbatur; nam ex tempore interdum Latinos versus fundebat. Quae facilitas persuasit ei, ut Latinis numeris Italicum Tassi poema de Hierosolyma in libertatem vindicata redderet. Perduxit opus ad IX. usque librum, quod postea in ignem conjecit, ex vero judicans illam praeclaram et eximiam speciem perfecti poetae et pulchritudinem, quam tantopere in Tasso admiramur, mutatione vestis facta, aut amitti, aut saltem plurimum minui. In philosophia praeceptores habuit primum Franciscanos homines Urbanam et Paganium, postea Michaellem Vierium, a quo non dialectica modo, metaphysica et physica institutus fuit, sed etiam theologia, quia militare Ecclesiae deliberaverat, quod consilium postea multis de caussis abjecit. Vierius sapiens quidem homo, & multarum rerum peritus tantum amorem Graecorum philosophiae &

praesertim Peripateticae in discipulo, qui erat ad disputandum acutus, & ad explicandum uber, excitavit, ut hic in illa una quasi tabernaculum vitae collocasset, nisi natura, cui omnes paremus, ad poesin & eloquentiam, omnesque humaniores littera factus praesertim fuisset. Sed quia hae maxime adjuvantur a philosophia; Joannes Antonius non veterum modo, sed et recentiorum decreta noscere voluit, eaque propter mathematicis etiam disciplinis nonnihil operae impendit. Didicit & a Graeco magistro Graecas litteras, et quod mireris, biennium versatus est in studio juris prudentiae, duce Jo. Baptista Cessio Bergomate, cujus non schola modo, sed & domus Themidis oraculum esse putabatur. Per juris prudentiam non illam forensensem, sed eruditam aditum ad Doctoris munus in Gymnasio Patavino facile sibi comparare posse sperabat; sed quod optabat obtinuit a philosophia, cujus secundarius, ut appellant, Magister an. MDCCXXVII. declaratus est. Serius quidem, si hominis ingenium et doctrinam et famam, quam collegerat, editis praesertim Latinis & Italicis carminibus, spectes.

ctes. Tum necesse ei fuit coronam illam lauream, quae testimonium esse solet doctrinae, accipere, et habuit a philosophia & medicina, more, ut dicitur, nobilitum, postulante, ejusque laudes celebrante Antonio Vallisnerio, qui in eo genere praeter ceteros excellere merito sane putabatur. Est in manibus hominum Latina oratio, quam habuit, cum ad physicam tradendam aggrederetur, eaque perelegans et persubtilis adeo judicata est, ut etiam adversantem & repugnantem illius disciplinae studio allicere posset. Tamlate enim hanc patere et dominari probavit, ut in ipsa cognoscenda maxima sint momenta ad bene beateque vivendum. Quo vero majorem gloriae fructum perciperet, illam ipsam convertit in Graecum, sicque invidiam fecit iis, qui minus illum ad hanc rem idoneum esse dictitabant, ut se ipsos, qui sane inferiores erant, magis magisque extollerent. Neque multo post binas alias orationes habuit de Aristotele, quod, ex vetere Gymnasii instituto, illius philosophi scripta praesertim esset explicaturus. Multis in rebus se acerrimum illius defensorem fore osten-

dit, et dum eos recenset, quibus Peripateticorum ratio non probatur, se non ignarum recentioris philosophiae ostendit. At quamvis ingenue fateretur nonnulla praeclara tum a Galileo, tum a Cartesio, tum a Gassendo inventa fuisse, multa tamen in eam sententiam dixisse videtur: *antiquitas, quo propius aberat ab ortu et divina progenie, hoc melius ea fortasse, quae erant vera, cernebat*. Ex quo factum est, ut syntagmate quodam separatim de iis egerit philosophis, qui lib. I. Physicorum ab Aristotele memorantur, eorumque decreta (quin potius dicam somnia?) de rerum naturalium principiis breviter, eleganter et dilucide explicaverit. De caeli natura, de vacuo, de loco, de non omnino repudianda Academicorum et Scepticorum in physica philosophandi ratione egit alijs orationibus (nam vulgatas ab ipso tantummodo commemorandas esse putamus); verum in luce, in qua nunc versatur physica, quodammodo injuriam facere mihi videntur nobilissimae disciplinae non modo ii, qui disputant quae sit caeli & loci natura, utrum in universo corporeo sit aliquid inane, sed et

ii, quorum aures ad hujusmodi disputationes patent. Nam ut vinum vetustate coacescit, sic multae veterum physicorum quaestiones prorsus evanuisse videntur. Sed venia interdum necessitati danda est. Munus enim, quod sustinebat Vulpius, poscebat ab ipso, ut illa Aristotelia tractaret; & laudem certe in eo meritus est, quod adjunxerit ad doctrinam propriam philosophi, elegantiam verborum, et interdum etiam oratoria ornamenta. Et cum nihil illarum rerum omiserit, quas aut invenerunt, aut excogitarunt posteriores physici, ejus scripta multo ampliora judicari debent, quam illa, propter quae haec elaborata fuerunt. Antiquitatis studium obtinuit etiam a Vulpio, ut e Graeca lingua in Latinam converteret, & commentariis explicaret Dialogum Zachariae Scholastici, quo adversus Aristotelem suum ostendit factum a Deo fuisse mundum, hunc regi ipsius numine, et ad illud usque tempus duraturum, quo eidem libuerit statum hujus naturae commutare. Non poterat non confiteri Vulpius se cum magna animi voluptate philosophica tractare. Sed per haec ad immorta-

litatem, quam quaerebat, cujusque erat cupidissimus, aspirare non poterat. Spem, quae eum frustrata fuerat docendae juris prudentiae, redintegrassent Academiae Curatores, si cum illa disciplina in gratiam redire voluisset. Multa attulit, ut rationem redderet, quare sui ingenii non essent concertationes & spinae juris consultorum, & se cum mansuetioribus musis rationem omnino habere velle ostendit. Florebat tum maxime non Patavii solum, sed etiam in universa Italia Dominicus Lazzarinus, vir Graecis Latinisque litteris eruditissimus, quarum caussam, dum vixit, singulari animi constantia defendit adversus eos, qui vitiosam corruptamque & scribendi & docendi consuetudinem invexerant. Tantus vir e vita cessit Patavii IV. Non. Quintil. an. MDCCXXXIV., & ut aliqua ratione damnum, quod ex illius interitu fecit Gymnasium Patavinum, sarcirent illius Curatores, undique, magnis propositis praemiis, conquieserunt hominem, qui in illius locum merito aut succederet, aut successisse videretur. Mirari id se nonnulli responderunt, quoniam domi habebant, qui

se fere cum Lazzarinio aequare posset, & dum Vulpium nominabant, plenior ore ejus scripta tum Latina, tum Italica, quorum plurima in vulgus ediderat, laudabant. Prorsus ex his testimoniis non videbatur posse esse dubium, quin Vulpus cathedram, quam Lazzarinius tenuerat, magna cum Gymnasii gloria esset occupaturus; quapropter honorificentissimo Veneti Senatus decreto, cujus verba infra exscribere minime pigebit (1), III. Non. Maii an. MDCCXXXVI.

S 3

(1) „ Chiamato all'eterno riposo il Professore Dot-
 „ tor Domenico Lazzarini, che ha lasciato di se stesso
 „ degna e felice memoria, resta vacante la cattedra di
 „ Umanità Greca e Latina, che con piena e giusta lode
 „ egli sosteneva. Estese dal zelo de' Riformatori nostri
 „ in più parti le diligenze loro affine di provvederla di
 „ soggetto, che corrisponda alla sua importanza, cono-
 „ scono opportuno l'incontro di appoggiarla al Professor
 „ Gio. Antonio Volpi, che nella lettura di filosofia ordi-
 „ naria in secondo luogo con decoro e vantaggio dello
 „ Studio fin qui esercitata ha reso celebre il di lui nome,
 „ e con le dotte stampe prodotte alla luce autentica la
 „ nobile erudizione che lo adorna, e la rarità del ta-
 „ lento, che possiede &c. „

humaniorum litterarum magister renunciatus est. Tum se beatum putavit, quod plane ingenio suo satisfacere posset, et cum memoria repeteret magnos illos viros Bonamicum, Robortellium, Sigonium, Riccobonium, Ferrarium et Lazzarinum ipsum, qui idem munus sustinendo tantum ornamenti addiderunt Gymnasio Patavino, ad illa studia recolenda, quibus a pueritia in primis deditus fuit, magis magisque inflammabatur. Egit causam humaniorum litterarum in ea, quam ineunte anno MDCCXXXVII. dixit, oratione, quaque creditae sibi scholae fores triennio ferme clausas aperuit. Hanc tres aliae subsecutae sunt, quae in eodem ferme argumento versantur. Nam cum renovaretur a multis five imperitis, five malevolis, five ignavis vetus querela, non esse in iis cognoscendis disciplinis, quae dicendi rationem tradunt, diutius immorandum, sed potius eas abjici oportere, non solum quod ad studium veritatis nihil conferant, verum etiam quod bonis mentibus tenebras, bonisque moribus labem inferant, horum sic confutandas rationes putavit, ut illis nihil levius, nihil

a recta ratione magis alienum esse probaret. Omnino perpetuum bellum sibi esse voluit Vulpius cum agrestibus illis viris, qui non intelligunt quanta utilitas sit in arte faciendae orationis, qua vel obscuriora illuminantur, austeriora suavitate quadam condiuntur, nuda vestiuntur, severiora exhilarantur, molliuntur, omnesque non alliciuntur modo, sed etiam coguntur ad noscendam atque amplectendam veritatem. Ut exempla abundarent, et ut gratus erga eos cognosceretur, per quos profecisset, veteres quosdam scriptores aut illustrandos, aut etiam edendos suscepit. Typographium enim domi suae instituit, cui praeerat Josephus Cominius, qui sumptibus & diligentia & eruditione Vulpii illud consecutus est, ut ejus nomen universa in Europa celebraretur, et quae ipse edebat ab omnibus studiosissime conquirerentur. Nam non sine corollario Praefationum tanti viri prodibant libri, et ex una, qua omnem fere T. Lucretii Cari seu Epicuri philosophiam persecutus est, & veluti in tabula bene picta exposuit poetae nobilissimi virtutes, & quid in ejus lectione caveri, quid contra

sciligi ediscique oporteret, conjici potest quam doctus aestimator, et sapiens rerum judex esset. Longum porro esset, si recensere vellem omnes Latinos scriptores per Cominium editos, & quid aut consilii, aut operis ad illorum exornandas editiones contulerit Vulpius. Qui quidem cum non solum admiraretur veteres illos recte scribendi magistros, sed etiam scriptores, qui felici ausu, postquam Latinae litterae ex diuturna & crudeli servitute in libertatem vindicatae fuerunt, eorum elegantiam, vim & veneres exprimere conati fuerant, horum quoque bene multos, sed praesertim poetas Cominianis typis imprimendos curavit. Hinc occasionem sumpsit declarandi vitas Actii Sannazarii, qui postquam de partu Virginis Virgilianis modis cecinit, Musas sacros recessus, sylvasque deserere, & littora incolere coegit; & Andreae Naugerii, qui fuit non unus elegiacus poeta e multis, sed potius inter multos prope singularis, denique historicus, et publicarum rerum peritissimus. Quaedam etiam tetigit de vita gentilis sui Jo. Antonii Vulpii Patricii et Episcopi No-

vocomensis, cujus carmina in lucem edita perplacuerunt omnibus, sed praesertim satyrae duae, quas ad Venusinam lucernam illum elaborasse facile judicabis. Nec minus meritis est Vulpus, editis elegantissime Dantis, Petrarchae, Politiani, Alamannii, Oricellarii, aliorumque carminibus, de Italica poesi. Dantem etiam illustravit, cum & verba obsoleta & sensus illius obscuros explicasset, et quae ad historiam atque mythologiam pertinent, breviter declarasset. Haec quidem omnia plurimum laudanda sunt; sed illa majora & admirabiliora, quae contulit ad explanandos illos amatorios poetas, qui ceteros omnes longe multumque superasse videntur, Catullum, Tibullum atque Propertium. Vel a prima adolescentia brevia quaedam scholia in eosdem poetas Vulpus ediderat in vulgus, quae ita accepta fuerunt, ut licet multa praeclara haberent, ubertas tamen, copia, varietas in iis desideraretur. Praeclare enim Plato (1): *univer-*

(1) In Alcibiade posteriori.

sa poetica est natura sua aenigmati involuta, ut non sit vulgaris hominis notitiam ejus habere. Quae juvenis fidenter nimium emisit, grandior factus improbavit, quapropter in animum induxit veterem telam retexere; ac novam ordiri. Quidquid igitur longo intervallo ex quotidiana optimorum auctorum consuetudine haurire et contrahere potuit; utilioribus & uberioribus commentariis instruendis totum seposuit. Ante omnia dedit operam, ut verba poetarum quam emendatissima proferret, germanasque lectiones seligeret, ac idoneis argumentis confirmaret, deinde ut nihil non explicatum relinqueret, secutus maxime exemplum Dionysii Lambinii, qui inter omnes interpretes unus excellere videtur. Quanquam nihil earum rerum omiserit, quae ceteri ante eum scriptores feliciter in iis explicandis poetis litteris mandaverant, in eo tamen vim doctrinae suae praesertim consumpsit, ut ipse ab aliis potius eligendus, quam aliorum bonus elector existimaretur. Quapropter multa nova, et prorsus sua prouulit, sicque universum opus contextuit, ut peracutus et aequus in aliorum cogitatis

perpendendis , modestus in suis¹ proponendis ,
et omni poetica doctrina , veterum historia ,
moribus , ritibus , lingua , omninoque Grae-
cis Latinisque litteris eruditissimus jure ac
merito judicaretur . Anno MDCCXXXVII.
separatim edidit commentaria in Catullum ,
quae , siquid judico , praeferenda ceteris sunt
et propter lautam eruditionis suppellectilem , et
propter difficultatem rei , cum frequentiores sint
in Catullo nodi , qui docto explicatore indi-
gent . Opus dedicavit Duumviris Veronae ,
quod haec civitas , ut aiebat Ovidius , *non
minus Catullo , quam Mantua Virgilio , gaudeat* .
Laus Vulpii , quae gratissima omnium civium
memoria inclusa erat , auctoritate etiam pu-
blica testata est . Accepit enim a Duumviris
litteras honorificentissimis verbis exaratas , &
donum aurei numismatis maximi moduli ,
cujus in antica parte extat Vulpii ipsius ef-
figies ad vivum expressa , in postica Vero-
nae stemma cum quercea corona atque in-
scriptione : GAUDET VERONA CATULLO .
Vidi hoc ipsum apud Sibilliatum , ad cujus
manus forte fortuna pervenit , ne tanti ho-
noris memoria interiret , ut multa alia culpa

haeredum interierunt a Vulpio vel collecta, vel scripta, quae ejus in omni re elegantiam declarabant. Quanquam ipse, edito Catullo, fidem suam obligaverit se propediem commentaria in Tibullum et Propertium editurum, attamen nonnisi multis annis post id quod promiserat solvit, quod impediretur difficultate rei, valetudine, quam continuæ vigiliae & melancholia turbaverant, & scholae occupationibus. Usque eo difficilis et morosus erat, ut satis se muneri non fecisse arbitraretur, nisi diu considerata, & multo ante meditata, quaeque reconditis et interioribus in litteris versantur, attulisset, irridebatque eos, qui magistri alicujus loquacitatem sine usu, & ex scholis cantilenam quamdam requirebant. Docebat, delectabat, permovebat etiam interdum auditorum animos; quapropter vel ab homine alienarum laudum parcissimo Jacobo Facciolato de eo praedicatum est: *semper eruditione atque elegantiata* (docuisse), *quantæ loci dignitas poscit*. Huic praeconio illud addemus, fortunatissimum nos putare Gymnasium Patavinum, quod hac nostra aetate (non lubet antiquiores

nominare) tres habuerit humaniorum litterarum magistros Lazzarinum, Vulpium, & qui huic successit, Sibilliatum, de cujus amicitia, dum vivam, gloriabor, qui pares omnibus magnis viris, quos exterae nationes nimium arroganter interdum jactant, & multis etiam superiores existimari possunt. Nos quidem nonnullis praestantiam in physicis & mathematicis rebus concedimus, quamvis nec nobis defint magni & physici & mathematici, & gloriemur harum disciplinarum aut inventoribus, aut instauratoribus; sed quae ad humaniores litteras pertinent, adeo sunt propria Italorum, ut multa licet habeant communia cum multis, nulla tamen natio cum iis et numero & praestantia poetarum & Latinarum rerum notitia, & Latine scribendi elegantia et artificio, quod in venustate, pulchritudine & convenientia partium illarum rerum consistit, quas aut oculis subjicimus, aut auribus commendamus, contendere possit. Sed ut, unde Italiae amor nos abripuit, revertamur, non necesse putamus pluribus verbis exponere quantam doctrinae et eruditionis vim ad discipulos erudiendos, et scho-

lae dignitatem tuendam contulerit Vulpius, cum terantur omnium fere manibus, quae ipse vulgavit de utilitate poetices, de traegodia et de satyra, ex quibus de universa ejus docendi ratione judicari potest. Noluit autem angustis scholae parietibus contineri, quae magno labore ex multis libris, & praesertim ex Aristotele collegerat, et diuturna meditatione ac studio per se animadverterat de poesi in universum, et de variis ejus generibus, quod hanc artem in primis amaret, & ex ea maximos fructus tum ad jucunditatem, tum ad utilitatem percipi posse intelligeret. Hunc suum amorem, seu potius ardorem hoc eleganti epigrammate significavit.

*Ussit me puerum doctarum forma Sororum,
Idem ego (fata jubent) urar amore senex;
Sic poterunt juvenes ad nostrum dicere bustum:
Quam tibi vita fuit, tam tibi longus amor.*

Mirari vero debemus non modo in florenti aetate, sed etiam in senecta Vulpium tam faciles habuisse Musas, ut ejus carmina

omnia, sed praesertim Latina, immortalitati commendari mereantur. Quae subito calore juvenis effudit, quanquam ex iis duxerit commendationem ineuntis aetatis, acri deinde limina perpolivit, et ad normam elegantissimorum scriptorum severe exegit. In elegia, quod genus poesis praesertim adamavit, Tibulli veneres, candorem, incorruptamque Latinitatem potissimum secutus est, neque idcirco Propertii nervos, eruditionem, peregrinos colores, aut Ovidii copiam ingeniumque est aspernatus, quemadmodum et in ceteris carminibus optimum quemque Latinum poetam sibi ad imitandum proposuit. Plura etiam sumplit ex Graecis scriptoribus, neque verebatur crimen arrogantiae, dum discipulis suis proponebat suum exemplum ad imitandum, atque fontes, unde tantam elegantiae copiam hauserat, atque etiam itinera ipsa demonstrabat. Quod Catullus de malo poeta, nos de bono pronuntiabimus;

. *neque idem unquam*
Aequè est beatus ac poema quum scribit,
Tam gaudet in se tamque se ipse miratur.

Non enim severe judicandum est de homine, ac praesertim de poeta, qui plaudet sibi, quod sanos et grandes foetus ediderit. *Quam gaudebat*, inquit Cicero, *bello suo Punico Naevius*, *quam Truculento Plautus*, *quam Pseudolo*? Vix sane invenitur, qui, magnis tolerantis laboribus, non quasi mercedem eorum desideret gloriam, neque gaudeat suo, et intelligentium virorum judicio, praesertim si ejus scripta incurrant in voculas aut malevolorum, aut invidorum. Videbatur omnino civitas Patavina esse in duas partes divisa, quarum una palmam, si quaerebatur quis maxime excelleret in humanioribus litteris, Facciolato dabat, altera Vulpio. Uterque sane magnis dignus laudibus erat. Sed ut erant natura dissimiles, ita differebant ingenio & studiis, quamvis eandem artem excolerent; nec dubito quin hoc invidiosum futurum sit Facciolato, quod ea, quae scriptis mandavit Vulpius, non satis laudasse videatur. Erant enim in eo reconditae & interiores litterae, optime Graece sciebat, erat in omni judicio et in omni scriptione elegantissimus, ut vel Etrusci ipsi solerent
ei

ei suae linguae subtilitatem elegantiamque concedere; poesi adeo valebat, ut primas in Latina, secundas in Italica ei facile concedam; probabilis erat orator; recte judicabat de antiquitatis monumentis, ut ex ejus divinatione in Diptychum Quirinianum conjici potest; adeo vero a philosophia, a jure civili & divino, ab historia instructus, ut lautam inde suppellectilem ad exornandam artem, quam profitebatur, et munus, quod sustinebat, transferre potuerit. Non est vero credibile quantas vigilias et labores, qui nec aetatis flexu constiterunt, ad optimas sibi comparandas artes impenderit. Hinc ne minima quidem tempora, quae vel homines industrii levando animo concedere solent, perire sinebat, et solitudine adeo oblectabatur, ut nihil ea dulcius, nihil ad alendam sapientiam magis idoneum esse affirmaret. Ejus laudes aliquando carmine Italico in doctorum hominum conventu celebravit, sed quia veritus postea est, ne quis a *Polinnia* (sic enim carmen ipsum inscripsit) se laesum esse arbitraretur, quodque a quopiam lae-

dendo natura et doctrina abhorruit semper, ejus exemplaria emissa in vulgus ad se se revocavit, et ne ulla existerent, quantum fieri potuit, cavit. Nolo tamen quis credat solitudinis amorem omnem ei abstulisse fructum voluptatum, quae ex hominum societate, ad quam nati sumus, capiuntur. Frequentabat Academias, et illam praesertim, quae *Recuperatorum* dicitur, colebat praesentium & absentium amicitias, atque intimos Patavii habuit Morgagnium, Dandinium, Polenium, Camposampierium, Alexium, Al-dirghettium, Burgedegatium, Gennarium, Sertorium atque Joan. Antonium Orsatos, quorum avi eruditissimi sane viri vitam Italice declaravit; jocos hilarulis condiebat familiares sermones; erat facillimus atque humanissimus erga omnes, et in primis erga discipulos suos ceterosque, qui colebant mansuetiores Musas, quam benignitatem mihi quoque homunculo experiri contigit; non omnino abhorrebat a feminarum consuetudine, quamvis hanc non requireret; laudavit illas interdum, interdum carpsit earum levitates

atque artificia, et nimis fortasse severe a doctrinarum studiis illas removendas esse Italica oratione probavit. Sed haec severitas habuit aliquid excusationis, cum debuerit tempori et argumento inservire, cujus ratio proposita illi fuerat a Patavina Recupertorum Academia. Captus et dulcedine matrimonii fuit, et gratias Deo agebat, quod talem sibi concesserit uxorem, in quam tanquam in speculum intueri possent omnes nuptae mulieres, adeo excellebat cura et providentia rei domesticae, castimonia, robore animi atque constantia in adversis rebus, maxime vero erga virum amore, cujus gravem et omnium incommodissimam valetudinem (nam atrabilis interdum in eam mentem turbavit) fortiter pertulit, omnique officio ac ministerio levavit. Tanti viri infortunium non uxor modo miserabatur, sed et omnes ii, in quibus humanitatis sensus et litterarum amor erat, ex quo fortasse factum est, ut Venetus Senatus, postquam eum laxavit scholae occupationibus, omnino exsolverit, scripto in hanc rem ix. Kal. Feb. an. MDCCLX. honorificentissimo decre-

to (1). Cum vero residebat melancholia, redibat
Vulpius ad pristina studia sua, et illud molie-

(1) *En hujus exemplar.*

„ Dopo sostenute per il lungo corso di anni trentadue ,
„ prima la cattedra di filosofia ordinaria, indi quella di
„ umanità Greca e Latina, carico d'anni, ed afflitto
„ da gravi indisposizioni di salute, che gli vietano affat-
„ to un più lungo esercizio, si rassegna il pubblico Pro-
„ fessore Giannantonio Volpi per forza invincibile dell'at-
„ tuale sua costituzione ad implorare la giubilazione, e
„ vi comparisce non solo scortato dal merito dell'eserci-
„ tato assidue applicazioni e fatiche a profitto degli stu-
„ denti e a decoro dello Studio di Padova, ma altresì da
„ quello delle dotte stampe uscite dalla virtù sua, che lo
„ refero celebre anche appresso le straniere nazioni; e dal-
„ la istituita stamperia Cominiana, che tanto vantaggio
„ e lustro apportò a un tal genere di commercio. Tutti
„ questi riflessi persuadendo il Senato a concorrere nel
„ sentimento de' Riformatori nostri dello Studio di Pado-
„ va, l'anderà Parte, che il Pubblico Professore Gian-
„ nantonio Volpi predetto sia giubilato coll' assegnamento
„ di fiorini sticento annuale, e continui il riputato Pro-
„ fessore in ruolo col titolo di *Emeritus*, e colle prero-
„ garive ed emolumenti relativi, onde riceva un giusto
„ testimonio della pubblica gratitudine e retribuzione al
„ lungo e benemerito da lui prestato servizio. *Felices il-
lus Respublicas esse dicemus, apud quas tanto in honore sunt
litterae, & qui eas gloriose excolerunt.*

batur praesertim, ut magnam copiam carminum Latinorum atque Italogum, quae habebat in scriniis, perpoliret. Genus enim quoddam acuminis, quod habuit a natura, & arte limaverat, ne in senecta quidem ipsum deseruit. Extremo tempore ad ceteras misérias accessit orbitas oculorum, quam patientissime, ut Christianum philosophum decet, ferebat, quamque lenire solebat aut religiosis precibus, aut erudito anagnosta. Profecto si alia argumenta deessent ejus pietatis in Deum, satis hanc comprobassent ejus patientia & fortitudo in adversis rebus, constantia in bonis, modestia in maxima celebritate famae, erga egenos caritas, et erga omnes humanitas. Iis, quibus spectaculum erant illius virtutes & doctrina, non potuit non esse luctuosa ejusdem mors, quam attulit vehemens apoplexis nocte ante diem VIII. Kal. Nov. an. MDCCLXVI. Sepultus est in Aede S. Luciae in monumento, quod sibi et uxori carissimae fecerat cum hac inscriptione.

H. ΣΑΡΕ . ΗΜΩΝ
 ΚΑΤΑΣΚΗΝΩΣΕΙ . ΕΠ' . ΕΛΠΙΔΙ
 JOANNES . ANTONIUS . VULPIUS
 PHILOSOPHUS . PRIMUM . DEINDE
 RHETOR
 IN . GYMNASIO . PATAVINO
 V. F.
 SIBI . ET . MARGARITAE . MOSCHINAE
 UXORI . AMANTISSIMAE B. M.
 A. C. CΙCΙCCCXLVIII.
 H. M. H. N. S.

In eadem Aede aliud suis sepulcrum statui
 voluit, quod factum ab ipso est sanctius &
 elegantius hoc tetraſticho .

*Nos tenet alta quies placidoque ſimillima ſomno,
 Quae ſumus ignavis corpora viſa mori .
 Hic erimus donec reſerato Chriſtus Olympo
 Aeterna jubeat nos vigilare die . (1)*

(1) Qui ſe Petrarchae imitorem eſſe gloriabatur re-
 ſpexit fortasse illos verſus :

*Dormito hai , bella Donna , un breve ſonno ;
 Or ſei ſvegliata infra gli ſpiriti eletti ,
 Ove nel ſuo Fattor l' alma ſ' interna .*

Vulpus non tam uxore, licet sterili, (1); quam fratribus fortunatus fuit. Erat enim Cajetanus Presbyter sanctissimis moribus, idemque satis doctus et diligentissimus in omni, quod suscipiebat, negotio. Ejus vero diligentiae in primis referre debemus acceptam emendationem librorum per Cominium impressorum, sanctitati editionem multorum operum, quae ad retinendos bonos mores, revocandosque antiquos pertinent. Huic aetate proximus erat Josephus Roccus, qui cum Societati Jesu nomen dedisset, veteris Latii explicationibus, aliisque scriptis, gestis in aula Romana muneribus (a Benedicto enim XIV. factus fuit Episcoporum, ut vocant, examiner, et S. Indicis Congregationis Consultor) et quod potius est, vitae sanctimonia inclaruit. Jo. Baptista demum, quo diu

(1) Sic ipse scriptum reliquit. Margarita Moschini Veronese donna di tutte quell' ottime desiderabili qualità adorna, che possono rendere felice un marito della faccendità in fuori, che per altro ed occulto consiglio, ma sempre giusto ed adorabile, Iddio Signore non ci ha voluto concedere. *Hæc ipsa paulo post virum mortem obiit.*

usus sectore fuit Morgagnius in anatome faci-
cienda, tantum profecisse in nobilissima di-
sciplina judicatus est, ut illius secundarius
Magister, eodem vivo Morgagnio, renuntia-
tus fuerit. Quin igitur ex ipsa stirpe Sapien-
tiae genitos fuisse Vulpios fratres fatebimur;
neque illius oscitantis atque dormientis, sed
quae semper molitur aliquid, aliquid semper
agit, omniaque refert ad hominum utilitatem?

O P E R A E D I T A .

Catulli, Tibulli et Propertii carmina ex recensione Jo. Antonii Vulpii cum ejusdem observationibus . Patavii spud Joseph Corona 1710. 8. maj .

Vita del Cav. Sertorio Orsati . *Exat in Parte II. libri, cui titulus: Marmi eruditi ec.* Patavii spud Cominum 1719.

Discorso Accademico , che le donne non debbano ammettersi allo studio delle lettere . In Padova presso Giuseppe Comino 1723. 4.

Opuscula varia ligata et soluta oratione scripta . *Ibidem* 1725. 4.

Orationes duae, scilicet de caeli natura et substantia, et Academicorum et Scepticorum philosophiae rationem non esse in physica omnino repudiandam *Ib.* 1732. 4.

Opere varie Latine e Italiane . *Ib.* 1735. 4.

Catullus cum Jo. Antonii Vulpii commentariis . *Ib.* 1737. 4.

Oratio habita in Gymnasio Patavino , cum a tractanda philosophia ad politiozem humanitatem translatus esset. *Ib.* 1727. 4.

Acroasis de Tragoedia. *Ib.* 1740. 4.

Rime : edizione seconda accresciuta ed illustrata . *Ib.* 1741. 8.

Carmina : editio II. aucta. *Ib.* 1741. 8.

De utilitate poetices . *Ib.* 1743. 8.

De satyra. *Ib.* 1744. 8.

Opuscula philosophica. *Ib.* 1744. 8.

Tibullus cum Jo. Antonii Vulpii Commentario . *Ib.* 1749. 4.

Divinatio in diptychum olim Quirinianum, nunc Vaticanum. *Ib.* 1750. 8.

Oratio pro facultate poetica. *Ib.* 1750. 8.

Polinnia, ovvero i frutti della solitudine, Stanze. *Ib.* 1751. 8.

Sextus Aurelius Propertius . . . et in eum Jo. Antonii Vulpii Animadversiones perpetuae. *Ib.* 1750. 4.

Orazione in lode di S. E. Alessandro Zeno Procuratore di S. Marco per merito. Venezia 1746. 4.

Vita Andreae Naugerii. *Exstat in operibus ejusdem editis a Cominio* 1718. in 4.

Vita Jacobi Sannazarii. *Exstat inter carmina ejusdem typis impressa a Cominio* 1719. in 4. *Edita iterum fuit Amstelodami cum iisdem carminibus variorum notis illustratis* 1728.

Recenseri possent inter Vulpii opera ejus notae in Dantes, in Zachariam Scholasticum, epistolae, praefationes, et alia hujusmodi plura, quibus ornare ipse solitus erat libros a Cominio suo impressos.

Multa et ipse inedita reliquit, et praesertim carmina tum Italica, tum Latina, quae, nescio quo misero litterarum fato, periisse creduntur. Exstat tamen apud eruditissimum virum Josephum Gennarium, cui maxima acceptum referimus quidquid de Vulpio memoriae prodidimus.

Lettura sopra il Sonetto del Petrarca = Gloriosa colonna &c. = con altre cose dette nell' Accademia de' Ricovrati.

ANGELUS FABRONIUS

FRANCISCO FONTANAE SUO

S. P. D.

Multa tu de Julinio (1), pauca ego de Orsato, ne tecum contendere velle videar, qui nulli parcentum esse diligentiae censuisti, ut omni ex parte cognita esset virtus et doctrina hominis, qui in patriis monumentis colligendis, exponendisque priscorum factis longam vitam consumpsit. Utraque laude floruit et Orsatus, nec facile inveneris homines, inter quos, quamvis aetate dispares, tanta similitudo fuerit studiorum, morum atque virtutum. Uterque etiam dramaticam poesin excoluit; verum quia omni tempore non multi fuere, qui ab ea nomen habuerint, eorum dramatica scri-

(1) Georgii Julinii vita a Fontana homine Bernabita et in Mediolanensi Collegio, quod *Nobilium* dicitur, Graecarum Latinarumque litterarum magistro scripta claudit hoc volumen,

pta fortasse obscurabit oblivio. Sed quae ad illusterandam patriae historiam litteris mandarunt, nec oblivione eorum qui sunt, nec reticentia posterorum insepulta esse poterunt, et beatas illas esse urbes puto, quibus contigit tales habere cives, qui totos se dediderunt patriae, et in ea omnia sua studia posuerunt, et quasi consecrarunt. Quod siqui eorum, dum in operoso ac molesto labore versabantur tot obscura ac recondita investigandi, tot barbara exscribendi, imitati volucres, quas dum fingunt et construunt nidos, levandi laboris sui causa, videmus passim ac libere solutas opere volitare, a poesi oblectationem aliquam petierunt, non erimus neque acerbi neque severi in iudicando de illorum poeticis scriptis, cum et ii levissimam delectationem gravissimae utilitati nunquam anteposuerint. Facile quidem omnes perpetior ac perfero, dum aliquid afferant, quod mihi non displiceat; illos vero perridiculos esse arbitror, qui cum se ipsos prospexerint, totosque tentaverint, nec sint ad ullum litterarum genus idonei, insolentius atque audacius poetarum choro se immiscent, et obtundunt aures, aut chartas maculant insulsissimis carminibus. Hos non minus consumeliose dimittendos censeo, quam Hannibal Peripateticum

illum Phormionem de re militari, et de omni imperatoris officio loquaciter et inepte disserentem. Quod horum hominum genere cumulata est eruditissima Italorum natio, vellem ut lex ferretur de iis ab omni litterario coetu rejiciendis, neque locus daretur in Academiis, quae apud nos frequentes sunt, nisi iis, qui suum munus, si non perfecte, saltem laudabiliter (quanquam mediocritas in poesi perpaucis honori fuerit) praestare possunt. Sed ut ad Orsatum et Julinium redeam, quibus propositum in primis fuit monumenta temporum, hominum, locorum gestarumque rerum mandare litteris, et otium in scribenda patria historia consumere, ut ex ea quae pertinent ad usum civium, mores hominum, ad rationem rei publicae, ad iura, ad leges, ad vicissitudines imperiorum ac fortunae varietates possemus cognoscere, magnum et utile opus illos effecisse arbitrabimur, pro quo iis gratia debetur. Mihi ad remunerandum tantum beneficium nihil suppetit praeter voluntatem. Tu vero, quod praestes doctrina et scribendi elegantia, adeo omnia, quae spectant ad Julinium tuum persecutus es, ut neque a benevolentiori, neque a studiosiori illi debitum historiae munus persolvere potuerit. Nec sane dubito quin is, qui conferet com-

mentarium tuum, quod omni verborum et sententiarum dote locupletasti atque ornasti, cum commentariolo meo de Orsato plane incommutato atque incompto, vel me ipsum reprehendas, vel suspicetur minus illum ingenii et scriptorum gloria floruisse. Quapropter illum postulandum putamus ab omnibus, qui haec in manus sument, ut majus quiddam de Orsato, quam quantum a nobis exprimeretur, judicent, quod non totam ejus imaginem pingere, sed tantummodo adumbrare conati fuerimus. Certe uterque, ut exposui antea, cum studio atque ingenio et doctrina, tum in patriam pietate praestantes fuere, et cum paucis omnino comparandi. Vale.

Pisis Kal. Maii MDCCLXXXVII.

SERTORIUS ORSATUS

Orsatorum familia apud Patavinos magna vel ab antiquissimis temporibus gloria fuit, quod illa, siqua alia, tulerit viros caritate in patriam, studio in litteras, ceterisque ornamentis generis, honorum, integritatis atque industriae clarissimos. Hujus familiae laudes plurimum sane auxit Sertorius Orsatus, qui cum iis artibus, quae ingenium commendant, decus omne virtutis junxisset, effecit, ut in civitate sua princeps haberetur. Is natus est Patavii Kal. Februarii an. MDCXVII. patre, cui a familia Orsati nomen erat, matre Elisabetha Buzzacarinia, et fortunatissimum ejus natale fuit, quod tum pater, qui erat illustris honoribus, ingenio, gratia et omni christiana virtutis genere, copiosus plane et locuples factus est ob acceptam a Sertorio Orsato gentili suo hereditatem. Hic filium sic instituebat, ut ipse intelligeret nobilitatem et divitias idcirco a

Deo datas, ut aliis prosimus, utque illae incitamento sint non ad voluptates ac desideria, sed ad virtutem atque industriam. Et profecto quocumque non modo mens, sed etiam oculi adolescentuli, in quo summa spes, summa ingenii indoles erat, inciderent, nil in paterna domo videbat nisi exempla virtutum. Natura hominem inchoat, educatio perficit, et ab utriusque laude fuit Sertorius felicissimus. In litteris et humanitate perdiscenda, ut moris est, primam aetatem consumpsit; deinde, bene positis hisce doctrinarum omnium fundamentis, ad philosophiam se applicavit, et cum acciperet an. MDCXXXV. illa insignia philosophica, libellum vulgavit, quem inscripsit *Sertum philosophicum*, ut argumento esset se non coronam habere honoris causa, sed pro merito concertationis atque doctrinae. Triennio post, rei familiari operam dare a patre coactus, in matrimonium duxit Irenem Mantuanam Benavidesiam, quae nuptiae plenae dignitatis, plenae concordiae fuerunt: Sed res domesticae non adeo distinebant Sertorium, quin plurimum temporis mansuetioribus musis concederet. Has semper
flu-

studiofissime coluit, et quod earum tanquam antistites venerabatur Graecos atque Latinos, horum non modo scripta legebat, sed et cetera omnia monumenta, quae ad nos ab illis pervenerunt, magnopere conquirebat. Ea propter si quis ad eum detulisset antiquum lapidem, hunc tanquam religiosum donum osculabatur, inque nobiliori aedium parte collocabat; et oscitantem & dormitantem sapientiam delicatiorum otio concedens, agros ipse peragrabat, parietinas, et omne genus rudерum investigabat, seque beatum putabat, quoties ex iis aliquid prompsisset, quod se et alios erudiret. Cum jam tantam inscriptionum, aliorumque huiusmodi Romanorum monumentorum supellectilem sibi comparasset, ne ad domus ornamentum illam tantummodo collegisse videretur, edidit primo quae ad patriam pertinebant, mox aliarum urbium, ac demum Commentarium. *de notis Romanorum* emisit, quo maxime declaravit suam antiquarum rerum peritiam. Nemo ignorat quam saepe non modo in lapidibus et nummis, sed etiam in scriptis veterum occurrant aut singulares aut plures

litterae, quae notae sunt verborum, nec semper consentire homines in iis interpretandis. Collegit illas notas Sertorius, et litterarum ordine disposuit; singulas vero sic interpretatus est non ut divinus, sed ut conector acutus, qui eas rationes reddit, quae consentaneae sunt linguae, moribus, & ritibus Romanorum, et qui ex comparatione plurium inscriptionum, et ex iis, quae scripta sunt, quod proposuit, efficit. Res sane habebat multum difficultatis et laboris, quod tenenda erat omnis antiquitas, et acuenda mens ad occultissimam perspicienda. Nihilo tamen minus ejusmodi opus confecit Sertorius, quod non solum novitate et copia rerum, sed etiam utilitate maxime celebratum fuit, quia per illud multarum rerum quasi adumbratas intelligentias concipere possumus. Ea propter qui marmora Oxoniensia illustranda susceperunt, ne quid deesset explicationi eorum, et enodationi inscriptionum, epitomen ejusdem fecerunt, et cum marmoribus ipsis an. MDCLXXVI. ediderunt. Edidit & integrum Joannes Georgius Graevius in vol. XI. *Thesauri antiquitatum Romanarum*, et post-

quam exposuit mentem suam de praestantia ipsius operis, pauca quaedam notavit, in quibus Sertorius errasse videtur. Est ne quisquam tanta inflatus superbia, ut sibi se scire omnia persuaserit, quae spectant ad religionem, ad sacerdotalia munera, ad dignitates urbanas, provinciales, militares, ad legionum, alarum cohortiumque nomina, ad militum patrias, stipendia, dona, missiones, ad libertorum et servorum officia & operas, ad Imperatorum gesta ac liberalitates, ad ludorum et spectaculorum varietates, ad collegiorum, municipiorum, coloniarum, provinciarumque erga patronos ac praefides pietatem, ad innumeros coloniarum, municipiorumque ipsorum magistratus, ad funera, ad sepulcra, ad morientium vota, ad superstitum in mortuos caritatem, atque ad alia multa sacra, profana, publica privataque populi terrarum domini?

*Multa retro rerum jacet, atque ambagibus aevi
Obtegitur densa caligine mersa vetustas.*

Haec animadvertere libuit non ut Orsatum a Graevii reprehensionibus defenderem (per-

pauca enim sunt quae ipse notavit) sed ut removerem ab ipso invidiam, quam illi confutare studuit vir, cujus nomen & honores inveteravit et universae Italiae, & hominum famae ac sermonibus. Is est Scipio Maffei, qui, quoties ei se se occasio obtulit carpendi Orsatum sive jure sive injuria, hanc minime praetermisit, quasi ipse solus explicator siglarum, atque inventor veritatis in interpretandis veteribus monumentis extitisset. Quod egerit cum ipso austere & stoice merito reprehensus est a multis, extititque Jo. Dominicus Polcastrus, qui doctam et eruditam apologiam pro cive & propinquo an. MDCCCLII. Patavii edidit, ex qua judicare quilibet facile potest raro Maffejum verum accusatorem fuisse, semper invidum. Ceterum Sertorio minime defuerunt insignes praedicatores laudum illius, et ipse Graevius cum inscriptiones veteres a Jano Grutero collectas iterum an. MDCCVII. Amstelodami edidisset, plurima ex illius libro, quem inscripsit *Monumenta Patavina*, quemque supra commemoravimus, sumpsit, ut aut emendaret, aut explicaret quae Gruterus suis attulerat.

Quando illa *monumenta* Sertorius emisit pro-
 posuerat jam sibi illustrare nomen populi
 Patavini, dum laudem illustrabat suam; quo-
 circa non modo diligentissime conquisivit
 omnia vetera monumenta, quae urbem an-
 tiquissimam ornabant, et ad eam quomodo-
 cumque pertinebant, sed et quidquid con-
 ducere poterat ad contexendam historiam pa-
 triae, quae tot praevaluit opibus, quae tot
 passa est vicissitudines, quae tot factionum
 principibus paruit, quae tot viris illustribus
 floruit, adeo ut quanto plus rerum, tanto
 plus cupiditatis esset. Magni operis primam
 partem, quae incipit ab urbe condita desinit-
 que in annum aerae Christianae MCLXXIII.
 vulgavit Sertorius Patavii an. MDCLXXVIII.,
 secundam partem, quae Eccellintorum ma-
 xime historiam usque ad an. MCCXXXIX.
 continet, non plane perfectam, cetera in-
 choata ac rudia reliquit. Chronologiam eo-
 rum, qui rexere Patavium (haec emanavit
 in vulgus an. MDCLXVI.) partem et ipsam
 huiusce operis dixeris, et ex ea quoque con-
 ficies, quam diligens esset Orsatus inve-
 stigator earum rerum, quas plurimum sagcu-

lorum barbaries quasi velis quibusdam obtendisse videbatur. Ipse tamen maxime famam quaesiisse videtur ex Romanarum rerum et inscriptionum notitia, et unum atque alterum volumen, quae inscribuntur *Marmora Erudita*, quorum primum edidit Auctor an. MDCLXIX., secundum quinquaginta annos post ejus nepos Joannes Antonius Cassinensis Abbas et sacrarum litterarum in Gymnasio Patavino magister, cumularunt laudem, quam a *Notis Romanorum* obtinuerat. Quod huic manus extrema minime accesserat, in ipsum quaedam editor addidit. Neque est tacendum Sertorium correctorem atque & emendatorem sui fuisse, quod veterem lapidem positum in Aedibus publicis ad T. Livium, quo praesertim gloriatur Patavium, pertinere, ut vulgo credebatur, putaverit. Verissime enim a Marquardo Gudio judicatum fuisse intellexit, mentionem ab illo fieri T. Livii Alii Liberti Liviae Quartae, filiae Titi, qui erat unus e Concordiae Deae Patavii in primis cultae Sacerdotibus. Miror equidem non pari modo acutum hominem vidisse Inscriptionem quamdam Justinopolitanam, de qua ejus sententiam rogavit Fran-

ciscus Zenus Justinopoli Episcopus, confictam fuisse dolo cujusdam, qui huic civitati multis nominibus clarae decus addere voluit. Sed haec, ut et quaedam alia quae fugerunt avum, pro sua prudentia animadvertit Joannes Antonius, cui verum quaerere unice propositum fuit. In extrema parte operis extat ejusdem dissertatio de sepulcrali quodam cubiculo forte prope Romam in via Flaminia an. MDCLXXIV. detecto, quod vulgo Nasoniorum sepulcrum appellabatur. Quia illud ornabatur non modo inscriptionibus, sed etiam picturis, non Orsati modo, sed et aliorum in illis explicandis acuit industriam. Instabant vero plurimi et urgebant, ut quidquid veterum monumentorum in apricum proferebat aetas, ipse non tanquam unus e populo antiquariorum, sed tanquam existimator doctus et intelligens illustraret, quod est argumento magnam de illius doctrina fuisse opinionem. Ipse vero nihil occultabat iis, qui sententiae suae volebant esse participes, quod natura ei dederat singularem humanitatem, nec quidquam ex omnibus rebus humanis praestantius esse judicaret, quam de litteris bene mereri.

Innumera sunt quae, ut amicorum postulationibus satisfaceret, scripto mandavit, et ut in promptu haberet copiam rerum, in adversaria referebat quidquid aut legerat, aut viderat, quod ad noscendam priscam vetustatem conducere posset. De qua quidquid pronuntiabat, accurate perpendebat, neque adeo suae, quod moris est multorum, tribuebat sententiae, quin etiam plurimum concederet alienae. Isthac modestia juncta comitati, facilitatique multum valebat ad conjungendas amicitias, & quamvis difficillime reperiantur in iis, qui in honoribus et republica versantur, fuit tamen Sertorius carissimus multis Venetis Patriciis, et Cardinalibus Atestino, Mediceo, Barberinio, Delphinio, Barbarigo, Basadonnae et Casanatae, quibus dum tribuebat officia, se non fortunae, sed hominibus solere esse amicum aperiebat. In patria vero coluit praesertim Carolum Patinum, Octavium Ferrarium, & Carolum de Doctoribus, quorum pervulgata sunt nomina; nam cum omnes amicitias tuendas semper putaverit, tum eas maxime, quas similitudo studiorum conciliaverat. Ea propter merito sibi gloriae ducebat, quod a

se verbosiores epistolas eliceret saepe Henricus Norisius aut aliquid de antiquitate requirens, aut aliquam historicam quaestionem proponens. Nec mediocris sapientiae erat eorum retinere usum benevolentiamque, inter quos esse solet laudis aemulatio: vere enim Hesiodus: ΤΕΚΤΟΝΙ ΤΕΚΤΩΝ ΦΘΟΝΕΕΙ. Quod sibi utendum esse existimabat iudiciis doctiorum, ut hos alloqueretur, Italiam peragravit, semel iterumque Romae fuit, initio sua sponte, post etiam invitatu summorum hominum, qui in illa urbe cum et honoribus, tum et scriptorum gloria florebant. Sunt quidam, qui molestas amicitias faciunt, cum ipsi se contemni putant, nisi effuse laudentur, a quo vitio tantum aberat Sertorius, ut qui liberalis erat praedicator alienorum meritorum, neminemque laedebat, nihil ab amicis exigeret, contentus eo quod sponte concessissent. Quamquam patria omnes honores, quos poterat, ipsi detulerit, et in omni procuratione rei publicae ipsum actorem auctoremque habuerit, atque a Senatu Veneto equestri dignitate & Comitibus titulo decoratus fuerit, nullum tamen in illo unquam ambitionis signum ap-

paruit. Idem immortalī memoria percepta retinebat beneficia, quae autem ipse tribuerat, tamdiu meminerat quoad ille gratus erat, qui acceperat. Itaque fecit, ut cum gloriosissime ac tranquillissime vitam in finu et complexu suorum degisset, vere dictum videatur: *sui cuique mores fingunt fortunam*. Neque tamen prius ille fortunam quam se ipse finxit, qui cavit ne qua in re, in qua fita vitae est honestas omnis, laberetur. Ut antiquitatis amator, sic moris majorum summus imitator fuit, omnesque ejus actiones magnam in Deum pietatem declarabant. Nemo ignorat quanta religione Patavii colatur S. Antonius, cujus ergo an. MDCLIII. libellum edidit, quem inscripsit: *le Grandezze di S. Antonio di Padova*. Eminuit etiam ejus pietas, cum tactae fulmine arderent S. Justinæ aedes. Dum enim omnes acerbum incendium lamentabantur, ac nemo ad illud ruina extinguendum accederet, ipse, arrepta securi, inter flamas se se conjecit, ut ceteris exemplo esset, quod cum multi animose secuti fuissent, magno liberata est civitas metu atque periculo. Religionī etiam se servire putabat cum

carminibus Sanctorum facta celebrabat, et redibat saepe ad poesin, quod illius studia adolescentiam alere, et senectutem maxime oblectare dicebat. Non lyricam modo et dramaticam coluit, sed et illam, quae genere quodam perpetuae festivitatis commendatur, ut conjici potest ex iis, quae scriptit ad illustrandum Italicum poema amicissimi sui Caroli de Doctoribus, quod inscribitur *Afinus*. Postremo philosophi personam suscipere et tueri debuit, cum an. MDCLXX. munus ei datum fuisset explicandorum meteororum in patrio Gymnasio. Qui ei successit Geminianus Montanarius laudator et testis illius diligentiae fuit, sed ab ea consequi celebritatem sermonis hominum haud poterat. Unicui habuit filium nomine Antonium, qui cum summa elegantia, summaque integritate vixit, quamquam, mortua Irene Mantuana, ex qua illum suscepit, alteram duxerit uxorem Franciscam Sfortiam. Patavii obiit v. Non. Quintilis an. MDCLXXVIII., et cum convenisset universa ferme civitas in Aedem S. Antonii ad ejus cohonestandas exequias, satis declaravit quantum ejus mors sibi fue-

rit luctuosa. Jussu Academiae Recuperatorum, de cujus gloria magnopere semper studuit Orsatus, laudatus publice fuit a Laurentio Malcreda, cujus verissima fuit sententia, de illo tamdiu praedicatum iri

Latinis dum manebit pretium literis (1)

(1) Phaedrus lib. V. ad Particul.

OPERA EDITA.

Sertum philosophicum ex variis Scientiae naturalis floribus confertum. Patavii 1635. 4.

Monumenta Patavina, collecta, digesta, explicata suisque iconibus expressa. Patavii 1652. apud Paulum Frambottum. fol.

Le grandezze di S. Antonio di Padova osservate nel trasporto della sua preziosa reliquia data da quella città al Serenissimo Principe di Venezia. In Padova per Paolo Frambotto 1653. 4.

Poesie geniali. In Padova per il Cadorino 1657. 12.

Cronologia de' Reggimenti di Padova da quando vi fu introdotta la Pretura sino al giorno d'oggi. In Padova per gli Eredi di Paolo Frambotto 1666. 4.

I marmi eruditi, ovvero lettere sopra alcune antiche iscrizioni. In Padova per Pietro Maria Frambotto 1669. 4.

De notis Romanorum Commentarius. Patavii 1672. typis Petri Mariae Frambotti, fol. Recusus Trajecti 1699

Tomo XI. Thesauri antiquitatum Romanarum a Joan. Georgio Graevio collecti: ex officina Petri Vander Aa, et Francisci Halmae. fol. *Epitome hujus operis extat impressa Oxonii 1676. fol. in calce marmor. Oxonien.*

Prima parte dell' Istoria di Padova dalla fondazione di quella città sino a l'anno di Cristo 1173. In Padova 1678. per Ristretto Maria Frambotto; fog.

Orazioni varie sì Latine come volgari, e moltissime Serenate per Musica, Intermezzi, Ode, Canzoni, e Sonetti stampati in diversi luoghi e tempi.

OPERA INE DITA

MAGNA EX PARTE IMPERFECTA.

Historiae Patavinae pars prima et secunda.

Parte seconda dell' Istoria di Padova, che incomincia dall' anno 1174., e termina nel 1219.

Praenomina, cognomina et agnomina antiquorum Romanorum.

Quadrumvirato Padovano, ovvero Cronologia de' Quadrumviri, Consoli, Anziani e Deputati della Città di Padova dalla loro origine sino al tempo presente, in cui si hanno tutti quelli che hanno havuto queste dignità distinte a famiglia per famiglia.

Prose Geniali.

Discorsi recitati nell' Accademia de Ricovrati Tomi 2.

Raccolta di lettere, marmi ed erudizioni con altro d'antico.

Gentes Romanae Patriciae, Plebejae quoque inveniri potuerunt ab origine Urbis ad initium Imperii Augusti, Trium-

viratu abolito, quae Sacerdotes, Urbanasque dignitates in Republica habuere.

Diversi volumi di poesie liriche.

Orondate, dramma per Musica.

Statira, dramma per Musica.

Commedie diverse.

Cronologia de' reggimenti di Padova corretta ed ampliata con annotazioni.

Deorum Dearumque nomina et attributa.

Elucubrationes variae seu historia sacra in Patavinis Episcopos.

Esganea fertile, ovvero Catalogo di tutti i Padovani che hanno dato opere alle stampe.

Simolacri delle Deità Padovane con elogi.

Lucubrationes in quatuor libros Meteororum Aristotelis.

CAESARI JULINIO

COMITI, ET PATRICIO MEDIOLANENSI EX AM-
PLISSIMO JUDICUM COMITUM ET EQUITUM
COLLEGIO FRANCISCUS FONTANA
E CONGR. S. PAULI

S. P. D.

Quod serius, quam fortassis arbitrabare, redditum tibi est commentariolum meum de viâ, scriptisque Georgii patris tui, ignosce plurimis munerum studiorumque meorum occupationibus, non illis quidem magni momenti, sed quibus tamen quotidie satis distineor. Quod vero minus aut expectationi tuae, aut singularibus optimi hominis atque doctissimi in patriam, remque publicam literariam meritis respondeat, cave credas id aliqua potius negligentia factum esse mea, quam tenuitate ingenii. Nihil enim quicquam (id quod unice praestare ipse poteram) studii ac diligentiae praetermissi, quo si minus scite eleganterque, at saltem sincere accurateque imaginem virtutis ingenique ejus oculis omnium, ac praesertim

adoleſcentum noſtrorum ſubjicerem, quibus hauſ-
ſcio, an aliud recens atque domesticum exemplum
praeclarius ſuppetat ad imitandum. Tu igitur, ad
quem et haereditas paternae gloriae et laudum imi-
tatio poiſſimum pertinet, munuſculum hoc meum
levidenſe, et crasso filo non ſolum fac eo, quo
tibi offertur, animo accipias, verum aliis etiam,
quibus poteſ, in primisque matri tuae lectiſſimae
ac nobiliſſimae matronae, tuoque fratri humaniſ-
ſimo commendare etiam atque etiam velis. Id
ſi feceris, ſcito non tam mihi, quam beatiſ parentis
tui Manibus praeclaram te gratiam grati-
ficaturum. Vale.

Mediolani in Coll. Caesareo Nobilium IX. Kal.
Februarias MDCCLXXXVI.

GEORGIUS JULINUS

GEORGIUS JULINUS nobili loco natus est Mediolani vi. Kal. Sextiles anno post Christum ortum MDCCXIV. Pater ei fuit Josephus Julinus, Georgii Mediolanensis Senatoris Filius, idemque in Academia Ticinensi antecessor emeritus; mater Angela Sadarinia, quam, extincto ejus priori viro Didaco Gera, Patricio Novariensi, Josephus uxorem duxerat. Ab his liberaliter, sancteque educatus, et mature admodum in disciplinam Jesuitarum traditus ita doctrinas omnes, quibus aetas puerilis impertiri solet, celeriter arripuit, ut annorum decem septemque, confecto studiorum curriculo, juris utriusque Lauream Ticini sit consecutus. Neque vero quod insignia doctrinae acceperat, continuo doctrinam ipsam se accepisse est ratus, ut plerique adolescentes solent, praesertim tali genere orti; qui scilicet hoc

Tom. XIII.

X

quasi gradu quodam, atque aditu ad honores jacto, libros dimittunt; itaque luxui se defidiaequae dedunt, aut imparati rem publicam capessunt. Contra inexplebili ipse flagrans cupiditate discendi, uti Ticino domum rediit, se totum revocavit ad optimarum studia disciplinarum; idque eo magis, quod aetate firmiore, hominumque doctorum consuetudine iudicium sensim perficiente, intelligebat, sibi illas jejune admodum traditas in scholis fuisse; quod quidem erat potius temporum vitium, quam hominum. Quare non tam sua sibi esse studia continuanda statuit, quam plane retexenda. Idem quum persuasum haberet, quod Tullius monet, mirum quemdam esse omnium quasi consensum doctrinarum, atque concentum, ad quam plurimas posset se se adplicare in animum induxit. Id eo valebat etiam, ut in unaquaque quid efficere posset expertus, ingenium nosceret suum; et quo sua ipse natura ferri maxime videretur, in id maxime industriae suae nervos intenderet; quippe cui ante oculos versabatur, vulgo quod dici solet, nihil invita fieri Minerva oportere.

re. Ipsemet in commentariis quibusdam, in quos summa vitae suae capita retulit, clarorum virorum nomina, quos hortatores studiorum suorum delegerat, ac veluti duces, memoriae prodidit. De iisdem, quoties occasio oblata esset, non tam verbo, quam scripto mentionem & perhonorifice, & peramanter faciebat. Quod est signum pii gratique animi, quem non minoris aestimamus, quam quemlibet ab eo factum in disciplinis singulis progressum.

Itaque philosophiae praeceptorem habuit Angelum Mazzolenium, matheseos Josephum Mariam Stampam, quorum alter Oblatorum, alter Somascam Congregationem ornat; poetices Augustinum Neuronum litteratum virum e Capuccinorum familia, qui postea Novocomensium sacris praefuit, eloquentiae Hieronymum Taliazzucchium, eum, cujus in profliganda superioris saeculi barbarie opera magni fuit. Animum quoque appulit ad Graecas litteras, sine quibus aditum sibi ad solidam, reconditamque eruditionem praecusum fore sentiebat; earumque doctore scientissimo usus est Angelo Theodoro Vil-

la, qui modo in Academia Ticinensi eloquentiam profitetur. In primis excolebat musicen, cujus artis liberalissimae, atque ad levandos humanae vitae labores natae, quum ei amor natura inditus pariter cum aetate adolevisset, non satis habuit elementa didicisse a puero, sed praecepta etiam, quae ad faciendos modos pertinent, a Joanne Sammartinio, qui in pertissimis habitus est musicis, diligenter voluit edoceri. Atque quum harmonia organica, a cantu sejuncta, delectaretur mirandnm in modum, hujus excellentes quosque in suo genere magistros conduxit. Nam, ut alios omittam, citharizare doctus est a Carolo Zuccario; cantare tibiis ab Antonio Sammartinio; *psalterium* pulsare ab Antonio Antoniano; *clavicymbalum* a Carolo Boronio, quorum omnium adhuc pervulgata sunt nomina.

Florebant saeculo hoc ineunte, quemadmodum in reliqua Italia, sic etiam Mediolani studia antiquitatis; iisque provehendis conflata est nobilissimorum et eruditissimorum civium societas, quam Palatinam appellarunt; qua quidem haud scio, an alia

fuerit usquam de universa eruditorum natione, in primisque de Italorum ingeniis merita praeclarius. Nae huic praeter ceteros maximam habuit gratiam Muratorius, cujus immensa illa volumina, quibus homo doctissimus immortalitatem nominis acceptam referre potissimum debet, sine sodalium Palatinorum studio, et pecunia nunquam fortasse aspicere lucem potuissent. Hi scilicet proposuerant sibi, ut codices manu exarati, et vetusta quaeque monumenta, maxime si qua Italicae historiae medii aevi, quae omnium maxime involuta erat tenebris, lumen adhibere aliquod possent, ubivis delitescerent conquirerentur, atque ex abditissimis tabulariis, & bibliothecarum forulis deprompta, eruditisque annotationibus exornata, & eleganter cusa in commune commodum prodirent. Quare factum est ut studium veterum rerum; quoad institutum hoc viguit, in civitate celebraretur quotidie magis, et vix jam reperiretur, qui modo cupidus litterarum esset, aut dici vellet, quin se illo delectare profiteretur. In hanc igitur aetatem adolescentia Georgii quum incidisset, qui quid-

quid scitu dignum foret, ultro arripiebat avidissime: qua tandem illius doctrinae adsequendae cupiditate incensum fuisse arbitramur, quae ita, uti est, majori etiam parti videbatur pulcherrima? Huc accedebat quaedam domesticae laudis aemulatio. Namque et avum Georgium, et avi fratrem Faustinum, & patrem Josephum nactus est cum jurisprudentiae laude praestantes, tum etiam in veteribus chartis & membranis colligendis industrios. Has igitur, in promptu cum haberet domi, evolvere coepit, tum alias conquirere, quaeque in iis usui esse possent saponere; antiquarios praeterea, diplomaticos, historicos omnium aetatum & gentium lectitare; ad ultimum numismata, inscriptiones, anaglypta, musiva, sarcophagos, et si quid est aliud veterum monumentorum visere; ex iisque rebus tantam sensim voluptatem percepit, nihil ut jam esset quod faceret libentius. Hactenus de studiis, in quibus Georgius juventutem contrivit, satis erit dictum, si hoc unum adjunxero, nunquam juris scientiam ab eo dimissam fuisse; in qua quidem quantum profecerit sa-

tis testimonium extat elucubratio, docta me-
hercules, quam manu scriptam reliquit de
legibus in decoctores latis. Nihilo tamen ma-
gis forum attigit; credimus, ne tricis, & li-
litibus, a quibus natura abhorrebat maxime,
implicaretur.

Ad has ingenii exercitationes plura
ac longe majora animi bona accedebant.
Erat enim modestus, frugi, veritatis dili-
gens, & alienae famae usque adeo parcens, uti
neque de quoquam detreheret unquam, ne-
que detrahere alios pateretur. Humanus, of-
ficiosus, majoribus natu adsurgens, aequa-
libus jucundus, omnibus affabilis, in primi-
sque obsequentissimus parentibus. Ita in re-
ligionem Christianam, quam pene cum lacte
nutricis suxerat, animatus, prorsus, ut nihil
de suis factis, studiis, consiliis non ad ejus
normam, et praescriptum dirigeret; ceteras
res, opes, nobilitatem, doctrinam, gratiam,
prae illa flocci faceret, ejusque sacra omnia,
& caerimonias, quas externus Dei cultus
defiderat, diligentissime obiret. Tali modo
cum se gereret ipse, eaque esset aetate, ut
non jam solum bene sperare, sed omnino

ab eo exspectare possent homines, quae a singulari virtute, et ingenio exspectanda sunt, sibi pater ejus beatissimus videbatur. Recordantur majores natu, qui adolescentes hoc sene familiariter sunt usi, saepius de Georgio suo loqui solitum; tum vero, ut Terentiano illi seui, *uno ore omnes omnia bona dicere, & laudare fortunas suas, qui gnatum haberet tali ingenio praeditum: at homini illico lacrymas cadere, quasi puero, gaudio.*

Neque vero caussa suberat ulla, quare pater timeret (ut timidi esse solent, qui amant) ne quid assidua illa, multiplexque animi contentio incommodi importaret ejus valetudini, ut pote quem videbat recte sese habere semper, neque quicquam de hilaritate ac suavitate sua naturali amittere. Quod nemini mirum esse debet. Nam quamvis Georgius noctes et dies in tot doctrinarum meditatione versaretur, retinebat tamen modum, animumque identidem relaxabat liberalibus ludis, & ingenuo quoque dignissimis, non qui in alea scilicet, aut commensationibus, aut ineptiis amatoriiis consistere, sed quibus aliqua esset cum gymna-

sticis , & palestricis veterum Graecorum , Romanorumque exercitationibus similitudo . Didicerat in primis saltare , ac jactare hastas ; adeo ut horum utrumque et pulchre facere ipse posset , et alios edocere . Atque his in rebus quo se exerceret commodius , in Collegium Nobilium , cui tum temporis Jesuitae moderabantur , ventitabat . Hi autem capti adolescentis probitate et doctrina , non admittebant modo , sed ultro rogabant , nullum ut temere intermitteret diem , quin veniret quasi illarum artium hypodidasculus ; intelligebant enim puerorum animos , quorum sibi erat cura demandata , mirifice illius convictione ad praeclara quaeque incitari . Itaque legendo , scribendo , commentando , magistros interpellando , cantando , saltando , aliud ex alio agendo semper , quum nihil otio relinqueret loci , non poterat sane non jucundissime vivere : sicut enim similitudo fastidii , sic est varietas oblectationis mater .

Et hercule hilaritatem in hoc adolescente multam fuisse , quamvis in tot studiis , atque artibus occupato , multa sunt argumenta ; quae etsi scimus levia visum

iri, exponere non dubitamus; illud enim unum intelligi volumus contra, quam plerique autumant, non solum non obrui hilare aetatis floridæ ingenium, sed excitari potius, atque ali varietate studiorum. Itaque Georgius et in hac suavitate humanitatis, qua jam tum homines delectabantur, per jucunde versabatur quotidie, postquam a gravibus scilicet, seriisque rebus se remiserat, et certis anni temporibus aliquanto liberius laetitiae se dabat; sic tamen ut nunquam non aliquod probi ingenii lumen ostenderet. Libenter enim per eos dies, qui a profusa quadam vulgi laetitia, ludorumque frequentia Bacchanales appellantur, non raro consueverat personatus trivios et compita interdiu circumvectari, noctu choreis interesse. In quo non tam ingenio indulgebat suo, quam amicorum, qui in ejusmodi larvatis pompis, quibus illa tempora plus multo delectabantur, quam nostra, apparandis, ornandisque fere auctorem eum actoremque habebant. Ipse autem dabat operam, ut his plus salis esset, quam sumptus; atque adeo non tantum vulgo, & turbæ, sed eruditis quo-

que oculis afferre oblectationem possent. Hac occasione aut epigramma aliquod Italica lingua conscriptum, aut alterius metri carmina spargere in vulgus erat solitus. Cujus generis duas habemus odas adhuc in manibus, e quibus hilarum scriptoris ingenium, nec inficetum possis agnoscere. Idem ad theatrum itabat, non quo falleret otium, ut plerique solent homines lauti atque nobiles, qui fere nihil quum habeant pensi, nullam sine his solatiis esse vitam ducunt; sed quod poesi, et musica, ut paullo ante demonstravimus, sese potissimum oblectabat. Atque illud quidem plerumque ei suppeditabat, ubi aures expleret suas, quarum delicatissimo utebatur sensu; in hac quippe civitate tam ampla, tam locuplete & splendida fas erat, si usquam alibi, tum ludos scenicos spectare apparatissimos, tum vel maxime audire quicquid pulcherrimarum elucubrationum, et praestantium cantorum ferebant tempora. Itaque quoties dabatur fabula, quam esset operae pretium cognoscere, seorsim sedebat, audiebatque illam ta-

cite, et quicumque una secum cuperent interesse, admittebat hac lege, ut silentium darent. Interea quo erat acri judicio, tum carminum, tum sonorum atque cantuum vitia omnia ac virtutes notabat; neque non aegre ferebat cum inepta videret spectatorum fastidia, concursationes, convicia, suppositiones pedum, dolebatque *narrari*, ut lepide loquitur Horatius, *asello fabellam furdo*, propterea quod non plebeculae modo,

*Verum equitis quoque jam migravit ab aure
voluptas*

Omnis ad incertos oculos, et gaudia vana.

Quam ob causam multo libentius, quam theatra, conventus amicorum eisdem artibus gaudentium frequentabat, ubi sonis, atque concentibus vacare sine interpellatoribus posset. Ex his autem illum longe praeferabat ceteris, qui in aedibus *Canonicorum* S. Ambrosii agebatur, eoque adolescente adhuc florebat, sed paucis post annis, nescio quo pulcherrimae artis fato, certe non

sine multorum querelis, desiit celebrari. Illuc quippe fidicinum, cornicinum, tubicinum, tibicinum, psaltriorum denique omnium, & cantorum flos confluebat; atque eo quidem successu, ut vulgo accepta ei referatur perfectio, ad quam Mediolani citius, quam in reliquis Italiae urbibus, musicam pervenisse compertum est.

Pari modo magnam autumnii partem, quod alterum anni tempus ad remissionem animi conceditur, et lepide, & hilariter traducebat Buffalorae; qui vicus est inter Ticinum flumen, et euripum, quem vocant, grandem, octavo et decimo ab urbe lapide. Illic enim quum domum haberet mater ejus hereditate relictam a priori viro, de quo commemoravi supra, satis amoenam, et multo commodissimam, rusticari solebat Julinorum familia, posthabitis, quae aviti juris erant, villis nobilioribus, e quibus Soricanam in ora lacus Larii Joannes patruus Georgii nostri nullis sumptibus pepercerat, uti magnifica aede, hortis amoenissimis, et piscinis in vivo saxo affabre effossis ornaret. Celebres ad hoc usque temporis sunt ludi sce-

nici, qui Buffallorae a Julinis splendide dabantur, agebanturque festivissime; comoediae scilicet, & tragoediae nobiles, remotaeque ab omni turpitudine dictorum atque factorum; quorum actus singulos, exodii loco, concentus musici distinguebant. Georgio, prout ad res omnes aptus erat, atque adeo non unas agebat partes, plausus a corona semper dabatur multiplex; nam siue tibia caneret, siue fidibus, siue suos, siue alienos modos, siue in scenam prodiret, placebat omnibus summo opere. Nec modicam laudem assequebantur fratres natu minores, Faustinus et Octavius, indole, atque ingenio praestantes adolescentes, quorum alter postea amplissimo sacerdotio in principe hujus urbis templo insignitus, atque ad gravissima negotia ob singularem ejus prudentiam, rerumque usum a Josepho Puteobonello adhiberi solitus, mature decessit; alter non modo a negotiis publicis, verum etiam ab oculis hominum remotus, fere agit in agro vitam, otio litterario, et re sua familiari delectatus. Sed primas deferebant omnes Laurae eorum sorori, suavissimis moribus puel-

lae, multisque bonis artibus excultae; quippe quum versus ea suavitate oris, atque vocis recitaret, ut supra nihil posset. Itaque donec fabulae illae agebantur, magni audiendi caussa nobilium hominum feminarumque concursus fiebant, qui scilicet in tota illa vicinia rusticabantur, sed agi sunt defitae anno MDCCXLV. quo anno Hispanorum, Gallorumque apud Ticinum castra consederant. Nèque de illis cogitatum est amplius, propterea quod Laura, cujus potissimum oblectandae caussa fuerant institutae, eodem anno in nobilissimam Torniellorum familiam nupta, paucis post mensibus acerbissimo fato occubuit.

Ex hoc tempore Georgio pristinam illam hilaritatem suam excussam esse perhibent, seu quia tam grave accepisset vulnus mortis sororis carissimae, ut earum rerum, quibus antea delectabatur, pigeret, seu quia fortasse, cum vir factus esset, cepissetque ducendae uxoris consilium, quod multo non ita post perfecit, se minus jam decere ludos, et jocos arbitrabatur, quibus adolescens indulserat. Duxit autem feminam primariam

Virginiam Morigiam, quam, praeter nobilem propinquitatem generosamque majorum famam, multa alia & fortunae, & naturae dona exornant. Post haec non multo pater decessit. Sed ad exercitationes ingenii ejus revertamur; quod quidem licet notum antea civibus esset suis, multo tamen clarius, tamquam in theatro quodam, explendescere per id tempus coepit in coetu Transformatorum, qui institutus fuit Mediolani, aut potius restitutus anno MDCCLXIV. De hujus origine, instauratione ac praeclaris institutis nihil est, quod plura persequamur; quippe cum luculenter ejus historiam descripserint duo ejusdem socii, nempe Franciscus Xaverius Quadrius in extremo historiae suae poeticae volumine, & Lodovicus Riccius in eleganti commentariolo de scriptis vitaeque Josephi Imbonati Comitissae, primarii restitutoris. Tantum dicam, nomen illi quidem dedisse multos doctrina praestantes philosophos, theologos, jurisconsultos, antiquarios, nonnullos etiam oratores probabiles, et complures nobiles poetas; in his Joannem Carolum Passeronium, et Josephum Parinium, quorum mul-

to illustriora sunt poemata, quam ut cuiusquam oratione clarescere postulent: neminem tamen ejus incolumitati, et gloriae majori studio inserviisse, quam Julinus, qui unus e Restitutoribus fuit, licet trigessimum aetatis annum vix praetervectus. Etenim quamdiu ille mansit, tum publicos, tum privatos conventus frequentare non destitit, semperque aliquid novi vel numeris adstricta, vel soluta oratione elaboratum afferbat. Quaecumque vero multis vigiliis atque improbo labore & studio de antiquitatibus Latinis, aut patriis investigasset, primo quoque tempore communicare ea cum sociis consueverat; itaque incitabat omnes studio suo, summoque in honore habebatur. Tandem Imbonato vita functo, quum orbae societatis esset ipse veluti tutor relictus (erat enim a secretis) socios coegit, ad eosque in magna civium frequentia de ejus laudibus orationem habuit elegantis illius conventus auribus dignam kalendis Septembris anno MDCCLXVIII.; quam anno post ad honestandam clarissimi socii memoriam, una cum variis sociorum carminibus edendam curavit Franciscus Gar-

canus, Patricius Mediolanensis, liberalibus disciplinis perpolitus. Hanc qui legit, quanto Georgius conservandae litterariae illius societatis studio flagraret facile intelligit. Ac nihil revera non egit, quod ad eam conservandam valeret. Sed dissociatis animis sodalium, summo cum ejus dolore disjecta est.

Non vacat hoc loco elucubrationes singulas recensere, quas in Transformatorum coetu recitavit, & multo etiam minus poeticas, in quarum numero fuerunt tragoediae duae, comoediae tres, dramata ad usum scenae, atque cantus complura. Haec enim, & alia poemata breviora, quae sibi festinanti exciderant, quaeque ante annum MDCCLII. emitte in vulgus est passus, ut ceteris probata fuerint, in primisque eruditissimo harum rerum aestimatori Francisco Quadrio, qui illorum aliquot magna cum laude commemorat, ipse tamen (ut erat scriptorum suorum censor et prudens, & modestus) quum aetate provecior ad trutinam revocasset, reprobavit, nulloque in numero habenda esse statuit, nisi si qua in posterum emendare, ac meliora facere sibi per otium li-

cuisset. Quod nunquam licuit homini plurimis aliis studiis, negotiisque quotidie magis distracto. Atque utinam tragoediae saltem, cui nomen est Alcmaeon extrema accepisset manus. Hanc quippe qui audierunt, aut etiam oculis habuere subjectam fidelibus aestimatores docti, atque intelligentes, fecerant tanti, ut tum gravitate dictionis, sententiarumque delectu, tum viva morum, animique affectuum repraesentatione, tum totius demum fabulae structura, in nobilibus Italicis tragoediis, quarum non ita magnus est numerus, ponere non dubitarent. Nos tamen gravissimi viri de rebus suis iudicium veriti, his omissis, opuscula dumtaxat, in quibus argumenta erudita tractavit, insigniora saltem referemus.

Prope Modoetiam pagus est non ignobilis, vulgo qua *Archor*, qua *Hercules* appellatus. Ibi temporibus Alciati in S. Apollinaris mensa erat, altaris usum praestans, e marmore politissimo, atque candidissimo, in quo elegantissimis litterarum figuris inscriptio ad Iuliam Drusillam spectans legebatur; manca tamen atque deformata, nonnul-

lis scilicet litteris vetustate exefis, & duobus integris versibus scalpro abrafis; qualem fere Gruterus refert ex ejusdem Alciati exemplari descripta. Posteris vero temporibus marmor illud ab altari avulsum jussu S. Caroli Borromei, ut Julinus suspicatur, perditum jacuit inter rudera, vestitum vepribus, & dumetis, donec illud avus ejus invenit, & dono acceptum, ut erat harum rerum non incuriosus, domum suam Mediolanum exportandum curavit. Suarum igitur esse partium existimavit Julinus praeclarum adeo monumentum antiquitatis politioris, quod sui mancipii erat, illustrare; maxime cum videret neque satis exacte a Grutero relatum, neque bene ab Alciato explicatum; itaque fecit. Ac primo ostendit titulum illum non sepulcralem esse, sed honorarium, neque ad Drusillam filiam Caii Caligulae, sed ad sororem pertinere, quibus de rebus addubitaverat Alciatus; data autem occasione, obiter animadvertit Drusillae aequae, ac duabus aliis fororibus Agrippinae, & Livillae praenomen Juliae fuisse, quod licet nemini fortasse dubium unquam fuit, nullo tamen adhuc ve-

teri monumento constabat. Praeterea non solum voculas, quae desiderabantur, sed integros etiam versus, quos exscalptos de industria a posteris fuisse demonstrat ad abolendam teterrimi Imperatoris memoriam scite admodum, meo iudicio, & perite supplevit; atque ita ut lacunae (a) marmoris adamussim

(a) En Inscriptio qualis affertur ab Alciato in *Ansigurio* pag. 116. Codicis Biblioth. Ambros. et a Grutero pag. 1022. n. 4.

IVLIAE DRVSIILLAE
GERMANICI . F
.
.
D. .

In lapide tamen, qui in aede Iuliorum adservatur, ita se habet :

IVLIAE . DRVSIILLAE
GERMANICI CAESA . .
.
.
D. .

Ex quo apparet, tum Alciati temporibus litteram F. conspicuam in lapide adhuc fuisse, quae nunc una cum ex-

expleantur. Ad ultimum cum quaereretur, cuinam monumento an arcul, an statuae, an templo inscriptio illa fuerit affixa, nihil quidem pro certo audet dicere; suspicatur tamen Drusillae arcum dedicatum fuisse, seu, si mavis, decreto Decurionum positum; unde pagus ille fortasse *Archori*, aut *Archuri* nomen invenit, quo fere in veteribus membranis appellatur; in eamque rem exempla aliquot affert, quae indicant monumenta hujus generis in villis etiam, atque pagis excitata nonnunquam fuisse. Haec autem omnia singulari perspicuitate, quae ejus erat propria, et multa eruditione, eaque minime vulgari, Transformatis exposuit anno MDCCXLVI. Eadem postea in dissertationem conjecit, quam

tremis litteris *Drusillae*, & *Caesaris* desideratur; tum ab eo vocem *Caesaris* omissam ostentanter. Jam vero quod inscriptioni deest ita supplevit Julinus.

IVLIAE DRUSILLAE
GERMANICI . CAESARIS . F.
C. CAESARIS . AVG.
GERMANICI . SOR.
D. D.

de Julia Drusilla in *Collectione Mediolanensi* (sic enim inscribitur) decem post annis in vulgus edidit: locupletem illam quidem, & longe eruditissimam; sic enim omnia ex scriptoribus Graecis, & Latinis, et ex numismatibus, aliisque monumentis de celebris illius feminae genere, ortu, vitiis, moribus, fortunaeque vicibus, ac de honoribus eidem, et vivae, et mortuae habitis, perscripta sunt, ut nihil non appareat.

Anno consequente, tum in eadem *Collectione*, tum separatim libellum alium, quem non multo ante sociis perlegerat, in apertum protulit de Amphitheatro Mediolanensi. Habuisse hanc urbem, in qua complures annos domicilium orbis terrarum fuit imperii, quamque thermis, circo, theatro, palatio illis temporibus ornatam novimus, id genus etiam aedificii, neque temporarium, sed marmoreum, et magnificentissimum, convenit inter omnes, qui de rebus Mediolanensibus scripserunt. Sed tam magnus consensionis globus nihilo plus ponderis habet, quam una Galvanei, Flammae scriptoris nugacissimi auctoritas, quam ceteri nimirum, alius

alium exscribentes, temere sunt secuti. Primus omnium Flammae testimonio diffusus, rem de integro expendit Petrus Gratiolius Bononiensis, e Congregatione Sancti Pauli, in erudito atque eleganti opere de praeclaris Mediolani aedificiis. Hic multum quidem quaestioni lumen attulit, non tamen abunde satisfecit. Nam neque vidit argumenta firmiora, quibus suam tueri sententiam posset, neque quidquam respondit Scipioni Maffaeo, qui quum in ea esset opinione, ut existimaret Amphitheatra nusquam fuisse lapidea, praeter quam Romae, Nemausi, Capuae, et Veronae, multa adversus Mediolanense objecerat, desumpta cum ex actis SS. Martyrum Firmi, & Rusticii a se editis, tum ex carmine Ausonii, et ex rythmo quodam veteri de laudibus Mediolani, in quibus de amphitheatro verbum nullum; quamvis non tantum occasio erat, sed etiam causa illius commemorandi. Itaque scriptores Mediolanenses caussa cecidissent, nisi patronum Julinum nacti essent, cum a doctrina, tum ab acri, et prudenti judicio instructissimum. Nae hic rem in utramque par-

tem, nullo partium studio, pensitat accurate, vera a falsis, dubia a certis separans, nihilque eorum dissimulans, quae sibi obesse viderentur. Nihilo tamen secius ita celeberrimi adversarii, & eruditorum aetatis suae facile principis argumenta diluit, itaque e contrario sua confirmat, praesertim quae tum a Laudulpho seniore, cujus libri in volumine quarto rerum Italicarum continentur, tum e S. Ambrosii testimonio, ejusdemque vita a Paullino scripta deprompsit, uti si ille paullo vixisset diutius, et legere ea potuisset, non dubito quin, licet invitus, animum induxisset tandem, ut quatuor illis amphitheatris, cum alia nonnulla, quemadmodum Sutrinum, cujus reliquiae haud ita pridem sunt detectae, tum etiam Mediolanense adjungeret. Ceterum hariolari ipsimet Julinus fateatur, quum et locum, & auctorem veteris hujus aedificii satagit investigare; aliquot tamen conjecturas proponit, leviculas illas quidem, sed non plane improbabiles, quibus ducitur ad suspicandum, & ab Imperatore Trajano amphitheatrum Mediolani excitatum fuisse, et in ea urbis parte, quae vulgo *via*

arenæ etiam nunc appellatur. Neque videor debere prætermittere, in hoc opusculo, quum de *Lusoriis* sermonem injecisset, ut hæc ab amphitheatris distingueret, opportunam eum occasionem esse nactum corrigendi Hermantii errorem, qui in vita S. Ambrosii pulcherrimum hujus, & splendidissimum facinus Christianæ fortitudinis, Sozomeni locum quemdam perperam interpretatus, mire extenuavit. Ex hoc quippe colligitur Sanctissimum Antistitem, quum ad Gratianum Augustum, qui tum forte venationem spectatum iverat in Lusorium, mortem cujusdam deprecaturus venisset, essetque ei omnis alius aditus interclusus, ad portam, qua ferae immittebantur, clanculum descendisse, earumque ita pro nihilo morsum, atque ungues habuisse, ut iis permixtus ingressus in caveam sit; neque ante Imperatoris ipsius, & amicorum obtestationibus, uti sibi parceret, atque inde abiret, cesserit, quam veniam reo impetra-verit. Ab hac enim vero immane, quantum Hermantii narratio discrepet, cujus summa est in Palatii vivarium introisse Ambrosium una cum venaticis canibus, perinde ac si

venatio illa caprearum atque leporum fuisset, non immanium ac furentium belluarum. Quod contra esse Julinus, et ex ipsius Sozomeni verbis, et ex epistola Cassiodorii secunda, et quadragesima libri V. *Variarum*, plane evicit; itaque factum praeclarissimum, et cum paucis comparandum, ad quae Christiana in alios homines charitas quemque unquam impulerit, ad splendorem pristinum eruditione sua revocavit.

Sed cum nulla esset antiquitatis pars, in qua non perlibenter Julinus versaretur, tum praesertim re anularia delectari videbatur. Duo in primis opuscula de gemmarum veterum sculptura confecit. In horum altero generatim disputat, et quo tempore, & a quibus ars hujusmodi inventa primum fuerit, quibusque veluti gradibus se ad summum perfectionis evexerit; tum in eadem qui omnium maxime floruerint, et quibus instrumentis uterentur; demum quae gemmarum genera majori forent in pretio apud veteres, et qui illarum varii usus, et si qua alia sunt ejusmodi. In altero nonnulla praefatus de gemmis anulariis, sive quae or-

namento, sive quae ad obfignandum usui erant, explicare instituit gemmam quamdam liiteratam, quam inter alias antiquitatis lauitias hujus generis habebat domi, plurimique faciebat. Erat quippe achate crystallina perspicua, aurea funda inclusa, affabre prorsus, et antiquo, quemadmodum ipse pluribus demonstrat, artificio sculpta Julium Caesarem paludatum, laureaue spicis intertexta evinctum exhibens, lituo atque astro adjectis cum hoc titulo: **DIVI IULII**. Haec quidem singula pulchre exponit; sed inscriptionem potissimum, in qua illud animadvertit, quod alibi nemo ante ipsum, quodque in gemma, non ita dissimili, quae in Museo Odeschalchio fuit, Stephano etiam Morcello, viro eruditissimo, atque acerrimo harum antiquitatum aestimatori admirabile postea est visum; nomen figurae videlicet, quod in gemmis illustri aliquo vultu insignitis raro admodum reperitur, hic praeterea secundo casu adpositum legi, quo casu artificum nomina fere apponebantur. Nodum tamen Georgius expedit. opinor, commodissime; quippe qui animadverterat numismata, quotquot habuit

unquam in manibus, Julio post ἀποθεωσιν causa, ubi scilicet astrum adfectum est, nomen ejus genitivo semper casu exhibere; reliqua vero omnia ad ceteros Imperatores, aut ad eundem Julium nondum in Deos relatum, pertinentia, non item. Ex quo concludit casum illum ad stellam, quae, ut ex testimonio Svetonii compertum est, imaginibus Divi Julii in vertice nunquam non addebatur, minime vero ad figuram esse referendum. Quod si Mediobarbus nummos aliquot affert, eundem illum quidem titulum, non tamen astrum exhibentes, id nisi adulterinos illos esse, & subditios suspicari libet, propterea accidisse ostendit, quod astrum aut vetustate exesum evanuerit, aut cum minutulum sit instar puncti, non fuerit ab ipso animadversum.

Haec opuscula duo alia, aliquanto ampliora, excipiunt similis argumenti, quorum unum historiam anulorum continet ab orbe condito, usque ad exordium rerum Romanorum; alterum verum annotationes eruditissimas in caput primum libri XXXIII. Plinianae historiae, quod de anulorum potis-

simum origine inscribitur. In his quam valde Georgius fuerit, tum veterum rerum, tum linguarum, praesertim Graecae, litterate peritus, manifestius ac plenius, quam in ceteris ejus operibus apparet; eoque magis dolendum est non ea fuisse & limatius expedita, et typis descripta. Sed nimirum utrumque specimen erat ingentis cujusdam operis, quod de re anulari universa meditabatur, tribueratque in libros quinque, in quibus ita materiam omnem plene perfecteque tractare constituerat, ut qui adversaria pervolvit, magnamque eo congestam eruditionis vim, & prudentissimam rerum distributionem expendit, facile intelligat, modo ut permanere in incepto potuisset, nullam eum quaestionem propriam ejus loci fuisse praetermissurum.

Sed tantum opus de manibus vix adumbratum deposuit, quum ad contexenda, & explicanda urbis, et agri Mediolanensis monumenta se totum dedisset, quod munus non putabat sa patriae diutius posse debere. Hujus quippe usque ab anno MDCCLI. primum sodalibus specimen exhibuit, et alias alia deinceps exhibuit fragmenta, praesertim an-

no MDCCLIV. quum Madiolani esset, eosque conventus frequentaret Joannes Maria Mazzucchellius Comes, & Patricius Brixianus longe eruditissimus, cujus plausus, & cohortationes mirum quantum currentem eum incitarent. Atque ego quidem arbitror, hanc ei mentem initio fuisse, ut ab origine ultima stirpis Mediolanensis exordium scribendi caperet. Huic rei sunt indicio duo ejus codices; quos manu exaratos reliquit, in quorum altero monumenta ejusmodi usque ab anno post Romam conditam centesimo quinquagesimo quinto colligere, inque sua tempora digerere instituit; quo anno Bollovesus Gallorum dux, in hanc planitiem descendisse traditur, et prima Mediolani fundamenta jecisse: in altero unde, & quo tempore Etrusci, Umbri, atque Insubres, a quibus haec provincia est nomen antiquitus nacta, huc commigraverint diligenter inquirat. Verum id consilii abjecit, veritus, ut novi aliquid asferre posset. Nam si innumerabiles fabulas, plerumque ineptas, ac prorsus absurdas excipias, quibus saeculo XIII. tota foedata Mediolanensis historia est, quasque XIV. ineun-

te collegit, nullo adhibito iudicio, venditavitque posteris Galvaneus Flamma, paucopido prae dignitate, & amplitudine sua servat haec civitas remotae vetustatis vestigia, quippe quum domesticis, externisque bellis perpetuo vexata, et toties direptionibus, incendiis, ruinis fuerit obnoxia. Quare qui cupiditatem habet notitiae illiusmodi rerum, modo ut ea legat, quae docti, et egregie cordati scriptores saeculi decimi sexti, Tristanus Calvus, Carolus a Basilica Petri, & Puricellius, e recentioribus vero Muratorius, & Saxius memoriae prodiderunt, praeterea inscriptiones aliquot noverit; & anaglypta sacra & profana, quae tamquam e naufragio reliquiae supersunt, explicanturque ab Alciato, Cicerejo, Gratiolio, Allegratio satis luculenter, nihil ei deest propemodum, quin sciat. Haec igitur Georgio secum reputanti, ne actum ageret, studium omne suum ad investiganda sequioris aetatis monumenta visum est conferre; ab adventu scilicet Caroli Magni in Italiam, eversoque Longobardorum regno, usque ad initium potentiae Vicecomitum; quae pars historiae quinque comple-

plectens immanis barbariae saecula, & longe mendosior erat ceteris, et magis involuta tenebris. Hujusmodi monumentorum non minima quidem copia in aedificiis quibusdam, anaglyptis, musivis, & inscriptionibus extabat, & hercle etiam in membranis quam plurimis, atque in rudibus illius aevi scriptoribus. Ea tamen ipsa, quum in urbe, et in agri oppidis atque villis dispersa essent: et tot jam saecula situ, et squallore obsita, investigari, ac reperiri sine singulari solertia, et pertinaci quodam studio non poterant, praecipue vero membranae, in quibus expressior profecto, quam usquam alibi, illorum temporum imago continetur. Hae nimirum partim negligentius adservatae, et omnibus incognitae, praeter quam blattis, in tabulariorum angulis delitescabant; partim quum in eorum potestate forent, qui nulla publicae utilitatis habita ratione sibi tantum esse divites volunt, centum ferreis vectibus obserebantur. Praeterea ubi erutae a tenebris fuissent, exscribere eas diligenter oportebat, tum quid in singulis esset momenti sollertissime perpendere, ac deum perinde atque e ramentis fluminum, ut

ipse loquitur Julinus, lucentes auri scintillae improbo labore secernuntur, ex iis secernere res gestas abditas atque reconditas, et in veritatis lucem proferre. Cui quidem negotio parum satisfecerant summi viri, qui ad haec studia viam posteris muniverant, Muratorius Puricellius, Saxius, Sormanus; neque enim omnia recte ipsi explicarunt, et nonnulla etiam oscitanter hallucinati sunt. Iisdem res complures, quas magni ad historiam eorum temporum interesset scire, incognitae fuerunt, aut certe non satis exploratae. Quid quod illae ipsae notitiae rerum, quas in medium ipsi e tenebris protulere, in tot voluminibus dispersae non aequè videbantur juvare cupidos eruditionis posse, ac si ab uno aliquo tum universae in uno essent opere comprehensae, tum acriteri iudicio expensae, et suo quaeque loco, ac bono in lumine collocatae? Hoc autem longum opus, et salebrosus, et multa requirens industriae, doctrinae, ingenii subsidia, id ipsum est, quod Julinus receperat; itaque noctes atque dies urfit annos circiter viginti, ut feliciter ad exitum perduxerit, etiamsi variis semper, et maximis distractus curis. Neque e-

nim ita se in haec studia abdiderat, ut nulla ab iis ratione divelli se pateretur, officiumque aliquando negligeret. Quin immo nihil ei fuit in tota vita antiquius, quam aliorum commodis atque utilitati, quantum poterat, inservire, maxime eorum, quos aut pietas sibi, aut amicitia, aut natura commendaret.

Ac primo sedulam liberorum institutioni operam dabat; rei vero familiari tantam, quantam deberet non indiligens paterfamilias. Praeterea pio illi Instituto, quod *Montem pietatis* vocant, praefectus fuit; item magno urbis Valetudinario semel atque iterum. Hujus etiam tabularium in ordinem redigendum curavit, et saepe rustica praedia obivit. Eadem officia Valetudinariis, quae in agro sunt, praestitit. Quibus quidem muneribus non a se quaesitis, sed ultro delatis diligenter adeo sancteque est perfunctus, ut exemplo esse posset ceteris, quemadmodum hujusmodi rerum procuratio *ad utilitatem eorum, qui comissi sunt, non ad eorum, quibus comissi, gerenda sit.* Pari modo inter Patricios Mediolanenses, qui splendidissimus est civitatis ordo, anno MDCCL. quum adlectus fuisset, biennioque post XII vir. annonae publicae curandae renun-

ciatus, singularem in hoc amplissimo Magistratu, quem iterum aliquot post annis gessit, diligentiae, aequitatis, abstinentiae laudem tulit. Huc adde amicorum, quibus abundabat (erat enim ad conciliandas, tuendasque amicitias, ut boni esse solent, aptissimus) tum civium, tum exterorum assiduas interpellationes, quorum partim carmina ab eo, aut lucubrationes musicas flagitabant, partim aliquid de antiquitate requirebant; neque id mehercules frustra: goriebat enim ipse omnibus morem libentissime. In his Joannes Andreas Tricus, Bibliothecae Ambrosianae praefectus, vir eruditus, dissertationem suam de pervetuso lapide, in quo Fasti Fratrum Arvalium describuntur, ejus judicio permisit, elicuitque epistolam verbosior, Latine scriptam, in qua puram quidem, germanamque Romanae orationis elegantiam desidero; hanc enim homo in scriptorum aevi sequioris lectione diu multumque volutatus, eorum nonnihil colore infuscaverat; non possum tamen admirari satis cum animi candorem, modestiamque, qua sensa aperit sua, tum ingenii subtilitatem plane singularem in enodandis, supplendisque hujusmodi

antiquitatis reliquiis, injuria temporum depravatis. Neque hoc loco praeteream duos viros e Societate Jesu, elegantioris doctrinae jam tum laude florentes, qui cum Julino de cogitatis, scriptisque suis communicare erant soliti, Hieronymum Tiraboschium, & Guidonem Ferrarium, quibuscum scilicet cognatio studiorum, & morum similitudo magnam illi necessitudinem conciliaverat. Praecipue consulebatur Georgius de ortu, atque originibus familiarum Mediolanensium, quarum nonnullas, amicorum rogatu, a stirpe ad hanc aetatem ordine enumeravit. Nec vero non eamdam operam familiae praebuit suae, quae a Julino, quod est oppidum in ora Larii situm, nomen nacta, magnam habuit antiquis temporibus apud Rhoetos auctoritatem; deinde inter patricias Novocomi diu floruit; demum Mediolani censedit. Hujus igitur monumenta tam diligenter collecta, quum Caesari ejus filio, natu majori, in promptu essent, nihil hic fere negotii habuit in iis exhibendis Collegio probandisque, quum inter Nobiles Jurisconsultos voluit cooptari.

Sed ubi ab antiquitatis studio discessisset, nulla in re Georgius plus temporis, aut certe libentius, quam in musica se exercebat, sic ut unam ex artibus omnibus hanc, tanquam filiolum, videretur osculari suam. Neque mirum: fit enim fere, ut ad quas artes aptissimi sumus, in iis tractandis voluptate maxima perfundamur. Ipse autem, quum fautricem admodum hac in re naturam habuisset, tantam erat longo usu concinnandae harmoniae facultatem adeptus, ut in paucis aetatis suae numeraretur. Etenim, quae precipuae erant virtutes Sammartinii, harmoniam scilicet organicam animare quodam modo, idque apte ad variam instrumentorum naturam, ac stilum mira flosculorum, pigmentorumque, quae audientes delectarent, copia ac varietate conspergere, in his non inferior, quam magister, fuit; hunc vero eundem longe superabat apta rerum distributione, quod erat facile homini ingenio nobili, ac multis litteris praedito. Quare ejus lucubrationes peraeque intelligentibus, ac vulgo probabantur summo opere; atque tantam ubique gentium celebritatem

erant consecutae, uti ex variis Europae partibus, immo vel ex ultima America, nedum ab Italia universa expeterentur. Scribebat autem incredibili celeritate, eratque solitus dicere numquam lucubrationum suarum, quae organis inservirent musicis, se minus poenitere, quam quum, priusquam ad scriptionem admo- veret manum, nihil admodum commen- tabatur; referens in chartam scilicet quidquid ultro aliud ex alio sese scribenti offerebat. Neque id non vere, ac perite dicebat; ete- nim si quando ante meditabatur, ejus in mente, qua nihil erat feracius, nimia rerum efflorescebat copia; has vero difficile erat postea ita ordinare, atque disponere, ut simplex illud *dumtaxat*, & *unum* efficerent; in quo Horatius primam scribendi virtutem ponit. Praeter quam quod vel ipsa haec co- pia audientes defatigat, neque perinde admo- dum delectat.

Idem cum sua; tum aliorum carmina; maxime, quae usui essent scenae, quoties ocafio ferebat, notis vestiebat musicis. Nec tamen ad sublime illud, & grave scri- bendi genus, atque ad permovendos animos

maxime accommodatum, quod argumenta sacra & heroica scilicet deceat, se umquam ad-
suefecerat, in quo temporum consuetudini
indulgit; licet haud videretur esse dubium,
si tentare voluisset in hoc etiam genere
quid posset, non mediocrem eum laudem
fuisse consecuturum. Id ut faceret epistola
eum elegantissima, Italicis versibus conscri-
pta, Juvenalis Saccus Collega meus, impel-
lere est conatus, eo consilio, ut dum me-
ditando ipse scribendoque ornare atque illu-
strare artem studebat, dabatque operam, ut
vitiis mederetur in eam invectis, quae usque
eo creverunt, ut multis bonis hominibus vel
musicae nomen sit invisum, haberent simul
Mediolanenses musici unum aliquem auctori-
tate praestantem civem, ad cuius exemplum
toto possent lucubrationes suas conformare.
Id quidem consilii Georgius vehementer pro-
bavit, egitque illi gratias, ut natura erat
suavissima, plurimis verbis, quod se illi
perficiendo parem existimaverat, non tamen
aggredi voluit, excusatione usus maximarum
occupationum, quibus obstrictus jam erat,
in primisque aetatis jam inclinatae. Qua de

re coram postea cum Sacco colloquens: *utinam, inquit, mihi id negotii aliquis dedisset, quum et magis eram vacuus et ver agebam aetatis; non sane commissem, ut mihi hanc ququam laudem praeberet. Sed mihi abiit tempus, quo moliri aliquid novi possem: neque enim te ipsum fugit, si quando tale aliquid contigerit, ut opus sit contra praejudicatas vulgi opiniones ratione pugnare, et consuetudinem vitiosam artificum, et corruptam pura, et incorrupta consuetudine emendare, quanto id juventui commodius succedat, quam senectuti. Juvenum quippe suavitati tribuuntur multa, quae auctoritati senum negantur. Quare horum est moderari, et confirmare, illorum vero exequi, et inchoare.*

Sed illuc redeamus. Magnis quidem, & variis curis assidue premebatur Julinus, quae nullum otioso relinquere tempus videbantur. Sed eam iniverat ipse rationem vivendi, ita vigiliis, laboribusque exercitam, atque ab omnibus voluptatibus alienam, ut ei nihilo minus quotidie horae subcissivae complures superessent, quas operi illi suo maximo rerum Mediolanensium reservaret. Has ipse non patiebatur perire; itaque in dies procedendo

ad calcem pervenit. Ex quo intelligi potest eos dumtaxat tempus destituere, qui uii illo nesciunt. Anno MDCCLX. primum volumen prodiit, post quinquennium prodiit nonum, idemque suscepti operis extremum, cujus quidem universi ratio facile studiosis Julini constabit, modo ut ea legant, quae ipsemet in epistola ad lectorem est praefatus, in qua quidquid receperat, religiose praestitit; laudes vero singulas referre, etsi hujus esse loci videatur, non tamen aggredimur. Nimis enim esset longum persequi, quot ipse monumenta aut prius incognita in lucem protulerit, aut recepta ab aliis partim falsa, partim dubia ostenderit, aut obscura illustrarit, aut mendis scatentia recensuerit, aut genuinae lectioni reddiderit; ad summam quantam ab historia illorum temporum caliginem dispulerit. Ut mihi non solum praeconium tributum, sed etiam grave clarissimi viri testimonium ei impertitum videatur, quum Petrus Verrius Comes (qui & quantus judex!) in ipso historiae Mediolanensis vestibulo, quam ab exordio urbis contexuit, affirmavit in illo se opere admiratum fuisse, praeter improbos exantlatos

labores, singularem mentis sagacitatem, atque acre, sincerumque judicium, a quo si quando paululum deflectit, quod tamen ipsum accidit perraro, facile intellectu est, aliquam ei oblatam religionem fuisse. Non me fugit a nonnullis id Julino vitio dari, quod leves quasque res, & minutas diligenter consecratur; sed perperam. Quippe animadvertendum est, eo spectasse ipsum potissimum, ut suppellectilem monumentorum, quam maxime poterat, lautam & expeditam pararet, et in annalium ordinem digereret, unde eumerent, qui vellent scribere historiam, proindeque nihil ei admodum praetermittendum fuisse de juribus, de legibus, de institutis, de factis, sive *Ecclesiasticis*, sive civilibus, sive publicis, sive privatis, quod cuiquam aliquando usui futurum suspicaretur. Ceterum genere orationis est usus, quod nullus quidem flos, neque lumen fere ullum distinguit, non tamen impolito, neque abjecto, sed fuso, atque tracto, & cum aequabili quadam lenitate profluenti; ex quo denique modestus scriptoris atque ingenuus quodam modo animus spirat.

Jam vero statim atque exemplaria operis emissa in vulgus fuere, nae illius magna, non in Italia solum, sed etiam trans Alpes percrebuit fama. Namque per id tempus inter sodales litterarios Umbriae primarios adlectus fuit, & paucis post annis inter Goestingenses, epistolis ad eum missis laudum plenissimis, sicut in Regiam pulchrarum artium societatem, Parmae haud ita pridem constitutam, fuerat adscitus, propter et ejus in musica praestantiam, et singularem etiam, quam in aliis artibus intelligentiam habebat, quippe qui de signis quoque, & tabulis judicium facere poterat, sic, ut ex lineamentis, formis, pigmentisque vel de manu, si minus esset nota, sagacissime existimaret. Complures etiam ad eum viri ap-
prime docti, et litterati gratulatum scripserunt, e quibus Labrettus a Bibliotheca Ducis Wirtembergensis ei praeterea significavit se Historiam Mediolanensem Germanica oratione scriptitare adortum esse, eumque per quinque illa saecula unice auctorem sequi. Neque vero non magnam a civibus suis gratiam iniit; quippe qui honorificentissime

Decurionum diplomate Patriae Historicus est appellatus, et aliquanto post civiciis tabulariis constituendis praefectus. Ac tantam quidem ejus integritati, prudentiaeque habuerant fidem, ut ei permitterent eligere, quem vellet, adiutorem sibi, et successorem dari; quam sane ipse non sefellit: elegit enim virum optimum, et experientissimum, Ignatium Lualdium, Sacerdotem Placentinum, cujus in exequendo illo munere opera magni aestimata semper fuit; nos autem non sine quodam grati animi sensu meminimus, propterea quod magnam monumentorum partem, quae ad declarandam Julini vitam pertinent, nobis supeditavit. Sed tum demum Georgius putavit se pulcherrimum studiorum suorum fructum tulisse, quum Regio diplomate ad Franciscum I. Mutinensium Ducem, et Praesidem Insubriae Auftriacae dato, immortalis M. Theresia Augusta, illius sibi operis munus acceptum ac per jucundum fuisse humanissimis verbis declaravit, jussitque Scriptori benemerito (sic enim eum appellat) pensionem quotannis ex aulario solvi, dum opportuna se occasio offerret aliquo eum dignitatis gradu honestandi,

quo nobilium adolescentium ingenia ad utilia quaeque studia excolenda aemulatione illius excitarentur. Quo sane potentissimae ac sapientissimae Reginae testimonio, ut nihil ei honorificentius, sic nihil esse poterat verius. Nam documento revera Julinus fuit, si quisquam alius, *Patriciorum studio* (ut praeclare de eo pronuntiavit Guido Ferrarius) *inclarescere plurimum civitates posse, si non levitate, aut otio obruantur mentes, sed virtute, et consilio praesentem, doctrina & monumentis praeteritam Patriae gloriam proferre studeant, commendentque nepotibus.*

Sed unum instar omnium judicium est sapientissimi, ac gloriosissimi viri Principis Chaunitii, supremi rerum Austriacarum administri, cui quidem tanti illud opus fuit, ut e re publica existimaverit fore, si continuaretur. Itaque ad Carolum Firmianum Comitem, in Insubria plena cum potestate administrum, litteras misit cum mandatis, ut ad se Julinum arcesseret, & postquam de singulari sua in eum voluntate certiolem fecisset, suis verbis exhortaretur etiam atque etiam, ut opus illud ad duo saltem consequentia sae-

cula proferret, quae quod propiora sunt nobis, nostra etiam magis refert cognoscere; atque id quo facilius faceret, pecuniam etiam, si qua opus esset, auxiliique omne genus, ac nova praemia polliceretur. Haec mandata Firmianus Comes ut accepit, nihil quidquam maluit, quam conficere, ut pote cui & res nihilo minus erat cordi, et erat Iulinus carissimus. Hic autem tantorum hominum, quos patronos, fautoresque studiorum suorum colebat, & comitate victus, & auctoritate permotus, licet videbatur sibi, quasi decursu spatio, a calce ad carceres revocari, rem non recepit modo aequo animo, sed totis etiam viribus (quae ei in nitendo, quod semel admiserat, cura esse consueverat) praestitit, nulla ne valetudinis quidem habitatione, sic ut quum materiem omnem in quatuor ipse volumina dispertiisset, horum priori jam anno MDCCCLXXI. extremam manum imposuerit. Hujus autem exemplaria formis excusa Viennam, ut solebat, tum M. Theresiae Augustae, ejusque Regiae sololi, tum Aulae proceribus, in primisque Principi Chaunitio muneri misit, cujus reddi-

tae sunt ei litterae paullo post favoris, benevolentiaeque notis insignes, quae et quanti illum faceret, et stipendium ei in annos singulos adauctum fuisse significabant; sic tamen, ut quaecumque patriae notitiae interessent reipublicae, eas ipse, quotiescumque juberetur, suppeditare deberet. Quod et fecit. Complura enim deinceps mandata hujus generis accepit, primo ut librorum, in quibus quoque modo de rebus Insubriae politicis, civilibus, aeconomicis sermo esset, indicem contexeret, quam absolutissimum posset, ut illis omnibus bibliotheca instrueretur, quae est in aula Viennensi, ad usum illorum, qui a consiliis aut a secretis Aug. sunt pro rebus Italiae, deinde ut monumenta diligenter colligeret, quae ad historiam contexendam pertinerent Sacerdotiorum omnium, quae in provincia Austriaca Cispadana reperiuntur, ut quibus temporibus, et a quibus sive Regibus, sive Imperatoribus, sive Episcopis, sive liberis civitatibus fundata, patrimonio aucta, aut instaurata fuerint, appararet; ad ultimum, ut inquireret potissimum sacerdotia id genus, quas *Abbatias* vocant, quemadmodum

a dq-

a domibus religiosis, ad quas pertinebant antiquitus, quibusque temporibus fuerint alienata. His autem omnibus, ut ex litteris apparet ad eum datis a Josepho Spargelio Dynaste et eximio litterarum non patrono solum, sed etiam cultore, cumulate satisfecit; quantum scilicet ab eo expectari par erat, qui accuratissime antiquitatem omnem, nostratam praesertim, habebat cognitam.

Verum propter assiduos, & immoderatos labores, valetudine sensim labefactata, morbo correptus est, quem apoplexin vocant, XI. Kal. Februarias anno MDCCLXXIV. quem debilitas sinistrae corporis partis, non sine quodam stupore mentis, atque sensuum, est consecuta. Quo periculo licet diutina, et diligentissima curatione evaserit, a medicis nihilominus jussus est, libris omnibus, negotiisque abjectis, omne suum ingenium conferre ad se sibi, suisque reservandum. Horum consiliis, quamvis invitissimus, dicto audiens fuit. Sed in urbe lente admodum quum convalesceret, essetque otiosus, anno repescente, in villulam se recepit, ubi salubritate coeli, & corporis motu, in primis-

T. XIII.

A a qua

que remissione animi factum est, ut amissas vires revocaret. Nihil tamen agere non poterat diutius, homo semper agere aliquid a prima assuetus aetate; itaque hujus vitae paucis post mensibus pertaesus, Mediolanum remigravit, & medicis omnibus dimissis, rursus se in litteras totum abdidit. Sed novum illud opus, de quo paullo ante diximus, nequivit absolvere, ejusque volumen quartum inchoatum reliquit. Rursus enim anno MDCCLXXVII. in eundem morbum incidit, sed longe graviolem, vehementioremque, sic ut memoria rerum retenta, quo suo quaeque vocabulo proprio, ac certo appellarentur, plane dedidicerit. Quo fiebat, ut si qui eum convenirent, fere collacrymaret, dictaque eis salute, subito obmutesceret. Quod nescio, ipsi ne molestius foret, an amicis, qui non hominis modo carissimi causa, sed etiam sua angebantur plurimum; propterea quod prudentissima ejus, & plena litteratae senectutis oratione carebant. Recordabantur enim nunquam se cum illo antea congressos fuisse, quin doctiores discefferint. Nam quamdiu est commode locutus, quicumque ser-

mo incidisset, five de geometria, five de philosophia, five de legibus, five de anti-quitate, five demum de ingenua quaque disciplina, nulla ex parte imparatum eum offendere; sed contra tum ejus multiplicem exquisitamque doctrinam, tum miram facilitatem, quaecumque ipse naturali quodam bono, longoque studio acquisiverat, imper-tiendi ceteris, consueverant admirari. Id quod scriptum de se ipso reliquit praesertim Seba-stianus Rovida Navariensis, Doctor philoso-phiae, ac Medicinae cum primis nobilis, in epistola, qua Julino opusculum inscripsit, in quo effigiem solaris eclipsijs ovo gallinaceo, in obscuracione solis apud Sessitem edito, ad vivum natura impressam, si minus vera, at certe verissimillima ratione explicavit. Igi-tur quum non amplius lectionibus, aut scri-ptionibus vacare ipse posset suis, neque lit-teratos cum amicis conferre sermones, quibus jampridem unice delectabatur; reliqua ei nul-la erat animi relaxatio, praeter quam sono-rum, atque concentuum, quibus fere quotidie ac tum maxime, quum in iis se liberi ejus exercerent, intererat libentissime. Namque

aurium sensu, vel post illam calamitatem, acerrime semper est usus; atque ita, ut si quid vel minimum peccatum esset, sentiret ipse statim, & voce, ut poterat, ac nutibus significaret; sin suavius aliquid, modulatusque symphonia canebat, exilire pene gaudio videretur.

Res tamen nulla, in tam iniqua vitae conditione, perinde recreabat Julinum, ut carissimae, atque amantissimae conjugis assiduitas. Haec enim, nemini satis fidens, ipsa met die noctuque curabat eum diligentissime, fere pedem, quoad ille superfuit, non efferens domo; quadriennium scilicet. Eadem rem familiarem prudentissime administrabat. In primis vero mira omnibus nobilissimae matronae patientia videbatur, quum viri desiderio, quo se hic vehementer teneri nutibus significarat, morem ut gereret, diviniorem illam supplicandi formulam, quam Christus ipsemet tradidit, senem lingua haesitantem, obstupescentem, obliviosum, ut sedula matercula puerum trimum, aut quattrimum, syllabatim edocebat. Atque eo tandem, licet aegre & difficulter, deducta res est, rursus

ut integram memoriter pronunciaret ; quod faciebat nunquam sine singulari animi ardore, & intima quadam spiritus dulcedine, quae vel ex ore spirabat, & quin illa adesset, a qua, sicubi forte errabat, corrigere-tur. In quo vehementer dubito, utrum maioribus efferam laudibus, patientiam ne, et pietatem magistrae, an discipuli modestiam, atque religionem. Quam quidem tum etiam ferebat prae se maxime, quum uxorem, & liberos suos a rebus divinis domum redeun-tes exciperet. Nam manibus porrectis, & complicatis, collacrymansque indicabat, quam intimis angeretur sensibus, quod ad illas ac-cedere morbo prohiberetur. Ceterum quum in horas singulas impendere sibi mortem in-telligeret, hanc habebat semper ante oculos; & conscientia bene actae vitae sustentatus, tanquam non ex vita, sed ex diversorio quo-dam esset migraturus, quo Christianum ho-minem decet, aequo, atque alacri animo ex-pectabat. Quo factum est, ut inscientem quidem, non tamen imparatum eum oppres-serit. Percussus fuit tertio apoplexia in per-vigilio Nativitatis Dominicae an. MDCCLXXX.

quam in eo esset, ut pransus e mensa surgeret; atque ita male est habitus, ut vocem omnino, et sensum amiserit. Paucis post horis febricula accessit, quam sperabant medici, ut in illo morbo, aliquam aegrotō levationem allaturam. Falso; nam post biduum animam efflavit. Elatus est ad S. Thomae, ibique iustis funerum persolutis sepultus in monumento familiae, cujus lapidi hic titulus inscriptus est.

MEMORIAE . AETERNAE
 GEORGII . GIULINI
 COMITIS . VIALBAE . VILLAEQ. PIZZONI
 PATRICII . MEDIOLANENSIS
 HISTORIOGRAPHI . PATRIAE
 TABULARIIQ. CIVICIS . PRAEFECTI
 IN . QUO . FUERE
 INGENIVM . DOCTRINA
 MODESTIA . RELIGIO
 ABUNDE . OMNIA . LAUDE . DIGNA
 OB. VIII. KAL. IANUAR. MDCCLXXXI.
 AET. LXVI,
 H. M. M. S.

Duos filios, Caesarem I. C., qui ab hinc triennium Annam e nobilissima Vermiorum Familia habet in matrimonio, et Josephum reliquit; tresque filias, quarum duae se Virgines Deo sacrarunt, tertiam Francisco Bossio Vicecomiti, adolescenti primario, cuius ab obitu hic tertius est annus, collocaverat. His nihil a Georgio unquam defuit, quod esset ab optimo juxta & amantissimo parente expectandum. Neque sane admonitionibus solum, praeceptisque sobolem instruere ad omne officii genus studuit ipse semper, sed etiam praeclaris exemplis, sine quibus verba inania fore intelligebat. Nam quum nihil sanctius singulis ejus actis, tum nihil perpetua vitae consuetudine erat innocentius, nihil laboriosius.

Bene mane e lectulo quotidie surgebat; hieme vero ante lucem continentem saltem horam precationi dabat, fere in aeternarum rerum se meditatione exercens. Mox incumbebat ad studium; idque semper intentione animi tam vehementi, nihil ut ei pene cum sensibus esse videretur. Non interventu aliqujus, non interpellatione, non etiam strepi-

tu facile afficiebatur. Hibernis temporibus igne non indigebat, neque, quod magis mirere, ad magnitudinem frigorum remedia alia comparabat. Meridie ad templum itabat, & sacro intererat, quod facere nullum diem praetermittebat. Hinc se referebat ad studium, donec discumbendi signum daretur, quod accidebat saepius, ut ipse non audiret; proindeque, quod apud Donatum de C. Laelio tradit Nepos, admoneretur ab uxore, temporius ut discumberet: usque adeo lectionibus ipse, & commentationibus interdum abstraheretur; maxime si quando plus solito sibi in scribendo succedebat. In convivio licet de sua illa hi hilaritate juvenili multum decerpisset, ut ante docuimus, non tamen se tristem, aut cogitabundum praebebat; sed & familiariter jocabatur ipse aliquando, & aliorum jocos arridebat; urbanis illis scilicet et ingenuis, nunquam scurrilibus, neque in quenquam injuriolis. Namque eos adhibebat convivae, quorum mores a suis non abhorrerent. Sed, quoad fieri sine molestia convivarum poterat, sermones de rebus seriis inducebat libentius, eosque unam amplius

horam a prandio producebat. Hinc rursum in bibliotheca latitabat usque ad vesperum. Tum vero prodibat domo, et postquam suae in Deum-, & Superum aliquem, cujus dies festus agebatur, in aliqua sacra aede, religioni facisset satis, amicos conveniebat; in his frequentius duos senes, quibuscum vetus ei necessitudo intercedebat, Joannem scilicet Conradum de Olivera Marchionem, eundemque Senatus Mediolanensis Praesidem, virum integritate, atque auctoritate plane singulari, & Cloeliam Grillam Borromeam, celeberrimam illam primariam feminam, scientiarum, & liberalium artium omnium, praeter muliebrem conditionem, intelligentem atque studiosam. Horum uterque quotidie, ut moris est, illustres nobilium virorum seminarumque conventus prima nocte habere consueverat. Intererat his interdum Julinus; plerumque vero matutinis, et pomeridianis commentationibus non contentus; nocturnas addebat. Idem octavo quoque die ad poenitentiae, et Eucharistiae mysteria accedebat. Decretis Christianae Reipublicae, etiam quae ad disciplinam, caerimoniasque pertinent,

religiose obtemperabat. Quicumque opis suae indigeret, ei, quoad facere poterat, pecunia, consilio, opera praesto erat.

Modestiae vero nullum adferre majus testimonium possumus, quam quod, licet ingenii, doctrinaeque laude floreret maxime, tamen pudore quodam pene subrustico, deterritus est semper, quominus Firmiano Comiti, in cujus ceteri gratiam irrepere ambiciose certabant, quotquot doctrina vel mediocriter essent instructi, se sistere auderet prius quam fortuito fuerit ei de facie cognitus, atque ultro accersitus. Quod ita evenisse accepimus. Invitatus fuerat Julinus a Theresia Pinotina, musices scientissima, sorore Cajetanae Agnesiae mathematicae, quam haec non modo urbs, sed aetas tulisse semper gloriabitur, ad conventum quemdam psalteriorum atque cantorum, quem domi suae illa habebat. Huic aderat etiam Firmianus Comes, qui cum ibi Julinum offendisset, et praeclare fidibus canentem audiret, ad eum quae erat comitatus singulari, accedit. Ei gratulatur, quod gravissimis studiis, in quibus excellēbat, leviores etiam has artes tanta cum

laude adjungeret; deinde suavissime conquiritur, quod ad se venisset numquam, idque ut facere quam primum commodo suo posset, ne gravaretur, rogat. Ivit postridie mane Julinus, atque multis verbis ultro citroque habitis, eo tandem de industria, sermonis cursu, ille devenit, ut diceret, editionem Monumentorum Mediolanensium plusquam oporteret differri, seque opus illud jam pridem expectare vehementer. Cui noster, cum maturaturum se recepisset, ex eo die tanta apud celeberrimum illum Musarum omnium Patronum gratia floruit, ut anteferretur ei nemo, pauci partes ponerentur. Hac vero gaudebat sane Julinus, nunquam tamen uti voluit; ne tunc quidam, quum ei usu venit, ut vel damna, vel iniuria, & gravia essent illata, vel malevolentium (neque enim obrectatores viro tam illustri deesse poterant) rationibus ejus officeretur. Ipse enim erat is, qui neque laceraret quemquam, neque si injuriam acciperet, non pati mallet, quam ulcisci, aut etiam propulsare. Quod est signum animi non modesti solum, sed etiam lenis, sibi que met ipsi imperantis.

Atque erat ipse quidem, ut accepimus, ad iram, & aegritudinem natura proclivis, ut fere ingeniosus quisque esse solet; sic tamen has animi perturbationes adsueverat ratione cohibere, nemo ut illum neque irascentem, neque nimio moerore demissum unquam viderit. Lacessitus etiam acerbiori aliquo dicto, tantum abest ut par pari ipse referret, ut potius, dolore omni dissimulato, serena fronte, & verbis quam suavissimis responderet. Quod si adversi aliquid ei nec opinanti accidisset, aut esset relatum, quantumvis intime angeretur, manum ad frontem admovebat tantum, et in cubitum innixus, suo cum animo paullisper cogitabat, itaque se brevi colligebat. Nunquam aut cum parentibus, ~~aut cum~~ ^{aut cum} amore in gratiam rediit; nunquam ~~aut cum~~ ^{aut cum} inopiam suorum in similitudine fuit; et si qua forte inter eos querimonia intercedebat (non enim boni viri, quique inter se amant, unum semper, idemque sentiunt) pro concordia domestica, qua nihil habebat potius, nullum ipse sumptum, nullum incommodum aut refugiebat, aut deprecabatur. Ultimis vero temporibus homo lenissimus, ac

patientissimus non nihil morosus evaserat; nam quidquid non ex ejus sententia cadebat, aut ab aliis fiebat, conquerebatur facile, & iis etiam exprobrabat, quos habebat carissimos; idque non tam vitio senectutis, quam teterrimi morbi, cujus vi fuerat vehementer conflictatus: adeo verum est, in fragili corpore omnem offensionem odiosam esse. Sed enim, ut iram colligebat temere, sic etiam ponebat, quasi puer; et simul ac se remiserat, petere errati veniam solebat.

Sed quum a litibus omnibus, tum a litterariis potissimum, alienum semper animum praesetulit. Quod quidem perillustre fuit, quum celebris illa exarsit controversia inter Transformatos plerosque, & Paullum Onuphrium Brandam, Eloquentiae Professore in Collegio Alexandrino Mediolani, hominem optimum, quique in litteris consenuerat, interioribus illis quidem, atque reconditis, sed paullo acriorem, et nimis fortasse solitarium. Huic res erat cum ingeniosis sane, & litteratis hominibus. Itaque pugnatum est utrimque diu, & acerrime. Quam pugnam commissam fuisse, si litterarum bonum spectemus, satis justa causa est laetandi, nam

opuscula hinc et illinc prodire cum docte, eleganterque conscripta, tum multo sale condita; fin dissidii animorum ratio ducatur, quo non tantum ad subamaros jocos ventum est tandem, sed ad convicia etiam, & probra, quae nihil ad rem, sane est magnopere dolendum. Inter has turbas mira fuit Georgii quies. Habebat ipse quidem carissimum Transformatorum coetum, ut demonstravimus supra. Suspicebatur praeterea se se quoque aliqua ex parte petatum a Branda fuisse, propterea quod vernacula lingua, quam hic scriptioni minus aptam asserebat, carmina aliquot, animi caussa, confecerat, e quibus festivissimum illud est habitum, ubi quemadmodum Anacreon Bathyllum, puerum venustissimum, sic ipse jocans turpi e contrario, et perridicula forma puellam, a pictore exprimi in tabella jubet: nihil tamen quidquam aut dolori suo, aut studio partium indulgit. Quin etiam, pacis semper auctor, gavisus est vehementer, quum publica auctoritate bello illi litterario est finis tandem impositus. Sic se gerentis minime est mirandum; si et vita ejus fuerit tranquilla, & mors bonis omnibus luctuosa.

• • P E R A E D I T A .

Memorie spettanti alla Storia, al Governo, ed alla descrizione della Città e della campagna di Milano ne' secoli bassi raccolte, ed esaminate dal Conte Giorgio Giulini. In Milano nella Stamperia di Giambattista Bianchi. in 4. Otto Voluminibus opus absolvitur. His tamen nonum adjectum est a Juliao, in quo et addicamenta complura, et emendationes priorum continentur, tum index atrox rerum memorabilium, locupletissimus, iisque, qui universum opus perlegere noluerint, plane necessarius.

Continuazione delle Memorie spettanti alla Storia, al Governo, ed alla descrizione della Città e della Campagna di Milano ne' secoli bassi, raccolte, ed esaminate dal Conte Giorgio Giulini. In Milano nella Stamperia di Giambattista Bianchi. in 4. Tria dumtaxat hujus Operis volumina sunt edita, quorum primum ab anno MCCCXI. incipit, quo anno Reipublicae Mediolanensis potitus est Matthaeus M. Vicacomes; tertium vero desinit in annum MCCCCXLVII.

Di Giulia Drusilla, figliuola di Germanico, Dissertazione del Conte Giorgio Giulini. Extat in Volumine Collectionis Mediolanensis edito apud Antonium Agnellum anno MDCCCLVI.

Sopra l' Anfiteatro di Milano. Ragionamento del Conte D. Giorgio Giulini. Extat cum separatim, tum in Volumine Collectionis Mediolanensis edito apud Antonium Agnellum anno MDCCCLVII.

In morte del Conte Giuseppe Maria Imbonati Conservatore perpetuo dell' Accademia Milanese de' Trasformati. Orazione del Conte Giorgio Giulini recitata nell' Accademia il di

primo Settembre 1763. Edita fuit anno post Mediolani una cum lectissima carminum Collectione, quibus Transformati. certatim obitum Imtonati Comitit defleuerunt, ejusque memoriam summis laudibus honestarunt.

Rime. Pauca admodum e multis carminibus Julini mihi contigit videre; cum pene evanuerint libelli, in quibus edita saere. De illis igitur, quum haud possem egomet, nisi temere, judicare, percontatus sum ab aequalibus ejus, aestimatoribus harum rerum non solum peritis, sed prope fanaticis, accepique non ad unguem ea quidem expolita esse, sed singulari tamen facilitate, et prudenti judicio conscripta, non sine lepore quodam nativo. Saepius in alienas Collectiones versus suos conferebat ipse, veluti symbolas, nunquam vero ab amicis id officii reposcebat; idque in primis fecit, ut duabus coniugis suae sororibus gratificaretur, quum hae simul sacro Virginum coetui dederunt nomen, eidemque postea solemnè se sacramento addixerunt. Harum Collectionum, quarum prior anno MDCCXLIV. vulgata fuit, altera anno consequente, meminit Quadrius Vol. VII., in iisque complures Julini lucubrationes varii metri, pulchrae illas atque venustas, extare testatur.

OPERA INEDITA.

Sopra il riso, Cicalata del Conte Giorgio Giulini recitata nell' Accademia de Transformati del Carnovale dell' anno 1744.

Sugli Anelli degli Antichi dalla loro origine fino alla fondazione di Roma. Dissertazione Storica.

Il Prodigo. Commedia, recitata l' anno 1745.

La Fentasia. Commedia recitata l' anno 1746.

La Bottega del Caffè, recitata l' anno 1743.

La.

Lavinia. Tragedia, recitata l'anno 1748.

L'Alcimeone Tragedia recitata l'anno 1750.

De antiqui marmoris fragmento, ubi Arvalium Fratrum Fusi deferibuntur Epistola Georgii Jalini ad Joann. Andream Tricum Ambr. Bibliothecae Praefectum.

Delle Mura, e fortificazioni antiche di Milano.

Memorie spettanti alla Città, e Campagna di Milano; secondo i tempi, cominciando dall'anno di Roma 155.

Della Scultura delle gemme presso gli antichi.

Spiegazione di un Cammeo antico rappresentante Giulio Cesare.

Osservazioni sul Capo I. del Libro XXXIII. dell' Istoria Naturale di Plinio.

Della venuta degli Etruschi, e degli Umbri, e in seguito degli Insubri.

Ragionamento sulle leggi, che riguardavano i falliti.

L' Oracolo. Serenata per musica tratta da una farsa Francese del Sig. Saintfoix dal Sig. Conte Pietro Verri, e posta in Musica dal Sig. Conte Giorgio Giulini. 1775.

L' Ombra d' Augusto: Cantata per Musica del Sig. Conte Giorgio Giulini per la nascita di S. A. R. l' Arciduca Massimiliano d' Austria.

La Costanza di Scipione Africano. Dramma per Musica: Rime, e lettere.

Sonate.

Il fondatore di Lisbona. Cantata a quattro voci pel giorno Natalizio di S. M. Fedelissima Giuseppe Re di Portogallo. Poesia e Musica del Sig. Conte Giorgio Giulini.

Raccolte di Notizie intorno a' Vescovadi alla Abazia, Prepositure, e altri Benefizj dello stato di Milano. Parte I. de' Vescovadi del presente stato di Milano, privilegiati, ed arricchiti dai Sovrani di esso. Parte II. Intorno alle Chiese e

Capelle, ed a Benefizj fondati dalle Città dello Stato di Milano. Parte III. Intorno a luoghi Pii fondati, ed arricchiti dalle dette Città e dai Sovrani, e dai Pubblici.

Raccolte di Notizie intorno alle fondazioni originarie delle Abbazie, e Benefizj della Lombardia Austriaca, che successivamente furono secolarizzati, e passarono in Commenda.

Continuazione delle Memorie spettanti alla Storia, al Governo, e alla Descrizione della Città, e della Campagna di Milano ne' secoli bassi, raccolte, e spiegate dal Conte Giorgio Giulini Tomo IV. Hoc volumen primis tantum lineis informatum, ut ita dicam, morte interceptus reliquit, petinde fere atque alterum opus de Anulis Veterum, quod Latine scribere instituerat. Hujus enim habemus tantum adversaria cum hac epigraphe: ΣΥΜΜΙΚΤΑ ΠΕΡΙ ΤΩΝ ΔΑΚΤΥΛΙΩΝ; in quibus uberrimam silvam rerum, et prudentissimam capitum distributionem admiramur.

ERRATA

CORRIGE

Psg. 30. l. 8. Vaticanis	Vaticanis
P. 198. l. 9. dissemere	disserere
P. 232. l. 24. 83.	230.
P. 272. l. 6. littera	litteras
P. 303. l. 14. fortunatissimum ejus natale	fortunatissimus ejus natalis
P. 310. l. 23. adde	Pars II. cum eodem titulo in Padova 1719. presso Giuseppe Comino.
P. 339. l. 4. accepisset	accessisset
P. 343. l. 14. amphitheatro	amphic teatro
P. 350. l. 22. &	se

INDEX VITARUM

Quæ in hoc volumine XIII. continentur

<i>Joannes Bona Card.</i>	pag. <u>1.</u>
<i>Leopoldus Andreas Guadagnius</i>	<u>46.</u>
<i>Castruccijs et Philippus Bonamicii Fratres</i>	<u>89.</u>
<i>Petrus Jannonius</i>	<u>127.</u>
<i>Justus Fontaninius</i>	<u>201.</u>
<i>Jo. Antonius Ulpius</i>	<u>270.</u>
<i>Sertorius Orfatus</i>	<u>303.</u>
<i>Georgius Julinus</i>	<u>321.</u>

INDEX RERUM PRAECIPUARUM

QUAE IN HOC XIII. VOLUMINE CONTINETUR.

A

A Cherius Lucas 29.
 Aegyptius Matthaeus 161.

Agnellus Andreas 286.
 Alberonius Card. 85.
 Alciatus 339.
 Alexander VII. 12. 14. 15.
 Alexandra Lycophronis 63.
 Althanius Card. 140. 141.
153.

Ambrosii S. fortitudo 346.
 Amphitheatrum Mediolanense 343.

Amatus Cajetanus 107.
 Anastasius Philippus 153.
 Acquaviva Card. 88.
 Argentus Cajetanus 129. 139.
145.

Atentinorum iura 224.
 Averanius Iosephus 47. 51.
 Augustinus S. ubi conditus 241.
 Aulifius Dominicus 128. 132.
 Azzonius Iosephus .

B

B Alutius Stephanus 30.
 Baptismi ritus 259.
 Belli Veliterni historia 87.
 Italici 91.

Bellellius Fulgentius 243.
 Bembus Petrus 77.
 Benedictus XIII. 155. 161.
227. 235. 237. 240. 242.
 ... XIV. 90. 104. 107. 251.
 Beneventanus Archiepiscopus 165.
 Blanchius Jo. Ant. 188.

Bollandianae 31.
 Bona Jo. Card. ejus vita 7.
 Iudicia 9. munera 12. mo-
 res 14. 17. 20. 32. Car-
 dinalis creatur 15. opera
 20. et. seq. mors 32.
 Bonamicii Fratres Castroe-
 cius & Philippus illorum
 vita 80. illius orationes
84. 96. historia 87. marx
97. hujus opera 104.
 Bonarrotius Philippus 247.
 Borbonius Carolus Rex. 87.
98. 167.
 Philippus 94.
 Borromeus Card. 110.
 Brunius Petrus 248.

C

C Apassius Nicolaus 134.
159.
 Capius Jo. 165.
 Capponius Ferrantes 58.
 Carolus VI 149. 150. 227.
 Carrarius Hieronymus 27.
 Castellius Rig-ns 163.
 Cestifius Jo. Bapt. 272.
 Cenforie leges quae? 49.
 Chantelovius Claudius 29.
 Chaunitius Princeps 166.
368.
 Chitius F. bius Card. 11. 12.
 Clemens IX. 15.
 X. 19.
 XI. 155. 205.
209. 234.
 XII. 84. 165.
249.
 XIV. 110. 112.

Colloredus Fabius 105.
 Columba S. 240.
 Columina Card. 109.
 Comaculum ad quem perti-
 near 224.
 Combefisius 30.
 Cordis Jesu cultus 249.
 Corfinius Card. 83. 109.
 Coscia Card. 165.
 Cocelerius 39.
 Cremanus Aloysius 37.
 Cujacius 62.
 Cyrillius Nicolaus 133.

D

de **D** Ecolonia 20.
 Doctoribus, Carolus
 315.
 Druſilla Julia 339.
 Dukius Arthurus 120.

E

E Maldjus Thomas 107.
 Etruscorum antiquitates
 198. 219.
 Eucharistia ejus ritus 25.

F

F Abulac quid contineant
 265.
 Facciolatus Jacobus 49. 284.
 288.
 Falconia Proba 222.
 Falconia Proba 222.
 Farsetius Josephus 263.
 Ferrarius Guido 337. 366.
 Firmianus Comes 366. 378.
 Flamma Galvaneus 352.
 Fontana Franciscus 299. 319.
 Fontaninus Dominicus 253.
 Julius ejus vita 202. ejus

dissertatiq de masnadis
 203. alia opera 205. &
 seq. eloquentiam Romae
 docet 209. Germonium
 confutat. Tillemonium
 defendit 215. ejus opus
 de italica eloquentia 217.
 de Hortano 219. de ju-
 ribus Rom. Pont. in Co-
 maculum 224. in Parmam
 et Placentiam 221. de Bi-
 bliotheca Imperiali 227.
 de codice S. Marci 228. de
 corona ferrea 229. ejus
 vices et munera 234. 236.
 Grariani decretum vulgat
 238. de S. Columba dis-
 serit 240. de sepulero S.
 Augustini 241. de S. Pe-
 tro Urseolo 243. de disco
 varivo 246. de litteraria
 Foro-Julienſium historia 251.
 Mors 252. mores 248.
 laudes 259.

Foro-Julienſium historia litte-
 raria 250.

Fortius Cajetanus 105.

Foricius Alexander 105.

G

G Arellius Pius 149. 167.
 Garofalus Blasius 147.
 157.

Garrius Ant. 215.

Genebrardus 5.

Georgius Dominicus 237.

Germonius confutatus 210.

Goarius Jacobus 5.

Gotius Ant. 58.

Goussanvilleus Petrus 30.

Graevius Georgius 306.

Gratiani decretum vulgatum

Romae 238.

- Gratiolius Petrus 144.
 Grandius Guido 82.
 Gregorii S. libri morales editi 245.
 Grimaldus Constantinus 152.
 Guadagnius Leopoldus ejus vita 46. ejus opus de legibus Censoriis 49. magister creatur 51. ejus commentaria in Institutiones Imperiales 53. opus de Pandectis 58. 60. orationes 51. 64. mores 68. mors 70.
 Carolus 69.
 Guastaldus Josephus 176.

H

- H** Arduinius Jo. 212.
 Harrachius Comes 156.
 Hermantius emendatus 146.
 Historiae laudes 71. Quid latine illam scripserunt 78. quomodo tractanda 119.
 Hortanae antiquitates 220.

I

- I** Annonius Petrus 122. ejus vita 127. stulia & exercitationes 129. historiam scribit 130. 134. & seq. causas agit 130. ejus vices 141. Viennam concedit 142. ejus opus de triregno 151. 173. confutatur 153. et seq. Professionem fidei emitte 188. Paulus respondit 161. ejus liber de Dicasteriis 163. Vienna discedit 167. Venetiis 171. Mediolano 172. Genevam concessit 173. comprehenditur 177. ejus scripta dum erat in vinculis 178. & seq. retractatio 181. mors 189. mores 192.
 Jannetastus Partenius 131.
 Jesuitae 19. 31. 151. 169. 114. 241. 255.
 Imbonatus Josephus 116. 337.
 Imperialis Card. 203. & 227.
 Josephus I. 224.
 Julii Caesaris gemma explicata 148.
 Innocentius XI. 114.
 XII. 104.
 XIII. 235.
 Julius II. 165.
 Julius Caesar 319. 357. 375.
 Georgius ejus vita 321. studia de antiquis rebus 326. 340. de musica 344. 359. mores 327. 330. 377. munera 355. 365. carmina et dramata 338. opus de rebus Mediolanensibus 344. 351. 362. de gemmis anulariis 347. mors 374.
 Juris civilis historia 38. & seq.
 Justinianus quid egerit in condendo jure 41.

L

- L** Abbeus Philippus 30.
 Labrettus 164.
 Laderchius Jacobus 215. 237.
 Lamius Jo. 78.

Lantius Aloysius 109.

Lazarinus Dominicus 85.
215. 276. 285.

Liturgicarum rerum scientia
commendata 2. a Bona
Card. illustrata 4. 20. 22.
ab aliis 5.

Lualdus Ignatius 365.

Lucchesius Vincentius 80.
105.

Ludovicus XII. 165.

Lupus Christianus 31. 205.

M

M Abillonius Jo. 3. 24.
26. 27. 205. 210.

Macedo Franciscus 25.

Maffei Scipio 218. 308.

Maicreda Laurentius 316.

de Marchia Jacobus 205.

Mazzolenius Angelus 333.

344.

Mazuchellius Jo. Maria 351.

Mediolanensium amphithea-
trum 344. historia 351. et
seq. 362.

Migliorini Cajetanus 196.

Miro Abbas 147.

Monelia Ferrantes 47.

..... Thomas 239.

Montanarius Geminianus 315.

Montecatinius Jo. 104.

Montisalconius 228.

Morcellus Stephanus 248.

Muratorius Ludovicus 218.

225. 230. 325. 352. 354.

N

N Afoniorum Sepulcrum
317.

Neapolitani Regni historia

131.

Norifius Card. 205. 250.
313.

O

O Descalchii Livius et Vi-
ctoria 110.

Ogilvius Jacobus 160.

Olmeca Salvator 82.

Orfatus Jo. Antonius 310.

..... Sertorius ejus vita 303.

ejus opus de notis Romano-

rum 305. de monumentis

Patavinis 308 et seq. de

marmoribus eruditus 310.

de sepulchro Nafoniorum

311. ejus mores 312. mors

315.

P

P Alatina Societas 324.

Pallavicinus Card. 22.

Pallium 206.

Pamelius Josephus 4.

Pandectarum historia 58.

Panzinius Leonardus 126.

Papia quare sic dicta 243.

Parmae et Placentiae domi-

nium 237.

Parinini Josephus 336.

Paffronius Jo. 336.

Paffioneus Dominicus 216.

Paulius Sebastianus 160.

Persius Cyrus 206.

Petrididierini Matthaeus 248.

Pifanus Angelus 168. 171.

Polcastrus Jo. Dom. 208.

Polignachius Card. 84.

Preverius Jo. Bsp. 120.

Q

Q Uadrus Franciscus 336.
338.

R

R Egalia 250.
Renaudotius Eusebius
27. 205.
Riccius Ludovicus 336.
Rubeus Bernardus 252.

S

S Accus Juvenalis 360.
Salvinus Antonius 48.
Sanfelicius 156.
Saneius 159.
Savinus Guido 71.
Sarpus Paulus 170.
Sibillatus 285.
Strajus Benedictus 115.
Stampa Josephus Maria 324.

T

T Aliazucchius Hieronymus
323.
Tassus Torquatus defensur
207. in Latinum conversus
271.
Tassonius Alex. 207.
Theresia M. Augusta 365.
Thiersus Jo. 30.
Thomasius Card. 205. 337.
Thoanus Jac. b. 165.
Tillemontius defensur 215.
Tiraboschius Hieronymus
357.
Traismundi persecutio 242.

Transformatorum Academia
336.
Tria Joan. Andreas 188.
Teicus Jo. Andr. 356.
Tronci Historia 125.
a Tur: e Philippus 203. 205.
Turtecremata Card. 237.

V

V Allisterius Antonius
273.
Venetorum dominium in ma-
re Adriat. 160.
Verrius Petrus 362.
Villa Angelus Theodorus
323.
Vitalianus Othavins 154.
Urbanus VIII. 152.
Urseolus Petrus 248.
Vulpus Jo. Antonius ejus
vita 270. Professor crea-
tur 272. ejus orationes
philosophicae 273. Laz-
zarinio succedit 277. Ve-
teres Scriptores illustrat
270. recentiores edit 280.
ejus commentaria in ama-
torios poetas 283. & seq.
illius carmina 287. mors
293.
i Cajetanus 295.
. Jo. Baptista 295.

Z

Z Accagnius Laurentius
304.
Zaccharias Scholasticus 275.
Zenus Apostolus 203. 217.
& seq. 245.



5270813

